

中国民族史

吕思勉著













中国学术丛书

中国民族史

吕思勉著



中国大百科全书出版社

内 容 提 要

本书认为中国历史上的民族主要可分三派：匈奴、鲜卑、丁令、貉、肃慎是北派；羌、藏、苗、越、濮是南派；汉族处在中间，不断向南北两派逐渐交流与融合。本书分章叙述了十二个民族的源流，读后可以了解我国多民族发展的概况。著者在书中发表了不少创见，例如认为貉和肃慎原来同样居于燕国以北；夫余即是貉的后裔，挹娄、靺鞨即是肃慎的后裔；藏族起源于吠哒，原在于闽；彝族起源于濮，又作樊，等等。





吕 恩 勉



出版说明

本书著者吕思勉先生(1884~1957),字诚之,江苏武进(今常州市)人。他毕生致力于历史研究和历史教学工作,五十年中,先后著有两部中国通史(《白话本国史》、《吕著中国通史》),四部断代史(《先秦史》、《秦汉史》、《两晋南北朝史》、《隋唐五代史》),五部专史(《中国民族史》、《先秦学术概论》、《理学纲要》、《宋代文学》和《中国制度史》),以及《吕思勉读史札记》等著作,共约六百万字以上。本书是吕先生所著专史之一,分章叙述了我国境内十二个民族的源流,既能“贯串全史,观其会通”,又能“比合史事,发现前人所未知之事实。”(陈协恭序)。1934年在上海世界书局出版以后,颇受读者欢迎,当年就再版。由于这类著作的缺乏,长期不能解决读者的需要,我们就根据世界版重新校订出版,其中有关民族问题理论和民族政策部分,凡不适应目前情况的,加以删节。大部分历史地名,著者所注今地名,现在多数又有变更,在一般地图上,已无踪影,读者难于查考,我们也逐一修改补正。但我们限于水平,可能仍有错漏的地方,希望读者指正。

序

吕君诚之，著《先秦学术概论》，予既为序而行之矣。越三日，君复以所著《中国民族史》相示。读之，二日而毕。则其贯通精确，又有非前书所能逮者。汉高祖之盛也，以三十万众，困于平城。是役也，上距蒙恬之逐头曼，仅十余年耳。蒙恬之兵则强矣，自此以前，秦之兵威，未能若是其盛也；燕、赵诸国，兵力尤不逮秦；匈奴之为国则旧矣，何以迄无冒顿其人者，侵扰北垂？此史事之可疑者一也。汉世所谓上谷、渔阳、右北平、辽西东者，实苞今辽热^①二省，且渡鸭绿江入朝鲜。乌桓居五郡塞外，其地亦不狭矣。乃自魏武柳城一捷，而乌桓之名，几不复见，其众果何往乎？此史事之可疑者二也。朝鲜为箕子之国，无足疑者。然当商、周之间，辽东西究作何状，殊不可知。无论箕子出走，武王封建，安能及于朝鲜？此史事之可疑者三也。蒙古由来，《元史》不载。赖有《秘史》，少窥崖略。然《秘史》所述，则蒙古王室之先世耳。其部族缘起，不可知也。近世考证之家，谓其实出室韦，以地望核之，是矣，然蒙人又自号曰鞑靼，何居？抑鞑靼者，《五代史》云：鞑鞑别部之居阴山者也。鞑鞑在松花江畔，何缘西附阴山？既附阴山，又何缘绝漠而北？此史事之可疑者四也。往史所载诸民族，一夫多妻者多，一妻多夫者少。苟其有之，必且竞相传述。当南北朝时，有具一妻多夫之俗者曰唃廝囉，居今于阗。史谓其自金山而南；班勇平西域时，已有其国。果如所言，《后书》、《国志》，何以一语不及？而吐蕃赞普，《唐书》谓其系出秃发，越积石而抚有群羌。羌固父死妻后母，兄亡报姪嫂者。以一妻多夫之藏族，而谓其原出于羌，可乎？此史事之可疑者五也。苗，瑶，僚，僰，

^① 热河省：旧省名，1956年撤销，分别并入河北、辽宁两省及内蒙古自治区。

占地既广，称名猥多。果一族乎？抑多族乎？若为多族，当得几族？若本一族，缘何派分？历来记诸族之事迹者多，能董理其派别者少。此尤予读书以来所怀疑莫释者也。一读此书，则向之怀疑莫释者，今皆昭若发矇。昔人谓《汉书》可以下酒，得此快作，真可一石不醉矣。然向所臆举，乃仅就予所怀疑者言之耳。全书中精辟之处，盖未易枚数。如匈奴与中国同文也，其前后龙庭所在也，契丹十部八部之异也，金源王室得氏之由也，靺鞨二字之义也，文身食人之俗，究出何族也，无一不怡然涣然，未道破则人不能言，已道破则人人共信者。又如濮族远迹，曾及秦豫，肃慎涉貉，皆因燕开五郡，播迁东北，则贯穿史事，若缀千狐之白而为裘，使往史失载之大事，突然现于眼前。斯尤足究民族盛衰兴替之原，岂徒曰诵习简策，若数米盐而已。①盖尝论之：考证之学，以清代为最精。实详于经而略于史。清儒之考史者，多留心于一枝一节，为古人弥缝其阙，匡救其灾，其能贯串全史，观其会通者盖寡，比合史事，发现前人所未知之事实者，尤不可觐矣。君之所为，诚足令先辈咋舌。附录诸篇，若三皇五帝，昆仑、鬼方、长狄诸考，则又淹贯经子，虽专门之经生有不逮。才士固无所不可哉！谁谓古今人不相及乎？

癸酉年夏武进陈协恭序

① 近人所撰《东北史纲》，因夫余诸国，俗类有殷，而疑满族来自东方，远不如此书诸族本居燕北，因燕国开拓而播迁之说之善。

目 录

第一章 总论	1
第二章 汉族	6
附录一 昆仑考	14
附录二 三皇五帝考	16
附录三 夏都考	20
附录四 释亳	24
第三章 匈奴	30
附录一 赤狄白狄考	48
附录二 山戎考	54
附录三 长狄考	57
附录四 秦始皇筑长城	60
第四章 鲜卑	62
附录一 鲜卑	78
附录二 后魏出自西伯利亚	81
附录三 宇文氏先世	82
附录四 契丹部族	83
第五章 丁令	87
附录一 丁令	104
附录二 丁令居地	107
附录三 突厥与蒙古同祖	110
第六章 貉族	115
附录一 貉族发现西半球说	131
第七章 肃慎	135

附录一 金初官制·····	170
第八章 苗族·····	172
第九章 粤族·····	184
第十章 濮族·····	194
第十一章 羌族·····	208
附录一 鬼方考·····	220
第十二章 藏族·····	226
第十三章 白种·····	232

第一章 总 论

此书凡分十二族，今各述其大概如下：

（一）汉族 此为居住中原地区之主要民族。其语言、习俗、文化等，皆自成一体，一线相承。此族初居黄河、长江流域，渐向南北西方发展。其开化之年代，今尚不能确知。据史家所推算者计之，则其有史时期，当在距今五千年前后。^① 其奄有中国广大领域，盖定於秦、汉平南越开西南夷之日。自此以后，其盛衰之迹，见于一般史书，人人知之。其与他族交涉，则述他族时可以见之。故述此族之事，即至此为止。

（二）匈奴 此族当前二世纪至纪元一世纪时，据今内外蒙古地方，为汉族之强敌。一世纪末，为汉族所破，辗转西迁，直至欧洲为止，与汉族无甚交涉矣。其入居中国内地者，四世纪之初，乘晋室内乱而崛起。是为五胡中之胡、羯，十六国中之前后赵，约五十年，大为冉闵所屠戮，遂骤衰，其遗族浸与汉族相同化焉。此族自周以前，盖与汉族杂居黄河流域，详见篇中。此时今内外蒙古之地，盖极地广人稀；错处之种族虽多，^② 实无一强大者。故中国当未统一之前，无北方游牧民族侵掠之患。

（三）鲜卑 此族似即古所谓析支，散居中国北部。秦、汉时，则在今辽、热之间。盖南限于燕所开上谷、渔阳、右北平诸郡，西

① 中国确实之纪年，始于共和元年，在公元前八百四十一年。自此以前，据《汉书·律历志》所推：周尚有一百九十二年，殷六百二十九年，夏四百三十二年，为公元前二千零二十四年。更加巢、燧、羲、农，及黄帝、颛顼、帝喾、尧、舜等，事迹较可凭信者，必在距今五千年前后也。

② 非尽此族。

限于匈奴也。^① 史书称为东胡。公元前一二世纪之间，为匈奴所破，余众分保乌桓、鲜卑二山，因以为名。二山所在，今不能确知，然必满、蒙之间，所谓内兴安岭之脉者。乌桓在南，鲜卑在北。汉武帝时，招致乌桓，居于上谷、渔阳、右北平、辽西、辽东五郡塞外，助汉捍御匈奴。自此乌桓与汉较亲，一世纪末，匈奴亡。鲜卑徙据其地，而臣其遗落，由此大盛。至二世纪后半，遂与中原王朝相抗衡。然未久复衰。惟其部落分布仍甚广。乌桓当二世纪后半，其大人亦颇有桀骜者。三世纪初，曹操袭破之于柳城。自此不能复振。然后此崛起之鲜卑，核其地，实多前此乌桓所据。故予颇疑鲜卑为其种族之本名，乌桓仅其分部之号；柳城战后，非乌桓自此遂亡，乃皆改从本名耳。此族分布既广，故五胡之乱，乘时崛起者颇多。前后燕、西秦、南凉、拓跋魏、宇文周皆是。高齐虽自称汉族，风气实同鲜卑，亦不能视为汉族也。两晋、南北朝之世，此族之兴，始于慕容氏之据辽东西。事在三世纪末叶。至五八一年，隋代宇文周，此族在中原割据之局方始结束，其人亦大抵融化于汉族。而其种落，仍有居西辽河上游流域者，是为奚、契丹。公元十世纪之初，契丹崛起，尽服漠南北，声威西至西域，又东北灭渤海，南割燕云十六州。至千一百二十五年，乃为金所灭。自东胡之强至此，盖千三四百年，其运祚，实远较匈奴为久也。

（四）丁令 此族后裔之一支，中国人通称为回，西人则通称为突厥，皆其后来之分部。其种族之称，实惟丁令，异译作敕勒，亦作铁勒。地在匈奴及西域诸国之北。自贝加尔湖附近起，至威海、里海之北，成一弧形。鲜卑侵入内地后，此族踵之而据漠南北。公元四世纪前半，北魏与柔然争斗最烈。柔然虽鲜卑分部，其所用，实皆丁令之众也。五世纪中叶，柔然衰，而此族之突厥盛。自此或与中原王朝为敌，或则臣服于中原王朝。至七世纪初乃亡。而

^① 更东则为貉族。

其同族回纥又继之。至八世纪初叶，乃为黠戛斯所破。自此弃漠南北，居河西及天山南路以至于今。以上所述，为此族之居东方者。其居西方者为西突厥。六世纪中叶，为中国所破。后中国之威力衰，则臣服于大食，然其种落仍在。大食衰，此族复多崛起者。元世，入居中国者不少焉。

（五）貉族 东洋史上，汉族而外，当以此族程度为最高。古所称东方君子之国者，实指此族言之。古貉族居辽、热、河北之间，自燕开五郡，发展到东北。此族分支建国者，在今吉林西境者有夫余，其南下朝鲜半岛者，分高句丽及百济。夫余亡于三世纪之初。而句丽、百济，日益昌大，终成半岛之主人焉。此族文化，酷类有殷，盖受之箕子。古代之朝鲜，断不能在半岛，盖亦随燕之开拓，而奔迸于东者也。

（六）肃慎 此族在古代，疑亦近北燕，随燕之开拓而东北走者，详见篇中。自汉以后，此族居于松花江流域，而黑龙江两岸，亦其种落所在。初盖服属夫余，后亦臣事句丽。句丽之亡，助之之粟末部，入居今热河境。七八世纪之间，因契丹叛乱，东走出塞，建国曰渤海。尽有吉、黑及清咸丰间割畀俄国之地。并有今辽宁东境，及朝鲜北境。一切制度文物，皆模范中华，称为海东盛国。九百二十六年，为辽所灭。于是此族大致服辽。至千一百十四年，而此族之黑水部曰女真者兴起。以飘风暴雨之势，十有二年而灭辽，又二年而亡北宋，奄有中国之半。凡百二十年，而亡于元。其居长白山者，后四百年乃兴起，是为清。其居黑龙江上游者为室韦。其别部，唐时曰蒙兀，即后来之蒙古。然蒙古王室之先世，则实沙陀突厥与室韦之混种也。详见篇中。

（七）羌族 此族在今陇蜀之间，及西康、青海、前藏之境。其分支东出，受汉族文化之熏陶最早者曰氐。三代时，即与中原有交涉。据河、湟肥饶之地，为中原王朝冲突者，为汉时之西羌。又西北至天山南路，南至云南西境，亦有其种落。但非其蟠结繁盛之区

而已。此族所处之地，极为崎岖，且较硗瘠，既不能合大群，产业亦无由开发，故其进化颇迟。

(八) 藏族 此族有一特异之俗，曰一妻多夫。自晋以前无闻焉。南北朝时，乃有据今于阗之地者，曰呾哒。其兵威远暨西亚。至突厥兴，乃为所破。呾哒原起，史籍所云，殊不足据。以予观之，则呾哒二字，实系于阗异译。后藏、于阗之间，本有交通孔道。呾哒盖后藏民族之北出者也。西康、青海、西藏，同为亚洲中央高原。然其地势，仍有微别。西康、青海及前藏，皆向东南倾斜，为诸大川上游谷地，此为羌族所据。后藏之地，则高而且平，其水皆无出口，地理学家称为湖水区域，此则藏族之所据也。前藏之南，雅鲁藏布江流域，地最肥饶，亦较平坦，去印度又近，是以吐蕃王室之先，自此入藏，遂为羌、藏二族之主。此族以所居之地之闭塞，其发展迟缓，然正以此故，其信教之心极笃，佛教衰于印度，遂以此为根据。蒙、羌两族，亦皆受其影响。

(九) 苗族 南方诸族，向来论者，不甚加以分别。然考诸史籍，则固显然可分为三：其一族，予从今日通行之名，称之为苗。又其二族，则稽诸古初，而称之为越，曰濮。苗族古称黎，汉以后称俚，亦作里。其地居正南，故古书多称为蛮。今所谓苗，即蛮字之转音也。或以附会古之三苗，误矣。然今苗族之称，不因古三苗之国，而古三苗之国所治，则确为今之苗民，即所谓九黎也。此族当五帝时，曾据今长江中流，洞庭、彭蠡之间。后为汉族所破。周时，江域之地入楚。此族退居湖南，自汉以后，又沿洞庭流域西南退。凡今湖南及贵州沅江上游之地，古所谓蛮者，大抵皆此族也。

(十) 越族 百越古有文身之俗，散见史籍者甚多，比而观之，则皆系此族人。此族之程度，似较苗族为低。然其所据之地，远较苗族为广。江南、浙江、福建、广东沿海及部分湘、赣地区，古代盖皆为此族人所据，且有深入川、滇者。今日中国人之成分中，此族之血胤，必不少也。

(一一) 濮族 此族后称罗罗，今称彝族。其与苗族之异，日本鸟居龙藏曾言之。然考诸史籍，其事亦甚显著也。此族之文明程度，又较苗族为高。其地在苗族之西；贵州西境，云南东境，四川南境则其居住之区也。此族在古代，踪迹曾深入北方，达今秦、豫之境。湖北西半，亦大抵为其所据，详见篇中。其去汉族盖最近，故其程度亦最高也。

(一二) 白种诸族 今日欧、亚二洲之界线，非历史上东西洋之界线也。历史上东西洋之分界，实为亚洲中央之帕米尔高原。自此以东之地，其事皆与中国之关系多，与欧洲之关系少；自此以西之地，则与欧洲之关系多，而与中国之关系少矣。白种人之分布，大都在葱岭以西，故与中国关系较浅。然彼此往来，究亦不乏。而葱岭以东，白种人之分布，亦非曰无之，特非大部落耳。

以上所述，除白种诸族甚少，不足计外，其余十一族，可分三系：匈奴、鲜卑、丁令、貉、肃慎为北系；羌、藏、苗、越、濮为南系；^①而汉族居其中。北系除貉族外，非据之草原，则据山岭崎岖而苦寒之地，故常谋求进入中原，又或进入西域，有时且及于欧洲者，皆此系民族也。西南则地势崎岖，而气候炎热，其民族分散，故团结较难，开发亦较迟。惟中原与南方地区，处于黄河、长江、粤江三大流域，川原交错，物产丰饶，幅员广大，交通便利，气候亦寒热温三带。由于汉族与南北各族人民之共同努力，故能大启文明，创建世界上宏伟之大国。

^① 此以大致言。羌、藏中，亦有具北派之性质者。

第二章 汉 族

民族与种族不同。种族论肤色，论骨骼，其同异一望可知。然杂居稍久，遂不免于混合。民族则论言文，论信仰，论风俗，其同异不能别之以外观。然于其能否抃结，实大有关系。同者虽分而必趋合，异者虽合而必求分。其同异，非一时可混也。

一国之民族，不宜过杂，亦不宜过纯。过杂则统理为难，过纯则改进不易。惟我中华，合极错杂之族以成国。而其中汉族，人口最多，开明最早，文化最高，自然为立国之主体，而为他族所仰望。而汉族以文化根柢之深，用克兼容并苞，同仁一视；所吸合之民族愈众，斯国家之疆域愈恢；载祀数千，巍然以大国立于东亚。斯固并世之所无，抑亦往史之独也。

汉族之称，起于刘邦有天下之后。近人或谓王朝之号，不宜为民族之名。吾族正名，当云华夏。案《书》曰：“蛮夷猾夏。”①《左氏》曰：“戎狄豺狼，诸夏亲昵。”②又曰：“裔不谋夏，夷不乱华。”③又载戎子驹支对晋人之言曰：“我诸戎饮食衣服不与华同。”④《论语》曰：“夷狄之有君，不如诸夏之亡也。”⑤《说文》亦曰：“夏，中国之人也。”则华夏确系吾族旧名。然二字音近义同，窃疑仍是一语。⑥近人以《列子》黄帝梦游华胥，附会为汉族故壤，未免失之虚诬。夏为

① 《尧典》，今本分为《舜典》。

② 闵元年。

③ 定十年。

④ 襄十四年。

⑤ 《八佾》。

⑥ 二字连用，则所谓复语也。“裔不谋夏，夷不乱华”二语，意同辞异，古书往往有之，可看俞樾《古书疑义举例》。

禹有天下之号，夏水亦即汉水下流。禹兴西羌，^①汉中或其旧国。则以此为吾族称号，亦与偕资刘汉相同。且炎刘不祀，已越千年。汉字用为民族之名，久以不关朝号。如唐时称汉，蕃，清时称满，汉，辛亥革命则有汉、满、蒙、回、藏五族共和之说是也。此等岂容追改？夏族二字，旧无此辞，而华族嫌与贵族混。

汉族自有史以前久居此土乎？抑自他处迁来，其迹尚有可考者乎？此近人所谓“汉族由来”之问也。昔人暗于域外地理，即以其国为天下，此说自无从生。今则瀛海大通，知中国不过世界列国之一，远览他国史乘，其民又多非土著；而读史之眼光，始一变矣。法人拉克伯里氏，撰《支那太古文明西原论》，谓汉族来自巴比伦。日本白河次郎，国府种德取其说以撰《支那文明史》。东新译社译之。^②说极牵强。顾中国人自此颇留意考据。蒐辑最博者，当推蒋智由之《中国人种考》。^③此外丁谦、章炳麟等，咸有论著。或主来自小亚细亚。^④或谓来自大夏故墟。^⑤要其立说，皆不免借《山海经》、《穆天

① 《史记·六国表》。

② 改名《中国文明发达史》。

③ 见《新民丛报》。此篇以博为主，故所采不皆雅言。作者亦无确实论断。

④ 丁氏之说。见所著《穆天子传地理今释》。略谓“此书体例，凡穆王经过诸国，有所赐者皆曰‘赐’，惟于西王母则曰‘献’。请受天子之赐者，皆膜拜而受，惟西王母及河宗氏不然。天子觞西王母于瑶池之上，西王母为天子谣曰：白云在天，山陵自出。道里悠远，山川间之。将子无死，尚复能来”。意谓中华大国，然其初起自西方，犹天上白云，出自山陵也。然则西王母为汉族故国，理自可信。传云：“自群玉之山以西，至于西王母之邦，三千里。自西王母之邦，北至于旷原之野，飞鸟之所解其羽，千有九百里。又云：至于西王母之邦，遂驱，升于奔山。乃纪其迹于奔山之石，而树之槐，眉曰西王母之山”，群玉之山，以穆王游行道里核之，当在今葱岭左右。旷原之野，盖印度固斯山以北高平之地。西王母在群玉之山之西三千里，旷原之野之西千九百里，则当在今小亚细亚。奔山，郭注云：奔兹山，日所入也。即《山海经》之崦嵫山。经云：“崦嵫之山，赤水出焉，而西流注于海。可证西王母之地，西面滨海。然则西王母当在小亚细亚之西端。昔人所知陆地，西尽于此，遂以为日之所入耳。”愚案西王母之名，见于《尔雅》，为四荒之一。《淮南子·地形训》：“西王母，在流沙之濒。”《礼记·王制》：“自西河至于流沙，千里而遥。”则西王母之地，极远亦不过在今甘肃边境。《太平御览》地部引崔鸿《十六国春秋》：“酒泉太守马岌上言：酒泉南山，即昆仑之体。有西王母石室”云云。虽未必密合，地望固不甚远。故虞舜时，西王母能来献其白琯，若在小亚细亚，则葱岭东西，古代了无交通之迹，西王母安能飞越邪？舜时西王母来献白琯，见《大戴礼记·少间》篇。

⑤ 章氏之说，见《太炎文录·论种姓》篇。以西史之巴克特利亚，《史记》称为大夏，

子传》等书为佐证,并加以附会。予谓二书实出晋世,汉时西域地理已明,作伪者乃取以为资,而后人遂为所欺耳。^①予昔亦主汉族西来之说。所立证据,为《周官》郑注。谓古代之祀地祇,有昆仑之神与神州之神之别。入神州后仍祀昆仑,则昆仑为汉族古土可知。自谓所据确为雅言,迄今思之,郑氏此注,原本纬候。^②纬候之作,伪起哀、平,本不足言。据此议彼,未免五十步之笑百步也。^③

古代帝王事迹,多杂神话。其轻可信者,盖始三皇五帝。三皇五帝,异说纷如,要以《尚书大传》燧人、伏羲、神农为三皇;《史记·五帝本纪》,黄帝、颛顼、帝喾、尧、舜为五帝之说为可信。^④燧人都邑无征。《遁甲开山图》谓伏羲生于成纪,^⑤徙治陈仓,^⑥地在秦、陇之间。神农氏,一称厉山氏,亦曰大庭氏。厉山,《括地志》谓在随县,^⑦即春秋时之厉国。而春秋时鲁又有大庭氏之庠,皇甫谧《帝王世纪》,谓神农都陈徙鲁,^⑧盖本诸此。黄帝邑于涿鹿之河。服虔云:涿鹿,山名,在涿郡。^⑨张晏谓在上谷,^⑩盖因《汉志》上谷有涿鹿县云然。窃疑服说为是也。颛顼、帝喾,《史记》皆不言其都邑。《集解》引《皇览》,谓其冢并在濮阳,^⑪则在今河南境。尧都晋阳,^⑫

必其地之旧名。而引《吕览·古乐》篇:“昔黄帝命伶伦作律。伶伦自大夏之西,乃之阮隃之阴,取竹于解溪之谷。”为大夏为汉族故土之证。然大夏之名,古籍数见,虽难确指其地,亦必不得在葱岭之西也。详见柳诒徵所撰《大夏考》,载《史地学报》。

① 此说甚长,当别著论,乃能详之。《山海经》系据汉后史志伪造。予所考得,凡数十事。

② 疏引《河图·括地象》为证。

③ 参看拙撰《昆仑考》。

④ 详见鄙人所撰《三皇五帝考》。

⑤ 今甘肃秦安。

⑥ 今陕西宝鸡。

⑦ 今湖北随县。

⑧ 《史记·五帝本纪》正义引。

⑨ 今河北涿县。

⑩ 皆见《集解》。

⑪ 今河南濮阳。

⑫ 今山西太原。

见于《汉志》。舜盖因之。《左传》定公四年，祝佗谓唐叔封于夏虚，启以夏政，则禹亦仍尧旧都也。然《世本》谓禹都阳城，盖其后嗣所徙。《左传》哀公六年引《夏书》曰：“惟彼陶唐，帅彼天常，有此冀方。今先其行，乱其纪纲，乃灭而亡。”盖指太康失国之事。窃疑有夏自此，遂失冀州，后嗣更居河南也。^① 汤都曰亳，异说尤繁。鄙意当采魏氏源之说，以商、^② 偃师、^③ 及汉薄县^④ 三处皆为亳。汤初居于商，《史记》所谓“自契至汤八迁，汤始居亳，从先王居”者也。其后十一征，自葛始。韦、顾既伐，遂及昆吾、夏桀。桀败于有娥之虚，奔于鸣条。汤以其间又伐三豸。其战胜攻取之迹，皆在河南、山东，则必在汉薄县境矣。此孟子所谓“汤居亳，与葛为邻”者也。有天下之后，盖定都偃师。故盘庚渡河而南，《史记》谓其“复居成汤之故居”也。^⑤ 其后仲丁迁于敖；^⑥ 河亶甲居相；^⑦ 祖乙迁邢；^⑧ 盘庚涉河南，治亳；武乙立，复去亳，徙河北；^⑨ 亦皆在大河两岸。然则自伏羲至殷，汉族踪迹，迤在今黄河流域矣。

《史记·六国表》：“或曰：‘东方物所始生，西方物之成熟。’夫作

① 详见鄙人所撰《夏都考》。

② 今陕西商县。

③ 今河南偃师县。

④ 今河南商邱、夏邑、永城三县境。

⑤ 详见鄙人所撰《释亳》。

⑥ 《书》序作嚣。《正义》：“李颙曰，嚣在陈留浚仪县，皇甫谧云：仲丁自亳迁嚣，在河北也。或曰：今河南敖仓。二说未知孰是。”《史记正义》：“《括地志》云：荥阳故城，在郑州荥泽县西南十七里，殷时敖地也。”案浚仪，今河南开封县；荥泽，今河南荥阳。《水经·济水》注：济水又东经敖山，山上有城，即殷帝仲丁之所迁也。皆同《正义》或说。

⑦ 《史记正义》：“《括地志》云：故殷城，在相州内黄县东南十三里，即河亶甲筑都之所，故名殷城也。”案今河南内黄。

⑧ 《书》序：“祖乙圯于耿。”《正义》：“皇甫谧以耿在河东，皮氏县耿乡是也。”《史记·索隐》：“邢，近代本亦作耿”，案此盖后人以书序改之。《通典》谓祖乙所迁之邢为邢州，说比较确。皮氏，今山西河津。邢州，今河北邢台。

⑨ 《项羽本纪》：“项羽乃与期洹水南殷虚上。”《集解》：“应劭曰：洹水在汤阴界。殷虚，故殷都也。黠曰：洹水，在今安阳县北，去朝歌殷都一百五十里。然则此殷虚非朝歌也。”案清光绪己亥，河南安阳县西五里小屯，发现龟甲兽骨，刻有文字。近人多谓即《史记》之殷虚，武乙所迁。

事者必于东南，收功实者常在西北。故禹兴于西羌，汤起于亳，周之王也以丰、镐伐殷，秦之帝用雍州兴，汉之兴自蜀、汉。”此等方位地运之说，原不足信。然自汉以前，兴亡之迹，确系如此。此实考汉族发展者所宜留意也。伏羲起自秦、陇，神农迹躋尧、豫，黄帝、尧、舜，则宅中冀州，已隐有自西徂东之迹。然犹曰：古史茫昧，不尽可据也。至殷而事迹较详矣。犹曰：都邑地里，多有岐说也。至周则更无异辞矣。统观古文，大抵肇基王迹，必在今之陕、甘，继乃进取直、鲁、晋、豫，终至淮域而止。三代、秦、汉，莫不皆然。然则唐虞以前，虽无信史，亦可亿测矣。尧、舜嬪代，究由禅让？抑出争夺？久成疑案。予则颇信《史通·疑古篇》之说，别有《广疑古篇》明之。今姑勿具论。使予所疑而确，则舜卒于鸣条，禹会诸侯于涂山，^①皆淮域地也。商事已见前。周封有邰，^②公刘迁邠，^③大王迁岐，^④文王作丰，武王作镐，^⑤皆在今陕西境。文王伐犬戎，^⑥伐密须，^⑦则今陕西西北及甘肃境。虞、芮^⑧质成，败耆，^⑨伐邲，^⑩则今山西及河南北境。盖济蒲津东出。武王渡孟津，战牧野，则出函谷而东也。武王未受命，周公乃大成王业。亲戡三监之叛，而使子鲁公伯禽平淮夷、徐戎。成王复东征，践奄。^⑪亦犹汤韦、顾、昆吾，三嬖之伐，鸣条之放矣。武王营洛邑，周公卒成之，则汤之建偃师为景亳也。秦起关中，其出函谷，劫韩包周，则武王东伐之路也。其迁魏安邑，^⑫

-
- ① 今安徽怀远。
 - ② 今陕西武功。
 - ③ 今陕西彬县。
 - ④ 今陕西岐山。
 - ⑤ 今陕西户县。
 - ⑥ 见下篇。
 - ⑦ 今甘肃灵台。
 - ⑧ 今山西平陆。
 - ⑨ 今《尚书》作黎，今山西长子。
 - ⑩ 今河南沁阳。
 - ⑪ 《说文》邾在鲁。
 - ⑫ 今山西夏县。

坑赵众长平，^①南下上党，^②北定太原，^③则文王东出之路也。而其灭楚，用兵亦至寿春^④而止。与周之平淮夷、徐戎，如出一辙。特其灭燕，开辽东，及破楚郢、^⑤郢，^⑥争战之烈，则商、周所未有耳。汉高祖使韩信渡河北出，而身距项羽于荥阳、^⑦成皋^⑧之间。卒背约追楚，破之垓下。^⑨其形势，犹夫商、周以来之形势也。兴亡之迹，异世同揆，岂真有如《史记·六国表》之说，故“收功实者必于西北”哉？非也。射猎之民，率依险阻。降丘宅土，必耕农之世乃然。故汉族初基，实在黄河上流，后乃渐进于其下流。东方地形平衍，戎狄之杂居者少，其民以无与竞争而弱。秦、陇、燕、晋之境，则其民多与异族错处，以日事淬厉而强。此则三代、秦、汉，所以累世有胜于天下也。岂真有地运方位之说哉？然而汉族在河域发展之迹，则固可以微窥矣。^⑩

汉族在江域之发展，中流较早，上、下流稍晚。以蜀地大险，吴、越距文物之邦太远故也。中流古国，厥惟三苗。《韩诗》述其地曰：“衡山在南，岐山在北；左洞庭之陂，右彭蠡之泽”；实跨楚、豫、湘、赣之交。近人误谓即今之苗族。以予所考，实为姜姓之国，炎帝之后，详见《苗族》篇。此实汉族开发江域之最早者矣。然自夏以后，闾焉无闻。《国语》谓“少昊之衰，九黎乱德。民神杂扰，不可

① 今山西高平。

② 今山西晋城。

③ 今山西太原。

④ 今安徽寿县。

⑤ 今河南郢陵。

⑥ 今湖北江陵。

⑦ 今河南荥阳。

⑧ 今河南荥阳。

⑨ 今安徽灵璧。

⑩ 春秋时强国，曰晋、楚、齐、秦，其后起者则吴、越，皆与蛮夷杂处。其居腹地者，如鲁、卫、宋、郑、陈、蔡等，皆浸弱以即于亡。一由无与竞争。一亦由四邻皆文明之国，非如戎狄之贵货贱土，拓境不易也。梁启超《中国之武士道》序，论此义颇悉，可以参看。又冀州亦邻戎狄，而商、周皆起雍州者，窃疑冀州为黄帝、尧、舜所都，其文明程度，已较雍州为高，故其民亦较雍州为弱矣。

方物”。得毋南迁之后，已化于越人巫鬼之习邪？^①此江域文明之大启，所以必有待于楚人也。

楚封丹阳，《汉志》谓即汉时之丹阳县，地在今安徽之当涂。与郢都相距，未免太远。故后人多主杜预说，谓在今之秭归。宋氏翔凤始考得丹阳在丹、浙二水入汉处，地实在今南阳、商县之间。熊泽徙荆山，在今湖北南漳。至武王迁郢，乃居今之江陵。^②吾侪读此，乃知楚之开拓，实自北而南。本此以观古史，则知丹、浙一带，实为古代形胜之地。《吕览·召类》谓“尧战于丹水之浦，以服南蛮”，而其子朱，即封于此；《书传》谓“汤网开三面，而汉南诸侯，归之者四十国”。周南之地，《韩诗》谓在南郡，南阳之间，皆是物也。周公奔楚，盖亦袭三分有二之势，故出武关，走丹、浙矣。昭王南征而不复，管仲以诘屈完。杜预谓是时汉非楚境，故楚不受罪。信如杜言，管子岂得无的放矢？观宋氏之说，乃知是时汉正楚境，昭王是役，盖伐楚而败也。^③牧野之役，实有庸、蜀、羌、髳、微、卢、彭、濮人，得力于西南诸族者不少。^④至于武关道阻，而周室之威灵，亦日替矣。楚既南下，其势力浸达长江下游。观熊渠三子，皆封江域，少子实王越章可见也。^⑤是时吴、越尚在榛莽之境，故皆服从于楚。

① 三苗为九黎之君，见《苗族》篇。

② 《过庭录·楚鬻熊居丹阳武王徙郢考》参看《濮族》篇。

③ 《左·僖四年》，“昭王南征而不复。寡人是问”。杜注：“昭王南巡狩，涉汉，船坏而溺。”《正义》：“吕氏春秋·季夏纪”云：“周昭王亲将征荆蛮。辛余靡长且多力，为王右。还反涉汉，梁败，王及祭公殒于汉中。辛余靡振王北济，又反振祭公。”高诱注引此《传》云：“昭王之不复，君其问诸水滨。”由此言之，昭王为没于汉，辛余靡焉得振王北济也？振王为虚，诚如高诱之注，又称梁败，复非船坏。旧说皆言汉滨之人，以胶胶船，故得水而坏，昭王溺焉。不知本出何书。又《史记·齐太公世家》《集解》：“服虔曰：周昭王南巡狩，涉汉未济，船解而溺昭王。”《索隐》：“宋忠云：昭王南伐楚，辛由靡为右。涉汉，中流而殒。由靡逐王，遂卒不复。周乃侯其后于西翟。”案《史记·周本纪》云：“昭王南巡狩不返，卒于江上。其卒不赴告，讳之也。”此盖因周人讳饰，故传闻异辞。诸家或云巡狩，或云征伐；或云殒汉，或云卒江；甚有振王北济之说，皆由于此。然以理度之，自以伐楚而败，殒没于汉，为得其实。古人造舟为梁，梁败船坏，实非异事。屈完之对，乃谓此事楚弗与知，非谓是时汉非楚境也。

④ 详见《濮族》篇。

⑤ 越章即豫章，乃汉之丹阳也。亦见宋氏《楚鬻熊居丹阳武王徙郢考》。

至春秋时，巫臣奔吴，教之射御战阵，而形势乃一变。吴为泰伯后，越为少康后，其受汉族之膺启亦甚早，而其开化独迟者，则以地处僻远，不与上国通故也。《华阳国志》谓“蜀之为国，肇自人皇”，黄帝之子昌意，降居若水，说者谓即今雅龙江，而蜀至战国时始为秦有，亦同此理。

五岭南北，开拓稍晚。春秋时楚地不到湖南，顾氏栋高尝论之。^①然《史记·越世家》载齐使说越王之辞曰：“此时不攻楚，臣以是知越大不王，小不伯。复仇、庞、^②长沙，楚之粟也；竟泽陵，楚之材也。越窥兵通无^③假之关，此四邑者不上贡事于郢矣。”《索隐》云：“复字上脱况字。𨾏，当作攀。竟泽陵，当作竟陵泽。四邑者，攀一，庞二，长沙三，竟陵四也。”无假之关，《正义》谓在长沙西北。又云：“战国时永，^④郴，^⑤衡，^⑥潭，^⑦岳，^⑧鄂，^⑨江，^⑩洪，^⑪饶^⑫并属楚。袁，^⑬吉，^⑭虔，^⑮抚，^⑯歙，^⑰宣^⑱并属越。”则湖南、江西及皖南皆已开辟矣。越攻楚而败，诸族子或为王，或为君，滨于江南海上，服朝于楚。后七世，闽君摇，佐诸侯平秦。汉高帝复以为越王。东

① 《春秋大事表》。

② 《集解》：“徐广曰：一作庞。”

③ 《集解》：“徐广曰：无一作西。”

④ 今湖南零陵。

⑤ 今湖南郴县。

⑥ 今湖南衡阳。

⑦ 今湖南长沙市。

⑧ 今湖南岳阳。

⑨ 今湖北武昌。

⑩ 今江西九江。

⑪ 今江西南昌市。

⑫ 今江西鄱阳。

⑬ 今江西宜春。

⑭ 今江西吉安。

⑮ 今江西赣县。

⑯ 今江西临川。

⑰ 今安徽歙县。

⑱ 今安徽宣城。

越闽君皆其后。则浙东、福建之地，亦勾践后裔所开也。两广之地，秦始皇帝始略取之。秦亡，南海尉赵佗，据以自立。汉武帝时乃卒入版图。云南之地，楚庄蹻始开拓之，亦至汉武帝而后大定，详见《粤族》、《濮族》两篇，此不赘。

附录一 昆 仑 考

昆仑有二：《史记·大宛列传》：“汉使穷河源，河源出于阗，其山多玉石，采来，天子案古图书，名河所出山曰昆仑云。”此今于阗河上源之山，一也。《禹贡》：“织皮昆仑，析支，渠搜，西戎即叙。”《释文》引马云：“昆仑，在临羌西。”《汉志》：金城郡临羌有昆仑山祠。敦煌郡广至有昆仑障。《太平御览·地部》引崔鸿《十六国春秋》：“酒泉太守马岌上言：酒泉南山，即昆仑之体。”地望并合。《周书·王会解》：“正西昆仑，请令以白旄、纼、罽为献。”旄，犛牛尾。纼，《说文》：“氐人纼也。”“纼，西胡毛布也。”犛牛正出甘肃、青海，物产亦符。析支，马云：“在河关西。”《水经·河水注》：“司马彪曰：西羌者，自析支以西，滨于河首，左右居也。河水屈而东北流，经析支之地，是为河曲矣。”《后汉书·西羌传》亦曰：“河关之西南，滨于赐支，至于河首，绵地千里。”《禹贡》叙述之次，盖自西而东。渠搜虽无可考，^①度必更在析支之东，故《汉志》朔方郡有渠搜县，盖其种落迁徙所居邪？^②析支在河曲，而昆仑更在其西，则必在今黄河上源矣。二也。《书疏》引郑玄云：“衣皮之民，居此昆仑、析支、渠搜三山之野者，皆西戎也。”又申之曰：“郑以昆仑为山，谓别有昆仑之山，非河所出者也。”《山海经·海内西经》：“海内昆仑之墟在西北，河水出其东北陬”，《郭注》亦曰：“言海内者，明海外复有昆仑山。”一似此两昆仑

① 《凉土异物志》：“渠搜国，在大宛北界。”《隋书·西域传》：“拔汗国，都葱岭之西五百余里。古渠搜国。”地理并不合。

② 蒋氏廷锡说，见《尚书地理今释》。

者，必不可合矣。然予谓以丁閼河源之山为昆仑，实汉人之误，非其实也。水性就下；天山南路，地势实低于黄河上源；且其地多沙漠，巨川下流，悉成湖泊；安得潜行南出，更为大河之源？汉使于西域形势，盖本无所知；徒闻大河来自西方，西行骤睹巨川，遂以为河源在是。汉武不知其诳，遽案古图书而以河所出之昆仑名之。盖汉使谬以非河为河，汉武遂误以非河所出之山为河所出之山矣？太史公曰：“《禹本纪》言河出昆仑，昆仑，其高二千五百余里，日月所相避隐为光明也；其上有醴泉瑶池。今自张骞使大夏之后也，穷河源，恶睹《本纪》所谓昆仑者乎？故言九州山川，尚书近之矣。至《禹本纪》、《山海经》所有怪物，余不敢言之也。”《禹本纪》等荒怪之说，自不足信。然其所托，实今河源所出之昆仑。史公据于阗河源之山以斥之，其斥之则是，其所以斥之者则非也。①《尔雅》：“河出昆仑墟。”虽不言昆仑所在。然又云：“西方之美者，有昆仑墟之球琳琅玕焉。”②《禹贡》昆仑之戎，实隶雍州；而雍州之贡，有球琳琅玕；可知《尔雅》河所出之昆仑，即其产球琳琅玕之昆仑，亦即《禹贡》之昆仑矣。《淮南·地形训》：“河水出昆仑东北陬，贯渤海，入禹所导积石山。”《海内西经》则云：“入渤海，又出海外，入禹所导积石山。”《说文》：“河水出敦煌塞外昆仑山，发源注海。”所谓海、渤海者，盖指今札陵、鄂陵等泊言，所据仍系旧说。《水经》谓“河水入渤海，又出海外，南至积石山下，又南，入葱岭，出于阗；又东，注蒲昌海”；则误合旧说与汉人之说为一矣。以山言之则如彼，以河言之则如此。然则河源所在，古人本不误，而汉之君臣，自误之也。③

① 《太史公书》，止于臧止。此篇多元狩后事，实非史公所作也。

② 《淮南·地形训》作西北方。

③ 《周官·大宗伯》，“以黄琮礼地”。郑注：“此礼地以夏至，谓神在昆仑者也。”《典瑞》，“两圭有邸，以祀地旅四望”。郑注：“祀地，谓所祀于北郊，神州之神。”疏：案《河图·括地象》，昆仑东南万五千里，神州是也。案郑氏之说，盖出纬候，故疏引《河图·括地象》为证。江、淮、河、济，古称四渎。汉族被逐，先在北方。北方之水，惟河为大。记曰：“三王之祭川也，皆先河而后海。或源也，或委也，此之谓务本。”《大司乐》注：谓“禘大祭地祇，则主昆仑”。昆仑为河源所在，故古人严祀之与？

附录二 三皇五帝考

言古史者，必称三皇五帝，三皇之名，不见于经。五帝则见《大戴礼记》。然说者犹多异辞。盖尝博考之，三皇之异说有六，五帝之异说有三。《河图·三五历》云：“天地初立，有天皇氏，十二头。漭泊，无所施为，而俗自化。木德王，岁起摄提。兄弟十二人，立各一万八千岁。地皇，十一头。火德王。姓十一人，兴于熊耳、龙门等山，亦各万八千岁。人皇，九头。乘云车，驾六羽，出谷口。兄弟九人，分长九州，各立城邑。凡一百五十世，合四万五千六百年。”^①此三皇之说一也。《史记·秦始皇本纪》：丞相绾等与博士议帝号曰：“古有天皇，有地皇，有泰皇。泰皇最贵。”此三皇之说二也。《尚书大传》以燧人、伏羲、神农为三皇。《含文嘉》，^②《甄耀度》，^③《白虎通》正说，谯周《古史考》^④并同。^⑤此三皇之说三也。《白虎通》或说，以伏羲、神农、祝融为三皇。此三皇之说四也。《运斗枢》，^⑥《元命苞》^⑦以伏羲、女娲、神农为三皇。此三皇之说五也。《尚书》伪孔传序，皇甫谧《帝王世纪》，孙氏注《世本》，以伏羲、神农、黄帝为三皇。^⑧此三皇之说六也。太史公依《世本》、《大戴礼》，以黄帝、颛顼、高辛、唐尧、虞舜为五帝，谯周，应劭，宋均皆同。^⑨此五帝之说一也。郑注《中候敕省图》，于黄帝、颛顼之间，增一少昊。谓德合五帝座星者为帝，故实六人而为五。^⑩此五帝之说二也。伪

① 司马贞《补三皇本纪》。

② 《风俗通》引。

③ 宋均注援神契引之，见《曲礼正义》。

④ 《曲礼正义》。

⑤ 惟《白虎通》伏羲次燧人前。

⑥ 郑注《中候敕省图》引之，见《曲礼正义》。

⑦ 《文选·东都赋》注引。

⑧ 《史记·五帝本纪正义》。

⑨ 《五帝本纪正义》。

⑩ 《曲礼正义》。

孔，皇甫谧，孙氏，以少昊、颛顼、高辛、唐、虞为五帝。^① 此五帝之说三也。案《大传》云：“燧人以火纪，火，太阳，故托燧皇于天。伏羲以人事纪，故托羲皇于人。神农悉地力，种谷蔬，故托农皇于地。天地人之道备，而三五之运兴矣。”则三皇之说，义实取于天地人，犹五帝之义，取于五德迭代也。伏生者，秦博士之一。《始皇本纪》所谓天皇、地皇、泰皇者，盖即《大传》所谓燧皇、羲皇、农皇；^②《河图》说虽荒怪，然其天皇、地皇、人皇之号，仍本诸此也。《白虎通》释祝融之义曰：“祝者，属也；融者，续也。言能属续三皇之道而行之。”司马贞《补三皇本纪》曰：“女娲氏，代伏羲立。无革造。惟作笙簧。故《易》不载，不承五运。一曰：女娲亦木德王。盖伏羲之后，已经数世，金木轮环，周而复始。特举女娲，以其功高而充三皇。”无革造及同以木德王，皆与属续之义相关。未知《白虎通》意果谁主？然司马氏之言，则必有所本也。《补三皇本纪》又曰：“当其末年，诸侯有共工氏。与祝融战，不胜。而怒，乃头触不周山，天柱折，地维缺。女娲乃炼五色石以补天，断鳌足以立四极”云云。^③ 上云祝融，下云女娲，则祝融女娲一人。盖今文家本有此异说，故《白虎通》并列之，造纬候者亦取之也。实六人而为五，立说殊不可通。然实伪孔说之先河。《后汉书·贾逵传》：“逵奏《左氏》大义长于《二传》者，曰：《五经》家皆言颛顼代黄帝，而尧不得为火德。《左氏》以为少昊代黄帝，即图谶所谓帝宣也。如令尧不得为火，则汉不得为赤。”此古文家于黄帝、颛顼之间，增一少昊之由，然以六为五，于理终有未安。伪孔乃去燧人而升黄帝为三皇，则少昊虽增，五帝仍为五人矣。且与《易系》盖取一节，始伏羲而终尧、舜者相合。此实其说之弥缝而更工者也。伪孔以《三坟》为三皇之书，《五典》为五帝之典。据《周官·外史疏》，其说实本贾、郑。增改之迹，固可微窥。

① 《五帝本纪正义》。

② 《索隐》：“天皇、地皇之下，即云泰皇，当人皇也。”虽推测之辞，说自不误。

③ 原注：“按其事出《淮南子》。”

然则三皇之说：义则托于天地人，其人则或为燧人、伏羲、神农，或为伏羲、神农、祝融，此经师旧说也。因天地人之名，而立为怪说者，纬候也。五帝本无异说，古文家增一少昊，伪孔遂并三皇而易其人。异说虽多，固可穷其源以治其流矣。

问曰：三皇五帝之义，及其人之为谁某，则既闻之矣。敢问旧有此说邪？抑亦儒家所创也？应之曰：三皇五帝之名，旧有之矣。托诸天地人，盖儒家之义也，《周官》：“都宗人，掌都宗祀之礼。凡都祭祀，致福于国。”《注》：“都或有山川及因国无主，九皇六十四民之祀。”《疏》：“史记伏羲以前，九皇六十四民，并是上古无名号之君，绝世无后，今宜主祭之也。”按《注》以因国无主之祀，释《周官》之都宗人，盖是。以九皇六十四民说周因国无主之祭，则非也。^①九皇六十四民，见《春秋繁露·三代改制质文》篇。其说：存二王之后以大国，与己并称三王。自此以前为五帝，录其后以小国。又其前为九皇，其后为附庸。又其前为民，所谓六十四民也。其说有三王九皇而无三皇。《周官》：“外史，掌三皇五帝之书。”伏羲者，三皇之一，疏引史记^②云伏羲以前，明在三皇五帝之前，其说必不可合。郑盖但知《周官》都宗人所祀，与《繁露》九皇六十四民，并是绝世无名号之君，遂引彼注此^③。《疏》亦未知二说之不可合，谓史记所云伏羲以前上古无名号之君，即郑所云九皇六十四民，遂引以疏郑也。《史记·封禅书》：“管仲曰：古者封泰山禅梁父者七十二家。”又曰：“孔子论述六艺传，略言易姓而王，封泰山，禅梁父者七十余王矣。其俎豆之礼不章。”而《韩诗外传》曰：“孔子升泰山，观易姓而王，可得而数者，七十余，人，不得而数者万数也。”^④万盖以大数言

① 《周官》虽战国时书，然所述必多周旧制。

② 史记为史籍之通称。今之《史记》，古称《太史公书》。汉东观所续，犹称史记。盖未专名，故以通名称之也。此疏所引史记，不知何书，然必南北朝旧疏，其说必有所本也。

③ 郑注好牵合，往往如此。

④ 《封禅书正义》引，今本无之。然书序疏及《补三皇本纪》，并有此语，乃今本逸夺，非张氏误引也。

之，然其数必不止七十二可知。数不止七十二，而管仲、孔子，皆以七十二言之者，盖述周制也。七十二家，盖周登封之所祀也。曰俎豆之礼不章，言周衰，不复能封禅，故其礼不可考也。《春秋》立新王之事，不纯法古制，然损益必有所因。因国无主之祭，及于远古有功德于民之人，忠厚之至也。盖孔子之所因也？然不能无所损益。王制者，孔子所损益三代之制也。^①《王制》曰：“天子诸侯，祭因国之在其地而无主后者。”此《周官》都宗人之所掌，盖孔子之所因也？《繁露》曰：“圣王生则称天子，崩迁则存为三王，绌灭则为五帝，下至附庸，绌为九皇，下极其为民。有一谓之三代。虽绝地，庙位祝牲，犹立于郊号，宗于岱宗。”绝地者，六十四民之后，封爵之所不及，故命之曰民。绝地而庙位祝牲，犹列于郊号，宗于岱宗，此盖周登封时七十二家之祭矣。周制：盖自胜朝上推八世，谓之三皇五帝，使外史氏掌其书，以备掌故。自此以往，则方策不存，徒于因国无主及登封之时祀之而已。其数凡七十二。合本朝为八十一。必八十一者，九九八十一。九者，数之究；八十一者，数之究之究者也。孔子则以本朝合二代为三王，又其上为五帝，又其上为九皇，又其上为六十四民。必以本朝合二代为三王者？所以明通三统之义也。上之为五帝，所以视昭五端之义也。九皇之后，绌为附庸；六十四家徒为民，亲疏之义也。此盖孔子作新王之事，损益前代之法，《春秋》之大义。然此于《春秋》云尔，其于《书》，仍存周所谓三皇五帝者，以寓“天地人之道备，而三五之运兴”之义，故伏生所传，与董子所说，有不同也。《古今注》：“程雅问于董生曰：古何以称三皇五帝？对曰：三皇者，才也。五帝，五常也。”三才者，天地人也。五常可以配五行。董子之言，与伏生若合符节。故知三皇五帝为《书》说，三王，五帝，九皇，六十四民为《春秋》义也。^②

① 《王制》多存诸经之传，如说巡守礼为《尧典》之传是也。皆孔门六经之义，非古制。郑以其与周官不合，多曲说为殷制，大非。

② 或曰：《繁露》谓“汤受命而王，亲夏，故虞绌唐谓之帝尧。以神农为赤帝。周以轩辕为黄帝；因存帝颛顼，帝喾，帝尧之帝号；绌虞而号舜曰帝舜，推神农以为九皇”。明

附录三 夏都考

夏都有二:《汉志》太原郡晋阳,“故《诗》唐国”。《左传》定公四年,祝佗谓唐叔封於夏虚,启以夏政。服虔以为尧居冀州,虞、夏因之。是夏之都,即唐尧旧都也。^①《汉志》:颍川郡,阳翟,“夏禹国”。“应邵曰:夏禹都也。”“臣瓚曰:《世本》禹都阳城,《汲郡古文》亦言居之,不居阳翟也。”^②洪氏颐煊谓“阳城亦属颍川郡,与阳翟相近。或禹所都阳城,实在阳翟”。金氏鹗驳之,谓“赵岐《孟子注》,阳城在嵩山下。《括地志》:嵩山,在阳城县西北二十三里。则阳城在嵩山之南,今河南府登封县是也。若阳翟则在开封府禹州,其

九皇六十四民为周时制也。应之曰:此古人言语与今人不同,其意谓以殷、周之事言之当如此,非谓殷、周时突然也。或曰:管子曰:“古者封泰山、禅梁父者七十二家;夷吾所记,十有二焉。”下历举无怀、伏羲、神农、炎帝、黄帝、颡项、帝喾、尧、舜、禹、汤,周成王之名,凡十二家,明三皇五帝,即在七十二家之中。应之曰:此亦古今言语不同。上云七十二家,乃极言其多。下云十二家,则更端历举所能记者,不蒙上七十二家言。此以今人语法言之之为不可通,然古人语自如是,多读古书者自知之也。《庄子·胠篋》篇,列古帝王称号,有宓戏氏、大庭氏、伯皇氏、中央氏、栗陆氏、骊连氏、轩轅氏、赫胥氏、尊卢氏、祝融氏,多在三皇以前。古人同名者甚多。大庭氏不必即神农、轩辕、祝融,亦不必即黄帝、女媧也。《礼记·祭法正义》引《春秋命历》序:“炎帝曰大庭氏,传八世,合五百二十岁。黄帝,一曰帝轩辕,传十世,二千五百二十岁。次曰帝宣,曰少昊,一曰金天氏,则穷桑氏,传八世,五百岁。次曰颡项,则高阳氏,传二十世,三百五十岁。次是帝喾,即高辛氏,传十世,四百岁。”又《曲礼正义》:“《六艺论》云:燧人至伏羲,一百八十七代。宋均注《文耀钩》云:女媧以下至神农七十二姓。颡项以为伏羲以次,有三姓,始至女媧。女媧之后五十姓,至神农。神农至炎帝,一百三十三姓。”说虽怪迂,然三皇五帝,不必身相接,则大略可知,亦足为韩诗不得而数者万数作佐证也。二千五百二十岁之二,闽本、宋本作一。

① 金鹗《禹都考》云:“杜预注《左传》云:夏虚,大夏,今太原晋阳是也。本於《汉志》,其说自确。《水经》云:晋水,出晋阳县西县壑山。酈道元注:县故唐国也。亦本《汉志》。乃臣瓚以唐为河东永安,宋守节以为在平阳。不知唐国有晋水。故燹父改唐曰晋,若永安去晋四百里,平阳去晋七百里,何以改唐曰晋乎?”愚按臣瓚、张守节之言,盖泥《史记》唐叔封於河、汾之东致误。不知古人言地理,皆仅举大概,太原固亦可曰河、汾之东也。顾亭林引《括地志》:故唐城,在绛州翼城县西二十里。尧裔子所封,成王灭之,以封唐叔,以为唐叔始封在翼。不知《括地志》此文亦误,故又有唐城,在并州晋阳县北二里。全谢山已纠之矣。

② 《礼记·缁衣正义》:谓《世本》及《汲郡古文》,皆云禹都咸阳。咸阳乃阳城之误。

地各异。《汉志》於偃师曰殷汤所都，於朝歌曰纣所都，於故侯国皆曰国。今阳翟不曰夏禹所都，而曰夏禹国，可知禹不都阳翟矣”。愚案古代命山，所苞甚广，非如后世，但指一峰一岭言之。又其时去游牧之世近，民习於移徙。宫庙民居，規制简陋，营构皆易。不恒厥居，事所恒有。稽古都邑，而出入於数十百里之间，殊不足较也。《国语》“伯阳父曰：河竭而商亡。”《书注》：谓“禹都阳城，河洛所近”。盖据《世本》，说初不误。而金氏引《史记》吴起对魏武侯之言，谓桀都必在洛阳。其拘泥之失，亦与此同也。金氏又谓“《史记·夏本纪》：禹避舜之子於阳城，诸侯去商均朝禹，禹于是即天子位。知其遂都阳城，盖即所避之处以为都也”。释于是字亦非是。《史记》此文，大同《孟子》。《孟子》及《史记》叙舜事，皆有“之中国践天子位”语。《集解》引刘熙曰：“帝王所都为中，故曰中国。”虽未知当否，然必自让避之处，复归建都之处可知。不然，即位之礼，岂可行之草莽之间哉？“於是”二字，指诸侯之朝，不指让避之地也。予谓夏盖先都晋阳，后都阳城。阳城之迁，盖在太康之后。《左传》哀公六年，引《夏书》曰：“惟彼陶唐，帅彼天常，有此冀方。今失其行，乱其纪纲，乃灭而亡。”盖指太康失国之事。《伪五子之歌》曰：“太康尸位以逸豫，灭厥德。黎民咸贰。乃般游无度，畋于有洛之表，十旬弗反。有穷后羿，因民弗忍，距于河。厥弟五人，御其母以从。僂于洛之汭。五子咸怨，述大禹之戒以作歌。”伪书此文，将羿好田猎，移诸太康。且误太康兄弟五人为厥弟五人，不直一笑^①然

① 夏之亡，由好乐太过。非以畋也。《墨子·非乐》：“於武观曰：启乃淫溢康乐，野於饮食。将将铭苴磬以力，湛油於酒。谄食于野。万舞翼翼，章闻於天，天用弗式。”辞虽不尽可解，然夏之亡，由好乐太过，则固隐约可见。《楚辞》曰：“启九辩与九歌兮，夏康娱以自纵。不顾难以图后兮，五子用失家巷。羿淫游以逸田兮，又好射夫封狐。固乱流其鲜终兮，浞又贪夫厥家。浇身被服强圉兮，纵欲而不忍。日康娱而自忘兮，厥首用夫颠陨。”综述太康、羿、浞始末，以好乐居夏，以好田居羿，尤极分明。《晋书·慕容》：“其在启之五子，忘伯禹之命。假因无正，用干戈作乱。遂使姒子——皇天幸禹，所以彰寿，思正夏略。”似五子之间，复有争乱争夺之事，与《左传》昭公元年“夏有乱亡”，《国语·楚语》“启有五观”之言合。韦注：“五观，启子太康昆弟也。”《汉书·古今人表》：“太康，启子。

“须於洛纳”，亦见《史记·夏本纪》。即谓《史记》同《书序》处，为后人所窜。然《潜夫论·五德志》，亦有“兄弟五人，降居洛纳”之言。非撰伪书者所臆造也。《左传》襄公四年，“后羿自钜迁于穷石，因夏民以代夏政”。“钜”，不可考。《淮南子·地形训》：“河水出昆仑东北陬，贯渤海，入禹所道积石山。赤水出其东南陬，西南注南海。丹泽之东。赤水之东，弱水出自穷石，至于合黎，余波入于流沙。绝流沙，南至南海。洋水出其西北陬，入于南海。羽民之南。凡四水者，帝之神水。以和百药，以润万物。”此节文字颇错乱。王引之谓：“自穷石以下十三字，为后人窜改。原文当作弱水出其西南陬。而出自穷石等文，当在下江出混山诸条间。”王说信否难遽定。然王逸注《楚辞》，郭璞注《山海经》，并引《淮南子》，谓弱水出自穷石，则此语虽或简错，决非伪窜。至於合黎十字，或后人以《禹贡》旁注，误入正文。《淮南》既云绝流沙，不必更衍此十字也。然窃疑《禹贡》入于流沙之下，亦夺南至南海一类语。《禹贡·雍州》，“弱水既西”。其导九川，先弱水，次黑水，次河，次漾，次江。黑水即今长江；黄河上源，出於昆仑，与今所谓河源同；予别有考。导川叙次，盖自西而东。《集解》引《地记》曰：“弱水西流入合黎，余波入于流沙，通於南海。”《地记》古书，颇可信据。见予所撰《黑水考》。《集解》引郑玄曰：“地理志。弱水出张掖。”又曰：“地理志：流沙，居延西北，名居延泽也。”似郑亦宗《汉志》所谓古文说者。^①然《索隐》又云：“《水经》云：合黎山，在酒泉会水县东北。郑玄引《地记》，亦以为然。”合诸《集解》所载郑引《地记》之说，则郑初无所偏主矣。《禹贡》、《地记》说弱水，皆仅云西流，不云北向。古文以居延泽当之，盖误。既云入於南海，而又在黑水西，则弱水必今澜沧江。澜沧江东南流，而《禹贡》、《地记》云弱水西流者，其所指上源与今异也。《禹贡》云：

兄弟五人，号五观。”《潜夫论·五德志》：“启子太康、仲康更立，兄弟五人，皆有昏德，不堪帝事，降在洛纳，是为五观。”皆以太康兄弟凡五人，“武”、“五”同声，即墨子所谓武观也。

① 《汉志》：张掖郡，居延，“居延泽在东北，古文以为流沙”。

“道黑水，至于三危，入于南海。”《集解》引《地记》曰：“三危山，在鸟鼠之西南。”弱水在黑水西，穷石亦必在三危之西。然亦不越陇、蜀、青海之境。羿迁穷石，果即此弱水所出之穷石者，则当来自湟、洮之间。其地本射猎之区，故羿以善射特闻，而其部族亦强不可圉也。太康此时，盖失晋阳而退居洛汭。少康光复旧物，然曾否定居河北，了无可考。窃疑自太康以后，遂居阳城也。《周官·大司徒》：“以土圭之法测土深，正日景以求地中。……日至之景尺有五寸，谓之地中。天地之所合也，四时之所交也，风雨之所会也，阴阳之所和也，然则百物阜安，乃建王国焉。”《注》：“郑司农云：土圭之长，尺有五寸，以夏至之日，立八尺之表，其影适与土圭等，谓之地中。今颍川阳城地为然。”《正义》：“颍川郡阳城县，是周公度景之处，古迹犹存。案《春秋左氏》，武王克商，迁九鼎于洛邑，欲以为都，不在颍川地中者，武王欲取河、洛之间形胜之所，洛都虽不在地之正中，颍川地中仍在畿内。”司农父子，皆明三统历，所举当系历家旧说。《义疏》此言，亦当有所本。此可见阳城附近，确为历代帝都所在，而先后营建，出入於数十百里之间，则曾不足较也。然则《汉志》、《世本》非有异说；应劭，臣瓚，亦不必相非矣。

夏迁阳城之后，盖未尝更反河东？故桀时仍在阳城，而伯阳父以伊、洛之竭，为夏亡之征也。郑氏《诗谱》云：“魏国，虞舜、夏禹所都。”此亦以大较言之。乃造《伪孔传》者见战国之魏，曾都安邑，遂以为夏都亦在安邑。又不知《史记》所谓“汤始居亳，从先王居”者，先王为契，亳为契本封之商，而以为即后来所都之偃师，^①於是解先王为帝喾，凿空，谓帝喾亦都偃师。《史记》云：“汤自把钺，以伐昆吾，遂伐桀。……桀败於有娥之虚，桀奔於鸣条。”《尚书大传》云：“汤放桀，居中野。士民皆奔汤。桀与其属五百人，南徙千里，止於不齐。不齐士民往奔汤。桀与其属五百人徙於鲁。鲁士民复奔汤。

① 见予所撰《释亳》。

桀曰：国，君之有也。吾闻海外有人。与五百人俱去。”^①其迹皆自西而东。今安邑反在偃师之西，其说遂不可通。《左传》昭公十二年：楚灵王谓子革曰：“昔我皇祖伯父昆吾，旧许是宅。”《国语》：史伯对郑桓公曰：“昆吾为夏伯矣。”韦昭云：“祝融之孙陆终，第三子名樊，为己姓，封於昆吾。昆吾，卫是也。其后夏衰，昆吾为夏伯，迁於旧许。”是则桀时昆吾之地，在今许昌，去阳城极近，故得与桀同日亡。《孟子》曰：“舜，生於诸冯，迁於负夏，卒於鸣条，东夷之人也。”《吕览·简选》篇：“殷汤登自鸣条，乃入巢门。”《淮南·主术训》：“汤困桀鸣条，禽之焦门。”《修务训》：“汤整兵鸣条，困桀南巢。谯以其过，放之历山。”则鸣条之地，必与南巢、历山相近。当在今安徽境。故《孟子》谓之东夷。《书序》：“伊尹相汤伐桀，升自陟，遂与桀战於鸣条之野。”陟虽不知何地，度必近接鸣条。《伪传》乃谓“陟在河曲之南，鸣条在安邑之西”，遂生绕道攻桀，出其不意之说，费后来多少辩论。皇甫谧又谓“昆吾亦来安邑，欲以卫桀，故同日而亡”。又谓“安邑有昆吾邑，鸣条亭”。不知自来卫桀，安暇筑邑？遂忘其自相矛盾也。不徒妄说史事，并妄造地名以实之。江艮庭谓“谧无一语可信”，诚哉其不可信矣！^②

附录四 释 毫

《史记》曰：“自契至於成汤，八迁。汤始居亳，从先王居。”其后仲丁迁於敖，河亶甲居相，祖乙迁於邢，盘庚渡河南，复居成汤之故居。武乙立，复去亳，徙河北。历代都邑迁徙，盖无如殷数者，而毫

① 《周书·殷祝》篇略同。宋作“桀与其属五百人去居南巢”。

② 西汉经说多本旧闻，虽有传讹，初无臆造。东汉古文家，则往往以意穿凿。今日故书雅记，百不一存，故无从考其谬。然偶有可疏通证明者，其穿凿之迹，则显然可见。如予所考东汉人谬以仓颉为黄帝史官，其一事也。详见予所撰《中国文字变迁考》。魏晋而后，此风弥甚。即如左氏所载，羿代夏政，少康中兴之事，据杜注，其地皆在山东。设羿所迁穷石。果在陇、蜀之间，则杜注必无一是处，惜书阙有间，予说亦无多佐证，不能辞而辟之耳。

之所在，异说尤滋。《汉书·地理志》：河南郡，偃师县，“尸乡，殷汤所都”。《续汉书·郡国志》：偃师县下，亦云“有尸乡”。《注》引《皇览》曰：“有汤亭，有汤祠。”《书序疏》：“郑玄云：亳，今河南偃师县。有汤亭。”此皆以亳在偃师者也。《汉志》论宋地云：“昔尧作游成阳，舜渔雷泽，汤止於亳，故其民犹有先王遗风。”山阳郡薄县下，“臣瓚曰：汤所都”。偃师县下，又载瓚说曰：“汤居亳，今济阴薄县是也。今亳有汤冢，已氏有伊尹冢，皆相近也。”《续汉书·郡国志》：“梁国薄县，汤所都。”《注》：“杜预曰：蒙县西北有亳城，中有汤冢。”《书序疏》：“皇甫谧云：《孟子》称汤居亳，与葛为邻，葛伯不祀，汤使亳众往为之耕。葛即今梁国宁陵之葛乡也。若汤居偃师，去宁陵八百余里，岂当使民为之耕乎？亳，今梁国谷熟县是也。”又《立政》：“三亳阪尹。”《疏》：“皇甫谧以为三亳，三处之地，皆名为亳。蒙为北亳，谷熟为南亳，偃师为西亳。”此以薄，亳，蒙，谷熟之地为亳者也。魏氏源以《史记·六国表》，以“汤起於亳”与“禹兴於西羌，周之王也以丰、镐伐殷，秦之帝用雍州兴，汉之兴自蜀、汉”并言；又《雒十命》，《尚书中侯》，皆有“天乙在亳，东观於洛”之文；断“从先王居”之先王为契。谓“汤始居商，①有天下后，分建三亳：徙都偃师之景亳，而建东亳於商邱，仍西亳於商州”。②此又以商之地亦为亳者也。③王氏鸣盛《尚书后案》：谓“薄县汉本属山阳郡。后汉又分其地，置蒙、谷熟二县，与薄并改属梁国。又改薄为亳，且改属济阴。故臣瓚所谓汤都在济阴亳县，及其所谓在山阳薄县，司马彪所谓在梁国薄县，杜预所谓在梁国蒙县者，本即一说。孔颖达《书诗疏》，皆误认为异说。皇甫谧以一亳分为南北。且欲兼存偃师旧说，以合《立政》三亳之文，实为谬误”。其说甚确。然谧谓“偃师去宁陵八百

① 《帝谥厘沃序疏》：“郑玄云：契本封商，国在太华之阳。”

② 宋魏氏说三亳，虽与皇甫谧异，而其立三亳之名，以牵合立政“三亳阪尹”之文则同。似非。《立政疏》云：“郑玄以三亳阪尹，共为一事。云：汤旧都之民，服文王者，分为三邑。其长居险，故言阪尹。”盖是。此自周初事，不必牵及商代。

③ 《书古微·汤誓序发微》。

余里，不当使民往为之耕”，则其说中理，不容妄难。^①魏氏谓汤始居商，所举皆古据。诸侯不敢祖天子；《玄鸟》之颂，及契而不及誉；先王为契，尤为确凿也。然则亳果安在邪？予谓古本无今世所谓国名。古所谓国者，则诸侯所居之都邑而已。然四境之内，既皆属一人所统，则人之称此国者，亦渐该四境之内言之。於是专指都邑之国，乃渐具今世国名之义焉。都邑可以屡迁，而今世之所谓国名者，不容数变。於是虽迁新邑，仍以旧都之名名之。如晋之新故绛是也。商代之亳，盖亦如是？《左传》襄公三十年，“鸟鸣於亳社”，在春秋之宋，其都仍有亳称也。《史记·秦本纪》：“宁公二年，遣兵伐荡社。三年，与亳战。亳王奔戎。遂灭荡社。”《集解》：“徐广曰：荡音汤。社，一作‘杜’。”《索隐》：“西戎之君号曰亳王，盖成汤之胤。其邑曰荡社。徐广云一作汤杜，言汤邑在杜县之界，故曰汤杜也。”^②是汤后在雍州者，春秋时其都仍有亳称也。此皆亳不止一处之证。亳既不止一处，则商也，偃师也，薄县也，固无妨其皆为亳矣。予盖以汤用兵之迹证之，而知其始居商，中徙薄，终乃定居於偃师也。何以言之？案《史记》云：“葛伯不祀，汤始伐之。”又云：“当是时，夏桀为虐政淫荒，而诸侯昆吾氏为乱。汤乃兴师……，以伐昆吾，遂伐桀。……桀败於有娥之虚，桀奔於鸣条。夏师败绩。汤遂伐三鬯。……伊尹报。於是诸侯毕服，汤乃践天子位，平定海内。汤归至於泰卷陶，……还亳”云云。葛，《汉志》：陈留郡宁陵，“孟康曰：故葛伯国，今葛乡是”。今河南宁陵县是也。昆吾有二：（一）《左传》昭公

① 王氏论古，颇为精核，惟倭郑太过。如於此处，必执谓“薄非亳，薄非亳，则蒙，谷熟可知”。其所据者，谓“晋人改薄为亳，乃以《汉志》谓汤尝止於是，又其地有汤冢也。然《汉志》仅谓汤尝游息於此。刘向云：殷汤无葬处。而《皇览》云：哀帝建平元年，大司空御史长卿案行水灾，因行汤冢，突然得之，足征其妄。”其说似辨矣。然於偃师去宁陵八百里，不当使民往为之耕之难，不能解也。此难不能解，而必谓薄非亳，则非疑《孟子》不可。尊郑而排皇甫谧可也，倭郑而疑《孟子》则慎矣。王氏於谧说，但谓“其说浅陋，更不足辨”，岂足服谧之心乎？

② 《封禅书》：“於杜亳，有三社主之祠。”《索隐》：“徐广云：京兆杜县有亳亭，则‘社’字误，合作‘於杜亳’。且据文列於下者皆是地邑，则杜是县。案秦宁公与亳王战，亳王奔戎，遂灭汤社。皇甫谧亦云：周桓王时自有亳王号汤，非殷也。”

十二年，“楚灵王谓子革曰：昔我皇祖伯父昆吾，旧许是宅”。地在今河南许昌。(二)哀公十七年，“卫侯梦于北宫，见人登昆吾之观”。《注》：“卫有观，在古昆吾之虚，今濮阳城中。”今河北之濮阳。《国语》：“史伯对郑桓公曰：昆吾为夏伯矣。”韦昭《注》：“祝融之孙陆终，第三子名樊，为己姓，封於昆吾，昆吾，卫是也。其后夏衰，昆吾为夏伯，迁於旧许。”则此时之昆吾，在今许昌，去桀都阳城极近，^①故得同口亡也。有娥之虚不可考。鸣条，《吕览·简选》篇云：“登自鸣条，乃入巢门。”《淮南·主术训》云：“汤革车三百乘，困之鸣条，禽之焦门。”^②《修务训》云：“乃整兵鸣条，困夏南巢。谯以其过，放之历山。”《注》“南巢，今卢江居巢是。历山，盖历阳之山”，居巢，今安徽巢县。历阳，今安徽和县。鸣条亦当在今安徽。故“舜卒於鸣条”，孟子以为“东夷之人”也。^③三嬖者，《续汉书·郡国志》：济阴郡，定陶，“有三嬖亭”。地在今山东定陶县。泰卷陶者，《集解》：“徐广曰：一无此陶字。”《索隐》：“邹诞生卷作餽，又作洞，则卷当为洞，与《尚书》同。解《尚书》者以大洞为今定陶，旧本或旁记其地名，后人转写，遂衍斯字也。”则泰卷亦今定陶也。《诗》云：“韦、顾既伐，昆吾夏桀。”则汤伐昆吾之先，又尝伐韦、顾。《郡国志》：东郡白马县，“有韦乡”《注》“杜预曰：县东南有韦城，古豕韦氏之国”。今河南滑县。《郡县志》：“顾城，在濮州范县东，夏之顾国。”今山东范县。《尚书大传》：“汤放桀，居中野，士民皆奔汤。桀与其属五百人南徙千里，止于不齐。不齐士民往奔汤。桀与其属五百人徙於鲁。鲁士民复奔汤。桀曰：国，君之有也。吾闻海外有人。与五百人俱去。”^④不齐盖即齐，鲁则周公所封也。纵观汤用兵之迹：始伐今宁陵之葛，次伐今滑县之韦，范县之顾，遂伐今许昌之昆吾，登封之夏桀，一战而胜。桀遂自齐、鲁辗转入今安徽。汤以其间，更

① 桀都阳城，见予所撰《夏都考》。

② 注：“焦，或作巢。”

③ 《史记·夏本纪集解》：“郑玄曰：南夷地名。”《书·汤誓序正义》引同。

④ 《周书·殷祝》篇略同。末云“桀与其属五百人，去居南巢”。

伐今定陶之三鬲。三鬲，盖桀东方之党也。其战胜攻取之迹，皆在今河南、山东，则其所都，必跨今商丘、夏邑、永城三县境之薄矣。《礼记·缁衣》引《尹吉》曰：“惟尹躬天见于西邑夏。”《注》“天当为先字之误。夏之邑在亳西”。夏都阳城，薄县在其东，商与偃师、顾在其西，此则《孟子》汤居亳与葛为邻之铁证也。^①然汤始居商，后迁偃师，亦自有其佐证。《太平御览·皇王部》引《韩诗内传》曰：“汤为天子十三年，百岁而崩。葬於征。今扶风征陌是也。”《韩诗》当汉时，传授甚盛；刘向治鲁诗，与韩诗同属今文。韩诗果有此说，刘向岂得不知？而云殷汤无葬处乎？然则征陌汤冢，盖汤后裔，如《史记》亳王之类，或其先祖耳。然传者以为汤冢，则亦汤尝居关中之证也。《大传》谓“汤网开三面，而汉南诸侯，归之者四十国”。亦必居关中乃能通武关之道，如周之化行江、汉矣。《盘庚》：“不恒厥邑，于今五邦。”《正义》：“郑王皆云汤自商徙亳，数商、亳、囂、相、耿为五。”郑说商国在太华之阳，自商徙亳，即谓其自本封之商，徙居偃师。《春秋繁露·三代改制质文》篇：“汤受命而王，作官邑於下洛之阳”，亦指偃师言之也。《孟子》谓“伊尹耕於有莘之野，汤三使往聘之”。《史记》则谓“阿衡欲干汤而无由，乃为有莘氏媵臣，负鼎俎，以滋味说汤”。《吕览·本味》云：“有佚氏女子采桑，得婴儿于空桑之中，献之其君。其君令嫫人养之。察其所以然，曰：其母居伊水之上，孕。梦有神告之曰：白出水而东走，毋顾。明日，视白，出水。告其邻，东走十里而顾。其邑

① 《孟子》言“伊尹五就汤，五就桀”。《史记》言“伊尹去汤适夏，既丑有夏，复归於亳”。《书大传》：“夏人饮酒，醉者持不醉者，不醉者持醉者，相和而歌。曰：盍归於亳？盍归於亳？亳亦大矣！故伊尹退而闲居，深听歌声。更曰：觉兮较兮！吾大命格兮！去不善而就善，何不乐兮？伊尹入告於桀，曰：大命之亡有日矣。桀惘然叹，哑然笑，曰：天之有日，犹吾之有民也。日亡，吾乃亡矣。是以伊尹遂去夏适汤。”所谓先见也。郑释先见，谓“尹之先祖，见夏之先君臣”，似迂曲。如此，非谓夏本在亳西不可。则汤始居商之说不可通。吾旧疑西邑夏，乃别於夏之既东言之，疑桀尝自阳城迁居旧许，故得与昆吾同日亡。然此说了无证据，亦不能立。似不如释尹躬先见，即为尹初就夏之为直捷也。

尽为水。身因化为空桑。故命之曰伊尹。此伊尹生空桑之故也。长而贤。汤闻伊尹，使人请之有侁氏。有侁氏不可。伊尹亦欲归汤。汤于是请取妇为昏。有侁氏喜，以伊尹为媵，送女。”“故命之曰伊尹”，黄氏东发所见本，作“故命之曰空桑”盖是？如今本，文义不相衔接。身化空桑，迹涉荒怪。谓阿衡得氏，由其母居伊水，难可依从。尹之氏伊，盖由后居伊水，故后人以其母事附会之邪？有莘者，周太任母家，其地“在洽之阳，在渭之涘”，今陕西合阳县是也。伊尹始臣有莘，后居伊水，亦汤初居商，终宅偃师之一证矣。统观诸说；汤盖兴于关中，此犹周文王之作丰，武王之宅镐也。其战胜攻取，则在薄县，犹周公之居东以戡三监也。终宅偃师，犹武王欲营洛邑，而周公卒成其志也。世之相去，五百有余岁；事又不必相师也，而其攻战之略，后先一揆，岂不诡哉？^①

① 商、周之得天下殆同。特周文、武、周公，相继成之，汤则及身戡定耳。

第三章 匈 奴

中国所吸合之民族甚多。顾其与汉族有关系最早、且最密者，厥惟匈奴。

《史记·匈奴列传》曰：“匈奴，其先祖夏后氏之苗裔也，曰淳维。”其说未必可信。^① 顾又云：“唐虞以上有山戎、豷允、荤粥，居于北蛮。”则其由来之久，可想见矣。^② 此族在古代，盖与汉族杂居大河流域，其名称：或曰豷豸，^③或曰獯鬻，^④或曰匈奴，皆一音之异译。^⑤ 又称昆夷，吠夷，串夷，则胡字之音转耳。^⑥ 此族在古代，与汉族

① 《索隐》：“张晏曰：淳维以殷时奔北边。又乐产《括地谱》云：夏桀无道，汤放之鸣条，三年而死，其子獯鬻妻桀之众妾，避居北野，随畜移徙，中国谓之匈奴。”案此说差无证据。鸣条在南，桀子何由北走？又獯鬻乃种族名，非人名，而此云“其子獯鬻”。《索隐》因谓淳维、獯鬻是一，疏矣。

② 夷、蛮、戎、狄，其初自系按方位言之。然游牧之族，迁徙无常。居地可以屡更，名称不能数变，则夷、蛮、戎、狄之称，不复与其方位合矣。居地迁徙，种族混淆，皆常有之事，故古书中夷、蛮、戎、狄等字，不能据以别种族，并不能据以定方位也。《史记·匈奴列传》，叙述匈奴古代之事，颇得纲要。或讥其并戎狄为一谈，非也。又或以戎为汉时之羌人，亦非。观第十篇及予所撰《山戎考》自明。

③ 亦作豷豸。

④ 獯，亦作熏，作荤，鬻亦作粥。

⑤ 《史记索隐》：“应邵《风俗通》曰：殷时曰豷粥，改曰匈奴。又晋灼云：尧时曰荤粥，周曰豷豸，秦曰匈奴。韦昭云：汉曰匈奴，荤粥其别名。”《诗·采芣》毛传：“豷豸，北狄也。”笺云：“北狄，匈奴也。”《孟子·梁惠王下》赵注：“熏粥，北狄强者，今匈奴也。”《吕览·审为》篇高注：“狄人，豷允，今之匈奴。”案伊尹四方令径作匈奴。又案《史记》：“唐虞以上，有山戎、豷豸、荤粥。”荤粥两字，盖系自注，史公非不知其为一音之转也。

⑥ 昆，又作混，作混，吠，亦作犬。又作昆戎、犬戎。《诗·皇矣》：“串夷载路。”郑笺：“串夷，即混夷。”《正义》：“书传作吠夷，盖犬、混声相近，后世而作字异耳。或作犬夷，犬即吠字之省也。案《诗·采芣》序疏引《尚书大传》注：“犬夷，昆夷也。”《史记·匈奴列传》：“周西伯昌伐吠夷氏。”又“自陇以西，有绵诸，緄戎。”《索隐》、《正义》皆引“韦昭曰：春秋以为犬戎”。足征此诸字皆一音异译。《索隐》又引《山海经》云：“黄帝生苗龙，苗龙生融吾，融吾生弄明，弄明生白犬，白犬有二牡，是为犬戎。”又云：“有人面兽身，名曰犬夷。”

之交涉盖甚多。其或可考或不可考者，乃书缺有间。汉族之记载，不甚完具，而非彼族之事迹有断续也。^①

此族于汉族交涉，见于史传最早者，则《史记·五帝本纪》所谓黄帝“北逐荤粥，合符釜山，而邑于涿鹿之阿”是也。又尧都晋阳，而《墨子》称其“北教八狄”，则《禹贡》冀州之域，自隆古即与此族杂居。夏自中叶以后，盖迁都河南，商虽间居河北，然不过在今河北大名，河南河北道境，非如黄帝、尧、舜之深入其阻，故此族在冀州之事，不复见于纪载，而其在《禹贡》雍州之域者，其事迹，乃随商、周先世之史实而并传。史称“自契至于成汤八迁”，其所以迁之故不可知，然观诸周代之行事，则商之先世，或亦为戎狄所迫逐，未可知也。周自后稷封于有邰。越数世，即失官而窜于戎狄之间。至公刘，乃复修后稷之业，居于豳。^②再传至大王，复为狄所逼，徙岐山

则附会字义矣。狄、貉、蛮、闽等字，其初或以为种族所自生。故《说文》有犬种、豸种、虫种之说。然其后则祇为称号，不含此等意义。至于犬戎之犬，则确系音译，诸家之说可征也。昆夷、猃狁，系一种人，犹汉时既称匈奴亦称胡也。《孟子》：“文王事昆夷”，“大王事獯粥”，乃变文言之耳。《诗序》：“文王之时，西有昆夷之患，北有獯狁之难。”竟以为两族人，误矣。《出车》之诗曰：“赫赫南仲，獯狁于襄。”又曰：“赫赫南仲，薄伐西戎。”又曰：“赫赫南仲，獯狁于夷。”獯狁在西北，可称戎，亦可称狄，诗取协韵也。箋云：“时亦伐西戎。独言平獯狁者，獯狁大，故以为始以为终”，已不免拘滞。序析獯狁、昆戎而二之，益凿矣。

① 《史记·匈奴列传》曰：“申侯怒而与犬戎共攻杀周幽王于骊山之下，遂取周之焦获，而居于泾、渭之间，侵暴中国。”又曰：“于是惠后与狄后、子带为内应，开戎狄，戎狄以故得入，破逐周襄王，而立子带为天子。于是戎狄或居于陆浑，东至于卫，侵盗暴虐中国。”一似戎狄本居塞外，至此乃入内地者。说春秋者亦多谓赤狄、白狄等，乃踵周之东迁而入内地。然求诸古籍，实无此等部落，本居塞外之证。故谓匈奴从古即与汉族杂居大河流域，实甚确也。

② 《史记·周本纪》：“封弃于邰，号曰后稷，别姓姬氏。后稷之兴，在陶唐、虞、夏之际，皆有令德。后稷卒，子不窋立。不窋末年，夏后氏政衰，去稷不务，不窋以失其官而奔戎狄之间。不窋卒，子鞠立。鞠卒，子公刘立。公刘虽在戎狄之间，复修后稷之业，务耕种，行地宜。自漆、沮，浚渭，取材用，行者有资，居者有畜积，民赖其庆。百姓怀之，多徙而保归焉，周道之兴自此始，故诗人歌乐思其德。”《匈奴列传》则曰：“夏道衰，而公刘失其稷官，变于西戎，邑于豳。”案“号曰后稷”之后稷，指弃。“后稷之兴”之后稷，指自弃以后后稷官者。“后稷卒”之后稷，则不窋之父也。周先世之先稷官自不窋，后迄未复，至公刘犹然。《匈奴列传》不叙鞠以前事，故径云公刘失其稷官；其复修后稷之业则所谓“变于西戎”者也。本无矛盾。《正义》云：“《周本纪》云‘不窋失其官’，此云公刘，未详也。”

下。^①爰及文、武，世济其德，而周势始张。文王伐昆夷。^②至武王，遂放逐之泾、洛以北，命曰荒服，以时入贡。周之声威，盖于是为盛。然穆王之世，荒服即已不至。^③至于幽王，卒有骊山之祸。时则俨狁“整居焦获”，^④“侵镐及方，至于泾阳”。周人尝命将伐之，至太原，而城朔方。诗家说此，多以为宣王时事。然观《史记·匈奴列传》，则似在骊山之役以后，疑莫能明也。^⑤

疏矣。又案《周本纪》、《索隐》：“《帝王世纪》云：后稷伯翳氏，生不窋。而谯周按《国语》云：世后稷，以服事虞、夏，言世稷官，是失其代数也。若以不窋亲弃之子，至文王千余岁，唯十四代，亦不合事情。”《正义》：“《毛诗疏》云：虞及夏、殷，共有千二百岁。每世在位皆八十年，乃可充其数耳。命之短长，古今一也，而使十五世君在位皆八十许载，子必将老始生，不近人情之甚。以理而推，实难据信也。”不窋非弃之子，古人早言之甚明。乃近犹有据此攻古书之不可信者，何其疏也。

① 以上参看前篇。

② 《书·传文王受命后，四年伐昆夷》。《诗》：“柞械拔矣，行道兑矣。混夷騷矣，维其喙矣。”笺云：“今以柞械生柯叶之时，使大夫将师旅出聘问。昆夷见文王之使者，将士众过己国，则惶怖惊走，奔突入此柞械之中而逃，甚困剧也，是之谓一年伐昆夷。”《正义》：“《帝王世纪》云：文王受命四年，周正丙子，混夷伐周。一日三至周之东门，文王闭门修德而不与战。王肃同其说，以申毛义，以为柞械生柯叶拔然时，混夷伐周。”

③ 《史记·匈奴列传》：“武王伐纣而营洛邑，复居于丰邰，放逐戎夷泾、洛之北，以时入贡，命曰荒服。其后二百有余年，周道衰，而穆王伐犬戎，得四白狼四白鹿以归。自是之后，荒服不至。”则穆王之所伐，即武王之所放也。

④ 《尔雅》十藪之一。据郭注，在今山西泾阳。

⑤ 《史记·周本纪》及《匈奴列传》，皆不言宣王时有与俨狁争战之事。《匈奴列传》曰：“穆王之后，二百有余年，周幽王用宠姬褒姒之故，与申侯有隙。申侯怒而与犬戎共攻杀周幽王于骊山之下，遂取周之焦获，而居于泾、渭之间，侵暴中国。”又曰：“初，周襄王欲伐郑，故取戎狄女为后，与戎狄兵共伐郑。已而黜狄后，狄后怨，而褒王后母曰惠后，有子子带，欲立之，于是惠后与狄后、子带为内应，开戎狄，戎狄以故得入，破逐周襄王，而立子带为天子。于是戎狄或居于陆浑，东至于卫，侵盗暴虐中国。中国疾之，故诗人歌之曰：‘戎狄是膺’，‘薄伐玁狁，至于太原’，‘出舆彭彭，城彼朔方’。”则似诗之所咏，皆周东迁后事。案邰、方、朔方，说诗者皆不能指为何地。若以为东迁后事，则镐即武王所居，方或丰之转音也。刘向《谏甘延寿疏》：“千里之镐，犹以为远”，镐京与洛邑，相去固得云千里。朔方亦当在泾水流域、自镐京言之，固可云西北也。平王虽不能御犬戎特以畏逼东迁，不应一迁之后，西都畿内之地，即尽沦戎狄。据《史记·秦本纪》及《十二诸侯年表》：秦襄公伐戎至岐，在其十二年，当周平王五年；秦文公十六年，收周余民有之，地至岐，当平王十九年。德公元年，“卜居雍，后世子孙饮马于河”。可见是时秦东境尚未至河。德公元年，乃周懿王五年，东迁后之九十四年也。《六国表》曰：“穆公修政，东境至河。”据《秦本纪》及《十二诸侯年表》，事在穆公十六年，则周襄王之八年，东迁后之百二十七年矣。周与西都交通之绝，由晋灭虢，守桃林之塞而然。虢之灭，在周惠王二十二年，亦在东迁后百十六年。然则自平王东迁后百余年间，周与西都之交通，迄未尝

春秋以后，史籍之传者较富，此族之事，可考者亦较多。其见于《春秋》者，或称戎，或称狄，盖就其始所居之方位名之，无关于种族也。其称狄者，初止作狄，后又有赤狄、白狄之分。^① 据《左传》杜说，则赤狄种类有六：曰东山皋落氏，^② 曰廆咎如，^③ 曰潞氏，^④ 曰甲氏，^⑤ 曰留吁，^⑥ 曰铎辰。^⑦ 白狄种类有三：曰鲜虞，^⑧ 曰肥，^⑨ 曰鼓。^⑩ 《史记·匈奴列传》曰：“晋文公攘戎翟，居于河内，圉、洛之间，号曰赤翟、白翟。”则居河内者为赤翟，居圉、洛之间者为白翟。窃疑《史记》之说为是也。^⑪ 其以戎称者：曰扬拒，泉皋，伊洛之戎，^⑫ 曰蛮氏之戎，^⑬ 曰骊戎，^⑭ 皆在今河南、陕西境。其跨今河南、山东及河北境者，时曰山戎，亦曰北戎。《管子》常以山戎与令支，孤竹并举。杜预又以山戎、北戎、无终三者为一。《汉志》右北平无终，故无终子国。辽西郡令支，有孤竹城。^⑮ 读史者因以山戎

绝。西都畿内之地，亦未尝尽为秦有，命将出师，以征玁狁，固事所可有也。“出车之诗”曰：“王命南仲，往城于方。”毛传：“方，朔方，近玁狁之国也。”案《诗》又言“天子命我，城彼朔方”，所咏当系一事，毛传是也。然则朔方乃近玁狁之地，在周之北。刘向《讼甘延寿疏》，亦以诗所咏为宣王时事。然古人学术，多由口耳相传，久之乃著竹帛，不审谛处甚多。无妨其言千里之犒为是，其言宣王时事为非也。

① 赤狄始见宣公三年，白狄始见宣公八年。

② 今山西昔阳县东皋落山。

③ ‘公羊’作将咎如。

④ 今山西潞城。

⑤ 今河北鸡泽。

⑥ 今山西屯留。

⑦ 今山西长治。皆灭于晋。

⑧ 今河北定县。

⑨ 今河北藁城。

⑩ 今河北晋县。肥、鼓亦灭于晋。鲜虞至战国时曰中山，灭于赵。

⑪ 详见予所撰《赤狄白狄考》。

⑫ 扬拒，在今河南偃师附近。泉皋，在今河南洛阳附近。伊洛之戎，春秋作洛戎。《左传》文公八年，公子遂会洛戎盟于暴。《释文》：“本作伊洛之戎，此后人妄取传文加之耳。”地皆入于周。

⑬ 今河南临汝。亦称茅戎，‘公羊’作蔑戎。地入于晋。

⑭ 今陕西临潼。地亦入晋。以上释地，据顾栋高《春秋大事表》。又有陆渾之戎，乃羌族，见第十篇。

⑮ 汉无终，今河北蓟县。令支，今河北迁安。

为在今河北东北境。然据《公羊》，则齐桓公之伐山戎，尝旗获而过鲁；而《左氏》亦载北戎侵郑，北戎侵齐；又《春秋》所载，鲁与戎之交涉甚多，窃疑山戎之地，实不仅东北一隅。至于无终，则《左传》襄公四年，尝遣使请成于晋。昭公元年，晋又败其众于太原。窃疑其地必近晋，亦不得在今河北东北境也。^①

以上所述，皆其地在腹里者。其君多有封爵，时与于会盟征伐，俨然厕于冠裳之列。较诸战国初年之秦，为东诸侯所摈者，犹或过之。自此以往，则其地较偏僻，其文明程度，亦当较低，故犹沿部落时代之习。《史记·匈奴列传》，所谓“自陇以西有绵诸、緄、^②翟獫之戎，^③岐、梁山、泾、漆之北有义渠、^④大荔、^⑤乌氏、^⑥胸衍之戎。^⑦而晋北有林胡、^⑧楼烦之戎、^⑨燕北有东胡、山戎。各分散居溪谷，自有君长，往往而聚者百有余戎。然莫能相一”者也。战国之世，燕、赵、秦、魏并起而攘斥之。魏有河西、上郡，^⑩赵有云中、雁门、代郡，秦有陇西、北地，以与胡界边。而燕秦开亦袭破东胡，置上谷、渔阳、右北平、辽西、辽东五郡。^⑪赵自代并阴山至高阙，^⑫燕自造阳^⑬至襄平，^⑭秦于陇西、北地、上郡，皆筑长城以拒胡。及始皇并六国，燕、赵之地亦皆入于秦。秦又使蒙恬收河南地，^⑮因

① 详见予所撰《山戎考》。又有所谓长狄者，其君盖别一种族，其民则亦狄也。详见予所撰《长狄考》。

② 皆在今甘肃天水。

③ 今陕西南郑。

④ 今甘肃宁县，庆阳。

⑤ 今陕西大荔。

⑥ 今甘肃泾川。

⑦ 今宁夏灵武。

⑧ 今山西朔县。

⑨ 今山西岚县。

⑩ 后入于秦。

⑪ 参看第三篇。

⑫ 山名，在今内蒙古境，黄河沿岸。

⑬ 地名，在上谷。

⑭ 今辽宁辽阳。

⑮ 今河套。

河为塞，因边山险陜溪谷可缮者治之，起临洮至辽东万余里。^①而北干山脉以南，^②尽为秦之地矣。

四裔为中原患者，莫如北族。北族之为中原患者，多在漠南北。中原人对朔方，遂有一种恐怖心，以为敌之起于是者，皆不可御也。^③其实不然，历代游牧之族，为中原患者，多非起自蒙古，即入据蒙古者，亦或能为中原患，或不能为中原患。可见敌国外患，原因甚多，地理特其一端耳。

蒙恬之斥逐匈奴也，匈奴单于曰头曼。头曼不胜秦，北徙。史不言其所居。然侯应议罢边塞事曰：“北边塞至辽东，外有阴山，东西千余里，草木茂盛，多禽兽。本冒顿单于依阻其中，治作弓矢，来出为寇，是其苑囿也。”冒顿弑父，龙庭未闻徙地，则头曼弃河南后，必即居阴山中矣。秦之乱，适戍边者皆去。匈奴得宽，复稍度河南与中国界于故塞。时北方游牧之族，在匈奴之东者为东胡，西为月氏，北为丁令。冒顿单于皆击破之。又南并楼烦、白羊王。^④《史记·匈奴列传》云：“诸左王将居东方，直上谷以往者，东接秽貉、朝鲜；右王将居西方，直上郡以西，接月氏、氐、羌；而单于庭直代云中。”匈奴盖至是始尽有漠南北之地。冒顿子老上单于（公元前174～前161年），又击破西域，置僮仆都尉，^⑤赋税诸国，取富给焉。^⑥而匈奴之国

① 临洮，今甘肃岷县。秦之长城，全非今之长城。当起陇西，北地，上郡塞外。东循阴山，沿黄河北岸，经今宣化之北，历热河至辽宁，迤东南，渡鸭绿江，入朝鲜。即上谷、渔阳、右北平、辽西，辽东五郡之界也。秦长城东端，在乐浪郡遂成县，见《晋书·地理志》。乐浪郡，今黄海、平安二道地也。汉初，辽东与朝鲜，以浞水为界。秦界则更在浞水以东。浞水，今大同江也。

② 谓黄河流域与蒙古之界山。

③ 中西交通，迄日俄战前，国人论者，皆敬畏俄。林文忠曰：“英、法诸国，皆不足患，终为中国患者，其俄罗斯乎？”徐继畲撰《瀛环志略》，谓英、法助土耳其以拒俄，犹之六国之合从以拒秦。甲午战后，犹有著论，谓俄国形势酷类强秦者，皆此等见解也。

④ 白羊王在河南。

⑤ 居焉耆、危须间。

⑥ 孝文三年，右贤王入居河南为寇。其明年，单于遣汉书曰：“今以少吏之败约，故罚右贤王，使至西方求月氏击之。以天之福，吏卒良，马力强，以灭夷月氏，尽斩杀降下定之。楼兰、乌孙、呼揭，及其旁三十六国，皆已为匈奴。”

势，遂臻于极盛。

汉初对匈奴，亦尝用兵。已而被围于平城，^①不利。乃用刘敬策，妻以宗室女，与和亲。盖以海内初平，不能用兵，欲以是徐臣之也。高后、文、景之世，守和亲之策不变。然匈奴和亲不能坚，时入边杀掠。中国但发兵防之而已。是时当匈奴冒顿，老上，军臣之世，为匈奴全盛之时。武帝即位，用王恢策，设马邑之权，以诱军臣单于。军臣觉之而去。匈奴自是绝和亲，攻当路塞，数入盗边。然尚乐关市，赍汉财物，汉亦关市不绝以中之。元光元年。汉始发兵出击。自后元朔二年、五年、六年，元狩三年，仍岁大举。而元朔二年之役，卫青取河南，置朔方郡。^②元狩二年，浑邪王杀休屠王降汉。^③匈奴受创尤巨。于是伊稚斜单于，^④用汉降人赵信计，^⑤益北绝幕。欲诱疲汉兵，徼极而取之。元狩四年，汉发十万骑，私负从马凡十四万匹，粮重不与焉。使卫青、霍去病中分兵。青出定襄，^⑥至襄颜山赵信城。去病出代，封狼居胥，禅于姑衍，临瀚海而还。自是匈奴遂远遁，而漠南无王庭。汉度河，自朔方以西至令居，^⑦往往通渠，置田官。吏卒有五六万人。稍蚕食，因而地接匈奴以北矣。

伊稚斜单于后，再传而至儿单于。儿单于之立，当武帝元封六年。自儿单于以后，益徙而西北。左方兵直云中，右方兵直酒泉、敦煌。龙庭所在，史亦不详。而以兵事核之，则距余吾水至近。^⑧《山海经》：“北鲜之山，鲜水出焉。北流注于余吾。”“北鲜”二字，疑

① 今山西大同。

② 在今鄂尔多斯右翼后旗，黄河西岸。汉既筑朔方，遂缮蒙恬所为塞，因河为固。

③ 汉通西域之道自此开，羌、胡之交关自此绝。

④ 军臣之弟，继军臣立。

⑤ 本胡小王，降汉，封为翁侯。败殁，又降胡。

⑥ 今山西右玉。

⑦ 今甘肃永登。

⑧ 天汉四年，贰师师出，且鞮侯单于悉远其累重于余吾水北，而自以兵十万待水南。征和二年，闻汉兵大出，右贤王驱其人民，度余吾水六七百里，居兜衍山。壶衍鞮单于时，汉生得颍脱王，匈奴恐以为导袭之，即北桥余吾，令可渡。

鲜卑之倒误。余吾，仙娥，一音之转。颇疑今色楞格河，古时本名鲜水；^①而拜哈勒湖，则名余吾，后乃颺其所注之湖之名，以名其水也。^②儿单于四传而至壶衍鞬单于。宣帝本始二年，匈奴欲掠乌孙。乌孙公主来求救。汉发五将军十五万众，出塞各二千余里以击之。匈奴闻之，驱畜产远遁。是以五将少所得，而校尉常惠，护乌孙兵，入自西方，获三万九千余级；马、牛、驴、羸、橐驼五万余匹，羊六十余万头。^③匈奴民众死伤及遁逃亡者，不可胜数。其冬，单于自将攻乌孙，颇有所得。欲还，会大雨雪人畜冻死，还者不及什一。于是丁令攻其北，乌桓入其东，乌孙击其西，凡三国所杀，数万级，马数万匹，牛羊甚众。匈奴大虚弱。诸国羁属者皆瓦解。兹欲乡和亲。然尚未肯屈服于汉也。其后匈奴内乱，五单于争立。呼韩邪尽并诸单于，又为新立之郅支单于所败。乃于甘露元年，款五原塞降汉。三年，入朝。郅支北击乌揭，降之。发其兵，西破坚昆，北降丁令。并三国之众，留都坚昆。^④后杀汉使谷吉，自以负汉。又闻呼韩邪日强，恐袭之，欲远去。会康居数为乌孙所困，使迎郅支居东边，欲并力取乌孙以立之。郅支大悦，引而西。康居王甚尊敬之，妻以女。郅支数借兵击破乌孙。乌孙西边空虚不居者且千里。郅支骤胜而骄，杀康居王女。又役康居之民为筑城。元帝建昭三年，西域副都护陈汤，矫制，发诸国及车师，戊己校尉屯田兵攻杀

① 即鲜卑水，或译名但取上一音，或夺卑字。

② 本始二年，五原之兵，出塞八百余里，而至丹余吾水。丹余吾，当系余吾众源之一，或其支流。以道里计之，亦当在今色楞格河流域也。匈奴之弱，实由失漠南。侯应罢边塞议，谓“边长老言，匈奴失阴山之后，过之未尝不哭也”。据《汉书·匈奴传》：元封六年，冬，匈奴大雨雪，畜多饥寒死。诛贰师后，连雨雪数月，畜产死，人民疫病，谷稼不熟。始元二年，单于自将击乌孙。欲还，会天大雨雪，一日深丈余。人民畜产冻死，还者不什一。虚闻权渠单于之立，匈奴饥，人民畜产死十六七。盖三十七年之间，大变之见于中国史者四矣。度尚有较小，为中国史所不载者也。

③ 《乌孙传》云：“乌孙皆自取所虏获”，则此数未必确实。然匈奴之所损，必甚多也。

④ 乌揭，坚昆，丁令，见第四篇。《三国志》注引《魏略》：匈奴单于庭，在安习水上，当系指此时言之。安习水，今额尔齐斯河也。

之。传首京师。北方积年之大敌，至是称戡定焉。

呼韩邪既降汉，请留居光禄塞下，^①有急，保汉受降城。^②许之。后人众渐盛，乃归北庭。事汉甚谨。王莽时，抚驭失宜，始复为寇。光武之世，至徙幽、并边人于常山、^③居庸关^④之东以避之。幸匈奴旋复内乱。其奥鞬日逐王比，自立为呼韩邪单于，降汉。于是匈奴分为南北。南单于入居西河、美稷。^⑤北匈奴连年旱蝗。又为南部、丁令、鲜卑、西域所侵，益弱。和帝时，南部求并之。永元元年，窦宪合南部击之，降其众二十余万。至燕然山，出塞三千余里。明年，南部又分兵：左过西海，至河宗北；右绕天山南，度甘微河。北单于被创走。明年，右校尉耿种又破之金微山，出塞五千余里，前此出师未尝至也。《后汉书》谓单于遁走，不知所在。《魏书·悦般传》，则谓其逃亡康居。盖《后汉书》所载，乃当时军中奏报；《魏书》所载，则后来得之于西域者也。北单于之弟于除鞬自立，止蒲类海，遣使款塞。四年，立为北单于。欲辅还北庭。于除鞬自畔还北，汉使人诱还杀之。其余众辗转西域。^⑥至南北朝时，犹立国于乌孙西北者曰悦般。其入欧洲者，立国于马加之地，为今匈牙利等国之祖焉。^⑦

南单于入居西河后，汉使中郎将段郴、副校尉王郁留拥护之。又令西河长史岁将骑二千，弛刑五百人，助中郎将护卫单于。冬屯夏罢，岁以为常。单于亦遣诸部王屯驻北地、朔方、五原、云中、定襄、雁门、代郡，为郡县侦罗耳目。明帝时，南部又欲叛还北者，置度

① 太初三年，徐自为所筑，去五原塞近者数百里，远者千里。

② 太初元年所筑，在今乌喇特旗西北。

③ 在今河北唐县。

④ 在今北京市。

⑤ 今鄂尔多斯左翼中旗。

⑥ 《后汉书》：永元十六年，北单于遣使诣阙贡献，愿和亲，修呼韩邪故约。和帝以其旧礼不备，未许。元兴元年，重遣使诣敦煌贡献。辞以国贫，未能备礼。愿请大使。当遣子入侍。时邓太后临朝，亦不答其使，但加赐而已。据此，则北匈奴自章、和后，仍自有单于，特微弱，又去中国远，世系事迹，皆不可考耳。

⑦ 见《元史译文证补》卷二十七上。

辽营，以中郎将行将军事以制之。灵帝时，张纯反，率鲜卑寇五郡。诏发南匈奴兵配幽州牧刘虞讨之。国人恐单于发兵无已，反，攻杀单于。子于扶罗立。国人杀其父者遂畔。立须卜骨都侯为单于。一年死。南庭遂虚其位，以老王行国事。于扶罗诣阙自讼。会灵帝崩，天下大乱，单于将数千骑与白波黄巾余众合寇河内诸郡。时民皆保聚，钞掠无利，而兵遂挫伤。复欲归国，国人不受，乃止河东，卒。弟呼厨泉立。建安二十一年，入朝。曹操留之于邺，遣右贤王去卑监其国。分其众为五部。立其中贵者为帅，选汉人为司马监之。魏末，复改为长史。左部都尉所统可万余落，居太原故兹氏县。^① 右部六千余落，居祁县。^② 南部三千余落，居蒲子县。^③ 北部四千落，居新兴县。^④ 中部六千落，居太陵县。^⑤ 左部帅豹，即刘渊之父。右贤王去卑，则赫连勃勃之先也。别部居上党武乡县之羯室者，^⑥ 亦称羯，其后为后赵。而居临松卢水者，^⑦ 先世为匈奴左沮渠，遂以沮渠为氏，其后为北凉焉。

五胡之中，匈奴鲜卑，部落皆盛，而匈奴尤居腹地，故最先叛。然刘、石二氏，皆淫暴无人理。石氏亡后，冉闵大肆杀戮，胡、羯遂衰。其历久而后同化者，惟稽胡而已。《北史》云：“稽胡，一曰步落稽，盖刘元海五部之苗裔也。或曰：山戎，赤狄之后，自离石^⑧以西，安定^⑨以东，方七八百里，居山谷间，种类繁多。虽分统郡县，列于编户，然轻其徭赋，有异华人。山谷阻深，又未尽役属。而凶悍者，恃险数为寇。”案元海部落，当时多散居郡县。^⑩ 稽胡盖因生事

① 今山西高平。

② 今山西祁县。

③ 今山西隰县。

④ 今山西忻县。

⑤ 今山西文水。

⑥ 今山西左权。

⑦ 今甘肃张掖。

⑧ 今山西离石。

⑨ 今宁夏固原。

⑩ 《晋书》云：“其部落随所居郡县，使宰牧之，与编户大同，而不输贡赋。”

及风俗之异，入居山谷。其能久而不亡，正以其自成一部落故也。^①《北史》云：“言语类夷狄，因译乃通。”盖因少与汉人交接之故。然又云：“其俗土著，亦知种田。地少桑蚕，多衣麻布。其丈夫衣服及死亡殡葬，与中夏略同。其渠帅颇知文字。”则渐染华风，亦非一日矣。故自隋、唐以后，遂与汉族融合。

匈奴政教风俗，与中土相类者极多。《史记》云：“自淳维以至头曼，千有余载，时大时小，别散分离，尚矣。然至冒顿而匈奴最强，尽服从北夷，而南与诸夏为敌国。”是则头曼以前，匈奴迄未尝为大国也。夫使当战国以前，漠南北之地，已有控弦数十万，如汉时之匈奴者，则深入杀略之事，必时有所闻；大兴师征伐，亦必在所不免；断非仅筑长城所能限戎马之足也。^②然则自秦以前，漠南北部落，亦不过如《史记》所谓散居溪谷，莫能相一者耳。其大部部落，实自皇古以来，即与汉族杂居黄河流域也。则其渐染汉族文化之深，固无足怪矣。

汉族之俗，敬天而尊祖。而《史记·匈奴列传》曰：“岁正月，诸长少会单于庭，祠。五月，大会龙城，祭其先、天地、鬼神。秋，马肥，大会蹛林，校课人畜计。”《后汉书》称其俗岁有三龙祠，尝以正月、五月、九月戊日祭天神。合二书观之，盖此三会皆祭天地，并及其余诸鬼神也。^③“单于朝出营，拜日之始生；夕拜月。”亦与中土朝日夕月合。其围高帝于平城也，其骑：西方尽白，东方尽骍，北方尽骊，南方尽骍。月尚戊己，祭天神以戊日，此中国五行干支之说也。贰师之降匈奴，岁余，卫律害其宠。会母闾氏病，律饬胡巫言：“先单于怒曰：胡故时祠兵，尝言得贰师以社，今何故不用？”遂屠贰师以祠。征和中，汉武帝诏：“军候弘上书：言匈奴缚马前后足，置城下，驰言：秦人，我匈若马。丞相、御史、二千石、诸大夫、郎为文

① 《两汉书》及《三国志》，皆无稽胡之名，以为山戎、赤狄之后者，必误。

② 参看附录《秦始皇筑长城》。

③ 南单于内附后，兼祠汉帝。

学者，乃至郡属国都尉赵破奴等，皆以虏自缚其马，不祥甚哉。或以为欲以见强。重合侯得虏侯者，言：闻汉军当来，匈奴埋羊牛所出诸道及水上以沮军。单于遗天子马裘，常使巫祝之。缚马者，沮军事也。”^①夫信巫，则亦汉族之古俗也。^②此其教之相类者也。

北狄无称其君为天子者，有之者其惟匈奴乎？^③匈奴称其君曰撑犁孤涂单于。撑犁，天也。孤涂，子也。单于，广大之貌也。言其象天，单于然也。老上遗汉书，自称“天地所生，日月所置，匈奴大单于”。狐鹿姑遗汉书，亦曰：“胡者，天之骄子。”得毋感天而生之说，亦为彼所习闻邪？颇重盟约。永光元年，汉使韩昌、张猛送呼韩邪侍子。昌、猛见单于民众益盛，塞下禽兽尽，单于足以自卫，不畏郅支。闻其大臣多劝单于北归者，恐北去后难约束，即与为盟约，曰：“自今以来，汉与匈奴，合为一家，世世毋得相诈相攻。有窃盗者，相报，行其诛，偿其物。有寇，发兵相助。汉与匈奴，敢先背约者，受天不祥，令其世世子孙尽如盟。”俨然见古者束牲载书之辞焉。《汉书》载董仲舒之言曰：“如匈奴者，非可说以仁义也，独可说以厚利，结之于天耳。与之厚利，以没其意。与盟于天，以坚其约。质其爱子，以累其心。”刘敬之说高帝和亲也，曰：“陛下诚能以适长公主妻单于，厚奉遗之。彼知汉女，送厚，必慕，以为闾氏。生子，必为太子。陛下以岁时汉所余彼所鲜数问遗，且使辨士风谕以礼节，

① 贰师之出塞，匈奴使右大都尉与卫律将五千骑要击汉军于夫羊句山狭。贰师遣属国胡骑二千与战，虏兵坏散，死伤者数百人。汉军乘胜追北，至范夫人城。应劭曰：本汉将筑此城。将亡，其妻率余众完保之，因以为名也。张晏曰：范氏，能胡诮者。

② 《北史·悦般传》：“真君九年，遣使朝献，并送幻人。称能割人喉脉令断；击人头，令骨陷血出，或数升，或盈斗，以草药内其口中，令咽喉止，须臾血止。养疮一月复常，无瘢痕。世疑其虚。乃取死罪囚试之，皆验。云中国诸名山，皆有此草。乃使人受其术而厚遇之。”此幻人自出西域。又云：“又言其国有大术者，蠕蠕来钞掠，术人能作霖雨，盲风，大雪及行潦。蠕蠕漂亡者十二三。”此则柔然、丁令，皆云有此术，或受之匈奴耳。《左氏》：狄之入卫也，“囚史华龙滑与礼孔，以逐卫人。二人曰：我大史也，实掌其祭。不先，国不可得也。乃先之。”注曰：“夷狄畏鬼，故恐言当先白神。”则狄人之巫鬼，由来旧矣。

③ 匈奴以外皆称汗。汗，大也。盖音译则曰汗，意译则曰大人。

冒顿在，固为子婿，死则外孙为单于，岂闻外孙敢与大父抗礼哉？可毋战以渐臣也。”此古代诸侯屡盟交质，事之以货贿，申之以昏姻之习。抑刘敬之策，亦莠人之所以亡郢也。此其政之相类者也。

匈奴之俗，与所谓尚文之世，若不相容，而反诸尚质之世，则极相类。“其送死，有棺槨、金银、衣裳而无封树，丧服。近幸臣妾，从死者数百人。”此古者不封不树，丧期无数及殉葬之俗也。“父死，妻其后母；兄弟死，皆取其妻妻之。”此晋献公所以烝于齐姜，象所以欲使二嫂治朕栖也。“有名不讳而无字”，幼名，冠字，本乃周道也。“贵壮健，贱老弱；壮者食肥美，老者食其余。”此古之人所以兢兢于教悌也。“利则进，不利则退，不羞遁走。苟利所在，不知礼义。”春秋时戎狄俗皆如此。尤其久与汉族杂居河域之征也。其文教虽不如中国乎？然《史记》称其“狱久者不满十日，一国之囚，不过数人”。中行说谓其“约束径易行，君臣简可久，一国之政犹一体”。犹足想见古者刑措不用，及未施信于民而民信，未施敬于民而民敬之风焉。要之匈奴之俗，与周以后不相类，若返诸夏，殷以前，则我国之俗，且可资彼以为借镜也。此其俗之相类者也。

《罗马史》载匈奴西徙后，有诗词歌咏，皆古时匈奴文字。当时罗马有通匈奴文者，匈奴亦有通拉丁文者，惜后世无传焉。^①案匈奴之有文字，史不言其始于何时，亦不言为何种文字。或谓当时西域诸国，多有旁行文字，匈奴或西徙后受之西域，如回纥文字，出自大食者然。案匈奴之服西域，事在孝文三四年间，自此以前，久与中原书疏相往还矣。中行说教单于左右疏记，以计识其人众畜数，必先有文字疏记之法，乃有可施。《史记》谓其“无文书，以言语为约束”，乃谓其无文书，非谓其无文字也。然则匈奴之有文字旧矣。创制文字，实为大业，虽乏史记，十口不得无传。辽、金、元、清、西夏皆然。然则匈奴文字，非由自制。既非自制，舍中国将安所受之

① 见《元史译文证补》。

哉？汉遣单于书以尺一牍，中行说令单于以尺二寸牍，及印封，皆令广长大，则其作书之具，正与汉族同。从古北族文字，命意措词，与汉族近者，莫匈奴若，初未闻其出于译人之润饰也。然则匈奴与中国同文，虽史无明文，而理有可信矣。抑《史》、《汉》之不言，非疏也。《西域传》云：“自且末以往，有异乃记。”记其与中原异者，而略其与中原同者，作史之例则然。然则《史》、《汉》之不言，正足为匈奴与我同文之证矣。^①然则我国文字之流传于欧洲也旧矣。^②

匈奴与汉族关系之深如此，然其文明程度，终不逮汉族者，则汉族久进於耕农，而匈奴迄滞於游牧之故也。《史记》云：“自唐、虞以上，有山戎、獫狁、荤粥居於北蛮，随畜牧而转移。”可见其从事畜牧，由来之久。然迄春秋、战国时，此族仍多以游牧，射猎为生。故魏绛劝晋悼公和戎之辞曰：“戎狄荐居，贵货易土，土可贾焉。”^③杂居内地者如此，在塞外者，自更不待言矣。《史记·匈奴列传》谓其“自君王以下，咸食畜肉，衣其皮革，被旃裘”。又云：“儿能骑羊，引弓射鸟鼠；稍长，则射狐兔，用为食。”盖犹《王制》所谓北方之狄，衣羽毛穴居不粒食之旧也。^④然汉时之匈奴，亦间有事种植者。《汉书》谓匈奴诛贰师，连雨雪数月，谷稼不熟。师古曰：“北方早寒，虽不宜禾稷，匈奴中亦种黍稷。”师古此言，当有所本。盖生业之

① 《汉书》于《安息传》明著其画革旁行为书记，即因其有异而记之者也。

② 日逐王比遣汉人郭衡奉匈奴地图求内附，则匈奴并有地图。又《说文》控字下曰：“匈奴引弓曰控弦。”《一切经音义》引作“匈奴谓引弓曰控弦”。案《一切经》引是也，今本盖夺谓字？观此，则匈奴之语，亦有与汉族同者矣。皆其久与汉族杂居之证也。《一切经》又一引作突厥。汉时无突厥，必误也。《观堂集林》有《匈奴相邦印跋》，曰：“匈奴相邦玉印藏皖中黄氏。形制文字，均类先秦，当是战国秦汉之物。考六国执政，均称相邦。秦有相邦吕不韦，见戈文，魏有相邦建信侯，见剑文。今观此印，知匈奴亦然。史作相国，盖避汉高帝讳改。《史记·大将军骠骑列传》，屡言获匈奴相国都尉。而《匈奴列传》，记匈奴官制，但著左右贤王以下二十四长，而不举其目。又言二十四长，亦各自置千长、百长、十长、裨小王、相封、都尉、当户、且渠之属。相封即相邦。易邦为封，亦避高帝讳耳。”此印若真，亦匈奴与汉族同文之一证。

③ 《左》襄四年。

④ 《王制》：四海之内，北不尽恒山。所谓北狄，当在恒山之北。

兴，由於地利，漠南北亦有宜於种植之地，农业遂缘之而兴也。特究不以为正业耳。

《春秋》僖公三十二年，“卫人及狄盟”。《杜注》：“不地者，就狄庐帐盟。”《疏》云：“狄逐水草，无城郭宫室，故云就庐帐盟也。”杜氏此注，非必经意，然当时北狄未有宫室，说当不诬。《史记》云：“其后义渠之戎，筑城郭以自守，而秦稍蚕食。至於惠王，遂拔义渠二十五城。”盖后来之事，且亦未必凡戎狄皆然也。秦、汉时之匈奴，“无城郭常居耕田之业，然亦各有分地”。其国中间有城郭，大抵汉人所筑。如赵信城，孟康曰：“赵信所筑。”范夫人城，应邵曰：“本汉将筑此城，将亡，其妻率余众保完之”是也。壶鞮衍单于初立，年少；母阙氏不正，国内乖离，常恐汉兵袭之。卫律为单于谋，穿井，筑城，治楼以藏谷，^①与秦人守之。汉兵至，无奈我何。即穿井数百，伐材数千。或曰：胡人不能守城，是遣汉粮也。乃已。郅支之徙康居，役其民以筑城，日五百人，二岁乃已。然终为汉兵所诛夷。胡人不能守城，此其一证也。

匈奴极重汉物，“其攻战，斩首虏，赐一卮酒”。酒之贵重可知。汉文与匈奴和亲，遗以缯絮，秣藁，岁有数，所以中之也。自关市之通，单于以下皆亲汉，往来长城下，几堕马邑之权。然犹乐关市，不能绝，可知其陷溺之深。贾生三表五饵之说，不能谓为处士大言矣。^②中行说之说匈奴曰：“匈奴人众，不能当汉之一郡，然所以强之者，以衣食异，无仰於汉也。今单于变俗，好汉物，汉物不过十二，则匈奴尽归於汉矣。其得汉絮缯，以驰草棘中，衣袴皆敝裂，以视不如旃裘之坚善也；得汉食物，皆去之，以视不如潼酪之便美也。”呜呼！何其计之深而虑之远也！

匈奴风俗，最称强悍。《史记》曰：“其俗宽则随畜田猎为生业，急则人习战攻以侵伐，其天性也。”《淮南子》曰：“雁门之北，狄不

① 观此语，亦可知匈奴有农业。

② 见《新书·匈奴》篇。

谷食。贱长贵壮，俗尚气力。人不弛弓，马不解勒。”^①此即《中庸》所谓“衽金革，死而不厌，北方之强”者邪^②。左伊秩訾之劝呼韩邪降汉也，呼韩邪问诸大臣。皆曰：“不可。匈奴之俗，本上气力而下服役，以马上战斗为国，故有威名於百蛮。战死，壮士所有也。今兄弟争国，不在兄，则在弟，虽死，犹有威名，子孙常长诸国。奈何乱先古之制，臣事於汉，卑辱先单于，为诸国笑？虽如是而安，何以复长百蛮？”百世之下，读之虎虎有生气焉。其能以不逮一县之众，^③使汉为之盱食，宜矣。

然匈奴众虽勇悍，而训练节制颇缺。“利则进，不利则退，不羞遁走。”犹是春秋、战国以来戎狄之旧俗。“其攻战，斩首虏，赐一卮酒；而所得虏获，因以与之。得人，以为奴婢。故其战，人人自为趋利，如鸟之集。其困败，瓦解云散矣。”此孙卿所讥齐人隆技击，若飞鸟然，倾侧反复无日者也。古汉族事耕稼，故多居平原。戎狄事畜牧射猎，故多居山险。故汉族重车战，戎狄则用骑兵及步兵。《左传》隐公九年，北戎侵郑，郑伯御之。患戎师，曰：“彼徒我车，惧其侵軼我也。”昭公元年，晋中行穆子败无终及群狄於太原。将战，魏舒曰：“彼徒我车，所遇又阨，请皆卒。乃毁车以为行。而赵武灵王亦胡服骑射，以灭中山。皆是道也。汉时匈奴，仍系如此。晁错《论兵事疏》曰：上下山阪，出入溪涧，中国之马弗与也。险道倾仄，且驰且射，中国之骑弗与也。风雨罢劳，饥渴不困，中国之人弗与也，此匈奴之长技也。若夫平原易地，轻车突骑，则匈奴之众易挠乱也。劲弩长戟，射疏及远，则匈奴之弓弗能格也。坚甲利兵，长短相杂，游弩往来，什伍俱前，则匈奴之众弗能当也。材官驍发，矢

① 《原道训》。

② 扬雄《谏不受单于朝书》曰：“往时尝屠大宛之城，陷乌桓之垒，探姑缯之壁，荡姐之场，艾朝鲜之旄拔两越之旗，近不过旬月之役，远不离二时之劳，固已犁其庭，扫其闾，郡县而置之，云彻席卷，后无余苗。惟北狄为不然，真中国之坚敌也。三垂比之悬矣，前世重之滋甚。”江统《徙戎论》曰：“并州之胡，本实匈奴。其天性骁勇，弓马便利，倍於氐羌。”是匈奴在四裔中为最强也。

③ 见附录《秦始皇筑长城》。

道同的，则匈奴之革笥本荐，弗能支也。下马地斗，剑戟相接，去就相薄，则匈奴之足弗能给也，此中国之长技也。”要而言之，匈奴长於骑，汉长於步，匈奴利於险阻，汉利於平地，匈奴之勇悍，非汉所及；汉之兵器及行陈，亦非匈奴能当也。^①

北族多辮发，惟匈奴则似椎髻。《汉书·李广苏建传》：“昭帝立，大将军霍光，左将军上官桀辅政，素与陵善。遣陵故人陇西任立政等三人俱至匈奴招陵。后陵、律^②持牛酒劳汉使。博饮。两人皆胡服椎结。立政大言曰：汉已大赦，中国安乐，主上富於春秋，霍子孟、上官少叔用事。以此言微动之。陵嘿不应，熟视，而自循其发，曰：我已胡服矣！”明椎髻为匈奴俗也。或曰：文帝前六年遣单于，有比疎一。^③师古曰：“辮发之饰也，以金为之。”此实匈奴辮发之证，陵、律盖未忍效之，故犹椎髻也。曰我已胡服，明发未尝如胡也。案比疎即篦梳，古今字。不必辮发然后可用。师古之说，似睹当时北族辮发以意言之。《朝鲜列传》谓“卫满椎结蛮夷服，东走出塞”，明是时塞北蛮夷多椎结，满岂亦有所不忍邪？^④

匈奴为汉族所迫逐，正支西徙，至今立国欧洲。然其同化於我者实不少。《左传》庄公二十八年，“晋献公娶二女于戎。大戎狐姬生重耳，小戎子生夷吾”。《注》“大戎，唐叔子孙，别在戎狄者”。

① 《史记》：“其长兵则弓矢，短兵则刀铤。”则其兵器，亦与汉同，特不如汉之精而已。又曰：“善为诱兵以包敌”，此亦居广原，习於驰逐之故也。又曰：“举事常随月盛壮以攻战，月亏则退兵。”案《左传》成公十六年，晋郤至谓楚有六间，“陈不违晦”其一。注：“晦，月终，阴之尽，故兵家以为忌。”昭公二十三年，戊辰，晦，战於鸡父。注：“七月二十九日。违兵忌晦战，击楚所不意。”盖月无光时，惧敌夜袭，故不用师也。此亦匈奴俗类汉族之一证。

② 卫律。

③ 《史记》作比余。

④ 《北史·悦般传》谓其“剪发齐眉”。又云：“其人清洁。与蠕蠕结好。其主尝将数千人入蠕蠕，欲与大檀相见。入其界，百余里，见其部人不浣衣，不辮发，不洗手。妇人口舐器物。王谓其从人曰：汝曹诬我，将我入此狗园。乃驰还”。不辮发即辮发之谓，辮发即被发也。从古西域多洁清，北族则否。悦般西徙后，盖已渐染西域之俗。然辮发当系匈奴之旧。剪发齐眉，不知为匈奴俗否？若然，则颇似中国之两髦矣。又匈奴之法，汉使不去节，不以墨黥面，不得入穹庐。盖以以墨黥面，为羞辱之意也。

《晋语》：“狐氏出自唐叔；狐伯耳之子，实生重耳。”是《杜注》所本也。又曰：“晋伐驪戎，驪戎男女以驪姬。”《注》云：“驪戎，其君姬姓，爵男也。”案驪戎立国甚古。《周书·史记篇》：“昔有林氏召离戎之君而朝之”，即驪戎也。《史记·周本纪》：“纣囚西伯於羑里。闾夭之徒，求驪戎之文马而献之纣。”是时驪戎为姬姓之国与否不可知，然其与姬姓之国有交涉，则甚确凿矣。昭公十二年，晋伐鲜虞，《公》、《谷》皆责其伐同姓。《范注》云：“鲜虞，姬姓。”疏谓《世本》文。又戎州己姓，见哀公十七年。己者，黄帝之子之姓也。^①是则春秋以前，我族作大长於戎狄中者多矣。《公羊》谓潞氏“离於夷狄，而未能合於中国。晋师伐之，中国不救，夷狄不有”。实为其渐即诸夏之征。^②《韩非子·外储说》：“赵主父使李疵视中山，可攻不也？还报曰：中山可伐也。君不亟伐，将后齐、燕。主父曰：何故可攻。李疵对曰：其君见好^③岩穴之士，所倾盖与车，以见穷阎隘巷之士以十数；伉礼下布衣之士，以百数矣。”^④周秦诸子，固多寓言，然寓诸何国，亦必有所由。中山之文明程度，亦可想见矣。然则古代之戎狄，至秦、汉以后，不复闻其为患者，大抵皆同化与汉族也。汉时南部之降，汉人骄纵之太甚，^⑤卒酿成刘、石之乱，致召冉闵之杀戮。然是时胡人居中国者甚多，闵所杀戮，实不过十之一二。谓足摧挫胡、羯则有之，谓能诛锄胡、羯殆尽，则事理所必无也。^⑥魏五部都尉所统，已二万九千余落。晋初内附武帝使居塞内者，亦辄千

① 见《国语》。麇咎如隗姓。隗姓，《姓苑》谓出古帝大隗氏。

② 《谷梁》例，灭夷狄时，婴儿以贤书月。甲氏，留吁余邑，以贤婴儿，灭亦月。左氏谓狄有五罪，亦谓鄆舒有三僇才。

③ 顾千里曰：“当依下文作好显。”

④ 亦见《中山策》。

⑤ 读扬雄《谏不受单于朝书》，可见此时汉人之见解。

⑥ 据《晋书·载记》：闵躬率赵人，诛诸胡羯，死者二十余万。屯据四方者，所在承闵书诛之。此亦杀其屯聚者耳。又云：“高鼻多须，滥死者半。”高鼻多须，自系白种人，见第十二篇。当时所诛胡，范围甚广，初不专指匈奴。如鲜卑称东胡，西域诸国称西胡是也。闵氏诛胡羯，而非胡羯以形状之异而滥死，则胡羯之形状不异者，必多获免可知。其颇同化於汉族者，更无论矣。

万落。此等非融化於汉族果何往哉？然则中华民族中，匈奴之成分，必不少矣。

附录一 赤狄白狄考

狄之见於《春秋》，或止称狄，或称赤狄、白狄。宣公十五年，“六月，癸卯，晋师灭赤狄潞氏”。《注》：“潞，赤狄之别种。”《疏》云：“狄有赤狄，白狄。就其赤白间，各自别有种类。此潞是国名，赤狄之内，别种一国。夷狄祖其雄豪者，子孙则称豪名为种，若中国之始封君也。谓之赤白，其义未闻，盖其俗尚赤衣白衣也？”^①如《疏》意，则凡狄非属於赤，即属於白矣。窃谓不然。

赤狄种类，见於《春秋》者有三：潞氏及甲氏、留吁是也。宣公十六年，“晋人灭赤狄甲氏及留吁”。《左氏》云：“晋士会帅师灭赤狄甲氏及留吁、铎辰。”^②又成公三年，“晋郤克、卫孙良夫伐麇咎如”。《左氏》曰：“讨赤狄之余焉。”是《左氏》所称为赤狄者，较《春秋》多一铎辰，一麇咎如也。^③至东山皋落氏，则《左氏》亦不言为赤狄。《杜注》云：“赤狄别种也。”《正义》：“成公十三年《传》，晋侯使吕相绝秦，云：白狄及君同州，则白狄与秦相近，当在晋西。此云东山，当在晋东。宣公十五年，晋师灭赤狄潞氏。潞则上党潞县，在晋之东。此云伐东山皋落氏，知此亦在晋东，是赤狄别种也。”其说似属牵强。

白狄种类，《春秋》及《左氏》，皆未明言。昭公十二年《杜注》曰：“鲜虞，白狄别种。”“肥，白狄也。”十五年《注》又曰：“鼓，白狄之别。”《疏》云：“宣公十五年，晋师灭赤狄潞氏。十六年，晋人灭

① 案两鬻亦称乌白蛮。《唐书》：初襄五姓皆乌蛮，其妇人衣黑缁；东欽二姓皆白蛮，其妇人衣白缁。疏盖据后世事推之。

② 《杜》注：“铎辰不书，留吁之属”，似以意言之。

③ 麇咎如，《公羊》作将咎如。

赤狄甲氏及留吁。成公三年，晋郤克、卫孙良夫伐麇咎如。《传》曰：讨赤狄之余焉。是赤狄已灭尽矣。知鲜虞与肥，皆狄之别种也。”其说之牵强，与前说同。

案《春秋左传》言赤狄种类，虽似不同。然铎辰之名，《春秋》无之。“讨赤狄之余焉”，语有两解。刘炫以为“麇咎如之国，即是赤狄之余。”^①杜预则谓宣公十五年晋灭赤狄潞氏，其余民散入麇咎如，故讨之。揆以文义，杜说为长，以《春秋》、《左氏》，於潞氏、甲氏、留吁、铎辰，皆明言为赤狄，於麇咎如则不言也。然则《左氏》之意，不盖以麇咎如为赤狄。《左氏》不以麇咎如为赤狄，而铎辰为《春秋》所无，则《春秋》、《左氏》言赤狄初无歧异矣。然则赤狄自赤狄，白狄自白狄。但言狄者，自属非赤、非白之狄，安得谓凡狄皆可分属赤狄、白狄乎？杜说盖失之也？

予谓赤狄、白狄，乃狄之两大部落。其但称狄者，则其诸小部落。小部落时役属於大部落则有之，若遂以赤白为种类之名，谓凡狄皆可或属诸赤，或属诸白，则非也。《左传》宣公十一年云：“众狄疾赤狄之役，遂服於晋。”必赤狄之名，不苞众狄，乃得如此措辞。若众狄亦属赤狄，当云疾潞氏之役，安得云疾赤狄之役乎？此《春秋》及《左氏》凡言狄者，不得以为赤狄或白狄之明证也。

然则赤狄，白狄，果在何方乎？曰：赤狄在河内，白狄在圉、洛之间。何以知之？曰：以《史记·匈奴列传》言“晋文公攘戎翟居於河内，圉、洛之间，号曰赤翟白翟”知之也。居河内者盖赤狄？居圉、洛之间者，盖白狄也？曰：《史记》上云“攘戎翟”，而下云“号曰赤狄、白狄”，明赤狄，白狄为两种之总称，所苞者广矣。曰：《史记》之言，盖举其大者以概其余，非谓凡狄皆可称赤狄或白狄也。若谓凡狄皆可称赤狄或白狄，则无解於《春秋》之或称赤狄，或称白狄，或但称狄矣。盖狄在《春秋》时，就大体言之，可区为二：一在东方，一在西方。在东方者，侵轶於周、郑、宋、卫、齐、鲁之间。其地盖跨今河北之保定、

^① 见疏。

大名两道，山西冀宁道之东境，河南之河北道。^①其中以居河内之赤狄为最大。居西方者，其地盖跨今山西冀宁道之西境，及河东道。陕西之榆林道及关中道，其中以居圃、洛之间之白狄为最大。故史公举之以概其余也。言春秋时狄事者，莫详於《左氏》。今请举之，以为吾说之证。

狄之居东方者，莫张於庄、闵、僖之间。庄公三十二年，伐邢。闵公二年，入卫。以齐桓公之威，纠合诸侯，迁邢於夷仪，封卫於楚丘，然及僖公十二年，诸侯复以狄难故，为卫城楚丘；其明年，狄侵卫；又明年，侵郑；则其势初未弱也。齐桓公之卒也，宋襄公伐齐而纳孝公。虽曰定乱，实有伐丧之嫌。诸侯莫能正。惟狄人救之。^②是时邢附狄以伐卫。至二十五年，而为卫所灭。狄虽不能救，然二十年，尝与齐盟於邢。《左氏》曰：为邢谋卫难也；二十一年，狄侵卫；三十一年，又围卫，卫为之迁於帝丘；狄之勤亦至矣。先是僖公九年，狄灭温。温者，苏子封邑，周初司寇苏忿生之后也^③十一年，王子带召扬拒、泉皋、伊洛之戎以伐周。入王城，焚东门。秦、晋伐戎以救周。晋侯平戎於王。十二年，王讨王子带。王子带奔齐。齐侯使管夷吾平戎於王，使隰朋平戎於晋。十六年，王以戎难告於齐，齐征诸侯而戍周。此所谓戎，不知与狄有关否？然及僖公二十四年，王以狄师伐郑。冬，遂为狄所伐，出居於郑，大叔以狄女居於温，则必即九年灭温之狄矣。晋文勤王，取大叔於温，杀之於隰城。王以温锡晋。三十二年，狄有乱。卫人乘之侵狄，狄请平焉。其在河内者，至是当少衰。然三十二年及文公七年、九年、十一年，迭侵齐；七年，伐鲁西鄙；十年侵宋；十三年又侵卫，则东方之狄，亦未尝遂弱也。凡此者，《春秋》及《左氏》，皆但称为狄。惟文公七年侵鲁之役，《左氏》云：公使告於晋，赵宣子使因贾季问酈舒，且让之。酈舒潞氏相，

① 或且兼及河洛，开封道境。

② 僖公十八年。

③ 见成公十一年。

似其事由赤狄，然此只可谓侵鲁之狄，役屬於赤狄，不能謂侵魯者即赤狄也。

赤狄見《經》，始於宣公三年之侵齊。六年，伐晉。七年，又侵晉，取向陰之禾。十一年，晉侯會狄於欒函。《左氏》云：“衆狄服也。衆狄疾赤狄之役，遂服於晉。”觀宣公七年趙宣子讓鄆舒，則知赤狄是時所役屬之狄頗衆，故其勢驟張也。及是，黨與携離，勢漸弱矣。十三年，雖伐晉及清，及十五年，潞氏遂爲晉所滅。晉侯治兵於稷，以略狄土。明年，滅甲氏留吁及潞辰。成公三年，又伐麇咎如，以討赤狄之余焉。赤狄之名，自是不復見。蓋赤狄本居河內，是時強盛，故兼據潞氏、甲氏、留吁、潞辰之地也。^①其本據地河內，未知滅亡或否？然縱幸存，其勢力亦無足觀矣。

東方之狄，自晉滅赤狄後，不見於《春秋》及《左氏》者若干年。至昭、定以降，鮮虞、肥、鼓，乃復與晉競。《左傳》昭公十二年，晉荀吳偽會齊師者，假道於鮮虞，遂入昔陽。秋，八月，壬午，滅肥，以肥子綿皋歸。十三年，荀吳以上軍侵鮮虞，及中人。十五年，荀吳伐鮮虞，圍鼓，以鼓子穀鞮歸。既獻而反之。又叛於鮮虞。二十二年，六月，荀吳滅之。定三年，鮮虞人敗晉師於平中。四年，晉士鞅、衛孔圉伐鮮虞。五年，士鞅圍鮮虞。哀公元年，齊、衛會於干侯，救范氏也。師及齊師，衛孔圉，鮮虞人伐晉，取棘蒲。三年，齊、衛圍戚。求援於中山。四年，十一月，邯鄲降。荀寅奔鮮虞。十二月，齊國夏會鮮虞，納荀寅於柏人。六年，晉伐鮮虞，治范氏之亂也。鮮虞、肥、鼓，地與潞氏、甲氏、留吁、潞辰相近；與齊、晉、魯、衛皆有關係；其形勢，正與自莊公至宣公時之狄同。《春秋》及《左氏》皆絕不言爲白狄，不知杜氏何所見而云然？以予觀之，毋寧謂爲與赤狄相近之群狄，爲較當也。

白狄本國，蓋在固、洛之間。然西方之狄，跨居河之東西者亦甚衆，非止一白狄也。晉之建國也，籍談追述其事曰：“晉居深山之

^① 據《左氏》伯宗之言，則潞氏又奪黎侯之地。

中，戎狄之与邻，而远于王室。王灵不及，拜戎不暇”。^①是唐叔受封之时，已与此族为邻矣。二五之说晋献公也，曰：“蒲与二屈，君之疆也。疆场无主，则启戎心。”又曰：“狄之广莫，于晋为都。晋之启土，不亦宜乎？”则蒲、屈所与为界者，即狄人也。僖公五年，晋侯使寺人披伐蒲，重耳奔狄。明年，贾华伐屈。夷吾将奔狄。郤芮曰：后出同走，罪也。不如之梁。梁近秦而幸焉。乃之梁。重耳、夷吾盖皆欲借资於秦以复国。夷吾不果奔狄，仍奔近秦之梁，则狄之近秦可知也。晋文公让寺人披之辞曰：“予从狄君以田渭滨，”则晋文所奔，夷吾所欲奔而未果之狄，即与蒲、屈为界之狄。其地自渭滨跨河而东，界於蒲、屈也。《左传》闵公二年，“虢公败犬戎于渭汭，”虽未知即此狄否，然其地则近矣。重耳之奔狄也，狄人伐麇咎如，获其二女叔隗、季隗，纳诸公子。成公十三年，吕相绝秦之辞曰：“白狄及君同州、君之仇仇，而我之昏姻也。”《杜注》：“季隗，麇咎如赤狄之女也。白狄伐而获之，纳诸文公。”杜氏此《注》，殊属牵强，故《疏》亦游移其辞，不敢强申其说也。凡此等狄，其地皆与白狄相近。然《春秋》及《左氏》皆不明言为白狄，则亦西方之众狄，与白狄相近者而已。僖公八年，“晋里克帅师，梁由靡御，虢射为右，以败狄于采桑。梁由靡曰：狄无耻，从之，必大克。里克曰：惧之而已，无速众狄。虢射曰：期年狄必至，示之弱矣。夏，狄伐晋，报采桑之役也。复期月。”曰“无速众狄，”明西方狄亦甚众，如东方赤狄所役属也。西方之狄，与晋相近，故争鬭颇烈。僖公十六年，因晋韩原之败，侵晋，取狐厨、受铎、涉汾，及昆都。二十八年，晋作三行以御狄。三十一年，又作五军以御狄。三十三年，晋侯败狄于箕。郤缺获白狄子。曰获白狄子，而不言所败者即白狄，盖白狄与他狄俱来也。范文子曰：“吾先君之亟战也，有故。秦、狄、齐、楚皆强，不尽力，子孙将弱。”^②以狄与秦、齐、楚并举，可以见其盛矣。此等狄人，东为

① 昭公十五年。

② 成公十六年。

晋人所攘斥；又秦穆修政，东境至河；^①其在渭滨及河东之地，盖皆日蹙。昭公十三年，晋人执季孙意如，使狄人守之；定公十四年，晋人围朝歌，析成酈，小王桃甲率狄师以袭晋，战于绛中；盖皆其服属於晋者也。《史记》云：“秦穆公得由余，西戎八国服於秦。”^②穆公所服，盖多岐以东之地，即太王所事之獯粥，文王所事之昆夷，及灭幽王之犬戎也。然则同蒲间之狄，盖尽为秦、晋所并矣。白狄居圉、洛之间，其地较僻，盖至魏开河西，上郡而后亡。

白狄之见《春秋》，始於宣公八年，与晋伐秦。成公九年，与秦伐晋。十三年，吕相绝秦之辞曰：“白狄及君同州，君之仇讎，而我之昏姻也。君来赐命曰：吾与女伐敌。寡君不敢顾昏姻，畏君之威，而受命於吏。君有二心于狄，曰：晋将伐女。狄宜且憎，是用告我。”《左氏》亦曰：“秦桓公既与晋为令狐之盟，而又召狄与楚，欲道以伐晋。”白狄盖叛服於秦、晋之间者也。《春秋》哀公十八年，春，“白狄来”《左氏》云：“始来。”盖至是始通於鲁。可见所谓白狄者，惟指圉、洛间一族。若凡在西北者，皆可称白狄，则前此不得迄无往来矣。二十八年，白狄朝晋。昭元年，祁午称赵文子服齐、狄，《杜注》谓指此事，其重视之可知。《管子·小匡篇》，谓齐桓公“西征，攘白狄之地，遂至於西河”。《小匡》述事，不甚可信，然白狄之在西河，则因此而得一左证也。^③

《左传》襄公四年，无终子嘉父使孟乐如晋，因魏庄子，纳虎豹之皮，以请和诸戎。《杜注》谓无终，山戎国名。其《释例》又谓山戎、北戎、无终三者是一。案山戎、北戎在东方，别见予所撰《山戎考》。杜氏之云，未知何据？观魏绛劝晋侯和戎，谓“戎狄荐居，贵货易土，土可贾焉”。又曰：“边鄙不聳，民狎其野，穡人成功”；则其地与晋密

① 《史记·六国表》。

② 此《匈奴列传》文。《秦本纪》云：“益国十二，开地千里。”与《韩非子·十过篇》同。《李斯传》作“并国二十。”二十字疑倒。《汉书·韩安国传》作“并国十四”，四亦疑二之误。古文一二三四皆积画也。

③ 《左》僖三十三年《杜》注：白狄，狄别种也。故西河郡有白部胡。

迹。昭公元年，“晋荀吴帅师败狄于大卤”。《左氏》云：“败无终及群狄于太原”，则无终即在太原附近。疑亦西方之狄，而能役属群狄者也。

夷、蛮、戎、狄之称，其初盖皆按据方位，其后则不能尽然。盖种落有迁徙，而称名不能屡更。故见於古书者，在东方亦或称戎，西方亦或称夷也。《春秋》时之戎，史公概叙之《匈奴列传》中，则亦不得谓之非狄。别见予所撰《山戎考》，此不赘。

附录二 山 戎 考

《管子·大匡篇》曰：“桓公遇南州侯於召陵，曰：狄为无道，犯天子令，以伐小国。以天子之故，敬天子命，令以救伐。北州侯莫至。上不听天子令，下无礼诸侯。寡人请诛於北州之侯。诸侯许诺。桓公乃北伐令支，下鳧之山，斩孤竹，遇山戎。”《小匡篇》曰：“北伐山戎，制冷支，斩孤竹，而九夷始听。海滨诸侯，莫不来服。”又曰：“桓公曰：北至於孤竹、山戎、秽貉，拘秦夏。”《霸形篇》曰：“北伐孤竹，还存燕公。”《戒篇》曰：“北伐山戎，出冬葱与戎菽，布之天下。”《轻重甲篇》曰：“桓公曰：天下之国，莫强於越。今寡人欲北举事孤竹、离枝，恐越人之至，为此有道乎？桓公终北举事於孤竹、离枝，越人果至。”皆以山戎在北方，与燕及孤竹、令支相近。燕召公封地，在今薊县。《汉志》：辽西郡，令支，有孤竹城。^① 则今迁安县也。然《小匡篇》曰：“桓公北伐孤竹，至卑耳之溪。”《小匡篇》曰：“西征，攘白狄之地，遂至於西河。方舟投柁，乘舟济河。至於石沈，县车束马，逾大行与卑耳之貉。拘秦夏。”又曰：“北至於孤竹、山戎，秽貉，拘秦夏。”“卑耳之貉”之貉，当系溪字之误。注随文妄说为“与卑耳之貉共拘秦夏之不服者”，误也。秽貉初在今陕西北境，予别有考。然则卑耳之溪，实在西河、大行附近；与汉之令支县，风马牛不相及

^① 注引应劭曰：“古伯夷国。今有孤竹城。”

矣。《轻重戊篇》曰：“桓公问於管子曰：代国之出何有？管子对曰：代之出，狐白之皮，公其贵买之。代民必去其本，而居山林之中。离枝闻之，必侵其北。”则离枝又在代北，亦非汉令支地也。《谷梁》谓“齐桓越千里之险，北伐山戎，为燕辟地”。又曰：“燕，周之分子也，而贡职不至，山戎为之伐矣。”其释齐侯来献戎捷曰：“军得曰捷，戎，菽也。”皆与管子合。①然《公羊》谓其“旗获而过我”。《疏》云：“齐侯伐山戎而得过鲁，则此山戎不在齐北可知。盖戎之别种，居於诸夏之山，故谓之山戎耳。”自来说山戎者，多主《左》、《谷》，鲜措意《公羊》。然《左氏》於齐侯来献戎捷，但云“诸侯不相遗俘”，无戎菽之说。其说公及齐侯遇於鲁济曰：“谋山戎也，以其病燕故也。”虽似与《谷梁》合。然山戎果去齐千里，何为与鲁谋之？则其消息，反与《公羊》相通矣。《礼记·檀弓》：“孔子过泰山侧，有妇人哭於墓者而哀。”《新序》亦记此事，而云“孔子北之山戎”。《论衡·遭虎篇》云：“孔子行鲁林中。”《定贤篇》云：“鲁林中哭妇。”俞氏正燮谓俱称林中，殆齐配林之类。②明山戎实在泰山附近，故齐伐之，得旗获而过鲁也。《管子》一书，述齐桓、管仲事，多不可据。即如一孤竹也，忽谓其在燕之外，忽焉伐孤竹所济卑耳之溪，又近西河、大行，令人何所适从邪？盖古书本多口耳相传，齐人所知，则管仲、晏子而已，辗转增饰，遂不觉其词之侈也。然谓伐山戎而九夷始听，则亦见山戎之在东而不在北矣。

杜预《释例土地名》，以北戎、山戎、无终三者为一。③《汉志》：右北平，无终，故无终子国，地在今蓟县。然襄公四年，无终子嘉父使孟乐如晋，请和诸戎。魏绛劝晋侯许之，曰：“戎狄荐居，贵货易土，土可贾焉。”又曰：“边鄙不聳，民狎其野，穡人成功。”则无终之

① 《史记·匈奴列传》谓“山戎越燕而伐齐”。又云：“山戎伐燕，燕告急於齐。齐桓公北伐山戎。山戎走。”亦以山戎在北方，与燕近。

② 《癸巳存稿》。

③ 昭公元年疏。僖十年《注》曰：“北戎，山戎。”襄公四年《注》曰：“无终，山戎同名。”昭公元年《注》曰：“无终，山戎。”庄公三十年《注》则曰：“山戎，北戎。”

地，必密迹晋。故昭公元年，荀吴得败无终及群狄於太原。若谓在今蓟县，则又渺不相及矣。故《义疏》亦不信其说也。

北戎之见於《春秋》者，僖公十年，齐侯，许男伐北戎。其见於《左氏》者，隐公九年，北戎侵郑；桓公六年，北戎伐齐。亦绝无近燕之迹。且隐公九年郑伯之患北戎，昭公元年魏舒之策无终，皆云“彼徒我车”；而《小匡篇》亦以“北伐山戎，制冷支，斩孤竹，而九夷始听”，与“中救晋公，禽狄王，败胡貉，破屠何，而骑寇始服”对举。胡者，匈奴东胡，貉即涉貉。屠何者，《墨子·非攻中篇》曰：“虽北者且不一著何，其所以亡於燕、代、胡、貉之间者，亦以攻战也。”孙氏诂让曰：“且不一著何，当作且，不著何。且疑祖之借字。《国语》：晋献公田，见翟祖之氛。韦《注》云：翟祖国名是也。不著何，亦北胡。《周书·王会篇》云：不屠何青熊。又《王会·伊尹献令》。正北有且略、豹胡。且略即此且及《左传》翟祖。豹胡，亦即不屠何。豹不，胡何，并一声之转。不屠何，汉为徒何县，属辽西郡。故城今奉天锦县。祖，据《国语》，为晋献公所灭，所在无考。”案孙说近之。古代异族在北徼者多游牧，杂居内地者则否。胡貉、屠何，为骑寇，而山戎、令支、孤竹不然，又以知其非一族矣。

戎之名，见於《春秋》者甚多。隐公二年，“春，公会戎于潜”。“秋，八月，庚辰，公及戎盟于唐”。^①七年，“冬，天王使凡伯来聘。戎伐之于楚丘，以归”。桓公二年，“公及戎盟于唐”。庄公十八年，“夏，公追戎于齐西”。二十四年，“冬，戎侵曹”。二十六年，“春，公伐戎”。其地皆在今山东境。虽不云山戎，亦近鲁之地多戎之证也。窃疑山戎占地颇广，次第为诸国所并。至战国时，惟近燕者尚存。后人追述管子之事，不知其时之山戎，疆域与后来不同也，则以为在燕北而已矣。记此事者独《公羊》不误，亦足雪口说流行之诬矣。

① 又是年，“无骇帅师入极。”贾云：极，戎邑。见《疏》。

附录三 长狄考

《孟子》曰：“其事则齐桓、晋文，其文则史。孔子曰：其义，则丘窃取之矣。”斯言也，实治《春秋》者之金科玉律也。能分别其事与义，则《春秋》作经读可，作史读亦可。而不然者，则微特不能明《春秋》之义，於春秋时事，亦必不能了也。

《春秋》事之可怪者，莫如长狄。文公十一年《经》云：“叔孙得臣败狄于咸。”但云狄而已。而《公羊》及《左》、《谷》，皆以为长狄。《左氏》所载，但云长狄有名缘斯者，获於宋；有曰侨如者，毙於鲁叔孙得臣，侨如之弟焚如，获於晋；荣如获於齐；简如获於卫；郑瞞由是遂亡而已。无荒怪之说也。《公羊》云“记异”，而不言其所以异。《谷梁》则云：“弟兄三人，佚宕中国。瓦石不能害。叔孙得臣，最善射者也。射其目。身横九亩。断其首而载之，眉见于轼。”其荒怪甚矣。

注家之言，《谷梁》范《注》，但循文敷衍，无所增益。《左氏》杜《注》亦然。①何君之意，则不以长狄为人。故注兄弟三人曰：“言相类如兄弟。”又曰：“鲁成就周道之封，齐、晋霸，尊周室之后。长狄之操，无羽翮之助。别之三国，皆欲为君。此象周室衰，礼义废，大人无辅佐，有夷狄行。事以三成，不可苟指一。故自宣、成以往，弑君二十八，亡国四十。”②《疏》引《关中记》曰：“秦始皇二十六年，有长人十二，见於临洮。身长百尺，皆夷狄服。天诫若曰：勿大为夷狄行，将灭其国。”《谷梁疏》引《考异邮》曰：“兄弟三人，各长百尺，别之国，欲为君。”《汉书·五行志》引《公》、《谷》说，而曰：“刘向以为是时周室衰微，三国为大，可责者也。天诫若曰：不行礼义，大为夷狄之行，将至危亡。其后三国皆有篡弑之祸。近下人伐上之

① 其云“盖长三丈”，乃本《国语》。《国语》、《左氏》，固一家言也。

② 二十八当作二十，四十当作二十四，见疏。

痼。”又引京房《易传》曰：“君暴乱，疾有道，厥妖长狄入国。”又曰：“丰其屋，下独苦。长狄见，主为虏。”又曰：“《史记》：秦始皇帝二十六年，有大人，长五丈，足履六尺，皆夷狄服。凡十二人，见於临洮，天诫若曰：勿大为夷狄之行，将受其祸。后十四年而秦亡。亡自戍卒陈胜发。”其义皆与何君同。

以长狄为非人，似极荒怪。然束阁三传，独抱遗经，以得臣所败，亦寻常之狄则可。否则以之为人，其怪乃甚於非人也。记事荒怪，《谷梁》为甚。然《公羊》谓“其兄弟三人，一者之齐，一者之鲁，一者之晋。其之齐者，王子成父杀之；之鲁者，叔孙得臣杀之；则未知其之晋者也”。其说全与《谷梁》同。特不云其佚宕中国，瓦石不能害，又不言其长若干而已。然《谷梁》云：“不言帅师而言败，何也？直败一人之辞也。一人而曰败何也？以众焉言之也。”①《公羊》曰：“其言败何？大之也。其日何？大之也。其地何？大之也。”意亦全同。以得臣所败为一人，则非谓其瓦石不能害，身横九亩，断其首而载之，眉见於轼不可矣。故《公谷》之辞，虽有详略，其同出一本，盖无疑也。②惟《左氏》之说，最为平正。其曰：“富父终甥搏其喉以戈，杀之”，特记其杀之之事，非有瓦石不能害，必射其目之意也。详记齐、鲁二国埋其首之处，则杜氏所谓骨节非常，恐后世怪之，更未尝有身横九亩，眉见於轼之说也。虽杜《注》谓“荣如以鲁桓公十八年死，至宣公十五年一百三岁，其兄犹在，《传》言既长且寿，有异於人”。然年代舛讹，古书恒有。此乃杜推《左氏》之意如此，《左氏》之意，初未必如此也。然则《左氏》果本诸国史，记事翔实，而《公羊》、《谷梁》，皆不免口说流行之诮邪？

盖《公羊》所云“记异”者，乃《春秋》之义也。何君所言，则发明《公羊》之所谓异者也。与事本不相干。至《公》、《谷》之记事，与《左氏》之记事，则各有所取。古事之传於今，有出史官之记载，士夫之

① 范《注》：“言其力足以敌众。”

② 《谷梁》曰：“传曰”云云，盖据旧传也。

传述者；亦有出於东野人之口，好事者之为者。有传之未久，即著竹帛者；亦有辗转传述，乃形简策者。由前之说，其言恒较雅，其事亦较确。由后之说，则其词多鄙，其事易芜。《左氏》所资，盖属前说；《公》、《谷》所本，则属后说也。以记事论、《左氏》诚为近实。然以义论，则公羊子独得圣人之传已。

《左氏》之记事，诚近实矣。然长狄究为何如人，《左氏》未之言也。则请征之《国语》。《国语》：“吴伐越，堕会稽，得骨专车，使问仲尼。仲尼曰：昔禹致群神於会稽山，防风氏后至，禹杀而戮之。其节专车。客曰：防风何守？仲尼曰：汪罔国之君也。守封禺之山。漆姓。在虞、夏、商为汪罔氏，於周为长翟氏。今谓之大人。客又曰：人长之极几何？仲尼曰：焦侥氏三尺，短之至也。长者不过十之，数之极也。”^①如此说，则长狄之先，有姓氏及封土可稽，身長三丈，乃出仲尼推论，非谓其实如是；了无足怪矣。《义疏》云：“如此《传》文，长狄有种。种类相生，当有支胤。惟获数人，其种遂绝，深可疑之。命守封禺之山，赐之以漆为姓，则是世为国主，绵历四代，安得更无支属，惟有四人？且君为民心，方以类聚；不应独立三丈之君，使牧八尺之民。又三丈之人，谁为匹配？岂有三丈之妻，为之生产乎？人情度之，深可怪也。”又引苏氏云：“《国语》称今日大人，但进居夷狄，不在中国，故云遂亡。”案苏氏所疑，盖同《贾疏》，故以是为解。然窃谓无足疑也。《疏》之所疑，首由不知身長三丈，乃出仲尼推论而非其实。若知此义，自不嫌以三丈之君，牧八尺之民；更不疑乏三丈之妻，为之生产矣。次则不知鄭瞞遂亡，惟指防风一族。盖泰伯、仲雍，窜身扬越，君为姬姓，民则文身。设使当日弟昆，并被异邦戕杀，南国神明之胄，固可云由是而亡。汪芒本守会稽，长狄跌宕兖、冀，盖由支裔北徙，君临群狄；昆弟迭见诛夷，新邑遂无遗种，此亦不足为怪。至於封禺旧守，原未尝云不祀忽诸也。

① 《史记·孔子世家》，《说苑》、《家语·辨物篇》略同。惟《说苑》漆姓作厘姓。又云：“在虞，夏为防风氏，商为汪芒氏”耳。《说文》亦曰：“在夏为防风氏，殷为汪芒氏。”

1921年10月8日，予客沈阳，读是日之《盛京时报》，有云：“北京西城大明濠，因治马路，开掘暗沟。有工人，在下冈四十号民家墙根下，掘得巨人骸骨八具。长约八尺余。头大如斗。弃之坑内。行人观者如堵。监者虑妨工作，乃命工人埋之。”^①此事众目昭彰，不容虚构。知史籍所云巨人，侏儒，纵有过当之辞，必非子虚之说矣。长狄之长，何君云百尺，盖本之《关中记》等书。杜云三丈，本诸《国语》。范云五丈四尺，则就九亩之长计之，并非其实。窃谓《左氏》：“富父终甥搃其喉以戈”一语，即所以状长狄之长。谓恒人举戈，仅及其喉也。然则长狄之长，断不能越北京西城所得之骨矣。岂今日北京西城之地，亦古代长狄埋骨之区邪？

夫“语增”则何所不至？今之欧洲人，皆长於中国人；日本人则短於中国人。来者既多，日习焉则不以为异。设使欧人、日人、来者不过一家数口，后遂无以为继，数十百年之后，或则同化於我，或则绝世无传，而吾国於此，亦无翔实之记载，一任传说者之悠谬其辞，则不一再传，而欧人为防风，而日人为僬侥矣。然则《公》、《谷》记事之缪悠，亦不足怪，彼其所资者则然也。故借长狄之来以示戒，《春秋》之意也。古有族曰防风，其人盖别一种类，颇长於寻常人，事之实也。曰百尺，曰三丈，曰五丈四尺，事之传讹，说之有托者也。曰瓦石不能害，弟兄三人，即能伏宥中国，致兴大师以获一人，则又身长之传语既增，因而辗转附会焉者也。一一分别观之，而《春秋》之义得，而《春秋》之事亦明矣。故曰：分别其事与义，乃治《春秋》者之金科玉律也。

附录四 秦始皇筑长城

秦始皇帝筑长城，誉之者以为立万古夷夏之防，毁之者以为不足御侵略，皆不察情实之谈也。《史记·匈奴列传》曰：“士力能弯弓，

^① 该报但云日前，未确记其日。

尽为甲骑。”又曰：“自左右贤王以下至当户，大者万余骑，小者数千。凡二十四长，立号曰万骑。”则匈奴壮丁，尚不足二十四万。《史记》又云：冒顿“控弦之士三十万”，盖其自号之虚词也。^①南部之并北部也，领户三万四千，口二十三万七千三百，胜兵五万一百七十七人。所谓胜兵，即力能弯弓之士也。然则匈奴壮丁，居其民数五之一弱。^②今即以匈奴兵数为二十四万，以五乘之，其口数亦不过百二十万耳。贾生谓匈奴之众，不当汉千石大县；中行说谓匈奴人众，不能当汉之一郡，非虚词也。冒顿尽服从北夷时，口数如此，头曼以前当何如？《史记》曰：“自陇以西，有绵诸、緄戎、翟獫之戎。岐梁山、泾、漆以北，有义渠、大荔、乌氏、朐衍之戎。而晋北有林胡、楼烦之戎，燕北有东胡、山戎，各分散居溪谷，自有君长；往往而聚者，百有余戎，然莫能相一。”头曼以前之匈奴，则亦如此而已。此等小部落，大兴师征之，则遁逃伏匿，不可得而诛也；师还则寇钞又起；留卒戍守，则劳费不资；故惟有筑长城以防之。长城非起始皇，战国时，秦、赵、燕三国，即皆有之。皆所以防此等小部落之寇钞者也。齐之南亦有长城，齐之南为淮夷，亦小部落，能为寇钞者也。若所邻者为习於战陈之国，则有云梯隧道之攻，虽小而坚如偃阳，犹惧不守，况延袤至千百里乎？然则长城之筑，所以省戍役，防寇钞，休兵而息民也。本不以御大敌。若战国秦时之匈奴，亦如冒顿，控弦数十万，入塞者辄千万骑，所以御之者，自别有策矣。谓足立万古夷夏之防，几全不察汉后匈奴、鲜卑、突厥之事，譬孰甚焉。责其劳民而不足立夷夏之防，其论异，其不察史事同也。

① 《新书·匈奴篇》曰：“窃料匈奴控弦，大率六万骑，五口而出介卒一人，五六三十，此即户口三十万耳。”此则其数太少。或贾生所计，非匈奴全国之众。

② 与贾生五口而出介卒一人之说合。

第四章 鲜 卑

北方游牧之族，继匈奴而起者，时曰鲜卑。鲜卑，古称东胡。《史记·匈奴列传》所谓“燕北有东胡，山戎”是也。^①又曰：“燕将秦开，为质与胡。胡甚信之。归而袭破东胡。东胡郤千余里。燕筑长城，自造阳至襄平，置上谷、渔阳、右北平、辽西、辽东五郡以拒胡。”则东胡之所弃者，必即此五郡地矣。^②秦始皇时，东胡亦强，后为匈奴冒顿所袭破。《后汉书》曰：“乌桓、鲜卑，本东胡。冒顿灭其国，余类保乌桓山，因以为号焉。”世因以东胡为北族之本名；乌桓，鲜卑，为其破灭后，因所居之山而得之称号。然《史记索隐》引服虔曰：“东胡，乌桓之先，后为鲜卑。在匈奴东，故曰东胡。”又引《续汉书》曰：“桓以之名，乌号为姓。”则东胡者，中国人称之之词。乌桓者，彼族大人健者之名姓。乃分部之专称，非全族之通号。惟鲜卑实其本名，故乌桓后来，亦以之自号也。希腊罗马古史，载里海以西，黑海之北，古代即有辛卑尔族居之。又拓跋先世，出于西伯利亚，而史亦云“国有大鲜卑山”，足知鲜卑种人，占地甚广，不仅匈奴之东，山岭崎岖之地矣。^③

《后汉书》所谓乌桓、鲜卑二山，盖在今蒙古东部。苏克苏鲁、索岳尔济等山是也。^④二山盖乌桓在南，故其去中国较近，与中国之

① 《山海经·海内西经》：“东胡，在大泽东。”又《周书·伊尹四方令》，正北有东胡。

② 是时居五郡之地，疑尚不止东胡。涉貉、肃慎等皆与焉。参看第五、六两篇。

③ 汉时之乌桓、鲜卑，盖皆山以部族名，而非部族以山名。参看附录《鲜卑》及《后魏出自西伯利亚》两条。

④ 更东则为肃慎，更北则为涉貉矣。参看该两篇自明。《史记·匈奴列传》云：“东胡与匈奴间有弃地莫居千余里。”匈奴左方王将直上谷。上谷今宣化，自宣化之北，至苏克苏鲁一带，恰千里也。

交涉亦较多。

乌桓自为冒顿所破，常臣服匈奴。岁输牛、马、羊皮。过时不具，辄质其妻子。及霍去病击破匈奴左地，乃徙其众于五郡塞外，为汉侦察匈奴动静。其大人岁一朝见。置护乌桓校尉监领之。壶衍鞬单于时，乌桓稍强。乃发单于冢墓，以报冒顿之怨。匈奴怒，发兵二万骑击破之。霍光闻之，遣范明友将二万骑出辽东邀击匈奴。时乌桓亦数犯塞。光戒明友：“兵不空出。即后匈奴，遂击乌桓。”斩首六千余级，获其三王首。乌桓由是怨，寇幽州。宣帝时，乃稍保塞归附。王莽欲击匈奴，使严尤领乌桓屯代郡，皆质其妻子。乌桓不便水土，数求去。不许。遂自亡去。诸郡尽杀其质子。由是结怨。匈奴因诱臣之。光武初，匈奴率乌桓、鲜卑进扰北边。乌桓居近塞，朝发穹庐，暮至城郭，矛盾尤深。建武二十二年，匈奴乱，乌桓乘弱击破之。匈奴北徙数千里。漠南地空。帝乃以币帛赂乌桓。二十五年。辽西大人郝思等二百二十二人诣阙朝贡。封其渠帅为侯、王、君、长者八十一人。皆居塞内。布列辽东属国、辽西、右北平、渔阳、广阳、上谷、代郡、雁门、太原、朔方诸郡。招徕种人，给其衣食，为汉侦察，助击鲜卑。置校尉於上谷、宁城。^①而鲜卑亦以是时通译使。其归附者，诣辽东受赏赐。青、徐二州，岁给钱二亿七千万，以为常。安帝永初中，宁城下通胡市。因筑南北两部质馆。鲜卑邑落百二十部，各遣子入质。灵帝时，乌桓、上谷大人难楼，辽西大人丘力居，辽东大人苏仆延，右北平大人乌延，皆拥众千百落，自称王。丘力居死，子楼班年少，兄子蹋顿立。骁勇。边长老皆比之冒顿。袁绍矫制，皆拜为单于。^②广阳人阎柔，少没乌桓、鲜卑中，为所尊信。乃因鲜卑杀校尉邢举而代之。绍亦因加抚慰。绍败。子尚奔蹋顿。阎柔降，曹操即以为校尉。建安十二年，操破乌

① 今河北涿鹿。

② 后难楼，苏仆延奉楼班为单于，蹋顿为王。然蹋顿犹兼计策。

桓於柳城，^① 斩蹋顿，尚与楼班、乌延奔辽东。太守公孙康皆斩送之。余众降者，及阎柔所统万余落，皆徙诸中原，帅与征伐。由是三郡乌桓，为天下名骑。而其本族微不复振。见於史者，惟《新唐书》所载，有一极小部落，居乌罗浑之北云。

鲜卑当和帝时，北匈奴逃亡，转徙据其地。匈奴留者十余万落，悉自号鲜卑。由是始盛。^② 桓帝时，其大人檀石槐，尽据匈奴故地。立庭於高柳北三百余里弹汗山上。^③ 分其众为三部：东部，自右北平至辽东，接遼貉、夫余。中部，自右北平以西至上谷。西部，自上谷以西至敦煌。屡次进扰。灵帝发兵三万征之，皆败绩。檀石槐死，子和连立。攻北地，为善弩射者所杀。子骞曼年小，兄子魁头立。后骞曼长大，与之争国。众遂离散。而小种鲜卑辄比能盛。自云中、九原，东抚辽水。亦数进扰。魏青龙中，幽州刺史并领乌桓校尉王雄遣勇士刺杀之。诸弟继统其众，在辽西、渔阳、右北平塞外，边地从此安定。

乌桓、鲜卑，汉时盖分为众小部落。观其来朝者，乌桓百二十大人，入质者，鲜卑百二十部可见。自遭冒顿之祸，历前后汉四百年，未尝大见破坏。而鲜卑又并匈奴之众，其户口当大增。然终比较安定者盖以此。然部落既盛，复日与汉人相接，渐染其文化；程度渐高，终必有能用其众者，此慕容、拓跋诸氏之所由兴也。十六国中，鲜卑有三：曰慕容氏，曰乞伏氏，曰秃发氏；而拓跋氏继诸国之后，尽并北方。继其后而据关中者，又有宇文氏焉。渤海高氏，虽云汉姓，然久居朔土，遂化於胡，论其气质，实鲜卑也。与慕容氏并起辽西者，又有段氏。乘后魏之衰而入中原，为宇文、高氏之前驱者，又有尔朱氏。随尔朱氏入中原者，又有贺拔氏、侯莫陈氏等。虽其业或成或不成，然其进入中原则一也。盖乌桓，鲜卑当汉时散

① 今辽宁凌源。

② 《三国志》注引《魏略》，谓其地东接辽水，西当西城。西城，在今陕西安康北。

③ 高柳，在今山西阳高北。

处辽东之北，至於凉州。部落虽小而甚众。两晋之世，收率辽东西之众者为慕容氏，收率上谷以西之众者为拓跋氏，介於慕容、拓跋二氏之间者，则宇文氏及段氏也。北魏自南迁以前，根本之地，实在平城，对北重於对南。^①六镇之设，盛简亲贤，配以高门子弟，实为全国兵力所萃。慕容氏既入中原，故所据地，多为高句骊所陷。辽东西之鲜卑，遂不复振。后魏全国兵力所萃，亦即鲜卑全族兵力所萃矣。胡灵后之乱，尔朱、宇文诸氏，纷纷奔突中原。及其力尽而踣，而鲜卑乱华之局，亦遂於此告终，职是故也。惟宇文氏之众，当为慕容氏所破时，别有一支，徙居西辽河流域。隋、唐两代，休养生息，渐致盛强。晚唐、五代之间，遭遇时会，遂能崛起，囊括北方，割据中国之燕、云焉。盖鲜卑种人数千年来之盛衰如此。^②

当慕容氏崛起时，其支庶又有西徙入今青海者，是为吐谷浑。吐谷浑者，廋庶兄。与廋不协，西附阴山，踰陇而西，止于枹罕。^③及于其孙，遂以王父字为氏。吐谷浑传十二世至拾寅，邑于伏罗

① 太武所以屡亲征柔然，高车者以此。

② 慕容氏之先曰莫护跋。建国於棘城之北，今辽宁凌源县境也。孙涉归，徙邑於辽东北。涉归子廋，徙徒河之青山，在今辽宁锦县。后又迁大棘城，在今辽宁义县。廋子皝，筑龙城，徙居之，则今辽宁之朝阳县也。慕容氏盛时，尝东侵高句骊，北并夫余，西破宇文氏。今辽宁全省，吉林西南境皆其地。乞伏氏：据《晋书·载记》，谓自漠北南出大阴山。后居苑川，在今甘肃靖远县境。秃发氏，《载记》云、其先与后魏同出。有四孤者，始自塞北迁于河西。卒，子寿罔立。初母孕寿罔时，因寝，产于被中，乃名秃发，其俗为复被之义。窃疑秃发、拓跋，同音异译。拓跋氏之先，出自西伯利亚，见附录。诤汾传子力微，始居定襄之盛乐，地在今归绥县北。四传至乐官，分为三部：一居上谷之北，濡源之西，东接宇文，自统之。濡水，今滦河也。一在代郡北参合陂，兄子猗荷统之。参合陂，在今阳高县境。一在盛乐，兄子猗卢统之。猗卢合三部为一。助刘琨攻匈奴。琨锡以陁北之地。乃城盛乐为北都。修古平城为南都。后世以内难，尝筑城于东木根山。又以石赵来攻，迁于大宁。东木根山，在汉五原郡境，黄河东岸。大宁，在今宣化西北。其后又迁新盛乐，在故城南八里。至什翼犍，为符秦所灭。道武帝复兴，仍居平城。宇文氏，见附录。段氏出于辽西。有曰陆眷者，因乱，被卖为渔阳乌丸子家奴。渔阳乱，其主使将众就食辽西。招诱亡叛，遂致强盛，控弦十余万。其后世尝助王浚攻石勒。又貳于勒。后以自相携，或降于勒，或为石虎所破。徙屯令支。石氏亡，其酋南据齐地，为慕容氏所灭。尔朱氏，其先居尔朱川，世为部落酋帅。贺拔氏，与魏俱出阴山。侯莫陈氏，后魏别部。居库斛真水。世为渠帅。

③ 今甘肃临夏。

川。^①十五世夸吕、徙青海西十五里之伏俟城。十九世诺曷钵，唐高宗龙朔三年，为吐蕃所破，走凉州。咸亨元年，薛仁贵纳之，大败。吐谷浑残众走鄯州。^②又徙灵州^③唐为置安乐州，拜为刺史。传四世，又为吐蕃所破。残众徙朔方、河东。德宗贞元十四年，以复为长乐都督，青海国王，袭可汗号。传一世而绝。五代时，其众服属于辽。

当拓跋氏之强，塞外诸部，尽为所收摄，然亦有崛强不服者，则柔然是也。柔然：《南史》云：“匈奴别种。”殊误。《魏书》云：“始神元之末，掠骑有得一奴，发齐肩。无本姓名，其主字之曰木骨间。木骨间者，首秃也。木骨间，郁久间声相近，故后子孙因以为氏。木骨间既壮，免奴为骑卒。穆帝时，坐后期当斩。亡匿广漠溪谷间。收合逋逃，得百余人。依纯突邻部。^④木骨间死，子车鹿会，雄健，始有部落，自号柔然。后太武以其无知，状类于虫，故改其号曰蠕蠕。”阿那瓌之降魏也，启魏主：“臣先世缘由，出于大魏。”观此，则柔然之先，必为鲜卑。惟纯突邻部，似系高车部落。车鹿会五传至社崆，为道武所破，遁走漠北，破斛律，并拔也稽，^⑤则所用者，几全为高车之众矣。社崆三传至大檀，复南徙犯塞。太武屡亲征之。^⑥降高车部落数十万。柔然由是衰弱，高车叛之，又有内乱。至明帝正光元年，阿那瓌，婆罗门先后降魏。魏置阿那瓌于怀朔镇北之吐六奚泉，^⑦婆罗门于敦煌北。时唃廝囉盛强，其王三妻，皆婆罗门妹。婆罗门叛降唃廝囉，为魏兵所讨禽。阿那瓌众渐盛。属魏衰乱，稍骄。天平后，^⑧遂复行敌国之礼。东西魏分立，虑其为敌用，争结昏姻，厚赂遗以抚之。然柔然终以不振，而其属部突厥，兴于西北方。北

① 丁谦曰：今湟水源博罗中克克河。

② 今青海西宁、乐都等地。

③ 今宁夏灵武。

④ 疑当作纥突邻。

⑤ 当即唐时之拔也固。

⑥ 大檀及其子吴提，孙吐贺真时。

⑦ 怀朔镇，在今内蒙古自治区五原。

⑧ 东魏孝静帝年号。

齐神武帝天保二年，突厥击柔然，大破之。阿那瓌自杀。北齐辅立其后，仍为突厥所破。西魏恭帝二年，阿那瓌子庵罗辰率千余家奔关中。突厥使译相继，请尽杀以甘心。周文帝议许之，收缚柔然主以下三千余人付突厥，尽杀之于青门外。柔然遂亡。柔然虽鲜卑分部，然其所用者，多高车之众。以民族论，实于鲜卑之关系浅，与高车之关系深。与谓为元魏之旁支，不如谓为突厥之前驱也。

鲜卑部落兴起最后者，时曰契丹。契丹者，宇文氏别种。^①为慕容氏所破，窜于松漠之间。又为元魏道武帝所破。乃分为二：西曰奚。^②东曰契丹。奚众依土护真水，^③盛夏徙保冷陁山。^④契丹在潢水之西，土河之北。^⑤奚众分为五部，契丹分为八部焉。魏孝文时，有部族曰地豆干者，^⑥欲与高句丽、柔然分其地。契丹惧，内附。止白狼水东。^⑦北齐文宣帝之世，击破之。虏其男女十余万口。又为突厥所逼，仅以万家寄于高句丽。隋时，乃复来归。依托纥臣水^⑧以居，分为十部。唐初，其酋长窟哥内属，以其地置松漠都督府。又有辱纥主曲据者，亦来归，以其地为玄州。奚酋可度者内附，以其地为饶乐都督府。又以八部，五部皆为州。而以营州^⑨统饶乐，松漠二府焉。唐时，君临契丹者为大贺氏，继为遥辇氏，最后为世里氏。^⑩《辽史·地理志》谓唐以大贺氏窟哥为使持节都督十州军事，窟哥殆大贺氏之始祖邪？窟哥死，契丹连奚叛。行军总管阿史德枢宾执松漠都督阿卜固，献于京师。阿卜固盖亦大贺氏，窟哥后也。窟哥孙曰尽忠，为松漠都督。先是高祖时，契丹

① 参看附录《宇文氏先世》条。

② 本称库莫奚。隋以后去库莫，但称奚。

③ 今英金河。

④ 在斡州西北。

⑤ 潢水，今辽宁西拉木伦河。土河，今老哈河。

⑥ 在室韦西千余里。

⑦ 亦今大凌河。《辽史·营卫志》云：是时始去奇首可汗故壤。

⑧ 吐护真之异译。

⑨ 治柳城。

⑩ 参见附录《契丹部族》条。

别部酋帅孙敖曹内附。诏于营州城旁安置。即以其地还归诚州。尽忠，敖曹孙，万荣之妹婿也。武后时，尽忠、万荣反，陷营州。进攻幽、冀。武后发大兵讨之，不能克。会尽忠死，其众为突厥默啜所袭破。万荣亦败于奚，为其家奴所杀。其余众不能立，遂附于突厥。契丹是时，虽见破坏，然其兵力，则已崭然见头角矣。玄宗开元二年，尽忠从父弟失活，以默啜政衰，来归。奚酋李大酺亦降。^①仍置松漠、饶乐二府，复营州都督。失活卒，^②从父弟娑固袭。有可突干者，勇悍。娑固欲除之，不克。奔营州。都督许钦澹发兵及李大酺攻之，败绩。娑固、大酺皆死。钦澹惧，徙军入榆关。是为奚人见弱于契丹之始。可突干立娑固从父弟鬱干。卒，^③弟吐干袭。复与可突干猜阻，来奔。国人立吐干弟邵固，^④为可突干所弑。胁奚众共附突厥。奚酋鲁苏^⑤不能拒，亦来奔。幽州击可突干，破之。可突干走，奚众降。可突干复盗边。朝廷擢张守珪为幽州长史，经略之。守珪善将，可突干惧，阳请臣，而稍趋西北倚突厥。有过折者，亦契丹部长，与可突干俱掌兵，不相能。守珪使客阴邀之，即斩可汗屈列及可突干来降。时开元二十二年也。以过折为松漠都督。未几，为可突干余党泥里所弑，屠其家。泥里，即雅里，亦作涅里，辽太祖七世祖也。《辽史·百官志》载遥辇氏可汗九世：曰洼，曰阻午，曰胡刺，曰苏，曰鲜质，曰昭古，曰耶谿，曰巴刺，曰痕德堇，《营卫志》以屈列当洼可汗，则自邵固以上，皆大贺氏矣。^⑥辽人立迪辇阻里。唐赐姓名曰李怀秀，妻以宗室出女。时天宝四年也。是岁，杀公主，叛去。迪辇阻里，《辽史》以当阻午可汗。安禄山讨破之。

① 时奚亦服默啜。

② 开元六年。

③ 开元十年。

④ 从《辽史》。《唐书》云李尽忠弟，误。

⑤ 大酺弟。

⑥ 《辽史·耶律曷鲁传》说奚曰：“契丹与奚，言语相通。实一国也。我夷离堇於奚，岂有陵轹之心哉？汉人杀我祖奚首，奚离堇怨次骨，日夜思报汉人，顾力微弱，使我求援於奚耳。”此奚离堇指太祖，则奚首者，太祖先世，为中国所杀者也。疑即可突干。

更封其酋李楷落。^①自是契丹中衰，附奚以通于唐。其酋长曰屈戌，武宗会昌二年，回纥破，来降。《辽史》以当耶谟。习尔，咸通中再贡献。《辽史》以当巴剌。曰钦德，即痕德堇也。嬗于辽太祖。

太祖七世祖曰雅里，即弑过折之泥里，已见前。据《太祖本纪》，雅里之子曰昆牒，昆牒之子曰颜领，颜领之子曰肃祖褥里思，肃祖之子曰懿祖萨剌德，懿祖之子曰玄祖匀德，玄祖之子曰德祖撒刺的，德祖之子，即太祖也。当大贺氏之亡，推载雅里者颇众。雅里让不有国，而立遥辇氏。^②时则契丹八部，仅存其五。雅里乃更析为八。又析三耶律为七，二审密为五。三耶律者，曰大贺，曰遥辇，曰世里，即相次居汗位者。二审密者，曰拔里，曰乙室已，即后来之国舅也。三耶律之析为七也，大贺，遥辇二氏分为六，而世里氏仍合为一。是为迭剌部。故终遥辇氏之世，强不可制云。契丹之初，草居野次，靡有定所。雅里始制部族各有分地。又立制度，置官属。刻木为契，画地为牢。政令大行。《地理志》：庆州，“辽国五代祖勃突，貌异常。有武略，力敌百人。众推为主。生勃突山，因以为名。没葬山下”。以世数核之，当为颜领。以音译求之，则于毗牒为近。案雅里为太祖七世祖，^③明白无疑。而《兵卫志》误作六世，岂《地理志》亦误差一世，因以毗牒为五世欤？肃祖大度寡欲，令不严而人化。懿祖尝与黄室韦挑战，矢贯数扎。玄祖教民稼穡，又善畜牧，国以殷富。德祖仁民爱物，始置铁冶。其弟述澜，亦称释鲁，^④为于越。遥辇氏岁贡於突厥，至是始免。^⑤述澜北征于厥、室韦，南略易、定、奚、霫。始兴版筑，置城邑。教民种桑麻，习织组。已有广

① 祿山又出兵讨契丹，大败。《辽史·营卫志》：“太祖四世祖褥里思，时为迭剌部奚离董。遣只里姑逆战潢水南，祿山大败。”《蒲塔葛传》：“八世祖只哈，遥辇氏时，尝为唐人。当安祿山来攻，只哈战於鲁山之阳，败之。以功，为北府宰相。”即其事也。可见契丹当时兵力之强。

② 见《耶律曷鲁传》。

③ 并太祖数之，实当云八世。

④ 皇子表述澜为玄祖三子，德祖第四。

⑤ 疑当作回纥，屈戌时事。

土众民之志。至太祖，乘遥辇氏之衰，又直晚唐之乱，遂崛起而成大业焉。^①太祖东北灭渤海，服室韦，女直；西北服黠戛斯；西南服党项、沙陀、鞑靼、吐谷浑、回鹘；远至吐蕃、于阗、波斯、大食，亦通朝贡；其声威可谓极广。《辽史·地理志》称其地“东至海，西至金山，暨於流沙，北至胘胸河，南至白沟”，犹仅以疆理所及言之也。

奚众当唐时，未尝犯边，有劳征讨，致遭破坏。然其后反弱於契丹。岂以宴安致然邪？抑其众本寡弱也？南北朝时，奚分五部：曰辱纥主，曰贺莫弗，曰契固，曰木昆，曰室得。有阿会氏，五部中最盛，诸部皆归之。唐时，五部：曰阿会，曰处和，曰奥失，曰度稽，曰元俟折。五代时五部：曰阿荅，曰噶米，曰奥质，曰奴皆，曰黑纥支，盖即唐五部异译。居幽州东北数百里琵琶川。契丹太祖强，奚服属之。常为之守界上。契丹苛虐，奚王去诸怨叛，以别部西徙妫州，依北山射猎。^②常采北山麝香、人参赂刘守光以自诿。其族至数千帐。始分为东西奚。去诸卒，子扫刺立。庄宗破刘守光，赐扫刺姓李，更其名曰绍威。绍威卒，子拽刺立。初绍威娶契丹舍利逐不鲁之姊为妻。后逐不鲁叛，亡入西奚。绍威纳之。及幽、蓟十六州割，绍威与逐不鲁皆已死。契丹太宗北还，拽刺迎谒。太宗曰：“非尔罪也，负我者，扫刺与逐不鲁尔。”乃发其墓，粉其骨而扬之。后太宗灭晋，拽刺常以兵从。其后不复见於中国。盖奚至是始尽入契丹。然奚在契丹中，尚为大部族。辽之亡，奚王回离保，犹能拥众自立云。^③

乌桓、鲜卑，皆以游牧为生。《后汉书》称其“俗善骑射，弋猎禽兽，随水草放牧。食肉饮酪，以毛毳为衣，居无常处，以穹庐为舍，东开向日”是也。然又云：“其土地宜稌及东墙。”^④俗识鸟兽孕乳，以别四节。耕种常以布谷鸣为候。能作白酒，而不知作曲蘖。米

① 以上辽先世事迹，大抵见《营卫志》。兼据《兵卫志》、《食货志》及《皇子表》。

② 妫州北之山。

③ 奚之名，见於《辽史·属国表》者，西奚，东奚之外，又有乌马山奚。

④ 东墙似蓬草，实如葵子，至十月而熟。

常仰给中国。”则亦非不知耕稼矣。

其风俗：“贵少而贱老。妻后母，报寡嫂，死则归其故夫。氏姓无常，以大人健者名字为姓。怒则杀其父兄，而终不害其母，以母有族类，父兄无相仇报故也。其嫁娶：先略女通情。或半岁百日，然后送牛、马、羊畜，以为聘币。婿随妻还家。妻家无尊卑，旦旦拜之，而不自拜其父母。为妻家仆役，一二年间，妻家乃厚遗送女，居处财物，一皆为办。故其俗从妇人计。至战斗时，乃自决之。盖妇女持生计，男子事战斗，去女系时代未远也。鲜卑婚姻，先髡头，以季春月，大会饶乐水上。饮宴毕，然后配合。^①

其政治极为散漫，远不如匈奴之转结。《后汉书》云：“有勇健，能理决斗讼者，推为大人。邑落各有小帅，不世继也。自檀石槐后，诸大人乃世相传袭焉。”《孟子》称“舜、禹之有天下，必以朝覲讼狱之归”，而自禹以后，遂变禅让为世袭，其理可借鉴而明矣。又云：“数百千落，自为一部。大人以下，各自畜牧营产，不相徭役。”此则许行所谓“并耕而食，饗飧而治”也。“有所召呼，刻木为信。邑落传行。虽无文字，而部众不敢违犯。”殊足见其风俗之淳。“其约法：违大人言者，罪至死。盗不止死。若相贼杀者，令部落自相报。不止，诣大人告之。有罪者听出马、牛、羊以赎死。其自杀父兄则无罪。若亡畔，为大人所捕者，邑落不得受之。徙逐於雍狂之地，沙漠之中。其土多蝮蛇，在丁令东南，乌孙西北焉。”

“俗敬鬼神。祠天地、日月、星辰，及先大人之有健名者。祠用牛、羊，毕，皆烧之。”“有病，知以艾灸。或烧石自熨，烧地卧其上。或随痛病处，以刀决脉出血，及祝天地，山川之神。无针药。”盖重巫，而医术则方在萌芽也。“俗贵兵死。斂尸以棺，有哭泣之哀。至葬，则歌舞相送。肥养一犬，以彩绳纓牵。并取死者所乘马、衣物，皆烧而送之。言以属累犬，使护死者神灵归赤山。赤山，在辽东西

^① 《后汉书》言风俗者，皆见《乌桓传》。《鲜卑传》曰：“其言语习俗，与乌桓同，但婚姻先髡头”云云。盖惟婚礼为特异也。

北数千里，如中国人死者，魂神归岱山也。”^①

以上所述，皆契丹旧俗。既与汉族交通，其文明程度颇有进。灵帝时，议击鲜卑。蔡邕谓“关塞不严，禁网多漏。精金良铁，皆为贼有。汉人逋逃，为之谋主。兵利马疾，过於匈奴”。又《三国志》称轲比能：“自袁绍据河北，中国人多亡叛归之。教作兵器铠楯，颇学文字，故其勒御部众。拟制中国，出入弋猎，建立旌麾，以鼓节为进退。”可见一斑矣。《后汉书》谓乌桓：“妇人能刺韦、作文绣。男子能作弓矢鞍勒，锻金铁为兵器。”疑皆汉人所教也。

晋时五胡，羯即匈奴，氐、羌亦一族，与鲜卑而三耳。羌则颇为汉人所侵役，故积怨而叛。惟乌桓、鲜卑，虽居塞下，而不处腹心之地。既不凌犯汉人，亦不为汉人所迫压，能获平和交通之利。故五胡之中，鲜卑最能仿效汉族之文明，非偶然也。割据中原之鲜卑，以慕容、拓跋二氏为大。北魏孝文帝，尽弃其俗，以从汉族，慕容氏亦济济多才，夫人知之，不待赘述。即远窜青海之吐谷浑，其文明亦有可观者。史称吐谷浑之孙慕延，援礼公孙之子，得以王父字为氏之义，因以吐谷浑为氏。又其主阿豺，尝升西强山，观垫江源，曰：“水尚知归，吾虽塞表小国，可以独无所归乎？”因遣使通宋，此或使臣文饰之词，然其屡通南朝，则事实也。其风俗，多沿鲜卑之旧，或化而从羌。史称其“有城郭而不居。随逐水草，以庐帐为屋，肉酪为粮。国无常赋。调用不给，辄敛富室商人，取足而止。杀人及盗马者死，他犯则征物以赎。亦量事决杖。刑人必以毡蒙头，持石从高击之。其婚姻，富家厚出聘币，贫者窃妻走。父死，妻其庶母。兄亡，妻其诸嫂是也。”^②然又称拾寅用书契，起城池，筑宫殿，居止出入，拟於王者。伏连筹准拟天朝，树置官司，称制诸国，以自夸大。

① 《三国志》注引《魏书》：至葬，日夜聚亲旧员坐。牵犬马历位。或歌哭者，掷肉与之。使一人口诵咒文。使死者魂神径至，历险阻，勿令横鬼遮护，达其赤山。然后杀犬马衣物烧之。

② 其主视黑，以子树洛干年少，传位於弟乌纥提，而妻树洛干之母。隋以光化公主妻其主世伏。国人杀世伏，立其弟伏允，亦请依俗尚主。皆鲜卑及羌俗也。

其官；有长史、司马、将军、王公、仆射、尚书、郎中。又颇识文字。国中又有佛法。能与益州通商贾。则其建国之规模，实有可观者。惜乎羌人，未能一时丕变也。

从来北族之强盛，虽由其种人之悍鸷，亦必接近汉族，渐染其文化，乃能致之。过於朴陋，虽悍鸷，亦不能振起也。若其所居近塞，乘中原丧乱之际，能多招致汉人，则其兴起尤速。突厥、契丹，其最著者也。契丹太祖之兴也：史称刘守光暴虐，幽、涿之人，多亡入契丹。阿保机又间入塞，攻陷城邑，俘其人民，依唐州县，置城以居之。其后自为一部，治汉城，其地可植五谷。阿保机率汉人耕种。为治城郭、邑屋、廛市，如幽州制度。汉人安之，不复思归。又谓辽太祖之久专旗鼓而不肯受代，实出汉人之教。此虽未必然，然其自为一部，所用实系汉人，则彰彰矣。契丹隋世十部，兵多者不过三千，少者千余。大贺氏八部，胜兵合四万三千。太祖会李克用於云中，乃以兵三十万；伐代北，兵四十万；^①亲征幽州，旌旗相望数百里。此如林之旅，果何自来哉？契丹建国，诚以部族为基础。太祖北讨南征，所俘降游牧之民亦不少。然《辽史》称其析本部^②为五院六院，宫卫缺然，乃分州县，析部族，以立宫卫军；述律后居守之际，又摘蕃汉精骑为属珊军；^③则其兵实有汉人。汉人之有造於契丹亦大矣。

契丹故游牧之族。分地而居，合族而处。分地所谓部，合族所谓族也。然其后有以族而部，部而族者。亦有部而不族，族而不部者。部族之众，大抵以游牧为生。亦或从事种植。分地之制，始於涅里。其后多因俘降而置。分合屯戍，各以政令定之。不能自专也。部族之胜兵甲者，即著军籍。无事田牧草莽间。生生之资，仰给畜牧。各安旧风，狃习劳事，不见纷华异物而迁。有事而战，驍骑介

① 天祐二年。

② 迭剌部。

③ 凡三十万。

夫，卯命辰集。马逐水草，人仰湏酪；挽强射生，以给食用；糗粮芻茭，道在是矣。史称其“家给人足，戎备整完，虎视四方，强朝弱附，部族实为之爪牙”。非虚语也。然其所得中原之地，亦自为其国元气所在。其设官分南北面。北以旧制治宫帐部族，南以汉法治汉人州县。观其财赋之官，多在南面，即可知其立国之有资於汉人也。^①

其政治，虽有君主，而贵族之权颇重。《五代史》谓其尝推一大人，建旗鼓以统八部。及其岁久，或其国有疾疫而畜牧衰，则八部共议，以旗鼓立其次而代之。被代者以为约本如此，不敢争。太祖袭杀八部大人，乃立不复代。一似八部本无世袭之共主者。此说虽未必然。然八部大人之权力，则可以想见矣。^②太祖即位之后，部族之权力，虽不如是其伟。然北面诸官，总以北南二宰相府。北宰相府，皇族四帐，世预其选。南宰相府，国舅五帐，世与其选。犹是以同姓、外戚，为国家之桢干也。^③

奚与契丹，本皆以游牧为生。北史称其“随逐水草，颇类突厥”者也。至太祖考匀德，仲父述澜，始教民以树艺，组织。太祖益招致汉人，令其耕种。及平诸弟之乱，弭兵轻赋，专意於农。至太宗时，则猎及出兵，皆戒伤禾稼。盖戛戛进於耕稼矣。道宗时，西蕃多叛。命耶律唐古督耕稼以给西军。唐古率众田胪胸河侧，岁登上熟。是其耕稼，施之诸部族也。然史称“契丹旧俗，其富以马，其强以兵”。又称太祖时，畜牧之盛，括富人马不加多，赐大小鹵军万余匹不加少。自太宗至兴宗，垂二百年，群牧之盛如一日。天祚初

① 契丹之国，合耕稼及游牧之民而成，实兼居国及行国者也。其耕稼之民，得诸中国，所谓州县也。游牧之民，为契丹之国民者，部族是也。又有所谓属国者，则平时朝贡，战时征其兵粮而已。与契丹之关系实浅。

② 参看附录《契丹部族》条。

③ 皇族四帐者？太祖为横帐。德祖次子岩木之后为孟父房。三子释鲁之后为仲父房。太祖五弟之后为季父房。国舅五帐者？拔里氏二房：曰大父，少父。乙室己二房：曰大翁，小翁。太宗取於回鹘孛思之后，是为述律氏。其后为国舅别部。辽俗东向而尚左，东西为经，南北为纬，故御帐东向，称横帐。犹是乌桓穹庐东开向日之旧也。

年，马犹有数万群，每群不下千匹。则其生业，究以畜牧为重云。

当南北朝时，奚及契丹，即多与汉人互市。《魏书》载宣武帝《诏》：谓“奚，自太和二十一年以前，与边人参居，交易往来，并无欺贰。至二十二年，叛逆以来，率众远窜。今虽款附，犹在塞表。每请入塞，与百姓交易”是也，辽太祖招致汉人，於炭山北起榷务，以通诸道贸易。太宗既得幽州，即置市，而命有司治其征。余四京及他州县货产懋迁之地亦如之。雄州、高昌、渤海，亦立互市，以通南宋西北诸部及高丽之货。史称“女直以金帛、布、密蜡、诸药材，铁骊、靺鞨、于厥诸部，以蛤珠、青鼠、貂鼠、胶鱼之皮，牛、羊、豕、马、毳罽等物，来易於辽者，道路纍属”。则当其盛时，北族之商业，必有一可观者。惜乎史不能纪其详也。

契丹旧俗，亦敬天而尊祖。《地理志》：“永州有木叶山。上建契丹始祖庙。奇首可汗在南庙，可敦在北庙。绘塑二圣并八子神像。相传有神人，乘白马自马孟山浮土河而东。有天女，驾青牛由平地松林泛潢河而下。至木叶山，二水合流，相遇，为配偶。生八子。其后族属渐盛，分为八部。”《述律后传》：“尝至辽、土二河之会。有女子，乘青牛车，仓猝避路。忽不见。未几，童谣曰：青牛姬，曾避路。盖谚谓地只为青牛姬云。”青牛姬为地祇，则白马神人，必天神矣。凡举兵，必率文武臣僚，以白马、青牛，祭告天、地、日神，惟不拜月。又分命近臣告太祖以下陵及木叶山神，乃诏诸道征兵焉。《辽史》谓“终辽之世，郊丘不建”，^①乃不用汉礼祭天，非其俗本不祭天也。

《礼志》：“冬至日，国俗屠白羊白马，各取血和酒。天子望拜黑山。黑山在境北，俗谓国人魂魄，其神司之，犹中国之岱宗，每岁是日，五京进纸造人马百余事，祭山而焚之。俗甚严畏，非祭不敢近山。”黑山，似即乌桓之赤山。契丹旧地，在潢、土二水合流处；其北，正在辽东西北数千里也。又云：“岁十月，五京进纸小衣甲、枪

^① 《仪卫志》二。

刀、器械万副。十五日，天子与群臣望祭木叶山。用国字书状而焚之。国语谓之戴辣。戴，烧也。辣，甲也。”似亦乌桓送死烧乘马衣物之俗。^①

其俗亦颇重巫。《五代史》：石敬瑭求援於契丹。契丹太宗以告其母。母召胡巫问吉凶。巫言吉，乃许。《辽史·列女传》：耶律奴妻尝与娣姒会，争言厌魅，以取夫宠。则崇信之者亦颇多。巫鬼固北族之通习也。

至通中国以后，则信佛颇笃。《辽史》：太宗援石晋，自潞州入幽州，幸大悲阁，指佛像曰：“我梦神人，令送石郎为中国帝，即此也。”因於木叶山建庙，春秋告赛。尊为家神。军兴，必告之，乃合符传箭於诸部。又其俗以二月八日为佛生日，京府及诸州雕木为像。仪仗百戏，道从循城为乐。则风靡全国矣。兴宗以信佛故，屡降赦宥，释死囚。道宗时，一岁饭僧三十六万，一日祝发三千。皆其先世有以启之也。又《义宗传》：“神册元年，春，立为皇太子。时太祖问侍臣曰：受命之君，当事天敬神。有大功德者，朕欲祀之，何先？皆以佛对。太祖曰：佛非中国教。倍曰：孔子大圣，万世所尊，宜先。太祖大悦。即建孔子庙，诏皇太子春秋释奠。”《太祖纪》：神册三年，四月，己亥，诏建孔子庙、佛寺、道观。则太祖实三教并尊。然其后来之崇信，则儒、道远非释氏之比矣。

契丹之慕效汉族，由来已久。而其大有所得，则在入汴之后。《仪卫志》云：“大贺，失活，入朝於唐。娑固兄弟继之，尚主封王，饫观上国。开元东封，邵固扈从，又览太平之盛。自是朝贡，岁至於唐。辽始祖涅里立遥辇氏，世为国相，目见耳闻，歆企帝王之容辉有年矣。至於太宗，立晋以要册礼，入汴而收法物，然后累世之所愿欲者，一举而得之。於是秦、汉以来，帝王文物，尽入於辽。周、宋

① 《魏书·契丹传》云：“父母死而悲哭者，以为不壮。但以其尸置於小树之上。经三年后，乃收其骨而焚之。因酌酒而祝曰：冬月时，向阳食。若我射猎，使我多得脂鹿。”与《后汉书》所述乌桓之俗不合。《后汉书》云“鲜卑习俗，与乌桓同”。契丹鲜卑部落，不应殊异至此。或魏时契丹尝与他族杂处，《魏书》误以他族之俗，为契丹之俗也。

按图更制，乃非古物。”以兵力之不竞，遂致举数千年来声明文物之积，一旦输之于辽，^①《志》又云：“太宗入晋之后，皇帝与南班汉官用汉服，太后与北班契丹臣僚用国服。”《太宗本纪》：“会同三年，十二月，丙寅，诏契丹人授汉官者从汉仪，听与汉人婚姻。”《外戚表序》：“契丹外戚，其先曰二审密氏：曰拔里，曰乙室己。至辽太祖取述律氏。大同元年，太宗自汴将还，留外戚小汉为汴州节度使。赐姓名萧翰，以从中国之俗。由是拔里、乙室己、述律三族，皆为萧姓。”《后妃传》曰：“太祖慕汉高皇帝，故耶律俨称刘氏，以乙室，拔里比萧相国，遂为萧氏。”其慕效汉族之心，可谓切矣。

契丹既入中原，一切制度，悉以汉族为楷模。《辽史》又极简略，其旧制遂多不可考。惟《刑法志》载其用刑甚酷。亲王有罪，或投诸高崖杀之。淫乱不轨者，五车轘杀之。逆父母者视此。犯上者，以熟铁椎搯其口杀之。又有梟磔、生瘞、射鬼箭、炮掷、支解等刑。颇足见其原有习俗。

契丹先世，本无文字。《辽史本纪》：太祖神册五年，始制契丹大字。九月，壬寅，成。诏颁行。《五代史》谓汉人教契丹，以隶书之半增损之，作文字数千，以代刻木之约。则契丹大字，实出汉文。又《皇子表》：迭剌，性敏给。回鹘使至，无能通其语者。太祖使迭剌逐之。相从二旬，尽习其言语。因制契丹小字，数少而该贯。则契丹小字，出於回鹘。今世所传契丹书，系增损汉文为之，则其小字，盖未尝通行也。^②

契丹文化之进步，观其种人通文学者之多，可以知之。其首出者，当推人皇王倍。尝市书万卷，藏之医巫间绝顶之望海堂。通阴

① 《辽史·太宗纪》：“大同元年，三月，壬寅，晋诸司僚吏、侯御、宦寺、方伎、百工、图籍、历象、石经、铜人、明堂、刻漏、太常乐谱、诸官悬、鹵簿、法物及铠仗，悉送上京。”《仪卫志》云：“晋高祖使冯道、刘煦册应天太后太宗皇帝，其声器与法驾，同归於辽。天子车服，防见於辽自此。”又辽郊庙颂乐，得之於汴，散乐得之晋。天福三年，刘煦以伶官归辽，皆见《乐志》。

② 《突吕不传》：“制契丹大字，赞成为多。”《耶律鲁不传》：“太祖制契丹国字，以赞成功，授林牙，监修国史。”

阳,知音律。精医学砭烙之术。工辽、汉文字。尝译《阴符经》。善画本国人物。如《射骑》、《猎雪骑》、《千鹿图》等,皆入宋秘府云。此外通文学,宗室中:若世宗第五子和鲁重、若人皇王第四子平王隆先、若耶律学古、耶律资忠、耶律庶成、庶箴兄弟、庶箴子蒲鲁、耶律韩留、耶律昭、耶律陈家奴、耶律良。外戚中:若萧芳古及其子朴、萧阳河、萧柳、萧韩家奴。究心史学者:则庶成、韩家奴及耶律孟简、耶律谷欲、耶律俨。善画者:则耶律显学、耶律裒里。善医者:则庶成及萧胡笃之祖敌鲁、耶律敌鲁、迭里特等。其事备见於《辽史》,迥非草昧之旧矣。^①

北族除匈奴外,殆皆辫发,而其辫发制,又小有不同。《后汉书·乌桓传》谓其父子男女相对踞,以髡头为轻便。妇人至嫁时,乃养发为髻。而鲜卑则婚姻先髡头。《魏书·宇文莫槐传》:“人皆剪发,而留其顶上,以为首饰。长过数寸,则截短之。”是其所留之发颇短。然木骨间发齐肩,而拓跋氏谥之曰秃,则拓跋氏之辫发,又颇长矣。此南朝所以呼为索虏欤?《晋书·载记》述慕容氏得氏之由曰:“燕、代多冠步摇,莫护跋见而好之,敛发袭冠。诸部因呼之为步摇,音讹为慕容。”窃疑莫护亦慕容音转,此人实名跋也。此当为北族慕化解辫之最早者。而后来之满洲人,乃以强迫汉人剃发,大肆杀戮,人之度量相越,岂不远哉?

附录一 鲜 卑

鲜卑出於东胡,读史者无异词。近人或曰:“通古斯(Tung-us)

^① 《兴宗纪》:重熙十三年,六月,丙申,“诏前南院大王耶律谷欲、翰林都林牙耶律庶成等编集国朝上世以来事迹。”《耶律谷欲传》:“奉诏与耶律庶箴、萧韩家奴编辽国上世事迹,未成而卒。”《耶律孟简传》:“太康中,诣阙上表,言辽兴几二百年,宜有国史。上命置局编修。”实重熙十三年之诏所由来也。天祚帝乾统三年,又诏耶律俨纂太祖以下实录,共成七十卷。又案《辽史》谓耶律富鲁举进士第,帝怒其父庶箴,擅令子就科目,有违国制,鞭之二百。则辽人并不欲其本族人从事文学。然《天祚纪》又谓耶律大石举天庆五年进士。盖一时风气所趋,虽国法亦不能禁也。

者,东胡之音转也。不译为东胡,而译为通古斯,则何不称孔子曰可夫沙士也?”窃有疑焉。《后汉书》曰:“乌桓者,本东胡也。汉初,匈奴冒顿灭其国,余类分保乌桓山,因以为号焉。”“鲜卑,亦东胡之支也。别依鲜卑山,故因号焉。”^①然则东胡之亡,众分为二。乌桓,鲜卑,大小当略相等。顾鲜卑部落,自汉以后,绵延不绝,而乌桓自魏武柳城一捷,遂不复见于史。^②何耶?案拓跋氏之先,实来自西伯利亚。^③《魏书》谓其国有大鲜卑山。希腊罗马古史谓里海以西,黑海之北,古有辛卑尔族居之。故今黑海北境,有辛卑尔古城;黑海峡口,初名辛卑峡,而俄人称乌拉岭一带曰西悉毕尔。^④辛卑尔,即鲜卑也。此岂东胡灭后,余众所居邪?抑鲜卑山自欧、亚之界,绵亘满、蒙之间也?^⑤案《史记·匈奴列传》,《索隐》引服虔曰:“东胡,在匈奴之东,故曰东胡。”《后汉书·乌桓传》:“氏姓无常,以大人健者名字为姓。”《索隐》又引《续汉书》曰:“桓以之名,乌号为姓。”^⑥然则东胡者,吾国人施匈奴之名以名之,而加一方位以为别,犹称西域诸国曰西胡尔,非译名也。乌桓盖彼族大人健者之名姓,乃分部之专号,非全族之通称。彼族本名,舍鲜卑莫属矣。此族古代,盖自欧、亚之界,蔓延于匈奴之北及其东^⑦其所居之地,皆以种人之名名之。故里黑海,乌拉岭,西伯利亚及满、蒙之间,其名不谋而合也。^⑧

① 《三国志》注引《魏书》略同,盖《后书》所本也。

② 仅《唐书》所载,有一极小部落曰乌丸,亦作古丸,在乌罗浑之北。《辽史·太祖纪》,诏澈刺讨乌丸。穆宗时,乌丸叛,盖即此乌丸也。然其微已甚矣。乌桓当汉时,遍布五郡塞外,岂有柳城一捷,所余仅此之理?《通考》云:西晋王浚为幽州牧,有乌桓单于审登,前燕慕容俊时,有乌桓单于薛云,后燕慕容盛时,有乌桓渠帅莫贺咄科勃,亦其微已甚,不足数也。

③ 别有一条考之。

④ 《元史译文证补西域古地考——康居、奄蔡》。

⑤ 乌桓、鲜卑二山,以地理核之,当即今苏克苏鲁,索岳尔济等山。

⑥ 此八字或有讹误,然大意可见。

⑦ 实在丁令之北。

⑧ 《史记》以东胡山戎分言。《索隐》引服虔曰:“山戎,盖今鲜卑。”又曰:“东胡,乌丸之先,后为鲜卑。”又引胡广曰:“鲜卑东胡别种。”则乌桓、鲜卑,虽大同,似有小别。

近人或又云：鲜卑，即《禹贡》之析支。说颇可通。然惟据音译推度，未能详列证据。予昔尝为之补证，曰：“析支者，河曲之地，羌人居之，所谓河曲羌也。^①羌与鲜卑，习俗固有极相类者。羌俗氏姓无常，或以父名母姓为种号，则母有姓父无姓可知。乌桓亦氏姓无常，以大人健者名氏为姓。又怒则杀其父兄，而终不害其母，以母有族类，父兄无相仇报故也。一也。羌俗父死则妻后母，兄亡则纳嫠嫂。乌桓亦妻后母，报寡嫂。二也。羌以战死为吉利，病终为不祥。乌桓俗亦贵兵死。三也。此皆鲜卑与河曲羌同族之证也。”由今思之，此等习俗，蛮族类然，用为证据，未免专辄。且如匈奴父死妻其后母，兄弟死，皆取其妻妻之，复可云与羌及鲜卑同祖邪？然此说虽不足用，而鲜卑出於析支，其说仍有可立者。《禹贡》析支与渠搜并举，则二族地必相近。《汉志》朔方郡有渠搜县，蒋廷锡谓后世种落迁徙，说颇近之。《管子·轻重戊篇》：“桓公问於管子曰：代国之出何有？管子曰：代之出，狐白之皮。公其贵买之。代人必弃其本，而居山林之中。离枝间之，必侵其北。”离枝即析支，是析支在代北也。《大匡篇》：“桓公乃北伐令支，斩孤竹，遇山戎。”《小匡篇》：“北伐山戎，制冷支，斩孤竹。”又曰：“北至於山戎涉貉，拘秦夏。”令支、冷支，亦即析支。《汉志》：辽西郡，令支，有孤竹城。地在今河北迁安县。是析支在今河北境矣。涉貉者，即《诗·韩奕》之追貉。^②《诗》曰：“王锡韩侯，其追其貉。”郑以韩在韩城，追貉为雍州北面之国。又曰：“其后追也，貉也，为匈奴所逼，稍稍东迁。”说颇可信。予别有考。渠搜者，《禹贡》析支之邻国，而汉时迹在朔方；涉貉者，周时地在离枝之东，而其后居今东三省境。然则自夏至周，青海至于辽东，种落殆有一大迁徙。离枝，渠搜，何事自今青海迁至雍、冀之北不可知。若涉貉之走辽东西，鲜卑之处今蒙古东境，则

① 《后汉书·西羌传》注引应劭。

② 陈氏免说，见所撰《诗毛氏传疏》。未知信否。予谓追未必即涉，然追貉之貉，必即涉貉之貉也。

殆为匈奴所逼也。又燕将秦开，袭破东胡。燕因置上谷、渔阳、右北平、辽西、辽东五郡。此五郡者，其初亦必离枝、涉貉诸族所杂居矣。《后汉书·乌桓传》：“若亡畔，为大人所捕者，邑落不得受之，皆走逐於雍狂之地，沙漠之中。其土多蝮蛇，在丁令西南，乌孙东北焉。”丁令所居，北去匈奴庭安习水七千里，南去车师五千里，见《史记索隐》引《魏略》。安习水，今额尔齐斯河；乌孙则今伊犁地也。乌桓区区，流放罪人，安得如是之远？得毋居西方时，故以是流放罪人之地，东迁后犹沿其法邪？然则吐谷浑附阴山逾陇而入青海，非拓新疆，乃归故国矣，此说虽似穿凿，然析支，渠搜，涉貉，同有迁徙之迹，则亦殊非偶然也。^①

附录二 后魏出自西伯利亚

五胡诸族，多好自托於古帝之裔，其说殊不足信。然其自述先世事迹，仍有不尽诬者。要当分别观之，不得一笔抹杀也。《魏书》谓“后魏之先，出自黄帝。黄帝子曰昌意。昌意少子，受封北国。其后世为君长，统幽都之北，广漠之野。黄帝以土德王，北俗谓土为拓，谓后为跋，故以为氏”。又谓“其裔始均，仕尧时，逐女魃於弱水北，人赖其勋，舜命为田祖”。此全不可信者也。然谓“国有大鲜卑山，因以为号”，则其说不诬。已见《鲜卑》条。又云：“积六七十代，至成帝毛，统国三十六，大姓九十九，威振北方。五传至宣帝推寅，南迁大泽，方千余里。厥土昏冥沮洳。谋更迁徙，未行而崩。又七传至献帝邻，有神人，言：此土荒遐，宜徙建都邑。献帝年老，以位授其子圣武帝诹汾，命南移。山谷高深，九难八阻，於是欲止。有神兽似马，其声类牛，导引历年乃出。始居匈奴故地。其迁徙策略，多出宣、献二帝，故时人并号为推寅，盖钻研之义也。”此为拓

^① 又肃慎古代，亦不在今吉林境。予别有考。

跋氏信史，盖成帝强盛，故传述之事，始於其时也。^①

今西伯利亚之地，自北纬六十五度以北，地理学家称为冻土带。自此南至五十五度，称森林带。又南，称旷野带。最南，称山岳带。其山，即西伯利亚与蒙古之界山也。冻土带极寒，人不能堪之处甚多。森林带多蚊虻。旷野带虽沃饶，然卑湿，多疫病，亦非乐土。拓跋氏盖始处冻土带，以苦寒南徙，复陷旷野带中，最后乃越山岳带而至今外蒙古也。大泽方千余里，必旷野带中藪泽。或谓今拜喀勒湖，非也。拜喀勒湖乃古北海，为丁令所居，汉时服属匈奴，匈奴囚苏武即於此，可见往来非难，安有山谷高深，九难八阻之事？

附录三 宇文氏先世

《周书》谓周之先，出自炎帝。“炎帝为黄帝所灭，子孙遁居朔野。其后有葛乌兔者，雄武多算略。鲜卑奉以为主，遂总十二部落，世为大人。其裔孙曰普回，因狩，得玉玺三纽，文曰皇帝玺。其俗谓天子曰宇文，故国号宇文，并以为氏。普回子莫那，自阴山南徙，始居辽西，为魏甥舅之国。自莫那九世至侯归豆，为慕容皝所灭。”出自炎帝乃妄语。自莫那至侯归豆，世次事实亦不具。当以《魏书·宇文莫槐传》正补之。《宇文莫槐传》：谓其先出自辽东塞外，世为东部大人，莫槐虐用其人，为部下所杀。更立其弟普不，普不传子丘不勤，丘不勤传子莫廋，莫廋传子逊昵延，逊昵延传子乞得龟。丘不勤取魏平帝女，逊昵延取昭帝长女，所谓为魏甥舅之国也。莫廋、逊昵延、乞得龟三世，皆与慕容廋相攻，皆为廋所败。乞得龟时，廋乘胜长驱，入其国。收资财亿计。徙部人数万户以归。别部人逸豆归，遂杀乞得龟自立。与慕容晃相攻，为所败。远遁漠北。遂奔高句丽。晃徙其部众五千余落於昌黎。自是散灭矣。逸

^① 《魏书》云：“时事远近，人相传授，如史官之有纪录焉。”

豆归即侯归豆，侯、逸同声；归豆豆归，未知孰为倒误也。侯应议罢边备塞吏卒，谓“北边塞至辽东，外有阴山，东西千余里”，则阴山之脉，远接辽东。《周书》谓莫那自阴山南徙，《魏书》谓莫槐出辽东塞外，似即一人。惟自莫槐至逸豆归，仅得七世。《周书》世次既不具，所记或有讹误也。《晋书》以宇文莫槐为鲜卑；《魏书》谓南单于之远属；又谓其语与鲜卑颇异。疑宇文为匈奴、鲜卑杂种，语亦杂匈奴也。又《魏书》以奚、契丹为宇文别种，为慕容晃所破，窜匿松漠之间，则逸豆归败亡时，慕容廆所徙五千余落，实未尽其众，奚、契丹之史，亦可补宇文氏先世事迹之阙矣。奚事迹无考。契丹事迹可知者，始於奇首可汗。别见《契丹部族》条，奇首遗迹，在潢、土二河流域，已为北遼后事，不足补宇文氏先世事迹之阙。惟《辽史·太祖本纪赞》，“辽之先世，出自炎帝，^①世为审吉国。其可知者，盖自奇首云”。审吉二字，尚在奇首以前，或宇文氏故国之名欤？然事迹无可征矣。

附录四 契丹部族

契丹部族，见於史者，在元魏及唐、五代时，其数皆八，惟隋时分为十部，而逸其名。元魏八部：曰悉万丹。^②曰何大何。曰伏弗郁。曰羽陵。曰日连。曰匹洁。曰黎。曰吐六干。唐时八部：曰达稽。曰纥便。曰独活。曰芬间。曰突便。曰芮溪。曰坠斤。曰伏。《五代史》八部：曰旦利皆。曰乙室活。曰实活。曰纳尾。曰频没。曰纳会鸡。曰集解。曰奚温。其名前后皆不同。《辽史·营卫志》云：“奇首八部，为高丽、蠕蠕所侵，仅以万口附於元魏。生聚未几，北齐见侵，掠男女十余万口。继为突厥所逼，寄处高丽，不过万家。部落离散，非复古八部矣。”又谓大贺氏之亡，八部仅存其

① 此即据《周书》言之。

② 亦作欣服万丹。

五。太祖七世祖雅里，更析为八。似乎契丹部族，时有变更。然唐之置羁縻州也，达稽部为峭落州，纥便部为弹汗州，独活部为无逢州，芬间部为羽陵州，突便部为日连州，芮奚部为徒河州，坠斤部为万丹州，伏部为匹黎、赤山二州，则芬间部即羽陵，突便部即日连，芮奚部即何大何，坠斤部即悉万丹，伏部即匹洁，惟达稽、纥便、独活三部，不能知其与元魏时何部相当耳。然则部众虽更，部名虽改，而其分部之法，则后实承前。《五代史》部名之异於唐，^①当亦如是矣。《辽史·地理志》：永州，“有木叶山。上建契丹始祖庙。奇首可汗在南庙，可敦在北庙。绘塑二圣并八子神像。相传有神人，乘白马，自马盂山浮土河而东。有天女，驾青牛，由平地松林泛潢河而下。至木叶山，二水合流，相遇，为配偶，生八子。其后族属渐盛，分为八部”。盖八部之分，由来甚旧，所托甚尊，故累遭丧败，其制不改耶？^②然隋时何以独分为十部？又唐置羁縻州之先，契丹酋长窟哥及辱纥主曲据皆来归，唐以窟哥之地置松漠都督府，以辱纥主曲据所部为玄州，合八部亦十部也。^③此又何说耶？曰：八部者，所以象奇首八子；八部外之二部，则所以象奇首可汗及其可敦；即《辽史》所谓三耶律、二审密者也。并三耶律、二审密言之，则曰十部；去此二部言之，则曰八部。汉人言之有异，契丹之分部，则未尝变也。何以知之？曰：以太祖创业之事知之。

《五代史》述太祖之创业也，曰：“契丹部族之大者曰大贺氏。后分为八部。部之长号大人。而常推一大人，建旗鼓，以统八部。至其岁久，或其国有疾疫而畜牧衰，则八部共议，以旗鼓立其次而代之。被代者以为约本如此，不敢争。某部大人遥辇次立。时刘仁

① 此八部盖即雅里就五部所析。

② 《太祖本纪》：“辽之先世，出自炎帝，世为审吉国。其可知者，盖自奇首云？”奇首生都庵山，徙潢河之滨。太祖七年，登都庵山，抚奇首可汗遗迹，徘徊顾瞻而兴叹焉。《地理志》：上京道，龙化州，“奇首可汗居此，称龙庭”。《营卫志》：“潢河之西，土河之北，奇首可汗故壤也”。又云：“奇首可汗，胡刺可汗，苏可汗，昭古可汗，皆辽之先，世次不可考。”白马青牛，说虽荒诞，然奇首则似非子虚乌有之流。

③ 《辽史·营卫志》说如此。

恭据有幽州，数出兵摘星岭攻之。秋霜落，则烧其野草。契丹马多饥死，即以良马赂仁恭，求市牧地。请听盟约，甚谨。八部之人，以为遥辇不任事，逃於其众，以阿保机代之。阿保机，不知其何部人也。是时刘守光暴虐，幽、涿之人，多亡入契丹。阿保机又间入塞，攻陷城邑，俘其人民，依唐州县置城以居之。汉人教阿保机曰：中国之王，无代立者。由是阿保机益以威制诸部而不肯代。其立九年，诸部以其久不代，共责谯之。阿保机不得已，传其旗鼓。而谓诸部曰：吾立九年，所得汉人多矣，吾欲自为一部，以治汉城，可乎？诸部许之。汉城，在炭山东南滦河上；有盐铁之利；乃后魏滑盐县也。其地可植五谷。阿保机率汉人耕种，为治城郭，邑屋，廛市，如幽州制度。汉人安之，不复思归。阿保机知众可用。用其妻述律策，使人告诸部大人，曰：我有盐池，诸部所食。然诸部知食盐之利，而不知盐有主人，可乎？当来犒我。诸部以为然。共以牛酒会盐池。阿保机伏兵其旁。酒酣，伏发，尽杀诸部大人。遂立不复代。”似契丹共主，本由选立，至辽太祖乃变为世袭者。然据《唐书》及《辽史》，则遥辇诸汗，世次相承，初无大贺氏亡，分为八部之说。《辽史·太祖纪》：唐天复元年，痕德堇可汗立，为本部奚离堇，专征讨。十月，授大迭烈府奚离堇。三年，十月，拜于越，总知军国事。天祐三年，十二月，痕德堇可汗殂。明年，正月，即皇帝位。其汗位受诸遥辇，又彰彰也。此又何说邪？曰：太祖之所争，乃奚离堇之职，而非汗位也。奚离堇者，后来之北、南二大王。《辽史》谓其统部族军民之政。《五代史》所谓建旗鼓以统八部者，盖即指此？^①契丹虽有共主，然征伐决之会议，田猎部得自行，其权力实不甚完；况於遥辇氏之仅亦守府？《五代史》之所纪，盖得之汉人传述。斯时述契丹事者，知有奚离堇而不知有可汗，正犹秦人之知有穰侯而不知有王，其无足怪。然太祖之汗位，则固受之痕德堇，非由八部所推之大人而变。谓太祖变公推之夷离堇为专任则可，谓其变嬗代之共主为

^① 世宗之立，即由北、南二大王。李胡争之，卒不胜。可见北、南二王权力之大。

世袭，则不可也。《辽史·营卫志》谓雅里析八部为五，立二府以总之。又析三耶律为七，二审密为五。三耶律者，曰大贺，曰遥辇，曰世里，即相次居汗位者，二审密者，曰乙室己，曰拔里，即耶律氏所世与为婚姻者也。二府，盖即后来之北、南二宰相府。北宰相府，皇族四帐，世豫其选。南宰相府，国舅五帐，世豫其选。然则是时之总八部者，盖即三耶律，二审密，以其象奇首，故世汗位；以其象奇首可敦，故世婚皇族也。隋时十部；唐时八部之外，别有松漠、玄州，其故盖亦如此。《五代史》谓八部之长，皆号大人。又谓推一大人，建旗鼓以统八部。似建旗鼓之大人，即在八部大人之中者。然又谓阿保机不知何部人，又谓太祖请自为一部，则太祖实非八部大人，其部族且在八部之外，亦隐隐可见也。

第五章 丁 令

北方游牧之族，大者有四：曰匈奴，曰鲜卑，曰丁令，曰肃慎。匈奴起自上古，极盛于前汉，而亡于后汉。鲜卑继之，两晋、南北朝时臻极盛，宇文周灭而亡。丁令继鲜卑而起。极盛于南北朝、隋、唐之间，而亡于唐文宗时。自金之起，以迄于清，则肃慎极盛之世也。

丁令，亦作丁零、丁灵，异译曰敕勒，亦作铁勒。我国今日，统称此族曰回，西人则称为突厥。其实突厥、回纥，皆丁令之分部耳。^①此族当汉代居今拜喀勒湖附近。为匈奴冒顿所征服。又有居今西伯利亚西境者，当唐努乌梁海之西，额尔齐斯河之东南，吐鲁番之正北。为郅支单于所击破。《魏书》载其部落，分布尤广。自西海以东，依山据谷，往往不绝。康国之北，得巖海之东西，伊吾以西，焉耆之北，以及金山西南，独洛河域，北海之南皆有之。《唐书》铁勒分十五部，今内外蒙及兴安岭一带皆其地。盖沿匈奴、鲜卑、乌孙、康居、大宛诸国之北，东西绵亘，如衣带焉。^②其部落颇多，而缺于转结。故两晋以前，未有兴者。五胡乱华之时，鲜卑纷纷侵入内地，此族乃踵之，而入漠南北。

《魏书》云：“敕勒，诸夏称之为高车。”是二者虽称名不同，实系一族。然又分高车、铁勒为二传，盖以迁漠南服魏者为高车，居漠北服柔然者为铁勒也。高车之在漠南者，居鹿浑海西北百余里。^③常与柔然为敌，亦侵盗于魏。魏道武帝击破之。柔然社仑之为魏

① 详见附录《丁令》条。

② 详见附录《丁令居地》条。

③ 今达里泊。

所败也，走漠北，击高车，深入其地，尽并诸部。由是大张。其后太武征大檀，前后降其众数十万。皆徙之漠南。凡此者，史皆称之为高车。隋以后遂不复见，盖或与他族相同化，或则并入突厥也。其在漠北者，突厥起而收用之。

漠北之铁勒，首起与柔然抗者，为副伏罗部。然无所成^①至南北朝之末，而突厥始盛。突厥起于金山。其先，盖柔然之铁工也。^②有名吐务者，^③种类渐强。始号大叶护。吐务之长子曰土门，始至塞上市缯絮。土门求婚于柔然。柔然阿那瓌怒，使人冒辱之，曰：“尔是我锻奴，何敢发是言也？”土门亦怒，杀其使者。遂与之绝，而求婚于魏。魏以长乐公主妻之。^④废帝元年，土门击柔然，大破之。阿那瓌自杀。土门自号伊列可汗。卒，子科罗立，号乙息记可汗。乙息记可汗且死，舍其子摄图而立其弟，是为木杆可汗。遂灭柔然。又西破哒，东臣契丹，西南袭破吐谷浑。其地：东自辽河以西，至西海，万里。南自沙漠以北，至北海，五六千里。赫然为北方大国矣。周、齐相争，惧其为敌用，争结婚姻，厚赠遗以抚之。突厥益骄。其他钵可汗至谓其徒属曰：“但使我在南两个儿常孝顺，何忧无物邪？”他钵者，木杆之弟也。木杆舍其子大逻便而立之。他钵子曰庵逻。他钵谓庵逻：“避大逻便。”摄图者，乙息记可汗子，他钵以为尔伏可汗，主东方；不可。庵逻继他钵立。大逻便不服，数使人冒辱之。庵逻不能制，以位让摄图。摄图立，是为沙钵略可汗。以大逻便为阿波可汗。齐之亡也，其范阳王绍义奔突厥。他钵可汗立为齐帝寇周。周人以千金公主妻之，乃执送绍义。沙钵略仍妻千金公主。周之亡也，公主痛宗社覆灭，日夜言于沙钵略。沙钵略侵

① 大檀之败，其部长阿伏至罗，与其从弟穷奇，走车师之北自立。后为柔然及哒所破。

② 突厥缘起，详见附录《突厥与蒙古同祖》条。

③ 讷都陆之孙。讷都陆，即纳都六设也。详见附录。吐务之名，见《唐书·西突厥传》。

④ 文帝大统十七年。

隋。文帝击破之。沙钵略与阿波构兵。主西方之达头可汗助阿波。沙钵略乃降隋。立约，以磧为界。千金公主改姓杨，封大义公主。沙钵略卒，弟处罗侯立，是为叶护可汗。西禽阿波。卒，子雍虞闾立，是为都蓝可汗。沙钵略子染干，为突利可汗，主北方。使来求婚。文帝要以杀大义公主而后许。突利构公主于都蓝。都蓝杀公主。隋以宗女义安公主妻突利，故厚其礼以间之。突利南徙度斤旧镇。^①都蓝怒曰：“我大可汗也，反不如染干？”击突利，破之。突利以五骑走归朝。拜为启民可汗。处之夏、胜二州之间。^②时义安公主已卒，复妻以宗女义成公主。未几，都蓝为其下所杀。启民以隋援，尽有其众。臣服于隋。

从来夷狄之顺从，恒以中原王朝之盛强，适直彼之衰乱；而夷狄之强横，亦以中原王朝之衰乱，促成彼之盛强，此数见不鲜之事也。惟突厥亦然。启民之世，事隋甚谨。启民卒，子始毕立。直炀帝时，中原乱，始有轻隋室心。炀帝北巡，始毕围之雁门，援至乃解。时中国大乱，华人归之者甚众。突厥遂大张。控弦之士且百万，前此夷狄未有也。群雄之崛起者，悉臣事之。唐高祖起太原，亦卑辞厚礼以乞援焉。天下已定，犹屈意奉之。而突厥求取无厌。始毕卒，弟处罗可汗立。处罗卒，弟颉利可汗立。自启民至颉利四世，皆妻隋义成公主。处罗始迎隋萧后及齐王暕子正道，处之定襄。^③

① 胡三省曰：“即都斤山，旧沙钵略所居。”案《唐书·突厥传》曰：“可汗建庭都斤山。”《薛延陀传》曰：“树牙鬱督军山，直京师西北六千里。颉利灭，率其部稍东，保都尉鞬山独逻水之阴。远京师才三千里而赢。”《回纥传》曰：“南居突厥故地，徙牙乌德鞬山、昆河之间。”独逻水，今土拉河。昆河，今鄂尔坤河。都尉鞬山与乌德鞬山，地当相近。乌德鞬为突厥故地，疑与都斤是一。惟鬱督军山颇远。然《延陀传》又谓“突厥处罗可汗时，铁勒一时反叛，推契苾可汗，延陀乙室钵为可汗。后突厥复强，二部黜可汗往臣之。回纥、拔野古、阿跌、同罗、仆骨，在鬱督军山者，东附始毕。乙室钵在金山，西役叶护。”以鬱督军山与金山对举，则距土拉、鄂尔坤二河，亦不能甚远。窃疑都斤、都尉鞬、乌德鞬、鬱督军，均系一音异译，皆即今之杭爱山；而《唐书》直京师西北六千里之语有讹也。

② 夏州，今内蒙古乌审旗附近。胜州，今内蒙古准格尔旗附近。

③ 今山西平鲁县北。

及颉利，遂岁进扰。高祖至欲迁都以避之，以太宗谏而止。始毕子曰什钵苾，主东方，称突利可汗。太宗与之相结。突利贰于颉利。而颉利仍岁兴师，群下怨苦；又遭岁饥，哀敛苛重，铁勒叛之；势遂衰。贞观四年，太宗遣李靖击破之。颉利为行军总管张宝相所禽。于是突厥崩溃。或附薛延陀，或走西域，^① 而来降者尚十余万。诏议处置之宜，温彦博请徙之宥，豫之间，分其种落，散居州县。教以耕织，化为齐民。魏征请遣还故土。太宗右彦博议。度朔方地，建顺、化、祐、长四州为都督府，以处其众。^② 剖颉利故地，左置定襄，右置云中都督府以统之。^③ 以突利为顺州都督，率其下就部。卒，子贺逻鹘嗣，后太宗幸九成宫，突利弟结社率以郎将宿卫，阴结种人谋叛，劫贺逻鹘北还。事败，诛。乃投贺逻鹘于岭外。立颉利族人思摩为可汗，树牙河北，悉徙突厥还故地。时薛延陀强，思摩畏之，不敢出塞。太宗赐延陀书，谕以“磻以北，延陀主之。其南，突厥保之。各守境，毋相钞犯。有负约，我自以兵诛之”。延陀受令，贞观十五年，思摩乃率其众渡河，牙于故定襄城。^④ 居三年，下多携背，惭而入朝，因留宿卫。余众稍稍南渡河，处于夏、胜二州之间。其地为车鼻可汗所夺。

突厥者，铁勒之一部耳。其骤致强盛，虽曰土门、木杆之雄略，亦铁勒之众，为之辅也。^⑤ 故铁勒一叛，而突厥遂不可支。唐时铁勒诸部，以薛延陀、回纥为最强。颉利政衰，铁勒叛之，共推薛延陀部长夷男为主。太宗册为真珠毗伽可汗。突厥亡，延陀称雄北方。贞观十九年，夷男卒，子拔灼立。国乱，为唐所灭，铁勒诸部皆降。悉以其地置都督府、州。即故单于台立燕然都护府以统之。^⑥ 于

① 盖走西突厥。

② 地皆在今河套内。

③ 定襄都督府、侨治宁朔，今陕西榆林县境。云中都督府，侨治朔方，今内蒙古河套西北部及后套地区。

④ 今内蒙古呼和浩特附近地区。

⑤ 《唐书·突厥传》，谓“自突厥有国，东征西讨，皆资其用，以制北荒”。

⑥ 在今呼和浩特西。

是回纥南境至河。车鼻可汗者，亦阿史那氏。居金山北，势颇张。延陀亡，益盛。贞观二十一年，太宗以其逆命，发回纥、仆骨兵讨禽之。置单于、瀚海二都护府，分领突厥诸都督府、州。高宗时，省单于，徙瀚海于古云中，改号云中都护府。后又改号单于，统碛以南。改燕然都护府为瀚海，统碛以北焉。单于府酋温傅、奉职二部尝叛，^①裴行俭讨平之。高宗末年，颉利族人骨咄禄又叛。唐不能定。武后时，骨咄禄死，弟默啜立。遂大盛。铁勒诸部，回纥、契苾、思结、浑，皆度碛，南徙甘、凉间，余悉臣之。兵与颉利时略等矣。尝寇河北，至相州。^②武后发三十万众讨之，不能战，突厥徐引去。玄宗开元时，默啜老，昏暴，部落叛之。四年，北讨拔野古，胜归。不设备，为拔野古残卒所杀。弟默棘连立，为毗伽可汗。用默啜老臣噉欲谷，与唐联和，突厥以安。又传两世，至天宝初，国乱。回纥怀仁可汗定之，尽有其地。徙牙乌德鞬山。自是回纥独雄漠南北矣。

回纥之强，非有以踰于延陀也。然突厥之初亡也，延陀据其地，不二十年而为唐所灭；突厥之再亡也，回纥雄张漠南北者且百年，则时会为之也。怀仁可汗之卒也，子葛勒可汗立。直安、史之乱，使太子叶护，将兵四千，来助唐收东西京。叶护得罪死。葛勒卒，次子牟羽可汗立。其妻，仆固怀恩女也。仆固者，即铁勒之仆骨部也。史朝义诱牟羽进犯，代宗使怀恩往见之。牟羽乃请助唐讨朝义。唐以雍王适为天下兵马大元帅，往会之。王见可汗于陕州。可汗责王不蹈舞，榜杀兵马使魏琚、判官韦少华。怀恩及其子瑒，以回纥兵平东京，定河北。初叶护之助唐收西京也，约城克之日，土地归唐，金帛子女归回纥。西京既下，回纥欲如约。时广平王俣为天下兵马大元帅，率众拜于马前。回纥乃止。及破东京，卒大掠三日。肃宗犹岁赐绢二万匹以酬之。朝义之平，回纥入东京，放兵剽攘，人皆遁保圣善、白马二祠浮屠。回纥怒，火之，杀万余人。后仆固

① 温傅部再叛。

② 今河南安阳附近地区。

怀恩反，诱回纥、吐蕃进犯。怀恩道死，二族争长。郭子仪单骑见其帅于泾阳。回纥乃约和而还。自乾元后，^① 纳一马，取直四十缗。岁以马四万求仇，皆驽弱不可用。其人之留京师者尤骄横，至诟折官吏，以兵斫含光门，入鸿胪寺；曹辈掠子女，暴市物；杀人则首领劫囚，残狱吏去。德宗立，九姓胡劝可汗入寇。宰相顿莫贺达干谏。不听。弑之，屠其支党及九姓胡几二千人而自立，是为毗伽可汗。始回纥至唐，常参以九姓胡，往往留京师，居资殖产甚厚。及是，毗伽诸父突董等还国，装橐系道。留振武^② 三月，供拟珍丰，费不资。军使者张光晟阴伺之，皆盛女子以橐。已而闻毗伽新立，多杀九姓。九姓胡惧，不敢归，往往亡去，突董察视严。群胡献计於光晟，请悉斩回纥。光晟因勒兵尽杀回纥及群胡。明年，因册使，归突董之丧。毗伽使谓册使曰：“国人皆欲尔死，我独不然。突董等已亡，今又杀尔，犹以血濯血，徒益汙。我今以水濯血，不亦善乎？为我言：有司所负马直百六十万，可速偿也。”使随册使来朝。德宗隐忍，赐以金缯。然回纥虽横，多得唐物，浸骄侈，稍弱。自天宝末，陇右陷于吐蕃、安西、北庭，^③ 朝贡道绝，假道回纥，乃得达。回纥由是求取无厌。沙陀突厥依北庭者苦之，密引吐蕃陷北庭。回纥以数万众攻之，大败。吐蕃又取深图川。^④ 回纥大恐，稍南其部落以避之。毗伽以后，国多弑逆。传十世，至廋馭特勒，当唐文宗。开成四年，饥疫，为黠戛斯所破。可汗死，诸部皆溃。可汗牙部十三姓，奉乌介特勒为可汗，转侧天德，振武间。^⑤ 求居天德，不许。攻云州，^⑥ 唐兵败之，降其众数万。可汗收所余保黑车子室韦。唐啖黑车子杀之。其下奉其弟遏捻特勒为可汗，哀残部数千，仰食于奚。宣宗初，张仲

① 肃宗年号。

② 军名，治单于都护府。

③ 唐所置都护府。安西、北庭，今新疆焉耆。北庭治庭州，今新疆乌鲁木齐。

④ 当在今蒙旗间。

⑤ 天德军，在今内蒙古乌拉特旗境。

⑥ 今山西大同。

武讨奚，破之。回纥浸耗灭。名王贵臣五百余，转依室韦。仲武谕室韦：“羈致可汗等。”遏捻惧，挟妻子，驰九骑，夜委众西走，部人皆恸哭。室韦七姓，析而隶之。黠戛斯怒，伐室韦，悉收回纥还磧北。回纥之在漠南北者遂亡。余帐匿山林间，狙盗诸蕃自给，稍归于庞特勒。

回纥之为黠戛斯所破也，残众入安西、吐蕃。^①其相驷职及外甥庞特勒，以十五部奔葛逻禄。后稍强，宣宗尝册为可汗。懿宗时，又有仆固俊者，击斩吐蕃将论恐热，尽有西州、^②轮台^③等城。自唐之衰，回纥贡会不常，史纪其事，不能备始末。然其居甘州、^④沙州、^⑤西州等处者，时时以玉马与边州相市。自五代至宋，亦时通贡献。其上书，犹呼唐朝天子为舅，^⑥答诏亦呼之为甥。契丹之兴，兵力尝至河西，回部远至于阗，皆通朝贡。元昊之强，河西亦服属之。辽之亡也，其室大石西走。会十八部王众于北庭。诒书回鹘王，谕以假道之意。回鹘王毕勒哥，即迎至邸，大宴三日。献马六百，驼百，羊三千，送至境外。元称其族曰畏吾儿。元太祖既定漠南北，畏吾儿亦都护巴而术阿儿忒的斤来朝，元人妻以女。元通西域之道始开。太祖之西征也，畏兀儿及哈刺鲁皆以兵从。盖自唐文宗时，回纥亡於漠南北，而其西南迁者，则日以盛大。自五代以降，河西及天山南路，几悉为所据云。元时，天山南路，地属太祖第三子察合台。清初，南路诸城主，仍多察合台后裔。先是元、明之际，元室疏族帖木儿，兴于撒马儿干，尽并西亚之地。帖木儿信天方教，教士多集于其都。教主后裔摩诃末亦至焉。后迁居喀什噶尔。摩诃末二子，长曰加利宴，其后为白山宗。次曰伊撒克，其后

① 此所谓吐蕃，亦吐蕃所据河西及天山南路之地。

② 今新疆吐鲁番。

③ 今新疆轮台。

④ 今甘肃张掖。

⑤ 今甘肃安西。

⑥ 以唐代尚主故。

为黑山宗。南路政教实权，渐入其手。而二宗轧轹殊甚。清康熙时，白山宗为黑山宗所逐，奔西藏，乞援于达赖喇嘛。准噶尔噶尔丹以达赖之命，纳白山酋。遂尽执元裔诸王，迁诸天山北路，并质回酋于伊犁。策妄阿布坦立，复替白山宗，代以黑山宗。白山酋马罕木特，^①据叶尔羌谋自立。策妄阿布坦执而幽之。马罕木特二子，长曰布罗尼特，次曰霍集占，所谓大小和卓木也。清定伊犁，大小和卓木遁归南路，自立。清兵进平之。二酋皆奔巴达克山。巴达克山执以献。于是葱岭以西回部，若巴达克山，若克什米尔，若乾竺特，^②若博罗尔，^③若敖罕，若布哈尔，若阿富汗，若哈萨克，若布鲁特，皆来朝贡。威令所及，直接波斯。布罗尼特子曰萨木克，居敖罕。清人赂敖罕银岁万两，使禁錮之。其子曰张格尔，嘉庆二十五年，犯喀什噶尔。守兵击郤之。道光六年，复以敖罕兵入侵，陷喀什噶尔、英吉沙尔、和阗、叶尔羌。清杨遇春击破之。张格尔走布鲁特。布鲁特执献之。诏敖罕执献其家属。敖罕不听。清人绝其贸易。敖罕以兵资张格尔兄摩诃末，使入侵。后敖罕仍为清錮和卓木之族，清亦许敖罕互市以平。自元以来，回族错居内地，西北尤盛。以所信教之异，与汉人不能无齟齬。咸、同间，粤捻兵起，回民亦起于西南、西北。张格尔子和卓布苏格，又以敖罕兵入据喀什噶尔。阿古柏者，敖罕将。尝拒俄人有功。同治六年，弑和卓布苏格而代之，尽有南路诸城，建立哲德沙尔王国，自称毕条特勒汗，并与俄、英等帝国相勾结。左宗棠力主用兵，卒平之，始改新疆为行省。然葱岭外诸回部，既皆亡于英、俄；沙俄又乘机出兵强占我国伊犁地区，清政府又被迫签订《伊犁条约》，被割去霍尔果斯河以西地区与北疆斋桑湖以东地区，连同五次《勘界议定书》总共被沙俄夺去七万多平方公里之领土。

① 实亦摩诃末之异译。

② 即坎巨提。一作喀楚特。

③ 即帕米尔。

天山南路，为回纥败亡后所迁。而自金山以西南，迄于黑海，则皆为西突厥故壤。西人近代仍称此族曰突厥，盖有由也。西突厥者，其始曰瑟点蜜，^①叶护吐务次子，而伊列可汗之弟也。始分乌孙故地而有之。与都陆、^②弩失毕、哥逻禄、^③处月、处蜜、伊吾诸种相杂。^④其风俗大抵突厥也，言语小异。^⑤瑟点蜜子曰达头可汗，始助阿波，与东突厥构兵。以隋助启民故，达头败，奔吐谷浑。阿波之禽，其下立泥利可汗。后为铁勒所败。子泥撅处罗可汗立。其母向氏，汉人也。达头孙射匿，入朝于隋。隋拜为大可汗。袭败处罗。处罗奔高昌。隋使向氏要之，乃入朝。^⑥射匿建庭于龟兹北之三弥山，自玉门以西皆役属。卒，弟统叶护可汗立。并铁勒，服波斯、罽宾，控弦之士数十万。遂霸西域，徙庭于石国北之千泉。^⑦已而负其强，不以恩接下。诸父莫贺咄杀之自立。国乱，其后复分为东西。西以五咄陆东以五弩失毕部为桢干，而以伊列水^⑧为界。西咄陆可汗并东部，其下作乱，复出亡。国人来请立君。唐为册立乙毗射匿可汗。贺鲁者，瑟点蜜之五世孙也。居多逻斯川。^⑨乙毗射匿迫逐之。贺鲁内属。唐处之庭州。招怀离散，部落日盛。西取咄陆可汗故地。复建牙于千泉，尽统咄陆、弩失毕之众，遂侵庭州。高宗讨平之，建昆陵、濠池二护府，以阿史那弥射、^⑩步真，^⑪分统其众。时乙毗射匿已死，子真珠叶护立。弥射击杀之。弥射为

① 亦作瑟帝米。

② 即咄陆异译。

③ 即葛逻禄。

④ 案旧史所谓种者，大抵指氏族言之。《唐书》此语，盖谓阿史那外，又有此诸氏，非谓突厥之外，别有其他民族也。

⑤ 盖与西域诸国人相杂故。

⑥ 后唐以射匿之请，杀之。

⑦ 在碎叶城西四百五十里。碎叶城，在碎叶川上。碎叶川，今吹河也。

⑧ 今伊犁河。

⑨ 今塔拉斯河。

⑩ 瑟点蜜五世孙，为昆陵都护，统左五咄陆之众。

⑪ 弥射族兄。为濠池都护，统右五弩失毕之众。

步真所诬，为唐所诛。旋步真亦死，西突厥益衰。突骑施乌质勒，据有其地。乌质勒卒，子娑葛，与弟遮弩毕相攻，皆为默啜所杀。突骑施别种车鼻施噉苏禄，雄张西域，众至三十万。肃宗后，葛逻禄徙居其地，即《元史》所谓哈刺鲁云。西突厥属部处月，异译亦曰朱邪。西突厥亡，依北庭都护府以居。地在金娑山之阳，蒲类海之阴，^①有大碛曰沙陀，故俗称沙陀突厥，以苦回纥衰斂，引吐蕃陷北庭，吐蕃徙之甘州，入侵，常以其人为前锋。久之，回纥陷凉州。吐蕃疑沙陀贰於回纥欲徙之河外，举部愁恐。其酋长朱邪尽忠乃与其子执宜悉其众三万落来归，吐蕃追之，战且走。所部死伤略尽，尽忠战死。执宜哀残部二千款灵州塞。^② 节度使范希朝以闻，诏处之盐州，^③ 时宪宗元和三年也。希朝移镇太原，沙陀举族从之。希朝料其劲骑千二百，置沙陀军，而处其余众於黄花堆。^④ 后又料其部人三千，置代北行营，授执宜兵马使。死，子赤心嗣，迁蔚州刺史，云州守捉使。庞勋乱，从康承训讨平之。赐姓名曰李国昌，进大同节度使，^⑤ 以回纥侵鄙，^⑥ 延，^⑦ 徙镇振武。僖宗时，其子克用，杀云州防御使段文楚，入据其州。朝仪移国昌於大同，以为克用必无以拒也，而国昌欲父子各得一镇，不奉诏，遂反。幽州兵讨破之。国昌、克用，亡入鞑靼。已而黄巢起义，陷长安，官军四面讨之，不能克，卒召克用讨平之。乃以国昌镇代北，克用镇河东，遂为唐、晋、汉三朝入据中原之本。以上为西突厥事见于中国史者。其见于西史者，则有若哥疾宁朝（Ghazni），有若塞而柱克朝（Seljaks），有若花刺子模朝（Khwarozm），^⑧ 皆尝雄据葱岭以西。后花刺子模为

① 蒲类海、今巴里坤湖。

② 今宁夏回族自治区灵武。

③ 今宁夏回族自治区盐池。

④ 在今山西山阴县北

⑤ 大同军，治云州，今山西大同。

⑥ 今陕西富县

⑦ 今陕西延安

⑧ 译名皆依《元史译文证补》，花刺子模，《元史》称为西域回。洪氏因之，亦称其补传为西域，於义未安，今改称花刺子模。

成吉思汗所破，西北亚之地，皆入蒙古。至近世，又为英、俄诸国所侵略。然雄据其地之民族，固犹以突厥为大。

康里，《元秘史》作康邻。西史谓亦突厥族，其地在咸海之北，西抵黑海。大食哈利发爱其勇悍，多募为兵。数传而后，遂跋扈。哈里发之废立，亦操其手。花刺子模王阿剌哀丁谟罕默德，有兵四十万，皆康里人。王母亦康里部酋女。王母以康里人为将，权与王埒。诸将亦倚王母，不听令。成吉思西征时，花刺子模所以一败涂地者，由其威权素夺，不可以御大敌也。^①《元史》之克列部，或曰即康里转音。其族本居欠火州，^②至王罕，乃徙土兀拉沐涟。^③王罕为成吉思汗父执。成吉思初起时，东征西讨，尝与合兵。后以王罕子你勒合与成吉思汗有隙，乃至构兵。为成吉思汗所灭。

今之乌梁海，《明史》作兀良哈，《元秘史》作兀良孩，西人谓其容貌近突厥，盖亦丁令族。据《秘史》，其牧地在不而罕山。^④元时，居今热河、洮昌二道境。其地为大宁路，属辽阳行省。明初，大宁路来降，即其地置泰宁、朵颜、福余三卫，隶北平行都司。宁王权居大宁^⑤以节制之。成祖起兵，袭执宁王。即位后，改北平行都司为大宁都司，徙治保定，大宁遂入兀良哈。瓦剌既强，兀良哈役属之。清平卫拉特，其众乃自立，居于唐努山，谓之唐努乌梁海。设佐领四十八，分隶定边左副将军，哲卜尊丹巴呼图克图及札萨克图三音诺颜两部。其徙牧阿尔泰山者，则属科布多大臣。同治三年中俄签订《塔城条约》（即《中俄勘分西北界约》），被割去唐努乌梁海西北部十佐领唐努乌梁海之地，雍正时，尝与俄分立界碑，同治八年，又各派员立界牌八。宣统二年，沙俄忽将察

① 蒙古西征，由朮打刺城主杀蒙古西行之人，城主，王母之弟也。

② 即谦河流域。在今唐努乌梁海境。详见《元史译文证补》西北附录释地下吉利吉思德合纳谦州益兰州等处条。

③ 今土拉河。

④ 今车臣，土谢图两部界上之布尔罕哈勒那都岭。

⑤ 今河北隆化县境。

布齐雅勒达布界牌撤毁。外务部与之交涉。沙俄谓同治八年所立界碑，未为妥协。唐努乌梁海界限，只可作为未定之案。交涉未了。迨一九一四年，《中俄蒙协约》成立。沙俄承认外蒙为中国领土。唐努乌梁海，当然亦在其内。乃沙俄于五年，复强占乌梁海之地，给其头目以印信，使归俄辖。将该处华商尽行驱逐，没其财产。政府拟设佐理专员于其地，沙俄声言将以兵力拒之，遂不果。俄国革命，侨寓乌梁海之俄人，时以党派互争。华商及外蒙皆请政府保护，我政府于是收复中东部三十六佐领并派专员驻扎，但不久又被迫撤退。从此乌梁海东部九佐领之地，属今蒙古人民共和国库苏古勒省。中部沙俄所占二十七佐领之地，于一九二四年宣布成立乌梁海共和国，一九二六年改称唐努图瓦人民共和国，一九四四年被并入苏联版图，我国政府至今不予承认。

丁令之政治，远不如匈奴之统一。匈奴单于，一而已矣。突厥则分据一方者，皆称可汗。其尊卑与大可汗盖不甚殊，故每致分争。突厥之地，大于匈奴，隋、唐所以对待之者，实力又不如汉代之厚。然不旋踵而皆奏肤功，则突厥之分崩离析，授之以隙也。其兵甚勇悍，而无节制。《北史·高车传》云：“为性粗猛，党类同心。至于寇难，翕然相依。斗无行陈，头别冲突，乍出乍入，不能坚战。”《铁勒传》曰：“人性凶忍，善于骑射。贪婪尤甚，以寇钞为事。”是其事也。社仑始立军法：以千人为军，军置将。百人为幢，幢置帅。先登者，赐以卤获。退懦者，以石击首杀之，或临时捶挞。然收效盖寡。杨忠与突厥伐齐，还，言于周武帝曰：“突厥甲兵恶，赏罚轻，首领多而无法令，何谓难制取？”颉利入侵，唐太宗谓突厥：“众而不整，君臣惟利是视。可汗在水南，而酋帅皆来谒我，我醉而缚之，甚易。”可见自南北朝至隋、唐，其散漫情形迄未尝改。此其所以地虽广，兵虽多，而终不竞于中原欤？^①

其生业，亦以游牧为主。《北史·铁勒传》，谓其“居无恒处，随水

① 《北史·突厥传》：“候月将满，转为寇钞。与匈奴同。盖所以利夜行也。”

草迁移”。《突厥传》谓其“穹庐毡帐，随逐水草，食肉饮酪，身衣裘褐”是也。《铁勒传》又云：“近西边者，颇知艺植。”盖为数甚少。故突厥取醉，仅知马酪，又不如匈奴之知饮蘖酒，乌桓之能酿而不知作麴矣。唐时，默啜求六州降户，并粟种十万斛，农器三千具。盖受汉文化熏陶渐知种植也。

《北史·突厥传》，谓其“贱老贵壮，重兵死，耻病终”。此与匈奴、鲜卑相类。又称其“男子好袴裤，女子好跣鞣。饮马酪取醉，歌呼相对”。可见其慷慨而少思虑。又《高车传》谓其“畜产自有记识，虽栏纵在野，终无妄取”。亦足见其风俗之淳也。

其服饰：男子辫发，女子则否。《北史·高车传》：“妇女以皮裹羊骸，戴之首上，萦屈发鬓而缀之，有似轩冕。”《南史·蠕蠕传》：“辫发，衣锦，小袖袍，小口裤，深雍鞞。”利御寒而便骑射，亦各适於其地也。《北史·突厥传》称其“披发左衽”，《隋书·突厥传》载《沙钵略表》，谓“削衽解辫，华音从律，习俗已久，未能改变”。可见其由来之旧矣。

其婚姻丧葬之礼，亦颇可考者。《北史·高车传》：“婚姻用牛马纳聘。结言既定，男党营车阑马，令女党恣取。上马祖乘出阑。马主立阑外，振手惊马，不坠者即取之。坠则更取，数满乃止。”盖亦买卖婚姻之俗。又借以觐骑乘之术，则游牧之族之游戏也。又云：“俗无谷，不作酒。迎妇之日，男女相将，持马酪，熟肉节解。主人延宾，亦无行位。穹庐前丛坐，饮宴终日，复留其宿。明日，将妇归。既而夫党还入其家马群，极取良马。父母兄弟虽惜，终无言者。颇讳取寡妇，而优怜之。”《铁勒传》“其俗大抵与突厥同。惟丈夫婚毕，便就妻家，待产乳男女，然后归舍；死者殡埋之，此其异也”。《突厥传》：“葬日，男女咸盛服饰，会于葬所。男有悦爱于女者，归即遣人聘问。其父母多不违也。”又云：“父兄叔伯死，子弟及姪等，妻其后母、叔母、嫂，惟尊者不得下淫。”此则类匈奴矣。

其丧葬之礼，有足见其俗之右武者。《北史·高车传》，谓“其死

亡葬送，掘地作坎。坐尸于中。张臂引弓，佩刀挟槊，无异于生，而露坎不掩”是也。《突厥传》：“死者停尸于帐。子孙及亲属男女，各杀羊马，陈于帐前祭之。绕帐走马七匝。诣帐门，以刀斫面，且哭，血泪俱流。如此者七度，乃止。择日，取亡者所乘马，及经服用之物，并尸俱焚之，待时而葬。春夏死者，候草木黄落，秋冬死者，候华茂，然后坎而瘞之。①葬日，亲属设祭。及走马，斫面，如初死之仪。表木为茔，立屋其中。图画死者形仪及其生时战陈状。②尝杀一人，则立一石，有至千百者。又以祭之羊马头，尽悬于竿上。”案突厥丧仪，颇类乌桓，惟焚尸为异。岂以近接西胡，故染其俗邪？抑古氏羌之俗也？③

肃宗以幼女宁国公主，下嫁回纥葛勒可汗。可汗死，国人欲以公主殉。主曰：“中国人婿死，朝夕临，丧期三年，此终礼也。回纥万里结婚，本慕中国，吾不可以殉。”乃止。可见其国本有殉葬之俗矣。

丁令残忍之俗，观其刑法可见。④《北史·蠕蠕传》：“豆仑杀其臣石洛侯，夷其三族。”《突厥传》：“反叛杀人及奸人之妇，盗马绊者皆死。淫者割势而要斩之。奸人女者，重责财物，即以其女妻之。斗伤人者，随轻重输物。伤目者偿女，无女则输妇。财折支体者输马。盗马及杂物者，各十余倍征之。”⑤其用刑之酷，可以见其残忍。其动辄以女妇为偿，又可见其视人如物也。

丁令诸族，敬天地，日月，先祖，亦与匈奴同。《隋书·突厥传》：“五月中，多杀羊马，以祭天神于都斤西五百里。有高山迴出，上无

① 案古之为丧服者，至亲以期断，取天地已易，四时已变，凡在天地之中者，莫不更始之义也。土庶人三月而葬，亦取天道一时而小变之义也。突厥之所谓时者，虽与中国异。然其候时之变而葬，则与中国同。可以见礼之缘起，大略相类也。

② 此可知塋画之缘起。

③ 羌族本有火葬之俗，见第十篇。唐太宗谓颉利时葬皆起墓，则又渐染华俗矣。

④ 古代刑法，恒较后世为酷者，亦以其任情而动，而不能节其疾恶之情也。

⑤ 《隋书》：“盗者则偿赃十倍。”

草树，谓之勃登凝梨，夏言地神也。^①《北史·突厥传》：“可汗恒处于都斤山。牙帐东开，盖敬日之所出也。”^②“每岁率诸贵人，祭其先窟。”“西突厥亦岁使重臣向其先世所居之窟致祭。”“以五月八月聚祭神。”《北史·高车传》：“时有震死及疫病，则为之祈福。若安全无他，则为之报赛。多杀杂畜，烧骨以燎。走马绕旋，多者数百匝。男女大小皆集会。文成时，五部高车，合聚祭天，众至数万。大会走马，杀牲游绕。歌吟忻忻。其俗称自前世以来，无盛于此会。”此即匈奴蹄林之俗也。亦重休咎征。木杆可汗与周武帝约婚。武帝使逆女。突厥贰于齐。会有雷风之变，乃许使者以后归。隋文帝之罪状突厥也，曰：“彼地咎征祲作，年将一纪。乃兽为人语，人作神言，云其国亡，讫而不见。”文帝固好机祥，然唐太宗亦谓突厥“盛夏而霜，五日并出，三月连明，赤气满野”，则必彼中先有此等妖祥之说，然后汉人从而摭拾之矣。又其见于《唐书》者，武德元年，始毕牙帐自破，明年而始毕死。天雨血三日，国中群犬夜号，求之不见，而处罗死。“延陀将灭，有丐食于其部者。延客帐下。妻见客，人而狼首。主不觉。客已食，妻语部人共追之。至鬱督军山，见二人焉，曰：我神也。薛延陀且灭。追者恐，却走。遂失之。果败此山下。”又回纥人自述其亡国之事云：“唐以金莲公主^③女回纥葛励的斤。别建牙于和林之别力跛力答，言妇所居山也。又有山曰天哥里于答哈，言天灵山也。南有石山曰胡力答哈，言福山也。唐使与相地者至其国，曰：和林之盛强，以有此山也。盍坏之以弱其国？乃诡语葛励曰：既为婚姻，将有求于尔，其与之乎？福山之石，于上国无所用，而唐人愿见。葛励与之。石大不能动。唐人烈而焚之，沃以醇醪，石碎，辇去。国中鸟兽为之悲号。后七日，葛励卒。自是灾

① 此可见“因高祀高”之礼意，登封所由昉也。

② 此类乌桓。

③ 宪宗女太和公主，穆宗时，下嫁登罗羽录没密施句主毗伽可汗。又三传而为黠戛斯所破。

异屡见，民弗安居。传位者又数亡。乃迁于西州。”^①于内忧外患，一无所忆，而转传此荒诞不经之语，亦可以见其所信矣。^②

《唐书·黠戛斯传》谓其呼巫为甘。黠戛斯虽白种，亦杂丁令，其语言多同回纥，此殆丁令语邪？柔然末主阿那瓌，兄曰丑奴。丑奴父曰伏图，伏图父曰那盖。那盖，可汗豆仑之叔父也。豆仑时，高车副伏罗部叛。部长阿伏至罗，与从弟穷奇走车师之北，自立。豆仑与那盖分两道击之。豆仑数败，而那盖累捷。国人咸以那盖为天所助，杀豆仑而立之。卒，伏图立。时穷奇已为𐱃𐱃所杀，虏其子弥俄突等。阿伏至罗亦以残暴，为其下所杀。立其宗人跋利延。𐱃𐱃纳弥俄突，国人杀跋利延迎立之。伏图击弥俄突，败死于蒲类海北。丑奴立，壮健善用兵。西击高车，大破之，禽杀弥俄突，尽并叛者，柔然复盛。实中兴之雄主也。而以信巫亡其国。初伏图纳豆仑之妻侯吕陵氏，生丑奴、阿那瓌等六人，丑奴立后，忽亡一子，字祖惠。求募不能得，副升牟妻是豆浑地万年二十许，为医巫，言此儿今在天上，我能呼得之。丑奴母子欣悦。后岁仲秋，在大泽中施帐幄，斋洁七日，祈请天神。经一宿，祖惠忽在帐中，自云恒在天上。丑奴母子抱之悲喜，大会国人，号地万为圣女，纳为可贺敦。授夫副升牟爵位。赐牛马羊三千头。地万既挟左道，亦有姿色。丑奴甚加宠爱。信用其言，乱其国政。如是积岁。祖惠年长，其母问之。祖惠言我恒在地万家，不曾上天。上天者，地万教也。其母以告丑奴，丑奴言地万悬鉴远事，不可不信，勿用谗言也。既而地万恐惧，潜祖惠于丑奴。丑奴阴杀之。魏明帝正光初，丑奴母遣莫何去汾李具列等绞杀地万。丑奴怒，欲诛具列等。会阿至罗^③侵丑

① 语出虞集《高昌王世勋碑》。《元史·亦都护传》采之，而误西州为交州。

② 《北史·高车传》：“俗不清洁，喜致震霆。每震，则叫呼射天而弃之，移去。来岁，秋，马肥，复相率候于震所。埋戕羊，然火拔刀，女巫祝说，似如中国祓除；而群队驰马，旋绕百匝，乃止。人持一束柳槐，回竖之，以乳酪灌火。”一震霆之微，亦以为祥而禳之，可谓甚矣。

③ 未详何人。

奴。丑奴击之，军败，还为母与大臣所杀，立阿那瓌。十日，其族兄俟力发示伐之。阿那瓌战败，南走归魏。阿那瓌母及其二女，寻为示发所杀。案阿那瓌自降魏后，遂居漠南。北方诸部，非复威力所及。突厥遂以此时大张。向使仍居漠北，挟积世之声威，以摄服诸部，突厥之兴，或不至如是其速也。地万虽以色宠，其始实由巫进，亦可见巫风之足以亡人国矣。仆固怀恩之挟回纥入寇也，回纥有二巫，言此行必不战，当见大人而还。及与郭子仪盟，相顾笑曰：巫不吾欺也。其出兵必以巫卜可知。又其巫自谓能致风雨，亦常用之于行军。《南史·蠕蠕传》：“其国能以术祭天，致风雷。前对皎日，后则泥潦横流。故其战败，莫能追及。或于中夏为之，则不能雨，盖以暖云”薛延陀之败，会雨雪，众败，死者十八。《唐书》谓“始延陀能以术祭神致雨雪，及是反自敝”云。此即《悦般传》所谓术人能作霖雨盲风大雪及行潦者，盖北族之旧俗也。^①

《元史译文证补》曰：“回纥称谓多本突厥。可汗，可敦，特勒之名无论矣。突厥别部将兵者，皆谓之设。默啜可汗立其子弟为左相察、右相察。毗伽可汗，本蕃号为小杀。而回纥亦有左杀、右杀，分管诸部。曰设，曰察，曰杀，皆译音之异。骨咄禄可汗及叶护之称，达干之名，回纥并同突厥。度其言语，或亦多同。突厥文字，不复可考。回纥文字，至今犹存，所谓托忒字体是也。与西里亚文字相仿。泰西人谓唐时天主教人，自西里亚东来传教，唐人称为景教。陕西之《景教碑》，碑旁字两行，即西里亚字，此其确证。回纥之有文字，实由天主教人授以西里亚文字之故。此一说也。回纥人自元以后，大率入天方教。而天方文字，本于西里亚。故信教之回人，谓蒙古文出于回纥，回纥文出于天方，以归功於漠罕默德。此又一说也。各私其教，傅会所由，皆属妄说。窃疑回纥文字，亦

^① 突厥可汗初立，近侍重臣等与之以毡。随日转九回。每回，臣下皆拜。拜訖，乃扶令乘马。以帛绞其颈，使才不至绝，然后释而问之，曰：尔能作几年可汗？其主既神情昏乱，不能详定多少。臣下等随其所言，以验修短之数。此盖君权未重之世，立君由众，以此卜其吉不吉者。

本突厥。特无左证，以折异议。”案《北史》谓突厥文字旁行，有类于胡，所谓胡者，西胡，指西域诸国也。丁令族人居西域者甚多，盖遂受其文字。突厥，回纥，皆沿而用之耳。^①

丁令诸族，自交华夏，颇仿其制度。《北史》谓“汝阳王暹之知泰州也，遣其典签齐人淳于覃使于阿那瓌。遂留之。亲宠任事。阿那瓌因入洛阳，心慕中国，立官号，僭拟王者。遂有侍中，黄门之属。以覃为秘书郎，掌其文墨”。^②又道武帝谓尚书崔宏曰：“蠕蠕之人，昔来号为顽鄙。每来钞掠，驾犍牛奔遁，驱健牛随之。犍牛伏不能前。异部有教以健牛易之者。蠕蠕曰：其母尚不能行，而况其子？遂为敌所虏。今社仑学中国，立法，置战陈，卒成边害。道家言圣人生，大盗起，信矣。”《唐书》云：“颉利得华士赵德言，才其人，委任之，稍专国。”《回纥传》：“吐迷度为瀚海都督，私自号可汗。署官吏，一似突厥。有北宰相六，南宰相三。又有都督、将军、司马之号。”皆其慕仿汉制，引用汉人之征也。《北史》又云：“齐有沙门惠琳，掠入突厥中。因谓他钵曰：齐国富强，皆为有佛法。遂说以因果报之理。他钵闻而信之，建一伽蓝。遣使聘齐，求《净涅槃》、《华严》等经，并《十诵律》。他钵亦躬自斋戒，绕塔行道，恨不生内地。”《唐书》：默棘连欲城所都，起佛老庙。以噉欲谷谏而止。则并所信之教，亦与汉族融化矣。

附录一 丁 令

洪氏钧《元史译文证补》谓“今日葱岭西北西南诸部，我国统称

① 《北史·突厥传》又云：“无文字。其征发兵马，及诸税杂畜，刻木为数，并一金镞箭舄印封之，以为信契。”盖有文字而不甚用也。观其能于坐屋中图画死者形仪及其生时战陈之状，则其图画已有可观，必不至不知文字。又《北史·蠕蠕传》：“始无文字。将帅以羊屎粗记兵数。后颇知刻木为契。”似其文字又受之丁令者。

② 据《北史》，柔然可汗，皆建年号。《南史》载其《相国表》辞有曰：“京房谶云：卯金草草肃应王。历观图纬，代宋者齐。”此必华人所为也。

之曰回，西人则称为突厥。回纥之盛，威令未行於咸海、里海之间；其衰，播迁未越于葱岭、金山以外。突厥盛时，东自辽海以西，至西海，万里。南自沙漠以北，至北海，五六千里。极西之部可萨，亦曰曷萨。西国古籍，载此部名哈萨克，即曷萨转音。亦曰喀萨克，即可萨转音。里海、黑海之北，皆其种落屯集。又东罗马古书，载于突厥通使。东罗马，即《唐书》之拂菻国也。种落繁多，幅员辽阔。匈奴而后，实惟突厥。而散居西土，亦惟突厥旧部为多。回纥、突厥之称，诚不敢谓己是而人非”。予案洪氏此言，乃知二五而不知十也。若举强部以概其余，则西人与突厥之交涉多，而在东土，则回纥为后亡，彼我所称，均未为失。若原其朔，则此族当正称曰丁令。突厥，回纥，皆其分部之后起者耳。我之称回纥固非，彼之称突厥，亦未是也。

丁令之名，昉见于汉，^①亦作丁零、丁灵。异译作敕勒，又作铁勒。中夏称为高车。《魏书》分高车、铁勒为二传，乃就其服於魏与未服于魏者分之，似无所据。《唐书》以回纥初与铁勒诸部，并属突厥，仍列为铁勒十五部之一，而于突厥别为一传，不复著其为铁勒，亦未安也。

何以知突厥，回纥，皆铁勒之分部也？曰：言语相同，为种族相同之铁证。洪氏于突厥、回纥言语之相同者，历举凡如干事，则二者必为同族无疑。《唐书》回纥本列为铁勒十五部之一。回纥又作袁纥。《魏书·高车传》，其种有表纥氏。表纥即袁纥之讹。又《铁勒传》：独洛河北有韦纥。韦纥，亦回纥之异译也。回纥之为铁勒，明白无疑，而突厥言语，与之相同，安得不为铁勒哉？又突厥兴于金山，金山固铁勒之地也。《魏书》述突厥缘起，其一说曰：突厥之先，伊折泥师都娶二妻，云是冬神、夏神之女。一孕而生四男。其一国于阿辅水、剑水之间，号为契骨。契骨者，《唐书》所谓“黠戛斯，古坚

^① 《山海经·海内经》：“有丁灵之国，其民从郭以下有毛，马蹄，善走。”《山海经》伪书，此条乃据后世史志所造。其来历见《三国志》注引《魏略》。又黄佐《六艺流别》卷十七《五行篇》引《尚书大传》：“北方之极，自丁令北至积雪之野，帝颛顼神玄冥司之。”陈氏寿祺《尚书大传辑校》采之。然此条恐亦黄氏误采，不出《大传》也。

昆国，或曰居勿，曰结骨，其种杂丁令”者也。又《魏书·高车传》云：“或云：其先，匈奴甥也。俗云：匈奴单于有二女，姿容甚美。国人皆以为神。单于曰：我有此女，安可配人？将以与天。乃于国北无人之地筑高台，置二女其上。曰：请天自迎之。经三年，其母欲迎之。单于曰：不可。未彻之间耳。复一年，乃有一老狼，昼夜守台嗥呼。因穿台下为空穴，经年不去。其小女曰：吾父处我于此，欲以与天。而今狼来，或是神物，天使之然。将下就之，其姊大惊，曰：此是畜生，无乃辱父母。妹不从。下为狼妻而产子。后遂滋繁成国。故其人好引声长歌，又似狼嗥。”此说谓铁勒之先，出于匈奴单于之二女，与伊质泥师都娶二妻之说，颇有类似之处。又《魏书》述突厥原起第一说，亦以突厥为狼种。突厥姓阿史那氏，以予考之，即《元秘史》帖赤那三字之异译，义谓狼也。^①然则突厥，铁勒，其谬悠传说，亦实不可分也。

《魏书》云：“高车，盖古赤狄之余种也。初号为狄历，北方以为敕勒，诸夏以为高车，丁零。其语略与匈奴同，而时有小异。”赤狄余种，不知何所据而云然。征诸史传，铁勒之语，亦无与匈奴类者。岂丁令种落，有与匈奴近者，其种遂相杂，故其语多同，吾国人因别称之为高车，以与其余之丁令别与？赤狄余种之说，似又因其语与匈奴同而附会，以古以匈奴即狄也。高车传说，既自托于匈奴之甥，又谓其先祖母，匈奴单于置之国北无人之地，则高车故地，必在匈奴之北。谓其与匈奴相近，或不诬邪？《魏书》述高车之称所由来，谓其车轮高大，辐数至多。阿卜而嘎锡，则谓古时其部侵掠他族，卤获至多，骑不胜数。有部人能制车。车高大，胜重载。乃尽取卤获以返，故以高车名其部。^②铁勒种类，程度至低。能制车之部落，或亦其与匈奴近者与？推测之说，虽若可通，终未敢遂以信已。^③

① 见《突厥与蒙古同祖》条。

② 见《元史译文证补·康里补传》。

③ 或云：古代匈奴，实与汉族杂居大河流域。北荒之地，不得无人。今据《魏书》，则丁令，铁勒，实为狄历异译。狄历迭韵，简称之，固可但作一狄字。岂古称北族为狄，

附录二 丁令居地

铁勒诸族，大者曰突厥，曰薛延陀，曰回纥。突厥至南北朝之末始盛；延陀，回纥之强，则当唐世矣。然其种落散布朔垂，实由来已久。突厥疆域之广，实由于此。非其力征经营，果有以超匈奴而几蒙古也。今就诸史所载铁勒居地，略为考索如下。

铁勒，古称丁令。其名首见于《史记·匈奴列传》。《匈奴列传》云：冒顿“北服浑庾、屈射、丁灵、鬲昆、薪犁之国”。^①《汉书·匈奴列传》云：“郅支北击乌揭，乌揭降。发其兵西破坚昆，北降丁令。”《三国志注》引《魏略》云：“呼得国，在葱岭北，乌孙西北，康居东北，胜兵万余人。坚昆国，在康居西北，胜兵三万人。丁令国，在康居北。胜兵六万人。此上三国，坚昆中央。俱去匈奴单于庭安习水七千里。”^②南去车师六国五千里。西南去康居界三千里，西去康居王治八千里。或以为此丁令即匈奴北丁令也。而此丁令在乌孙西，似其种别也。又匈奴北有浑窳国，有屈射国，有丁令国，有鬲昆国，有新犁国，明北海之南自复有丁令，非此乌孙之西丁令也。”案匈奴徙苏武北海上，丁令盗武牛羊，见《汉书·李广苏建传》。北海，今拜喀勒湖。而此与坚昆、呼得接壤之丁令，则实在今西伯利亚西南境。鬲昆、坚昆，一音之转，即唐时之黠戛斯。《唐书》：“黠戛斯，古坚昆国。或曰居勿，曰结骨。其种杂丁令，乃匈奴西鄙也。可汗驻牙青山。青山之东，有水曰剑河。”剑河即后世之谦河，在今唐努乌梁海境内。^③安习水，今额尔齐斯河。乌孙，今伊犁。康居

其原实指此族言之邪？此说于音译虽近。然丁令古代与汉族有交接之证据太乏，亦未敢遂以为信也。日本高桑驹吉曰：康里(Kankly)二字，乃突厥语，谓车也。

① 《汉书》浑庾作浑臚，丁灵作丁零，鬲昆作隔昆。薪犁作新犁，新犁上又衍一龙字。

② 《史记索隐》亦引此语，而误作接习水。

③ 见《元史译文证补·谦河考》。

之地，起今伊犁之西，西迄里海，北抵咸海附近。^①然则此三国之地，实在今西伯利亚境内。唐努乌梁海之西北，额尔齐斯河之东南，略当今吐鲁番诸县之正北。^②其去北海，盖千里而遥。故《三国志注》净其非一，然按诸后世史传，则丁令居地，实尚不止此也。^③

《北史·铁勒传》“种类最多。自西海之东，依山据谷，往往不绝。独洛河北，有仆骨、同罗、韦纥、拔也古、复罗，并号俟斤。蒙陈吐如纥斯结浑，斛薛等诸姓，胜兵可二万。伊吾以西，焉耆之北，傍白山，则有契苾，薄落职乙啞苏婆那曷乌护纥骨也啞于尼护等，胜兵可二万。金山西南，有薛延陀，啞勒儿十槃达契等，一万余兵。康国北，傍阿得水，则有河啞曷截拔忽比干具海曷比悉何嵯苏拔也末謁达等，有三万许兵。得疑海东西，有苏路羯三素咽篋促萨忽等诸姓，八千余。拂菻东，则有恩屈阿兰北褥九离伏温昏等，近二万人。北海南则都播等。虽姓氏各别，总谓为铁勒”。案以上诸部名，多不可句读。然其地则大略可征。西海，盖今里海。独洛河，今土拉河。伊吾，今新疆哈密县。焉耆，今新疆焉耆县。白山在其北。金山，今阿尔泰山。康国，今撒马儿干。得疑海，疑今咸海。拂菻，则罗马也。

《唐书》：铁勒，凡十五部：曰袁纥，即回纥，居薛延陀北婆陵水上。曰拔野古，漫散磧北，地千里。直仆骨东，邻于靺鞨。曰仆骨，在多览葛之东。地最北。曰同罗，在薛延陀北，多览葛之东。距京师七千里而羸。曰浑，在诸部最南。曰契苾，在焉耆西北鹰娑川，多览葛之南。曰多览葛，在薛延陀东，滨同罗水。曰都播，北濒小海，西坚昆，南回纥。曰骨利干，处瀚海北。其地北距海，去京师最

① 《元史译文证补·西域古地考康居奄蔡》。

② 《魏略》云，坚昆中央，而《汉书》云，郅支降乌揭后，西破坚昆，北降丁令，则乌揭在坚昆之东，丁令在坚昆之西北。

③ 《北史》述铁勒诸部，胜兵最多者，不过三万，且皆已合若干部落。而《魏略》谓丁令胜兵六万，亦必合多部言之。

远。又北度海，则昼长夜短，日入，烹羊胛熟，东方已明。曰白霄，居鲜卑故地。直京师东北五千里，与同罗，仆骨接，避薛延陀，保奥支水，冷陁山。南契丹，北乌罗浑，东靺鞨，西拔野古。地圆袤二千里，山缭其外。曰斛薛，处多览葛北。曰奚结，处同罗北。曰思结，在延陀故牙。^①娑陵水，今色楞格河。^②同罗水，亦今土拉河。都播北濒小海，盖今库苏古尔。骨利干北距海，仍即今拜喀勒湖，《地理志》：骨利干西十三日至都播，又北六七日至坚昆，道里符合。惟谓骨利干、都播二都落，北有小海，冰坚时马行八日可度，一似骨利干，都播，共濒一小海者然，则语欠分析。马行八日可度，自指拜喀勒湖，库苏古尔无此大。若谓都播亦濒拜喀勒，则道里不合。且北海自古不称小海，必《地理志》误。至《北史》云北海南则都播等者，以北海为大水，故举以为言；且言等，则非指都播一部也。鲜卑故地，当在今满、蒙之间。云圆袤二千里，山缭其外，则包今嫩江流域矣。

此族居地，盖自拜喀勒湖西附金山之阴；又西，当库里鄂模，^③威海，里海之北，直抵黑海。东西绵亘，成一直线。南北朝以前，据漠南北之地者，为匈奴、鲜卑。其西则中国，匈奴狎主齐盟之城郭三十六国也。又其西，则乌孙也，大宛也，大月氏也。继大月氏而起者，则哒也。皆强国也。故此族无由南牧。迨鲜卑渐次南迁，此族乃踵之而入色楞格、土拉二河流域，且东取鲜卑故地。其为魏所破，而迁诸漠南者，则史所谓高车也。留居漠北，为柔然所抚用者，则史所谓铁勒也。至南北朝之末，而此族之中，自有一强部起，则突厥是也。突厥之兴，适当柔然、哒之衰，一举而皆为所破。散处之铁勒，靡不臣之。而其疆域，遂大莫与京矣。延陀、回纥之盛。虽未能踵武突厥，转东西为一体。然其种人之散布各地

① 回纥在薛延陀北娑陵水，则延陀故牙，在娑陵水南。

② 《唐书》异译，亦作仙娥。

③ 伊犁河所注泊，今图作巴勒喀什。

者固自若。此其所以自唐迄今，仍为中西亚及东欧之一大族也。

附录三 突厥与蒙古同祖

突厥原起，《北史》所载，凡有三说：一曰：“其先居西海之右，独为部落。盖匈奴之别种也。姓阿史那氏。后为邻国所破，尽灭其族，有一儿，年且十岁。兵人见其小，不忍杀之。乃刖其足，断其臂，弃草泽中。有牝狼，以肉饵之。及长，与狼交合，遂有孕焉。彼王闻此儿尚在，重遣杀之。使者见在狼侧，并欲杀狼。于时若有神物，投狼于西海之东，落高昌国西北山，山有洞穴，内有平壤茂草，周围数百里，^①四面俱山。狼匿其中，遂生十男。十男长，外託妻孕。其后各为一姓，阿史那其一也。最贤，遂为君长。故牙门建狼头纛，示不忘本也。渐至数百家。经数世，有阿贤设者，率部落出于穴中，臣于蠕蠕。”二曰：“突厥本平凉杂胡，姓阿史那氏。魏太武皇帝灭沮渠氏，阿史那以五百家奔蠕蠕。世居金山之阳，金山形似兜鍪，俗呼兜鍪为突厥，因以为号。”三曰：“突厥之先，出于索国。在匈奴之北。其部落大人曰阿谤步，兄弟七十人。其一曰伊质泥师都，狼所生也。阿谤步等性并愚痴，国遂被灭。泥师都既别感异气，能征召风雨。娶二妻，云是夏神、冬神之女。一孕而生四儿。其一变为白鸿。其一国于阿辅水、剑水之间，号为契骨。其一国于处折水。其一居跋斯鼠折施山，即其大儿也。山上仍有阿谤步种类，并多寒露。大儿为出火温养之，咸得全济。遂共奉大儿为主，号为突厥。即纳都六设也。都六有十妻，所生子皆以母族姓。阿史那是其小妻之子也。都六死，十母子内欲择立一人。乃相率于大树下共为约，曰：向树跳跃，能最高者，即推立之。阿史那年幼，而跳最高，诸子遂奉以为主。号阿贤设”。又《元史译文证补》译拉施特《蒙古全史》，述蒙古缘起曰：“相传古时蒙古与他族战，全军覆没。仅遗男女各二

^① 《隋书》作地方二百余里。

人。遁入一山。斗绝险峻，惟一径通出入。而山中壤地宽平，水草茂美，乃携牲畜辎重往居。其山曰阿儿格乃袞。二男：一名脑古，一名乞颜，义为奔瀑急流。以其膂力迈众，一往无前，故以称名。乞颜后裔繁盛，称之曰乞要特。乞颜变音为乞要。曰特者，统类之词也。后世地狭人稠，乃谋出山。而旧径芜塞，且苦艰险。继得铁矿，洞穴深邃。爰伐木炽炭，篝火穴中。宰七十牛，剖革为筒。鼓风助火。铁石尽熔，衢路遂辟。后裔于元旦，锻铁于炉，君与宗亲，次第捶之，著为典礼。”与《北史》第一说绝相类。而锻铁之说，又足与第二说之世为铁工相印证。以风马牛不相及之两族，而其传说之相似，至于如是，实可异也。

民族缪悠之传说，虽若为情理所必无。然其中必有事实存焉。披沙拣金，往往见宝，正不容以言不雅驯，一笔抹杀也。今试先即《北史》所载三说观之。案此三说虽相乖异，然其中仍有相同之处。突厥姓阿史那氏，一也。突厥有十姓，阿史那其一，二也。首出之主曰阿贤设，三也。突厥先世，尝为他族所破灭，四也。狼生十子，说极荒唐。然突厥后世，牙门实建有狼头纛，又有所谓九姓部落者，于突厥为最亲。^①又突厥可汗，尝岁率重臣，祭其先窟。而西突厥亦岁遣使臣，向其先世所居之窟致祭。则缪悠之传说，实为数典所不忘，断不容指为虚诬矣。据《元史译文证补》，突厥最西之可萨部，实在里海、黑海之滨。然则突厥先世，殆本居西海之右，迨为他族所破，及辗转遁入阿尔泰之南山中，其地在高昌西北，其名则跋施处折施邪？锻铁之业，发明颇难。鲜卑、契丹，皆与汉人相习久而后能之。女真初起时，汉人有携甲至其部者，尚率其下出重资以

① 九姓之名：曰药罗葛。曰胡咄葛。曰掘罗勿。曰歌息讫。曰阿勿囁。曰葛萨。曰斛温素。曰药勿葛。曰奚邪勿。见《唐书·回纥传》。《突厥传》述突厥之亡，谓后或朝贡，皆旧部九姓云，此谓阿史那氏既亡，其余九姓，犹或来朝贡也。又《回纥传》载九姓胡劝牟羽可汗入寇。宰相顿莫贺干谏，不听。怒，遂弑可汗，屠其支党及九姓胡，几二千人。九姓胡先随回纥入中国者闻之，因不敢归。此为九姓胡与回纥有别之证。九姓胡既与回纥较疏，则突厥之于九姓，必较回纥为亲。故《唐书》称为旧部。盖回纥等皆后来服于突厥者，惟九姓，则为阿史那同族也。

市。突厥僻陋，未必有此。或沮渠亡后，败遁北走者之所教与？

蒙古传说，与突厥相类，洪氏疑蒙人袭突厥睡余，以叙先德。夫突厥之在当日，则亦败亡奔北之余耳。引为同族，岂足为荣？若谓传述者语涉不经，载笔者意存毁谤，则拉施特身仕宗藩之朝，亲见捶铁典礼；又乞要特即奇渥温，为有元帝室得氏之由，亦断不容指为虚构。拉施特之修史也，其主尽出先时卷帙，以资考核；又命蒙古大臣，谙习掌故者，襄理其事；安得作此谓他人父之言？拉施特亦安敢亿造异说，作为谤书邪？然此说与《北史》第一说相类太甚。又《蒙文秘史》，蒙古祖名孛儿帖赤那，译言苍狼。帖赤那与阿史那，泥师都，似皆同音异译，虽欲不谓为一说而不得也，此又何故邪？予反复思之，然后知蒙古为靺鞨、室韦杂种，靺鞨为靺鞨及沙陀突厥杂种，拉施特《蒙古全史》之说，确与《北史》第一说，同出一原也。

蒙古先世，《元史》不载。洪氏谓即《唐书》大室韦之蒙兀部，其说甚确。然蒙人实自称靺鞨。《秘史》即然。^①顺帝北迁，五传而大汗统绝。其后裔仍自号靺鞨可汗。此何说邪？《五代史》云：“靺鞨，靺鞨之遗种。本在奚、契丹之东北。后为契丹所攻，而部族分散。或属契丹，或属渤海。别部散居阴山者，自号靺鞨。后从克用入关，破黄巢。由是居云、代之间。”据《唐书》、《五代史》、《辽史》，渤海盛时，靺鞨悉役属之。契丹太祖以前，并无攻破靺鞨之事。《满洲源流考》引《册府元龟》谓“黑水帅突地稽，隋时率部落千余家内属，处之营州。唐武德中，以其部落置燕州。《五代史》所谓为契丹攻破者，实即此族”。其说是也。然此族实与室韦之蒙兀部，风马牛不相及，何缘以之自号乎？案彭大雅《黑鞑事略》曰：“黑鞑之国，号大蒙古。沙漠之地，有蒙古山。鞑语谓银曰蒙古。女真名其国曰大金，故鞑名其国曰银。”黄震《古今纪要逸编》云：“靺鞨与女真同种，皆靺鞨之后。其在混同江者曰女真。在阴山北者曰靺鞨。靺鞨之近汉者曰熟靺鞨，远汉者曰生靺鞨。靺鞨有二：曰黑，曰白，皆事女真。黑

^① 《秘史》作达达，即靺鞨异译也。

鞑靼至武没真叛之，自称成吉思皇帝。又有蒙古国，在女真东北。我嘉定四年，鞑靼始并其名号，称大蒙古国。”孟珙《蒙鞑备录》曰：“鞑靼始起，地处契丹西北。族出于沙陀别种，故历代无闻。其种有三：曰黑，曰白，曰生。^①所谓白鞑靼者，颜貌稍细。所谓生鞑靼者，甚贫，且拙，且无能为，惟知乘马随众而已。今成吉思皇帝及将相大臣皆黑鞑靼也。”据此三说，则鞑靼及蒙古，自系二族。而鞑靼之中，又有黑、白之别。族出于沙陀别种，盖缘李克用败亡，曾居其部，遗种与韃靼相杂，遂生黑白之别，其无足怪。惟所谓蒙古国者，除室韦之蒙兀部，无可当之。二者相距甚远，何由并合？为可疑耳。案《蒙鞑备录》又云：“鞑人在本国时，金虏大定间，燕京及契丹地有谣言云：鞑靼去，赶得官家没处去。虏酋雍，宛转闻之，惊曰：必是鞑人，为我国患。乃下令：极於穷荒，出兵剿之。每三岁，遣兵向北剿杀，谓之减丁。迄今中原尽能记之。鞑人遁逃沙漠，怨入骨髓。至伪章宗明昌年间，不令杀戮。以是鞑人稍稍还本国，添丁长育。”因童谣而出兵剿杀，语涉不经。然世宗初年，北边曾有移剌窝干之乱，牵动甚众。仍岁兴师，说非无据。鞑靼之北走而与蒙兀合，盖在此时也。然此以鞑靼之部落言也，至于有元帝室，则其与蒙兀部胖合，尚别有一重因缘。《蒙文秘史》云：“自天而生之孛儿帖赤那，与其妻豁阿马阑勒，同渡腾吉思水，东至干难沐涟之源不儿罕哈勒敦。”^②此为奇渥温氏徙居漠北之始。孛儿帖赤那生巴塔赤罕。巴塔赤罕生塔马察。塔马察生豁里察儿篾儿干。豁里察儿篾儿干生阿兀站孛罗温。阿兀站孛罗温生撒里合察兀。撒里合察兀生也客你敦。也客你敦生孛锁赤。孛锁赤生合儿出。合儿出生孛儿只吉歹篾儿干。孛儿只吉歹篾儿干之妻曰忙豁勒真豁阿。忙豁勒真，犹言蒙古部人。盖孛儿帖赤那之后，至此娶蒙古部女，遂以蒙古为部

① 案生、熟自以距汉远近言，不得与黑白并列为种别。此说盖误。

② 孛儿帖赤那，译言苍狼。豁阿，女子美称。马阑勒，译言惨白牝鹿。乃人以狼鹿名。《大典》本之译述，意在考证蒙古语言，非以求其史实。故但旁注其狼鹿，而不复译为人名。辑《大典》本《秘史》者，但就其旁解之文钞之，遂有狼鹿生人之讹也。

名，犹金始祖函普，娶完颜部女，子孙遂以完颜为氏也。^①为金守长城之部曰汪古。成吉思汗之侵金，汪古实假以牧地，为之乡导，故金人先失外险，猝不及防。乃蛮之伐蒙古，约汪古与俱。汪古以告成吉思汗，成吉思汗乃得先发制人。盖汪古之于蒙古，论部酋，论部族，皆有同族之亲；而灭丁剿杀之举，汪古虽力不能救，未尝不心焉痛之；故于元为特厚，而于金乃独酷邪？纳都六三字，与脑古音极相近。^②岂突厥先世，为他族所破坏后，分为二派：一为脑古，即纳都六设；一为乞颜，即奇渥温氏之祖与？果然，则阿儿格乃袞之名，且足补突厥先窟称名之阙矣。

① 说本屠氏寄《蒙兀儿史记》。又案《蒙古源流考》云：“土伯特智固本博赞汗，为奸臣隆纳木所弑。三子皆出亡。季子布尔特齐诺，渡腾吉思海，东行，至拜噶所属之布干哈勒图纳山下必塔地方，人众尊为君长。”布尔特齐诺，即《秘史》之孛儿帖赤那也，或据此，谓有元先世，出自吐蕃王室。然《源流考》之作，意在阐扬喇嘛教，故援蒙古以入吐蕃。其说殊不可信。即如此处，以智固本赞博汗为色哩特赞博汗之子。色哩特赞博汗者，尼雅特赞博汗之八世孙也。而下文又云：尼雅特赞博汗七世孙色尔特赞博汗，为其臣隆纳木所弑。又此处述智固本赞博汗，远在名哩勒丹苏隆赞之前。名哩勒丹苏隆赞，即《唐书》之弃宗弄赞，与太宗同时者也。其言尚可信乎？

② 设为突厥别部典兵者之称。

第六章 貉 族

北方诸族，传中国之文明最早者，莫如貉。貉，又作貊，亦称涉貉。又单称涉，亦作萝，作稊。

此族见于经典者：《诗》“王锡韩侯，其追其貉，奄受北国”。又“保有凫绎，遂荒徐宅。至于海邦，淮夷蛮貉。及彼南夷，莫不率从。莫敢不诺，鲁侯是若”。《论语》：“言忠信，行笃敬，虽蛮貉之邦，行矣。”《孟子》：“子之道，貉道也……夫貉，五谷不生，惟黍生之；无城郭、宫室、宗庙、祭祀之礼，无诸侯币帛饗飧，无百官有司，故二十取一而足也。”《周官》：“职方氏，辨其邦国都鄙，四夷，八蛮，七闽，九貉，五戎，六狄之人民。”案从古说貉，无以为在南方者。鲁颂以蛮貉与淮夷并举，自与《论语》之言蛮貉，同以为夷狄之通称。举在北之貉，以对在南之蛮，犹后世言胡越耳。^①至以貉在北方，或在东北方，则颇有异说。《孟子》赵注：“貉在北方，其气寒，不生五谷。”《职方》郑注。郑司农云：“北方貉狄。”《说文》豸部：“貉，北方豸种。”^②此皆以貉在北方者也。《郑注》秋官貉隶，“征东北方所获”。《诗周官正义》引《郑志》，答赵商问：“九貉、九夷，在东方。”《说文》羊部羴下：“东方貉从豸”。此皆以貉在东北方者也。^③今案《说文》

① 伪《武成》“华夏蛮貉，罔不率俾”，以蛮貉为对华夏之辞。《鲁颂》毛传“淮夷，蛮貉而夷行也”。《正义》言“淮夷蛮貉如夷行者？以蛮貉之文，在淮夷之下，嫌蛮貉亦服，故辨之。以僖公之从齐桓，惟能服淮夷耳，非能服南夷之蛮，东夷之貉，故即淮夷蛮貉，谓淮夷如蛮貉之行”。其说不误。乃其疏《韩奕》，又引此诗，而曰：“是于鲁僖之时，貉近鲁也。”可谓自相矛盾矣。

② 《诗》、《论语》、《释文》引，皆作“北方人也”。

③ 《周书·王会篇》：稊人，在稊慎，良夷之间，稊慎，即肃慎。

羌下之文，不甚可信。^①然貉自在东北方。其云北方，则浑言之耳。何以言之？

经典之言貉者，惟《韩奕》一诗，有地名可考。得《韩奕》诗中诸地所在，则貉之所在，从可推矣。《韩奕》郑笺云：“梁山，今在冯翊夏阳西北。韩，姬姓之国也。后为晋所灭，故大夫韩氏，以为邑名焉。幽王九年，王室始骚。郑桓公问于史伯曰：周衰，其孰兴乎？对曰：武实昭文之功，文之祚尽，武其嗣乎？武王之子应韩不在，其晋乎？”是郑以姬姓之韩，即武王之子。与《史记·韩世家》所谓“韩侯之先，与周同姓，姓姬氏。其后苗裔事晋，得封于韩原”，及《毛传》所谓“韩侯之先祖，武王之子”者，皆同物也。其笺“溥波韩城，燕师所完”云：“溥，大。燕，安也。大矣韩国之城，乃古平安时众民之所筑完。”笺“以先祖受命，因时北蛮，王锡韩侯，其追其貉，奄受北国，因以其伯”云。韩侯先祖有功德者，受先王之命，居韩城，为侯伯。其州界外接蛮服。因见使时节百蛮贡献之往来。后君微弱，用失其业。今王以韩侯先祖之事如是，而韩侯贤，故于入觐，使其复先祖之旧职，赐之蛮服追貉之戎狄，今抚柔其所受王畿北面之国。因以先祖侯伯之事尽与之”。又云：“其后追也，貉也，为严狁所逼，稍稍东迁。”是郑以当韩侯受命时，追、貉实在王畿之北也。然据《释文》，则王肃、孙毓并以“燕师所完”之燕，为北燕国。又《水经》圣水《注》：圣水迺方城县故城北，又东迺韩城东。《诗》溥彼韩城，燕师所完。王锡韩侯，其追其貉，奄受北国。王肃曰：今涿郡方城县有韩侯城，世谓寒号城，非也。^②与《潜夫论·志氏姓篇》：“昔周宣王时，亦有韩侯，其国也近燕。故《诗》曰：溥彼韩城，燕师

① 其文云：“南方蛮闽从虫，北方狄从犬，东方貉从豸，西方羌从羊，此六种也。西南僬僇从人。盖在坤地，颇有顺理之性。惟东夷从大。大，人也。夷俗仁，仁者寿。有君子不死之国。孔子曰：道不行，欲之九夷，乘桴浮于海，有以也。”《说文》一书，系博采通人而成，其体例本不纯一。详见予所撰《字例略说》。世之执列以绳《说文》者，误也。然未有如此处作慨叹之辞者。古人说字，从无此例。盖后人识语混入者也。

② 《括地志》：“方城故城，在幽州固安县南十里。案固安县，今属河北。”

所完”之说合。近世顾氏炎武、^①朱氏右曾^②主之。谓“《史记·燕世家》：易水东分为梁山”。《水经注》：“湿水经良乡县之北界，历梁山南，高粱水出焉。”^③鲍邱水过潞县西，高粱水注之。^④水东径梁山南。”是近北燕亦有梁山也。韩实有二：（一）《左传》僖公二十四年，富辰所谓邾、晋、应、韩武之穆，《国语》、《郑语》所谓武王之子，应，韩不在，即《毛传》所谓韩之先祖，武王之子者。其受封在成王之世，封地在职方并州。王肃所谓涿郡方城县之韩侯城，其都邑也。（一）则《左传》襄公二十九年，叔侯所谓霍、杨、韩、魏皆姬姓者。即《史记·韩世家》所谓韩之先与周同姓。其受封在武王之世，封地在河东。后为晋所灭。《汉书·地理志》所谓韩武子食采于韩，《续汉书·郡国志》所谓河东郡河北县有韩亭，杜预所谓韩国在河东郡界者也，二者既未可混合，又皆不在河西。自郑氏笺《诗》，误以晋之梁山为韩之梁山。韦昭解《国语》，误以宣王命韩侯，为即晋所灭之韩。张华《博物志》遂云夏阳冯翊有韩原，韩武子采邑。隋世因之，置韩城县。说地者罔不以为据，岂知案之经传不可通云云。^⑤其说似矣。然俞氏正燮申郑云：“禹甸梁山，必当为《禹贡》之梁山，在今韩城。燕乃蹶父国也。周初有燕，有北燕。《左传》隐公五年，卫人以燕师伐郑。注云：南燕国。今东郡燕县。《正义》云：《世本》：燕国，姑姓也。《汉书·地理志》：东郡南燕县云：南燕国，姑姓。今卫辉之封邱地。其国春秋前及春秋时谓之燕，其在蓟之燕，谓之北燕。《诗》言韩姑汾王之甥，蹶父之子，则蹶父姑姓，为厉王婿。以燕公族，入为卿士。《诗》言韩侯迎止，于蹶之里。知蹶不在燕，久居周，已有族里。韩城在河西，居镐东北，得受王命，为北诸侯长。蹶

① 《日知录》。

② 《诗地理征》。

③ 良乡县，今属河北。

④ 潞县，今河北通县。

⑤ 韩城，今仍为县，属陕西。其地在春秋时为少梁。朱氏曰：“《汉志》：左冯翊夏县，故少梁，秦惠文王更名。梁山在西北。无故为韩国之说。”顾氏谓左氏记秦晋韩之战，先言涉河，次乃言及韩，则韩实在河东。文十年，晋伐秦，取少梁，乃得今韩城地。

父亦得假王灵，用其国人，为韩筑城。如晋人城杞，亦戚好赴役，燕、韩事同也。郑未思南燕姞姓，故疑之。王符云：周宣王时，亦有韩侯，其国也近燕，是亦不知燕、韩之地何在。王肃乃以寒号城为韩侯城，后人多喜其说。于《诗》之燕与姞，不能通也。”^①以经证经，其说尤长。予谓韩自以从郑说在韩城为是。虽以追、貉为王畿北面之国，自与其注司隶及答赵商之问相违。然谓：“其后追也、貉也，为獬狁所逼，稍稍东迁。”似非凿空。参看第三章附录二《山戎考》，第四章附录一《鲜卑》自明^②。

貉族居地，初在燕北。其后则在辽东之外。盖当燕开上谷、渔阳、右北平、辽西、东五郡时，为所迫逐出走者也。《史记·燕世家》云：“燕北迫蛮貉。”此谓貉在燕北者也。^③《货殖传》云：“燕北邻乌桓、夫余，东馆秽貉、朝鲜、真番之利。此谓貉在辽东之外者也。”《汉书·高帝纪》：“四年，八月，北貉燕人来致橐骑助汉。”此北貉不知究在何所，疑遗落仍处五郡之内，近燕者也。《三国志·夫余传》“国之耆老，自说古之亡人。其印文言涉王之印。国有故城名涉城。盖本涉貉之地，而夫余王其中。自谓亡人，抑有由也。”此言微误。夫余盖即涉貉，为人所败，遁逃至此，故云亡人。若攘涉貉之地而居之，则是战胜攻取矣。其遁亡之由不可知，以意度之，或即燕开五郡之事也。^④

貉族国落，见于汉以后者：曰夫余，曰高句骊，曰百济，曰东涉，曰沃沮。据史籍所载，句骊出于夫余，百济出于句骊。句骊与百济之事不可知。若夫余，则其事之见于中国史者，反在句骊之后。而

① 《癸巳类稿》。

② 《墨子·兼爱》“以利燕、代、胡、貉与西河之民”。《荀子·强国》：“秦北与胡、貉为邻。”亦以胡貉并举。追为何种不可考。陈氏《毛诗传疏》，谓“追、涉声相近，疑追貉即涉貉”。然亦无他证。

③ 《水经注》：“清漳逾章武故城西。故涉邑也。枝洩出焉，谓之秽水。”章武，今大城、沧二县之地。酈氏之言而信，则貉并曾在燕南矣。

④ 予疑鲜卑、涉貉、肃慎，初皆居五郡之地，及燕开五郡，乃被迫出走。参看《鲜卑》、《肃慎》两篇。据《方言》，北燕、朝鲜之间，言语略同。

夫余，句骊，百济开国之事，相似太甚。其实为一事可知。^①盖涉貉种落，散处辽东塞外，各自兴起者耳。《三国志·高句丽传》：“东夷旧语，以为夫余别种。言语诸事，多与夫余同。其性气衣服有异。”《东沃沮传》：“其言语与句骊大同，时时小异。食饮居处，衣服礼节，有似句骊。”于北沃沮云：“其俗南北皆同。”于涉云：“其耆老自谓与句骊同种。言语法俗，大抵与句骊同。衣服有异。”皆足征此诸国之为同族也。

至其地，则跨今辽宁、吉林二省及朝鲜境。《志》称夫余在长城之北，去玄菟千里，南与高句骊，东与挹娄，西与鲜卑接，北有弱水，方可二千里，多山陵。于东夷之域，最为平敞。盖今吉林西境。弱水，今松花江也。高句丽“在辽东之东千里。南与朝鲜、涉貉，东与沃沮，北与夫余接。都于丸都之下。”^②方可二千里。多大山深谷，无原泽。随山谷以为居，食涧水，无良田。虽力佃作，不足以实口腹。”丸都，今吉林集安。高句骊之地，盖跨鸭绿江上游两岸，今辽宁东南境，朝鲜平安道北境也。^③东沃沮。“在高句骊盖马大山之东，滨大海而居。其地形，东北狭，西南长，可千里。北与挹娄、夫余，南与涉貉接。其土地肥美，背山向海。宜五谷，善田种。”盖马大山，盖今朝鲜平安、咸镜两道间之山。东沃沮，在今咸镜道境也。北沃沮，“一名置沟娄。去南沃沮八百余里。与挹娄接”。案汉武灭朝鲜，以沃沮地为玄菟郡，郡治在今朝鲜咸兴附近。此所云相去八

① 《后汉书·夫余传》：“初北夷索离国王出行。其侍儿于后妊身。王还，欲杀之，侍儿曰：前见天上有气，大如鸡子，来降我，因以有身。王囚之。后遂生男。王令置于豕牢。豕以口气嘘之，不死。复徙于马栏。马亦如之。王以为神，乃听母收养。名曰东明。东明长而善射。王忌其猛，复欲杀之。东明奔走。南至掩淲水。以弓击水，鱼鳖皆聚浮水上。东明乘之得度。因至夫余而王之焉。”《三国志》注引《魏略》略同，盖《后汉书》所本。而《魏书》述百济开国事，又与此大同。皆即高句骊东明圣王事也。索离，注云：索一作囊。囊疑囊之误，囊离，即高丽也。高句骊谓城曰沟娄。颇疑句骊二字，亦沟娄异译。高句骊，犹言高氏城耳。

② 此丸都为山名。

③ 《后书》：“句骊，一名貉耳。”《三国志》：“句骊作国，依大水而居。西安平县北有小水，南流入海。句骊别种，依小水作国。因名之为小水貉。出好弓，所谓貉弓是也。”案西安平在今安东县境。

百里者，当自玄菟郡治计之，则在今咸镜道极北境矣。^① 涉，“南与辰韩，北与高句骊沃沮接。东穷大海，西至乐浪”。今朝鲜江原道之地。此涉亦称东涉，又曰不耐涉，盖所以别于辽东北面之涉也。^② 凡此皆貉族散布之区也。^③

貉介鲜卑、肃慎间，两族文明程度皆浅，而貉族程度独高。果何所受之哉？则不得不溯其原于箕子。予谓箕子初地，究在何处，殆难质言。然必不在今朝鲜境，度其大较，当在燕之东北，与貉杂居。^④ 貉族文化，多同于殷，盖自箕氏有国以来所渐染，非待北燕拓境，然后接受之也。朝鲜古籍，经卫满之乱，悉亡佚。三国史籍，高句丽、百济之灭，亦俄空焉。^⑤ 故彼国史自三国以前，实不尽可信。惟较之我国所传，究属详备。今姑据之，述朝鲜及貉族诸国兴亡大略如下。不过我国《竹书纪年》、《帝王世纪》之伦耳。

新疆僧无极，撰《东事古记》云：“中国唐尧时，有檀君者，立国于今平壤，号曰朝鲜。言东方之地，受朝日光鲜也。子解夫娄，与于涂山之会。传国至商武丁时乃绝。或曰：北徙而为涉也。”其说殊不可据。

箕氏世系事迹，见于鲜于氏奇氏谱牒。据谱牒所载，“箕氏凡五十三王。其第五十一世曰元王勋者，有别子三：曰友平，其后为鲜于氏。曰友诚，其后为奇氏。曰友谅，其后为韩氏云”。说亦未必

① 《满洲源流考》云：“沃沮，即窝集转音。”案沃沮人久知农作。且句骊名城曰沟娄，而北沃沮一名置沟娄，则已有城矣。非复林木中人民也。大抵研究四夷事，专据音译附会，最不足信。清人自谓能知北族之语，于旧译辄好妄改，或加解释。姑无论北族言语，不皆同于满洲。即女真确与满洲同族，其语亦有今古之异，地域之殊，安得辄武断邪？其谬误百出宜矣。

② 《三国志》又云：“自单单大岭以西，属乐浪。自岭以东七县，都尉主之。皆以涉为民。”案单单大岭，今江原及京畿黄海两道间之山。

③ 以上释地，略据朝鲜人金于霖所撰《韩国小史》。诸国地理，皆据《三国志》，后书亦大同。

④ 或竟以貉为民。

⑤ 或曰：李勣焚之。

可信。今姑撮其大要如下：其略曰：“武王克殷，箕子耻臣周，走之朝鲜，今平壤也。殷民从之者五千人，诗书礼乐及百工之具皆备。周人因而封之。箕子不受。子松，始受周命为朝鲜侯，亦曰韩侯。韩，方言大也。《诗》所谓‘王锡韩侯’者，即其后也。箕子十八传至贞敬王阙。其十三年，当周桓王十年。饥，使通齐、鲁语者，泛海买米。二十世曰孝宗王存，使上大夫鲜于益聘于齐。齐行人公孙恪来聘。有伯一清者，自言周人。得轩辕氏之术，能炼丹长生，以访东海神山，浮海至朝鲜。群臣请试其术。不许。太子孝信之。王卒，孝立，是为天老王。以一清为国师。筑求仙台于屹骨山，高五百尺。以修道故，传位于子修道王襄。以一清为国太师。使一清弟子卢龙，驾大船数十，入东海求神山。至竹岛，遇风，舟尽覆。卢龙仅免。天老王及修道王，皆以服丹药毒发卒。修道王子徽襄王迺立，诛一清及卢龙。二十七世曰英杰王黎。周敬王元年立。北胡入寇，自将伐之。拓地千里。北胡，或曰：即中国所谓东胡。或曰：实后世之靺鞨也。二十九世曰济世王混。禁人民潜商齐鲁者。三十二世曰赫圣王隋。燕僖公使来聘。卒，子和罗王谐立。六年，^①燕人侵边郡，郡守苗春败之。卒，子说文王贺立。五年，^②燕将以二万人侵辽西，上大夫卫文言败之五道河。燕将移屯连云岛，造船筏，将渡海来袭。明年，文言又败之，射杀其将，余众遁还。卒，子庆顺王华立。十二年，^③北胡酋厄尼车吉汗来朝。请共伐燕。下大夫申不死以兵二万会之。北胡兵一千，共拔上谷。燕连年来侵，皆不得志。十九年，^④请和，许之。卒，子嘉德王翊立。二十年，^⑤燕称王，亦称王。追王箕子以下二十九世。卒，子三老王煜立。元年，^⑥

① 周安王二十二年。

② 周显王四年。

③ 周显王十九年。

④ 周显王二十六年。

⑤ 周显王四十六年。

⑥ 周慎靓王五年。

使大夫王霖如周。自箕子三十九世至章平王润，大为燕将秦开所败，失地二千余里，以潘满韩为界。^①北胡酋阿里当夫求助报燕，不许。北胡怨，不朝贡。自将伐之，败还。卒，子宗统王杏立。王之世，服属于秦，惟不与朝会。卒，子哀王准立。立二十年而秦灭汉兴。二十七年，燕人卫满，率千余人来归。封以故秦空地曰上下障者数百里。明年，汉惠帝元年。卫满告王：汉兵十道至。请入卫，许之。满遂袭王。王与战，不胜。将左右宫人及余众数千浮海。攻马韩，王之。都金马郡，今全罗北道益山郡也。传九世，为百济所灭。时王莽始建国元年。遗民保聚一隅，奉先王之祀者曰后马韩。至建武时，降于新罗云。”其所记皆不近情理，伪迹显然。然天下无可全然伪造之物，总必略有事实为据。据之，亦可推想朝鲜古代之情形耳。

《汉书》曰：“始燕时尝略属真番、朝鲜，为置吏筑障。秦灭燕，属辽东外徼。汉兴，为其远，难守，复修辽东故塞，至浞水为界。”真番，即后来汉武所置四郡之一。据朝鲜史家所考，地跨今鸭绿江。朝鲜乃平壤古名。浞水，今大同江也。然则燕时，辽东边境，实较今中、韩国界为远。宜《管子·轻重》，以“八千里之发，朝鲜与八千里之禺氏、吴越、昆仑之虚”并举，以为极远之地矣。汉武既灭卫氏，以其地置真番、玄菟、乐浪、临屯四郡。玄菟，今朝鲜咸镜南道。乐浪，今朝鲜黄海平安等道。临屯，地在今朝鲜汉江以北。自此至晋初，其地属于中国为郡县者，盖四百年焉。

夫余建国，旧说谓出北夷之国曰索离，其说之不可据，已述于前。《汉书·武帝纪》：“元朔元年，东夷蕤君南閼等口二十八万降，为苍海郡。”数年而罢。夫余，似即此等蕤君之后裔也。据《后汉书》所载，夫余之通中国，始于光武建武二十五年。历后汉之世，朝贡时通，侵叛甚鲜，晋初犹修贡职。太康六年，乃为鲜卑慕容廆所破。明年，护东夷校尉何龛送之复国。自是以后，纪载阙焉。日人某

^① 未详何地。

云：“《魏书本纪》：太安三年，夫余来贡。又《高句丽传》有北至旧夫余之语。旧夫余，似对新夫余言之。《魏书》高句丽四至，盖得诸册封长寿王之李敖。长寿王初朝贡于魏，据《册府元龟》，事在太延元年，早于太安三年二十有二年。则太安时之夫余，已非故土。传又载正始间，文咨王上言，扶余为勿吉所逐，涉罗为百济所并，臣云惟继绝之义，悉迁于境内。《三国史记·高句丽纪》六，载文咨王三年，夫余王及妻孥以国来降。盖播迁后为靺鞨所逼，降于句丽也。”夫余建国，实在鲜卑、靺鞨之间，中国疆理以外，为二夷所逼，遂至不能自立。远不如句骊、百济，久居中国郡县之下，资其卵翼者，凭藉之优矣。^①

朝鲜史籍，述句骊、百济开国事云：“夫余王解夫娄，用其相河兰弗之言，移都加叶原。^②是为东夫余。王莽时，其王带素，为高句丽所攻杀。带素季弟，率国人奔鸭绿谷。^③立国于曷思水滨。^④汉明帝永平十一年，其孙解都头，降于高句骊，而东扶余亡。解夫娄之东徙也，族人慕濊代主北国。慕濊通于部酋河伯之女曰柳花，河伯以其无媒而从人，滴之太白山南优勃水上。^⑤夫娄子金蛙，见而怜之。收置室中。若有日光，逐照其身。已而有娠。生子。七岁，自作弓矢，射无不中。夫余人谓善射者曰朱蒙，因名焉。金蛙七子，技皆不及朱蒙，忌欲杀之。柳花知之，以语朱蒙。朱蒙南走，至忽本，^⑥攘斥靺鞨而立国，国号高句丽，以高为氏，都沸流山上。^⑦时汉宣帝神爵四年也。是为东明圣王。^⑧卒，子琉璃明王类利

① 《魏书·豆莫娄传》，所载事迹，皆与《三国志·夫余传》同。盖夫余遗落，留居故土者。

② 地在今苏联沿海州。

③ 当在鸭绿江上流。

④ 无考。

⑤ 太白山，即长白山，朝鲜人谓之白头山。优勃水，无考。

⑥ 亦作卒本。

⑦ 沸流水，即今佟家江支流富尔沟，山当在其附近。

⑧ 东事古记，永乐大王碑皆作邹牟王。邹牟即朱蒙音转也。

立。^①初北夫余王优台，娶忽本人延陀勃女，曰召西奴。生二子，曰沸流，曰温祚。优台死，召西奴归于东明王。抚二子如己出。类利立，沸流兄弟郁郁，自视如赘疣，与其臣十人南走。百姓多从之者。至汉山，登贝儿岳，^②以望可居之地。沸流欲居海滨。十臣谏，不听。乃分其民就弥邹忽。^③温祚止北汉山下，树栅以居，是为北慰礼城。^④以十臣为辅，号曰十济。后又以百姓乐从，改号百济。以先世出于夫余，遂以为氏。时汉成帝鸿嘉三年。沸流居弥邹忽，土湿水咸，不能奠其民。来视百济，都邑既定，人民安泰。渐恚而死。而百济遂日盛。”与中国史所载，大同小异也。

自汉武帝置四郡，至昭帝始元五年，而并临屯于乐浪、真番于玄菟，以玄菟为诸部所侵，徙治高句骊西北。^⑤而析玄菟所领单单大岭以东，沃沮、涉貉之地，悉属乐浪。未几，以乐浪土广，分岭东置二部。东部都尉治不耐，^⑥南部都尉治昭明。^⑦王莽之世，发句骊人伐匈奴。句骊不欲，多亡出塞。光武建武六年，省东部都尉，弃岭东之地。因其土俗，悉封涉貉豪右为县侯。令岁时诣乐浪朝贡。二十年，渡海，复乐浪都尉。复取萨水以南。^⑧后汉之世，句骊与中国屡搆兵。及公孙氏守辽东，而形势乃一变。献帝建安九年，公孙康分屯有、^⑨有盐^⑩以南之地，为带方郡。^⑪百济、日本皆属焉。公孙氏亡，魏以刘昕为带方太守，鲜于嗣为乐浪太守。时

① 琉璃，亦即类利转音。永乐大王碑作朱留王。

② 今汉城附近之山。

③ 今仁川。

④ 今汉城东北。

⑤ 朝鲜史家云：“高句骊本古国名，汉因之置县。地在辽水上源。”案此殆高句骊之旧国，尚在宋蒙都沸流以前者也。

⑥ 今朝鲜德源永兴一带。

⑦ 今春川。

⑧ 萨水，今清川江。

⑨ 即古朝鲜临屯。

⑩ 今朝鲜延安。

⑪ 今临津江，古名带水。带方郡之地，大抵在临津江北。

萨水之道，为句丽所阻。二人浮海往定之。明帝景初七年，乐浪太守刘茂，带方太守弓遵伐岭东，降之。明年，幽州刺史毋丘俭，与茂、遵伐句骊，入丸都。^①句骊东川王^②徙治平壤。晋初，句骊屡侵乐浪、带方，晋将张统战败，奔慕容廆。故国原王钊，^③复居丸都，兵力复及马訾水矣。^④成帝延康八年，平州刺史慕容廆伐句丽，入丸都，虏钊母妻，发钊父墓，载其尸归。钊卑词请和，纳质奉贡，乃还之。句丽复去丸都，居平壤。又四传至广开土王谈德，南服百济，乘慕容氏之亡，尽取辽东，遂为东北方大国矣。

汉、魏而后，朝鲜半岛大国有三：在北者为句骊、百济，在南者则新罗也。新罗、百济与日本皆有关系。后汉献帝时，熊袭叛日本，新罗尝助之。日本神功皇后，越海伐新罗。新罗请和。日人遂置任那府于弁韩故地，^⑤与新罗时搆衅隙。句骊之为慕容氏所破也，绝意于北，专务南侵。新罗、百济，尝联合以御之。自宋元嘉至梁天监，殆百年。天监而后，新罗日强。既攻取任那，遂思灭百济以拓土。与句骊联合攻之。百济惧，请成于句骊。句骊疾新罗之强，背盟与百济合。日本亦时出兵攻新罗。新罗势孤，不得不乞援于中国。此隋唐之际东北方之形势也。

句骊自并辽东后，与中国矛盾日增。隋炀帝三伐之而无功。唐太宗自将征之，亦不克。至高宗世，乃与百济俱为中国所灭焉。于时朝鲜半岛仅存新罗一国。唐所并句骊、百济之地，皆分置都督府州，设安东都护府于平壤以统之。而新罗嫉百济余众叛唐，因之略其地。咸亨元年，安东都护府内徙辽东。玄宗时，遂尽弃溟水以外。于是朝鲜半岛，唐室无复寸土。然新罗疆理，亦仅及溟水。溟水以北，大都为渤海所有。渤海亡，靺鞨复据之。高丽王氏之初，

① 疏离明王徙治国内。八传至山上延优，筑丸都，徙都之。

② 名优位居，山上王子。

③ 东川王四传。

④ 鸭绿江古名。

⑤ 今庆尚道洛东江以西。

以萨水为界，其后稍度萨水而北。契丹圣宗伐高丽，高丽徐熙御郤之。遂筑六城于今平安北道境。后复筑长城，起鸭绿江入海处，东傅今咸兴府以南海口，以攘斥女真。金之初兴，来侵。高丽击破之。于今吉州一带筑城九，女真卑辞请和，乃以九城还之。西北境与女真，以鸭绿江为界。鸭江为中、韩界水，始此。契丹之与高丽搆兵，契丹颇不利。然高丽亦困弊，卒称藩纳贡以和。女真本臣属高丽。宋徽宗政和七年，既破辽，遣使通好，始自称兄。后又渡鸭绿江，取保州。^① 交涉多年，高丽卒以事辽者事之。乃归以保州。元人初起，因讨契丹遗族，阑入高丽境，约为兄弟之国。后蒙使归，渡鸭绿江，为盗所杀。蒙人疑高丽所为，衅端始搆。遂致兵争。高丽不能御。其国人又多据地附蒙者。卒至国主废立，操於蒙古之手。蒙人且时于其地设行省焉。盖自辽、金、元之兴，而高丽恒为所弱。其原因，实由新罗不能正句丽、百济旧壤，犹之越灭吴而不能正淮、泗之境也。

貉介鲜卑、肃慎间。二族之文明程度皆低，而貉族独高。谓其自然发生邪？则其所处之地，与二族无异也。谓其与燕杂处，有所受之邪？则鲜卑、肃慎，亦未尝不与燕杂处也。今观其政教风俗，多极类华夏，又有可证其出于殷者。^② 则朝鲜古国，必以貉为民可知矣。然则貉族古俗，不徒可见其族开化之迹，并可征殷之遗制也。

《孟子》称貉之道二十取一，则其俗已久进为耕农，而史称夫余“水旱不调，五谷不熟，辄归咎于王，或言当易，或言当杀”。此人主有过，谪见于天实行之制。华夏古者，岂亦如是？至后世，及移其责于三公邪？王而可易可杀，则贵戚易位，粥拳兵谏，不为异闻，而伊周之事，尤不足为怪矣。诸国政制，亦有异同。有有王者，有无王者。其有王者如夫余、句骊、百济是也。其无王者如东沃沮，

① 今义州。

② 如祭天以殷正月及尚白之类。

“有邑落长帅而无大君主”是也。夫余“以六畜名官，有马加、猪加、狗加等，其邑落皆分属诸加。大者数千家，小者数百家”。盖古采邑之制。“有敌，诸加自战，下户担粮饮食之。”犹可见古者士与民之别。句骊“大加不佃作，坐食者万余口，下户远担米粮鱼盐供给之”。此则所谓“治人者食于人”。禄以代耕之制所由昉也。

诸族用刑，皆极严急。夫余之法：“杀人者死。又没入其家为奴婢。盗一，责十二。男女淫，妇人妬，皆杀之。尤憎妬妇。既杀，复尸之国南山上，至腐烂。女家欲得，输牛马，乃与之。”句骊：“无牢狱，有罪，诸加评议，重者便杀之，没入妻子为奴婢。反逆者缚之于柱，蒸而斩之，籍没其家。盗则偿十倍。”百济：“退军及杀人者皆斩。盗者流，其赃，两倍征之。妇犯奸，没入夫家为奴婢。”均失之于严酷。岂殷代刑法，本甚峻急欤？

其兵，性质强悍，长于步战。而其好寇钞与否，则视其所居之地而殊。史称夫余之人，“粗大强勇，而谨厚，不为寇钞”；而高句骊之人，则以“凶急，有气力，习战斗，好寇钞”闻，其地肥瘠异也。东沃沮之人，“性质强勇，便持矛步战”。濊人亦“少寇盗，能步战”。盖诸国皆处山险，车骑非所尚也。其械器亦颇修饬。如夫余“以弓、矢、刀、矛为兵，家家自有铠仗”。句骊别种小水貉，出好弓，谓之貉弓。濊人又能作矛，“长三丈，数人共持之”。已非浅演之群所能逮矣。

史称濊人“知种麻，养蚕，作绵布。晓候星宿。豫知年岁丰约”。则其进于耕农，为时已久。又称夫余“以员栅为城，有宫室，仓库，牢狱”。高句骊之俗，“节于饮食，而好修宫室”。则又非《孟子》所称“无城郭宫室”之旧矣。

其丧祭之俗，最与华夏类。史称夫余“以殷正月^①祭天。大会连日，饮食歌舞，名曰迎鼓。是时断刑狱，解囚徒。有军事，亦祭天，以蹄占其吉凶”。句骊，“好祠鬼神，社稷，灵星。以十月祭天大

^① 此从《三国志》，《后汉书》作腊月。

会，名曰东盟。^① 其国东有大穴，号隧神，亦以十月迎而祭之。”洿，“常用十月祭天，昼夜饮酒歌舞，名之为舞天。又词虎以为神。多所忌讳。疾病死亡，辄捐弃旧宅，更造新居”。马韩，“常以五月田竟祭鬼神。昼夜酒会，群聚歌舞。舞辄数十人相随，蹋地为节。十月农功毕，亦如之。诸国邑各以一人主祭天神，号为天君。又立苏涂，^② 建大木，悬铃鼓，以事鬼神”。^③ 百济，“以四仲月祭天及五帝之神。立始祖仇台之庙于国城，岁四祠之”。^④ 此其祭礼之类华夏者也。夫余，“丧皆用冰。杀人殉葬，多者以百数。有棺无槨，停丧五月，以久为荣。其祭亡者，有生，有熟。丧主不欲速，而他人强之。常净引，以此为节。居丧，男女皆纯白。妇人著布面衣，去环珮。大体与中国相仿佛”。东沃沮之葬，“作大木椁，长十余丈。开一头为户。新死者，先假埋之。才使复形。皮肉尽，乃取骨置椁中。家人皆共一椁。刻木如生形，随死者为数。又有瓦甕，置米其中，遍悬之于椁户边”。此似异俗，非殷遗。至如高句骊，“死者殡在屋内，经三年，择吉日而葬。居父母及夫丧，服皆三年。兄弟三月。初终哭泣，葬则鼓舞作乐以送之。埋讫，取死者生时服玩车马，置于墓侧，会葬者争取而去”。“积石为封，亦种松柏。”则颇与华夏类矣。貉族好厚葬，史称句骊“婚嫁已毕，便稍营送终之具”，“金银财币，尽于厚葬”。马韩亦“牛马尽于送死”，以致“不知骑乘”。盖厚葬本华夏旧俗。经儒墨诸家之非议，乃渐革除者也。^⑤

其婚姻，亦颇类华夏古俗。史称夫余、句骊，皆兄死妻嫂，与匈奴同俗。案此亦中国古俗，第二章已论之。《三国志》谓句骊：“作婚姻，言语已定。女家作小屋于大屋后，名婿屋。婿暮至女家户外，

① 疑即东明，谓以东明圣王配天也。

② 注“《魏志》曰：诸国各有别邑，为苏涂”。

③ 以上据《后汉书》。

④ 《魏书》。

⑤ 夫余之王，葬用玉匣。“汉朝常豫以付玄菟郡，王死则迎取以葬。”亦其好厚葬之一证也。

自名跪拜，乞得就女宿。如是者再三。女父母乃听，使就小屋中宿。至生子已长大，乃将妇归家。”此盖女系时代，男子就婚于女氏之遗俗。赘婿之制，亦由是而起也。《魏书》称句骊婚嫁，“男女相悦，即为之。男家送猪酒而已，无财聘之礼。有受财者，人共耻之，以为卖婢”。而《魏略》载东沃沮嫁娶之法：“女年十岁，已相说许。婿家迎之，长养以为妇。至成人，更还女家。女家责钱。钱毕，乃复还婿。”则其俗适相反，俗固随地而殊也。^①

华夏古俗，本好歌舞。礼称“君子无故不去琴瑟”。又曰：“邻有丧，春不相。里有殡，不巷歌。”《论语》谓“子于是日哭，则不歌”。可见歌舞习为常事。古代礼乐之盛，盖亦以此。《后汉书·夫余传》谓其“行人好歌吟，无昼夜，音声不绝”。《三国志·句骊传》“民好歌舞，国中邑落，暮夜男女群聚，相就歌戏”。得毋亦殷之故俗与？此外礼俗，与华夏类者，盖尚不少。《后汉书·东夷传》总叙之曰：“东夷率皆土著，喜饮酒歌舞，或冠弁衣锦，器用俎豆。”^②夫其服食用器，相类如此，其必有所受之，无可疑矣。而夫余“在国中衣尚白，出国乃尚缁绣锦罽”，尤足为出于有殷之证也。

以上所述，为貉族古俗。貉族传受中国文化，当分三期。古代文化，盖受诸箕氏，此一期也。东晋简文帝咸安二年，苻坚使送浮屠顺道及佛像经文于句骊。未几，僧阿道继至。是为佛教入句骊之始。阅五六十年，而自句骊传入新罗。孝武帝太元九年，胡僧摩罗难陀自东晋入百济。百济枕流王迎之宫内。明年，立佛寺于汉山，度僧十人。是为佛教入百济之始。^③新罗之世，佛教大盛。新罗立国制度，一切以唐为模范。然民间风气，咸习于佛。论者谓是时之新罗，以制度论则儒，以风俗论则佛也。此第二期也。元时，

① 《魏书》谓句骊“俗多游女，夫无常人”，盖即女间之制。

② 《夫余传》：“其食饮用俎豆。会同，拜爵洗爵，揖让升降。”《高句骊传》：“其公会，衣服皆锦绣金银以自饰。大加主簿，皆著帻，如冠帻而无后。其小加，著折风，形如弁。”

③ 据金于霖《韩国小史》。

宋学始传入。至李朝而大盛，李朝太宗，修饬内治，有海东尧舜之称。世宗建藏书阁，敕文臣编撰书籍，作雅乐，正历象，制测雨器，^①造新字，^②一切文化，灿然可观。此第三期也。朝鲜当元时，剃发易服，几举国同化于胡。然卒能自振拔，可谓难矣。不幸其尚文治而忽武功，逞意气而好党争，亦与宋人类。至酿成近世之局面，卒为东邻所吞噬，亦可哀矣。然宗尚中华，列国中无如朝鲜者。清之兴，朝鲜尝助明以掎之。后以力不能敌，至于称臣。然心终右明，清太宗征其兵以伐明。朝鲜曰：“明吾父也，父可伐乎？”至再为清兵所蹂躏而不悔。清人既入关，朝鲜孝宗，犹训卒厉兵，欲伺其后。以清势方盛，资志而沮。子显宗立，庸懦无能。吴三桂举兵时，朝鲜士人罗硕佐，三上万言书，请追先朝薪胆之志。不报。盖至是而孝宗之志荒矣。然怀明之念终不忘。肃宗筑大报坛，以太牢祀神宗。英祖时又增祀太祖及思宗焉。模刻明成化所赐印，为子孙嗣位之宝。正祖辑《尊周汇编》，三致尊攘之意。

东方诸侯，能传华夏之文明者，固当以貉族为第一。抑貉族之功绩，尚有大足自豪者，则以予所考，发见新世界者，实当以貉族为首是也。案《宋书·四裔传》：载“文身国，在倭东北七千余里。大汉国，在文身东五千余里。扶桑国，在大汉国东二万余里”。其道里虽不可信，而其国则必在今南北美洲。文身，大汉，皆系粤族，别见第七篇。扶桑国之事迹，得诸其国沙门慧深所述。其言云：“其国法有南北狱。犯轻罪者入南狱，重罪者入北狱。有赦，则放南狱，不放北狱。在北狱者，男女相配；生男，八岁为奴。生女，九岁为婢。犯罪之身，至死不出。贵人有罪，国人共会，坐罪人于坑，对之宴饮，分诀若死别焉。以灰绕之；其一重，则一身屏退；二重则及子孙；三重则及七世。名国王为乙祁。贵人：第一者为对卢，第二者为小

① 欧洲测雨器，成于一千六百三十九年。后于朝鲜约二百年。

② 朝鲜活字，创于太宗三年，即明永乐元年。欧洲活字，创于一千四百五十年，即明景泰元年。亦较朝鲜为后。

对卢,第三者为纳咄沙。国王行,有鼓角导从。其衣色,随年改易:甲乙年青,丙丁年赤,戊己年黄,庚辛年白,壬癸年黑。其地无铁有铜,不贵金银。市无租估。其婚姻:婿往女家门外作屋,晨夕洒扫。经年而女不悦,即驱之。相悦,乃成婚。婚礼大抵与中国同。亲丧,七日不食。祖父母丧,五日不食。兄弟伯叔姑姊妹,三日不食。设坐为神像,朝夕拜奠,不制衰经。嗣王立,三年不亲国事。”近人或以此为汉族古代早居西半球之征。予案乙祁,对卢之名,皆与高句丽同。而婿往女家门外作屋,亦与句丽婿屋之制相类。扶桑必貉人之浮海而东者矣。^①

附录一 貉族发现西半球说

近人《法显发见西半球说》云:“《法显佛国记》云:弘始二年,岁在己亥,与慧景、道整、慧应、慧嵬等同契,至天竺寻求戒律。初发长安,六年,到中印国。停经六年,到师子国。同行纷披,或留或亡。即载商人大船上,可有二百余人。得好信风。东下。三日,便直大风,舶漏水入。商人大怖,命在须臾。如是大风,昼夜十三日,到一岛边。潮退之后,见船漏处,即补塞之。于是复前。大海弥漫无边,不识东西,惟望日月星宿而进。若阴雨时,为逐风去,亦无所准。当夜暗时,但见大浪相搏,恍若火色。商人荒遽,不知那向。海深无底,又无下石住处。至天明已,乃知东西,还复望正而进。若直伏日,则无活路。如是九十许日,乃到一国,名耶婆提,其国外道婆罗门兴盛,佛法无足言。停此国五月日,复随他商人大船,亦二百许人;赍五十日粮。以四月十六日发,东北行趣广州。一月余日,夜鼓二时,遇黑风暴雨,于是天多连阴,海师相望僻误,遂经七十余日。即便西北行求岸。昼夜十二日,到长广郡界牢山南岸。得好水菜,知是汉地。或言未至广州,或言已过,莫知所定。即乘小

^① 衣色随时改易,月令即然,但非随年耳。

舶，入浦觅人，得两腊人，即将归；今法显译语问之，答言此是青州长广郡界，统属晋家。是岁晋义熙十二年矣。案师子国，即今锡兰。本欲自锡兰东归广州，乃反为风所播，东向耶婆提国。耶婆提者，以今对音拟之，即南美耶科陀尔国；直墨西哥南，而东滨太平洋。科音作婆者，六代人婆、和两音多相混。如婆藪槃豆，一译作和修槃头，是其证。耶婆提，正音作耶和提，明即耶科陀尔矣。世传墨西哥旧为大国，幅员至广，则耶科陀尔，当时为墨西哥属地无疑。所以知耶科提必在美洲，非南洋群岛者，自师子国还向广州，为期不过四十六日。^①故法显失道，商舶亦齎五十日粮。今遭大风，昼夜十三日，始至一岛，又九十日而至一国，合前三日计之，已得一百六日；是东行倍程可知。况南洋师子国，途次悉有洲岛；当时帆船，皆傍海而行，未有直放大洋者。今言海深无底，不可下石，而九十日中，又不见附海岛屿，明陷入太平洋中，非南洋群岛。逮至耶婆提国，犹不知为西半球，复向东北取道；又行百余日，始折而西。夫自美洲东行，又百许日，则还绕大西洋而归矣。当时海师，不了地体浑圆，惟向东方求径，还绕太西，进行既久，乃舛青州海岸之东，始向西北折行，十二日方达牢山。是显非特发见美洲，又还绕地球一周也。然据《佛国记》言：耶婆提国，已先有婆罗门，特无佛法。则法显以前，必有印度人遇风漂播至此者，故婆罗门教得传其地。又观美洲山脉，横贯南北者，在北美曰落迦，南美曰昂底斯。落迦本印度称山之语，如补陀落迦，咀落迦，弹落迦，竭地落迦是也。落迦冈底斯为西藏大山，即葱岭所自起。美之山脉，莫长于昂底斯，正与葱岭等，明昂底斯亦即冈底斯音转。斯皆以梵语命山，益明婆罗门曾先至美洲，特以姓名不著，而尸其名者独在法显，斯可为梵国前哲悲，亦为汉土尊宿幸矣。”予案观《宋书·四裔传》，则知印人浮海而东者，自古即极多。婆罗门之先至美洲，非必如原文所云，出于遇风漂播，特其与貉族之至美洲，孰为先后，则尚不可知耳。

^① 据《唐书·地理志》。

近人《异闻录》云：“《山海经·海外东经》：言汤谷上有扶桑，十日所浴。《淮南子·天文训》：言日出于汤谷，浴于咸池，拂于扶桑。此皆悠谬之谈。然《梁书》确有扶桑国。齐永元元年，其国有沙门慧深，来至荆州。云扶桑在大汉国东二万余里。近西人诺哀曼(Nenmann)，推度其地，谓即美洲墨西哥。此说未知确否。特墨西哥建国甚早。与闽粤沿海诸地，同一纬线，中隔太平洋，在齐梁时，非不能与中华交通。《梁书》言扶桑国多扶桑，故以为名。扶桑叶似桐，而初生如筍。绩其皮为布，以为衣，亦以为棉。其文字以扶桑皮为纸。今考墨西哥特产之植物，则有摩伽(Magney)。其学名曰 *Agave Ameri cana*。土人亦名百岁花，谓经百岁始一花。其物多纤维。古时墨西哥象形文字，皆书于摩伽叶。此犹印度之贝叶，埃及之巴比利叶。若遽谓摩伽即梁时之扶桑，恐亦近於附会。但齐、梁时由中国东行二万余里，果有文物之国，则除墨西哥外，实无地以当之。此诺哀曼氏所以疑扶桑为墨西哥也。近世落花生，本来自南美之巴西，而《福清县志》言僧应元往扶桑觅种寄回，似亦以南美为扶桑。或者古人知中国极东有美洲，因附会《山海经》，名曰扶桑也。”又三十年代初，外交部尝咨教育部云：“据驻纽约总领事张祥麟呈称：准美国亚拉斯加省前任总督函称：本省前年掘土，发现古物二件：一系陶器，一系铜器。如能证明确系中国古物，则可证实华人曾经发见美洲。乞查明示复等因。并附发现古物拍照四纸前来。职领检阅《金石索》，内载形似泉币一图，其形恰与美人所发现之铜器相同；正面反面之摹本，亦无差异。该书注云：系唐代孙思邈《入山符》。惟未能释明所载符文，系何意义。此地书籍不备，无从研究。至所发现之陶器，因物未目睹，亦无从查考。兹特将照片四纸，随呈附送。可否咨行教育部，将符文意义，查明见复，以凭转复等情。相应检同原送照片二纸，咨行贵部，查照核复，以凭转知可也。”教育部复文云：“查该项铜器，确系我国厌胜钱币。《西清古鉴图》录是钱，以其面有符文，定名为符印钱，且谓文与孙思邈

《入山符》略仿佛。《金石索》及《吉金所见录》等钱谱，均沿袭其说，而未详其制作年代及符文意义。本部辨其形制、图象、笔意，当属宋代道家作品。又查各项厌胜钱文，皆祈福避凶之作。是钱符文，意义要不外此。一俟本部考有确证，再行详复。至陶器形制，甚似我国宋、元时磁洗。惟有无磁釉，质地及色泽若何，该总领事既未目睹原器，原文亦未经注明，本部自未便臆断为何时器物也”云云。观此，知华人至美洲，虽或在印度人后，亦必在欧人之先矣。

第七章 肃 慎

东北民族，见於史籍最早者，当推肃慎。肃慎之名，见於《史记》之《五帝本纪》、《周本纪》、《孔子世家》、《大戴记·少閒篇》、《书序》、《周书·王会篇》，《左传》昭公九年，《国语·鲁语》及《说苑》，《家语》之《辨物篇》。《大戴记》之文，似与《五帝本纪》，同出一原。《孔子世家》之文与《国语》大同。王肃造《家语》，盖取诸此。即《书序》亦据此伪造，而后人更以窜入《周本纪》者也。

《五帝本纪》述舜之功云：“方五千里，至於荒服。南抚交趾、北发，西戎、析支、渠廋、氐、羌，北山戎、发、息慎，东长、乌夷。”①《大戴记》则云：“朔方幽都来服，南抚交趾，出入日月，莫不率俾，西王母来献其白琯，粒食之民，昭然明视，民明教，通於四海，海外肃慎、北发、渠搜、氐、羌来服。”自民明教至来服二十字，下述禹汤文之功并同。案此两文似皆有错乱，然大意自同。所异者：《史记》以肃慎与山戎、北发并列，谓与交趾，北户，析支，渠廋，氐羌，乌夷，长夷，同在荒服之外；《大戴记》则以交趾与朔方，幽都，西王母并举，似视之较近；其与肃慎并列者，则少山戎之名；与之并举，谓在海外者，亦少析支之名，并不举东南二方而已。四海与荒服，似皆以大概言之，不能据昔人所言四海及五服远近里数，以定其所在。《尔雅》：“觚竹、北户、日下、西王母，谓之四荒。九夷，八狄，七戎，六蛮，谓之四海。”四荒在四海之外，而《王制》以雕题交趾为南蛮，则交趾。

① 《索隐》：“北发，当云北户，南方有地名北户。又按《汉书》：北发是北方国名，今以北发为南方之国，误也。此文省略，四夷之名错乱。西戎上少一西字。山戎下少一北字。长字下少一夷字。”

北户浑言之，同为南方远国；析言之，则交趾视北户为近。山戎即战国时之东胡，其所居之地，已见第二篇。北发不可考。《史记》举三国之名，似系由近及远，则《大戴记》不举山戎，似即以朔方幽都当之，犹其於南方，近交趾而远北户也。

如上所言，仅知肃慎更在山戎、北发之表，而不能确知其所在。《周书》以肃慎与涉人并列，秽人即貉族，已见前篇。貉族古代居地，虽未能确知，然据前篇所考，大约在北燕之东北。则史家以后世之挹娄、靺鞨，在今松花江上游者，当古代之肃慎，似不为过。然《左传》昭公九年，以肃慎与燕、亳并列，为武王克商后之北土；与魏，骀，芮，岐，毕为西土，蒲姑，商奄为东土，巴，濮，楚，邓为南土并举。辽东西之地，虽或以为古代营州之域，然谓松花江上游，周初视之，与魏，骀，芮，岐，毕诸国相等，终嫌其拟不於伦。《孔子世家》“有隼集於陈廷而死，楛矢贯之，石弩，矢长尺有咫。陈湣公使使问仲尼。仲尼曰：隼来远矣！此肃慎之矢也。昔武王克商，通道九夷八蛮，使各以其方贿来贡，使无忘职业。於是肃慎贡楛矢石弩，长尺有咫”云云。此文虽不言肃慎所在，而有楛矢石弩方物为据，后世所谓挹娄、靺鞨者，其地固犹产此物，且犹以之为贡，考古者遂以此为古代肃慎。即在后世挹娄、靺鞨之地之诚证。然予谓此只可证古代之肃慎，即为后世挹娄、靺鞨其人，而不能证古代肃慎，必居后世挹娄、靺鞨之地。何者？楛木固随处有之，石弩亦所在皆是，必指今长白山之木，中为矢榦；松花江之石，中为矢鏃；遂谓古代肃慎氏之楛矢石弩，必为此物，固无解於武断之讥也。^①然则谓朝鲜、涉貉、肃慎，皆本居燕北，迨燕开五郡时，乃为所攘斥而北走，虽书阙有间，若无诚证，而其理固有可信矣。^②

然则何以知古代之肃慎，必即后世之挹娄、靺鞨其人也？此其

① 阎百诗谓肃慎氏即今宁古塔。其地榆松枝枯，堕入混同江，化为石。可作箭鏃。榆化者为上，松化者次之。未免失之穿凿。

② 《淮南·地形训》：“东北薄州曰隐土。”案薄、亳二字之互讹，已见第一篇附录《释亳》。此所谓薄州，殆即左氏所谓“肃慎，燕，亳”者也。亦可见肃慎与燕相近。

证有二：挹娄、靺鞨外，后世更无用楛矢石弩之民，一也。汉时但有挹娄，而《晋书》云“肃慎，一名挹娄”，此必晋时挹娄人仍以肃慎之名自通。不然，则《晋书》当云挹娄古肃慎国，^①不得云“肃慎一名挹娄”也。二也。晋时之肃慎，《魏书》称为勿吉；《隋书》、《唐书》作靺鞨；辽以后称女真；至明末，乃有满洲之称。案《大金国志》云：“金国，本名珠里真，后讹为女真，或曰虑真。”宋刘忠恕亦称金之姓为朱里真。《满洲源流考》云：“北音读肃为须，须朱同韵；里真二字，合呼之音近慎；盖即肃慎转音。国初旧称所属曰珠申，亦即肃慎转音也。”又案清人自称其部族之名曰满洲。据日本稻叶君山所考：^②则谓“清人在明时，部落之名，仍曰女真。其建号曰清以前尝自号其国曰金。至满洲二字，则明人及朝鲜人，音译皆作满住，乃大酋之称，既非国名，亦非部族名。”予案《魏书》：靺鞨之酋长，号大莫弗瞞咄。瞞咄即满住之异译。勿吉，靺鞨，似仍系瞞咄音差。此族人惯以酋长之称自名其部族，而他人遂误以称酋长之词，为其部族之名，固古今一辙也。《满洲源流考》又云：“挹娄二字，即今满语之懿路，乃穴居之义。”然则挹娄者，他人以其穴居而名之，勿吉、靺鞨，则误以酋长之称为部落之名，至其族落之名，则古曰肃慎，后世曰女真，虑真，珠里真，朱里真，清人则译作珠申，亦即现在所谓索伦，固有异译而无异语矣。

肃慎古代居地，盖遍今黑龙江及其支流流域。而史言其地不同者，则其通中原有早晚耳。《后汉书》云：“挹娄，在夫余东北千余里。东滨大海，未知其北所极。”夫余都城，在今农安县附近，其疆域，则跨松花江而东。相去千余里，盖指夫余都城及挹娄诸部落中，与中原交通之部落计之，其地当今吉林东境。东滨大海，则抵今俄领沿海州矣。《晋书》云：“在不咸山北，去夫余可六十日行。东

① 《魏书·勿吉传》：“旧肃慎国也。”旧字盖指晋时言之，若指三代以前，则常用古字矣。

② 《清朝全史》。

滨大海，北极弱水。”不咸山，今长白山；弱水，今松花江也。^①《魏书》述勿吉使者乙力支之来云：“初发其国，乘船溯难河西上。至太弥河，沈船於水，南出陆行。度洛孤水，从契丹西界达和龙。”又述自和龙至勿吉之路云：“自和龙北二百余里有善玉山。山北行十五日，至祁黎山。又北行七日，至如洛瓌水。水广里余。又北行十五日，至太鲁水。又东北行十八日，到其国。国有大水，阔三里余，名速末水。”难河，今嫩江。太弥河，即太鲁水，^②今洮儿河。洛孤水，即如洛瓌水，^③今老哈河。速末水，《唐书》作粟末水，又作谿末江，今嫩江会口以上之松花江也。勿吉之地，盖本夫余所有。日本津田左右吉《勿吉考》云：“《魏书·高句丽传》述其四至云：北至旧夫余。盖长寿王初通贡於魏时，魏封册使李敖所闻。长寿王之初贡魏，事在太延元年。^④云北至旧夫余，则斯时高句丽之北方，尚不知有所谓勿吉。而乙力支之来朝，自云其国先破高句丽十落，密共百济谋，从水道并力取高句丽。据《册府元龟》，勿吉之初通魏，事在延兴五年，上距太延元年凡四十年；是时勿吉既与高句丽接界，则勿吉之强，盖在此四十年中。夫余旧土，遂为所并也。”^⑤予案《晋书》谓肃慎“自汉以后，臣服夫余，故虽以秦汉之盛，莫之致焉”。则勿吉之地，盖本肃慎氏故土。夫余强时，夷为其属，故不能以名自通。迨夫余王室，自今长春附近，南迁浑河之滨，故居其地之肃慎人，乃日渐强盛，终至以勿吉之名，自通於上国。非必魏时勿吉之地，故为貉人所居，夫余既衰，肃慎乃从而据之也。其汉时所谓挹娄，晋时所谓肃慎，则在夫余东界之外，纵或服属，未尝系籍而为之民，故仍能以名自闻焉。降及隋时，其种人与中原通者愈多。《隋书》记其部落，大者有七：“曰粟末部，居最南，与高丽接。曰伯咄

① 与嫩江会合后东流之松花江。

② 《北史》作太岳鲁水。

③ 《北史》作洛瓌。

④ 据《册府元龟》。

⑤ 文咨王时降於高句丽之夫余王，津田氏谓在浑河流域，所谓新夫余也。

部，^①居粟末北。曰安车骨部，居伯咄东北。曰拂涅部，居伯咄东。曰号室部，居拂涅东。曰黑水部，居安车骨西北。曰白山部，居粟末东南。”粟末部，津田氏谓即魏时之勿吉，以地理征之，良是。盖魏时通中原者，惟此一部，不烦分别，隋时闻於中原者多，乃以粟末别称之也。白山，今长白山。黑水，亦今松花江。此水上源称粟末，会嫩江东折后，盖汉魏时称弱水，隋唐时称黑水。《唐书》述靺鞨诸部惟无号室之名，余六部名及地望，皆与《隋书》同，而曰“部间远者三四百里，近者二百里”，核其道里，断不过至今黑龙江。《金史》云：“女直之地，有混同江，长白山。混同江，亦号黑龙江，所谓白山黑水者也。”语极明白。清人以敖嫩克鲁伦为黑龙江上源，不自知其与古不同，而转疑往史之言为误，可谓慎矣。《唐书》於六部之外又云：“黑水西北有思慕部。益北行十日，得郡利部。东北行十日，得窟说部。稍东南行，十日，得莫曳皆部。又有拂涅、^②虞娄、越喜、铁利等部。^③拂涅、铁利、虞娄、越喜，时时通中国；而郡利、窟越、莫曳皆，不能自通。白山本臣高丽，唐师取平壤，其众多入唐。泊咄、安车骨等浸微，无闻焉。惟黑水完强，分十六落，跨水称南部。”此即后来之金人也。

靺鞨之众，其后有渤海与女真。渤海之兴，《新旧唐书》记载互异。《旧唐书》云：“大祚荣者，本高丽别种也。高丽既灭，祚荣率家属徙居营州。万岁通天中，契丹李尽忠反叛，祚荣与靺鞨乞四比羽，各领亡命东奔，保阻以自固。尽忠既死，则天命右玉钤卫大将军李楷固率兵讨其余党。先破斩乞四比羽，又度天门岭以迫。祚荣合高丽、靺鞨之众以拒楷固，王师大败，楷固脱身而还。属契丹及奚尽

① 《唐书》、《五代史》均作泊咄。

② 亦称大拂涅。

③ 《通考》：“渤海以越喜故地为怀远府。”《辽史》：“东京韩州，‘本渤海越喜县也’。又银州新兴军，‘本故越喜国城’。又东京信州，‘本越喜故城，地邻高丽’。《金史》：“韩州柳河县，‘本粤喜县地’。案渤海怀远府，辽金元皆为信州，在今宁安附近。辽韩州，在今开原之北。银州，今铁岭也。《通考》又云：“渤海以铁利故地为铁利府，故铁骊国地。”案渤海铁利府，当在今图们江北岸。

降突厥，道路阻绝，则天不能讨。祚荣遂率其众，东保桂娄之故地，据东牟山，筑城以居之。”《新书》则云：“渤海，本粟末靺鞨附高丽者，姓大氏。高丽灭，率众保挹娄之东牟山。地直营州东二千里。南北新罗，以泥河^①为境，东穷海，西契丹，筑城郭以居。高丽遭残稍归之。万岁通天中，契丹尽忠杀营州都督赵鹞反。有舍利乞乞仲象者，与靺鞨酋乞四比羽及高丽余种东走，度辽水，保太白山之东北，阻奥娄河，树壁自固。武后封乞四比羽为许国公，乞乞仲象为震国公，赦其罪。比羽不受命。后诏玉钤卫大将军李楷固，中郎将索仇击斩之。是时仲象已死，其子祚荣，引残夷遁去。楷固穷蹙，度天门岭。祚荣因高丽靺鞨兵拒楷固败还。於是契丹附突厥，王师道绝，不克讨。祚荣即并比羽之众，恃荒远，乃建国”云云。案《新书》之文，显系杂采众书，以致复踵误谬。自“渤海本粟末靺鞨”至“稍归之”，盖采自一书。此书仅言渤海兴起之大略，而南北新罗十五字，则又误以渤海盛时疆域，系之保据东牟山之时。自“万岁通天中”以下，当又采自一书。此书言渤海兴起之事校详，然似又采他说补苴之，故又误以“度辽水，保太白山之东北，阻奥娄河树壁自固”之语，系之天门岭战前。其实奥娄即挹娄音差，桂娄或挹娄形讹。《旧书》所谓桂娄故地之东牟山，《新书》所谓挹娄之东牟山，及太白山东北之奥娄河，三者正自一地，乃祚荣既败李楷固后所据，而与楷固战前保阻自固之地，虽在营州之东，必不能至挹娄故地，《旧书》大致，自不误也。《新书》称其部为粟末靺鞨，而旧书称为高丽别种。盖以其久附句丽云然。《新书》谓祚荣承乞乞仲象之业，《旧书》谓身自创乱，亦无从定其孰误。然二书皆称乞四比羽为比羽，则似乞四其姓，比羽其名。乞四二字，似仍乞乞音差，而大字又颇似据汉族文义自定之姓氏。得毋乞乞仲象，为其本来之氏名，而大祚荣三字，则其自定之汉名汉姓欤？

渤海传国，凡十二世。其自立，在周圣历二年。其亡，在后唐

^① 今江陵北之泥川水。

明宗天成三年。前后二百三十年，其疆域：有五京，十五府，六十二州。其遗址不可悉考。大约上京龙泉府，在今敦化县附近。中京显德府，在今吉林西南。西京鸭绿府，在今辑安县境。东京龙原府，在今海參崴。南京南海府，在今朝鲜之咸兴。其疆域：盖包今吉林全省，奉天东边道之半，朝鲜之咸镜、平安二道，及俄领之沿海州。一切制度，无不模范中华，可谓海东盛国矣。^①然契丹之灭渤海，为时曾不浹月，何哉？^②《隋书》述靺鞨七部胜兵之数，粟末部数千，伯咄七千，余五部并不过三千，则幅员虽广，户口不繁。门艺之谏武艺曰：“昔高丽盛时，士三十万，抗唐为敌，可谓雄疆。唐兵一临，扫地尽矣。今我众比高丽，不过三之一，王将违之，不可。”然则渤海国势，尚乃不逮句丽，所以能传世十二，历年二百者，徒以突厥为梗，道路阻塞，盛唐之师，不暇远略，而自句丽、百济，相继复亡，新罗北疆，仅及溟水；又其嗣世之主，奕世尚文，拓土朔垂，非其所欲故耳。契丹勃起，而禋禩之亡忽焉，固其宜矣。

然渤海疆域广远，又其种人风气劲悍，^③故契丹虽用迅雷不及掩耳之势，系其王而墟其国，而究不能尽服其人。金于霖《韩国小史》云：“渤海之亡，其民之归高丽者无虚岁。距契丹远者，往往自立称王。”案其见于中国史者，有定安国，宋太祖开宝三年，其王烈万华；太宗太平兴国四年，其王乌玄明，皆遣使通表。又有琰府王，太平兴国六年，尝诏其助讨契丹。《韩国小史》又云：“高丽史^④载契丹伐渤海，事在我国宋真宗二年及徽宗正和五年。又有渤海旧国者，立大氏为王，金太祖攻克之。时渤海胜兵三万人，太祖虑其难制，仍岁驱之转戍山东。至绍兴十一年，遂尽驱以行。此渤海旧

① 其都城忽汗城，在今宁安南镜泊上，所谓忽汗城临忽汗海也。第三世文王钦茂，尝徙上京，又移东京。第四世成王华屿，还居上京。

② 《辽史·本纪》：太祖以天赞四年，闰十二月，丁巳，夜围夫余府。明年，正月，庚申，拔之。进攻忽汗城。渤海哀王禋禩，使老相将兵三万拒战，败降。丙寅，围城。己巳，禋禩请降。辛未，遂出降，前后仅十四日。夫余府今农安县。

③ 谚云：渤海三人敌一虎。

④ 高丽王氏之史。

国，或云即忽汗城也。初契丹之灭渤海也，徙其名帐於辽阳等处，借以控制高丽、女真。^①每战，常以渤海为前锋。金太祖起兵，招诱之曰：女真，渤海，本同一家。其人遂降。然金卒忌其强，宋高宗绍兴十九年，尽驱其众於燕南。自是渤海之名，乃绝无闻焉。”^②然则渤海之亡，实远在哀王败降之后也。

金源缘起，中国、朝鲜史籍所载，亦颇有异同。《金史》自述其先为黑水靺鞨。又云：“渤海盛强，黑水役属之。渤海灭，复役属契丹。在南者系籍，号为熟女直；在北者不籍，号生女直。生女直地有混同江，长白山。混同江亦号黑龙江，所谓白山、黑水也。”其说本甚明白。而朝鲜史籍，称熟女直为西女真，地在白头山^③大干长岭之西，鸭绿江之北；生女直为东女真，在长岭之东，豆满江之南北。^④彼国史家，因疑金之先在黑水流域为太远。然以黑水为今黑龙江，限其名於与松花江合流之后，本清代史家之误，前已辨之。《大金国志》云：“世居混同江之东长白山下，南邻高丽，北接室韦，西界渤海，东濒海。”其所言固与朝鲜史所载相符也。^⑤

金室之先，盖以文明人入野蛮部落，以开明之酋，驭悍鸷之众，故其兴也淳焉。始祖居完颜部，在仆干水之涯。^⑥取其部女，生二子、一女，遂为完颜部人。始祖之曾孙曰献祖，徙居海姑水。又徙安出虎水。^⑦始筑室，知树艺。献祖子昭祖，稍用条教为治。辽人以惕隐官之。昭祖耀武，至於青岭、白山，入於苏滨^⑧耶懒之地。^⑨

① 案此即所谓曷苏馆者也。参看下文。

② 以上皆据《韩国小史》。

③ 即长白山。

④ 豆满江即图们江。

⑤ 女直之名，见於《辽史》者，又有北女直，南女直，长白山女直，鸭绿江女直，渤海女直，盖各就其地名之。

⑥ 今布尔哈图河。

⑦ 今阿勒楚喀河。

⑧ 渤海之率宾府，金之恤品路。地自今兴京西南越鸭绿江。

⑨ 耶懒，即后来之曷崙路。地自今朝鲜吉州以南，至咸州。

子景祖，受辽命，为生女直部族节度使。自白山、耶悔、^①统门、^②耶懒、土鲁伦^③之属，至於五国之长，^④皆听命。女真部族，駉駉向统一矣。自景祖以后，常挟辽以号令同族，因以市功於辽。而又力阻辽兵入其境。景祖传位於次子世祖，使越三子而传位於第四子肃宗，以及第五子穆宗。世祖初年，同族群起构衅，势颇危急。世祖一战破之，诸部次第来降。女真统一之业，至是告成。穆宗卒，世祖子太祖立，遂举兵叛辽。

契丹控制女真之地有三：一咸州，^⑤一宾州，^⑥一宁江州，^⑦而黄龙府^⑧则其总汇之地也。金太祖既起兵，连克宁江，咸州。辽遣使议和。金要其迁黄龙府於别地。盖金之初兴，部落寡小，^⑨谓其欲取辽而代之，断无是理。其所求者，不过脱离辽人之羁制而已。乃和议迁延不就，而黄龙府遂为金所克。天祚帝自将征之，又以内乱，仓卒而返。未几，渤海人高永昌据东京，金太祖攻克之。东京郡县，遂为金有。不但辽之所以控制女真者全亡，即前此所迁渤海之众，亦皆归於金。女真至此，可谓悉离辽而自立。然谓其遂有取辽而代之之心，犹未必然也。故迁延於和议者仍累年。其后和议终不就，辽室又自行分裂，^⑩辽耶律余睹又来降，则姑发兵尝之。尝

① 未详。

② 图们异译。

③ 未详。

④ 辽五国部，城在朝鲜会宁府，宋二帝所迁也。

⑤ 在铁岭东。

⑥ 今吉林农安东北境。

⑦ 吉林北松花江右岸之乌拉旧城。《大金国志》云：“居混同江之南者为熟女真，北为生女真。契丹自宾州混同江北八十里，建寨以守之。”又云：“契丹诱女真豪右数千家，处之辽阳之南，谓之曷苏馆。自咸州东北分界入山谷，至洮末江，中间所居之女真，隶咸州兵马司，谓之回鹘。极远而野居者，谓之黄头女真。居洮末江之北，宁江州之东。地方千余里。户十余万。族帐散处山谷，无国名，自推豪桀为长。小者千户，大者数千户。”

⑧ 今农安。

⑨ 见下。

⑩ 谓南京别立秦晋国王淳。

之而天祚帝竟不能抗，秦晋国王，既不能定其众，又南迫於宋；太祖自将，居庸不守；而辽祚遂忽焉以斩矣。然其在金，则仍幸也，非真有兵力，足以亡泱泱大风之辽也。职是故，辽地殆皆金人所下，而燕、云故地，仍举以还宋，不过欲得一平州而已。其后宋、金启衅，汴京被围，为城下之盟，金之所欲得者，不过太原、中山、河间三镇。进一步所欲者亦止於两河。和议不定，宋人又不能守河南、山东，金人乃出兵经略之。然仍立一刘豫。刘豫又不能守，挾懶等几欲举以还宋，宗弼乃决策再取之。盖自挾懶败亡以前，金人迄未完全占有河南、山东也。所以者何？其部落寡小，其力实止於是也。

女真之衰，由於海陵，世宗之南迁。其种人多入中原，既失旧时强悍之风，而又不能勤事生产。一旦蒙古崛起，而其势遂不可支矣。^①

蒙古，亦女真同族也。蒙古出於室韦。《魏书》作失韦，云：“盖契丹之类，在南者为契丹，在北者号为室韦。”《唐书》云：“鲜卑之别部。”案契丹为鲜卑宇文氏之后，已见第三篇。则二书之说相同。然《魏书》云“其语与奚、契丹同”，而《唐书》云“其语言靺鞨也”，则又相乖异。今案《魏书》，室韦酋长，号余莫弗瞞咄，此语正与靺鞨同，则《唐书》之言不误。《魏书》之云，盖指其邻近契丹之部落言之。魏时室韦之通於中原者，固不若唐时之盛也。^②

肃慎，挹娄，靺鞨，皆在松花江以南，室韦则在嫩江沿岸。满族开化，既有朝鲜之藩启，则渤海、金源立国早於蒙古，亦其势也。漠北自回纥之亡，久无强部，而游牧之族，散处其间者甚多，终必有能收率而用之者，蒙古则其选也。故蒙古之兴，与渤海、金源事势又异。而满州之兴，地实在今吉会铁路沿线，则其情势，与渤海、金源正同也。

① 见下。

② 余莫弗瞞咄，《唐书》作莫贺咄。室韦风俗，有与契丹类者，契丹父母死，置尸树上；南室韦则部落共构大棚，置尸其上是也。有与靺鞨类者，北室韦，钵室韦，深末怛室韦，之冬月穴居是也。故知《魏书》之云，实以室韦与契丹相混。

《魏书》述失韦疆域云：“出和龙北千余里，入契丹国。又北行，十日，至噶水。又北行，三日，有盖水，又北行，三日，有鞞了山。其山高，周围三百余里。又北行，三日，有大水，名屈利。又北行，三日，至刃水。又北行五日，到其国。有大水，从北而来，广四里余，名捺水。”捺水即难河，事至明白。余诸山水，皆不能确指其今名。然此行必越辽河及洮儿河以至今嫩江。则无疑矣。魏时所通之失韦，盖止於此。《隋书》则区其众为五部：曰南室韦，“在契丹之北三千里。土地卑湿，至夏则移向西北贷勃，欠对二山”，此部盖即魏时所通。当在今龙江附近。“距契丹三千里”，似失之远。然四裔道里，往史多不甚详。即如《魏书》云“自和龙千里而入契丹”，其词亦不谛也。“自南室韦北行，十日，至北室韦，依吐屹山而居。又北行，千里，至钵室韦，依胡布山而居。”盖皆在今兴安岭中。“西南四日行，至深末怛室韦，因水为号也。”屠氏寄《蒙兀儿史记》云：“今俄领阿穆尔省有结雅河，东源曰昔林木迪，蒙古语。译言黄曲水，即深末怛异文。”“又西北行数千里，至大室韦。径路险阻，言语不通。”则踰兴安岭入西伯利亚南境矣。“言语不通”，似非同种。盖因自室韦以往，故假名之。《唐书》云“室韦居獯越河北”，似仍专指隋时之南室韦。獯越河，即捺水异译也。又述其分部凡二十余：“曰岭西部，曰山北部，^①曰黄头部，曰大如者部，曰小如者部，曰婆葛部。^②曰讷北部，曰骆丹部，悉处柳城东北，近者三千里，远者六千而羸。”今自洮南经吉林，长春至龙江附近，皆其地也。“最西之乌孝固部，与回纥接。当俱轮泊之西南。”俱轮泊，今呼伦池也。“自泊而东，有移塞没部。稍东，有塞曷支部。益东，有和解部，乌罗护部，耶礼部。岭西直北曰讷北支部。北有大山，山外曰大室韦，濒室建河。”室建即萨哈连异译，今黑龙江也。河南有蒙兀部。其北有落坦部，獯越河之北，则称东室韦焉。五代时凡分三部：一曰室韦，二

① 此所谓岭及山，盖指今苏克苏鲁索岳尔济等山。

② 盖即钵室韦。

曰黄头室韦，三曰兽室韦。其见于《辽史》有单称室韦者，又有大小黄室韦，盖即所谓黄头室韦也。^①

蒙兀，《旧唐书》作蒙瓦。洪氏《元史译文证补》谓即后来之蒙古，其说甚确。^② 蒙古部族，据予所考，实靺鞨、室韦之混种，而靺鞨又为靺鞨及沙陀突厥之混种。有元帝室之始祖曰孛儿帖赤那，始居斡难沐涟之源。十传至孛儿只吉歹蔑儿干，娶蒙古部女，始以蒙古为部名。与金始祖娶完颜部女，子孙遂以完颜为氏正同。已见第四篇《附录》，兹不赘述。孛儿只吉歹之子曰脱罗豁勒真伯颜。脱罗豁勒真二子，长曰都蛙锁豁儿，次曰朵奔蔑儿干。朵奔蔑儿干之妻曰阿阑豁阿。生二子，长曰别勒古台，次曰不古讷台。既寡，又生三子，曰不忽合塔吉，曰不合秃撒勒只，曰孛端叉儿蒙合黑。初，朵奔蔑儿干猎于脱豁察黑温都儿，^③ 遇兀良哈人，即鹿林中，乞其余。已而遇马阿里黑^④ 伯牙兀歹，^⑤ 饥困，请以子易肉。许之。携其子归以为奴。别讷古台、不古勒合疑其母私于奴。母知之。春日，烹伏腊之羊，食五子；曰：“夜见黄白色人，穿穹庐顶孔入，摩挲我腹，光明入腹中。其去也以昧爽。我窃窥之，如黄犬然。遂生此三子。后曰必有贵者。”不忽合塔吉之后为合答斤氏。不合秃撒勒只之后为撒勒只兀惕氏。孛端叉儿之后为孛儿只斤氏。孛儿只斤，译言灰色目睛，谓与神人同也。此三族，蒙人称曰尼伦，义谓洁清。别派曰多儿勒斤，犹言常人也。孛端叉儿玄孙曰海都，始有汗号。盖其部落渐强。海都次子曰察刺合领忽，察刺合领忽之子曰想昆必勒格。领忽，即令稳转音，想昆，亦详稳异译，盖皆受职于辽也。海都曾孙曰合不勒，复有汗号，统辖蒙兀全部。合不勒卒遗命立想

① 黄头室韦，即黄头女真也。可见室韦、女真为同族。

② 蒙古，《辽史》作盟古、萌古，《金史》作盟骨。《契丹事迹》作蒙古。《松漠纪闻》作盲骨子。《西游记》始作蒙古，明时修《元史》用之，遂为定称。

③ 温都儿，译言高山。

④ 名。

⑤ 氏。《元史》作伯岳吾。

昆必勒格之子俺巴孩。金人诱之往，以“木驴”^①杀之。诸部立哈不勒第四子忽都刺为汗。忽都刺卒，蒙古无共主，后衰。成吉思汗之父也速该，^②尝统辖尼伦全部。成吉思汗年十三，也速该为塔塔儿人所毒杀。部族离散。成吉思汗幼年，备尝艰困。同族泰亦赤兀，^③齟齬尤至。泰亦赤兀氏者，俺巴孩之后也。

当时漠南北部落有翁吉刺者，^④据《秘史》，其与主因塔塔儿战，在捕鱼儿、^⑤阔涟^⑥两海子间。《元史·特薛禅传》谓其居於苦烈儿温都儿斤迭烈不儿也里古纳河之地。屠氏寄云：“根河出伊勒呼里山，西流百余里，径苦烈业尔山之南。其北，有特勒布尔河，略与平行。苦烈业尔，即苦烈儿。温都儿，蒙语高山也。特勒布尔，即迭烈不儿。也里古纳者，额尔古纳河之异译也。”此族与蒙古世为婚姻，当系同族。又有蔑儿乞者，《秘史》载其牧地，在斡儿洹、薛凉格二水流域。斡儿洹，今鄂尔坤河；薛凉格，今色楞格河也。此族与蒙古种类极近。蔑儿乞，疑仍系鞑鞑转音。又有斡亦刺者，其居地在今西伯利亚南境。其种名见於《秘史》者，有不里牙惕，兀儿速惕，合卜合纳思，康合里，秃巴昔等。不里牙惕，在萨拜喀勒省之巴尔古精河上。阿穆尔省之牛满河上亦有之。牛满河，一名布里雅特河，即不里牙惕之异译也。兀儿速惕，在牛满河之北。《西北地附录》称为乌斯，谓以水为名，盖即乌苏之异译。合卜合纳思，《西北地附录》作憾合纳，云在乌斯东，谦河所从出，则在今多特淖尔附近。康合里，地在今杭爱山之北，秃巴昔，在今俄领托波儿斯克省境。此种人部落盖甚多。故《秘史》号称之曰秃绵斡亦刺。秃绵亦作土绵，译言万也。明时谓之瓦剌，清时谓之卫拉特。以当时所居之地考之，殆即古所谓大室韦也。

① 非刑之名。

② 合不勒孙。父曰把儿坛。

③ 《元史》，《亲征录》作弘吉刺。《蒙古源流考》作鸿吉刺。

④ 一称达来诺尔、达里泊。

⑤ 今呼伦泊。

塔塔儿，即鞑靼异译。居捕鱼儿海附近，其分部颇多。见於《秘史》者，有主因塔塔儿，阿亦里兀惕塔塔儿，备鲁兀惕塔塔儿等。主因即朱邪异译，可证其为沙陀突厥与鞑靼之混种也。此族与蒙古，世为仇讎。俺巴孩之死於金，主因塔塔儿实执送之；也速该之死，亦主因塔塔儿毒之也。然白鞑靼之一族曰汪古者，於蒙古甚亲。汪古，即《辽史》之乌古也。其部名见於《辽史·百官志》者，有乌古涅刺、斡特剌乌古、隈乌古、三河乌古等。又有乌隈、乌骨里、乌涉等部，疑亦乌古转音。《元史》称为汪古者，地在今归绥县北，马祖常《月乃合神道碑》所谓“雍古部族，在净州之天山”者也。^①《秘史》谓之白达达。此族为金守长城。成吉思汗之侵金，此族实假以牧地，为之乡导；乃蛮之伐蒙古，亦此族豫告成吉思汗，成吉思汗乃得先发制人。岂蒙古本出鞑靼，故二者有同族之亲，而减丁剿杀之事，汪古未尝不心焉痛之，故欲借手於蒙古，以报女真耶！又有乌梁海者，牧地亦在不而罕山。客列部，^②始居欠穴州，后徙土兀刺木涟。二者亦突厥族，见第四章。

以上诸族，皆在今蒙古之东偏。其雄据蒙古之西部者，则乃蛮也。乃蛮盖白种，见第十二章。

成吉思汗亦取於翁吉刺，而客列部长脱邻斡勒，成吉思汗之父执也，故二族右成吉思汗。兀都亦惕蔑儿乞酋脱黑脱阿，与蒙古有怨，袭成吉思汗，篡其妻孛儿帖去。^③札答剌部长札木合，^④成吉思汗安答也。^⑤成吉思汗以札答剌、客列之师袭蔑儿乞，复得孛儿帖。始与札木合同牧。诸部都归心成吉思汗，札木合忌之，成吉思汗乃他去。诸部共推为汗。^⑥札木合，泰亦赤兀等十三部来

① 净州故城，在今内蒙古四子王旗附近。

② 《元史》本纪及《亲征录》作克列。《元史》列传作怯列，《源流考》作克哩叶特。

③ 成吉思母诃额仑，本脱黑脱阿弟也客赤列都之妻，而也速该篡之。

④ 孛端叉儿尝虏一孕妇，所生前夫之子曰札只刺歹，其后为札答剌氏。

⑤ 安答，译言交物之友。

⑥ 此蒙古本部族之汗，犹俺巴孩，忽图刺等之称汗号也。

袭。成吉思汗亦分其众为十三翼以迎之，败绩。已而主因塔塔儿叛金。金丞相完颜襄讨之。成吉思汗与脱邻斡勒助之。襄喜，授成吉思汗札兀忽里，^①封脱邻斡勒为王。脱邻斡勒自此亦称王罕。^②乃蛮亦难察汗，乘王罕助金，纳其弟。王罕还战，不胜，奔西辽。已而东归。成吉思汗援之复国。亦难察卒，子太阳罕、不亦鲁黑交恶，分国而治。^③成吉思汗与王罕袭不亦鲁黑，破之。不亦鲁黑奔欠欠州。东方诸部，立札木合为古儿罕，来袭。成吉思汗逆击，破之。又与王罕连兵，击破诸部。诸部多降。遂灭泰亦赤兀。王罕子你勒合桑昆，与成吉思汗不协，来袭。成吉思汗暂退。旋出不意，袭客列，亡之。王罕，桑昆皆走死。太阳罕约汪古来伐，汪古以告。成吉思汗伐乃蛮，灭之。太阳罕战死。其子古出鲁克奔西辽。后篡其国，谋复仇，蒙古西征之师所由兴也。乃蛮既亡，漠南北皆定。宋宁宗开禧二年，诸部大会於斡难沐涟之源，上尊号曰成吉思汗。^④而代金之师旋起矣。

蒙古入中国之事，尽人知之，无待赘述。其用兵四方，头绪繁杂，须别为专篇，乃能详之。今但撮叙蒙古所征服之地，及蒙古人分布之迹，盛衰之略，取足见蒙族之兴替而已。

成吉思汗手定漠南北及西域，分其地於四子。和林旧业，与季子拖雷。叶密立河滨之地，^⑤与次子太宗。昔浑河滨之地，^⑥与第三子察合台。威海、里海以北之地，与长子拙赤。^⑦其后平定西北

① 札兀，蒙古语，译言百。《金史·百官志》：“部长曰李董，统数部者曰忽鲁。”忽里即忽鲁转音。札兀忽里，犹言百夫长也。

② 同汗。

③ 太阳罕居金山之阳，南近沙漠。不亦鲁黑居其北，近金山。

④ 此为诸部族之大汗。

⑤ 叶密立河，今额米河。

⑥ 昔浑河，今锡尔河。

⑦ 日本那珂通世云：“太宗所得者，为乃蛮旧地。察合台所得者，为西辽旧地。拙赤所得者，为花刺子模旧地。”其说是也。蒙俗产业传诸幼子。幼子称斡赤斤，义谓守灶。故以本族旧地界之。其后宪宗使阿里不哥守和林，犹此意也。

诸部，功出术赤之后拔都；而平定西南诸部，则拖雷子旭烈兀之功最多。故术赤分地，拔都之后，为之共主。而花剌子模以西南之地，旭烈兀之后，实君临之。蒙兀共主，本由诸部推戴，谓之“忽烈而台”。^①太宗之立，由成吉思汗遗命，故无异议。太宗死，子定宗继之，三年而殂。於是太宗后人，与拖雷后人争立。拖雷子宪宗卒立。太宗孙失立门、定宗可敦皆见杀。分裂之机始肇矣。宪宗使弟世祖开府金莲川，^②以治漠南；阿里不哥留守和林，以治漠北。宪宗攻宋，死於合州。世祖不待忽烈而召之推戴，遽自立於开平。^③阿里不哥亦自立於和林。与世祖战，败绩。乃降。而太宗之孙海都，自立於海押立。^④察合台、术赤之后多附之。惟旭烈兀后王，以与世祖同出拖雷，不附。然地与世祖隔绝。海都死於成宗世，其子察八儿来降。然蒙古大汗之号令，自海都之叛，不复行於分封诸国，分裂之势成矣。

直属於蒙古大汗之地，为今内地十八省，关东三省，内外蒙古，青海，西藏，略与见在疆域相当。其中和林为蒙古旧业，^⑤开平为世祖即位之地。定都燕京之后，建为上都，历代时巡幸焉。应昌为翁吉剌氏农土，^⑥元外戚世臣也。顺帝既失燕京，退居应昌。子爱猷识里达腊，为明师所逐，后奔和林，其子脱古思帖木儿，为其下所弑。自此五传至坤帖木儿，皆见弑，而大汗之统遂绝。^⑦有鬼力赤者，自称鞑靼可汗。俄为知院阿鲁台所杀。^⑧迎立元裔本雅失里。

① 译言大会。

② 在今独石口外。

③ 今多伦。

④ 在巴尔喀什湖西南。

⑤ 和林城为太宗所建。今土谢图汗本旗之额尔德尼招，其遗址也。

⑥ 应昌，在达里泊旁。

⑦ 此据《明史》。《源流考》：爱猷识里达腊作阿裕锡哩达喇，脱古思帖木儿作特古斯特穆尔，云是阿裕锡哩达喇之弟。特古斯特穆尔死，子恩克卓里图，额勒伯克相继为汗。格勒伯克死，子琨特穆尔继之，即《明史》之坤帖木儿也。琨特穆尔后，尚有其弟谔勒哲依特穆尔。及谔勒哲依特穆尔子德勒伯克两汗。

⑧ 成吉思汗弟哈布图哈萨尔后。

又为瓦剌部长马哈木所弑。瓦剌，即斡亦剌也。明初，元臣猛可帖木儿长其部。猛可帖木儿死，众分为三：马哈木，太平，把秃孛罗分长之。马哈木并三部为一。欲自立，其下不可。乃立元裔脱脱不花。马哈木卒，子脱欢袭。脱欢卒，子也先袭。弑脱脱不花，自立。部众日强，遂有土木之变。也先后为知院阿剌所杀，瓦剌复衰。鞑靼部长孛来，杀阿剌，立脱脱不花子麻儿可儿。诸部纷拏，争据河套，边患日棘。巴图蒙克者，额勒伯克汗之五世孙也。明宪宗成化六年，年七岁，即汗位。及长，尽服诸部，统一漠南北。孝宗弘治十七年，再正诸部大汗之位，是为达延汗。达延汗长子图鲁，早死。次子乌鲁斯，征套部，败死。达延汗怒，使三子巴尔苏攻套部，破之。巴尔苏遂留镇其地，是为鄂尔多斯部。巴尔苏次子阿勒坦，即《明史》之俺答，居大同北，是为土默特部，为边患最深。达颜汗季子格埒森札赉尔，留镇漠北，是为喀尔喀部。今土谢图、车臣、札萨克三汗之祖也。达延汗自与图鲁之子博迪阿拉克，即《明史》之卜赤，徙牧近长城。是为察哈尔部。《明史》作插汉儿。插，蒙语近也。初蒙古酋亦不剌、阿尔秃厮，以明武宗正德四年，袭据青海。是为蒙人占据青海之始。明人出兵攻之。阿尔秃厮遁去。亦不剌仍据其地。死，其党卜儿孩继之。世宗嘉靖三十八年，俺答与子宾兔、丙兔入青海。卜儿孩走，宾兔、丙兔遂留居焉。时黄教新盛，宾兔、丙兔亦信之。黄教由此传於漠南。俺答末年，所以甘就封贡者，实喇嘛教劝化之力也。然俺答虽就范，而察哈尔复为患。神宗初，高拱为相，擢戚继光守蓟镇，李成梁守辽东。继光严守备，成梁力战破敌，患乃平。卜赤六传至林丹汗，复强盛。陵轹漠南诸部。初阿鲁台之见杀也，其众走嫩江，依兀良哈。哈布图哈萨尔十四世孙蒙克塔斯哈刺长之。是为嫩江科尔沁部。郭尔罗斯、杜尔伯特、札赉特皆其族也，明神宗万历二十一年，尝合叶赫、哈达等九国之师攻清，为清太祖所败。后清攻乌拉，科尔沁援之，又败绩。自是降附於清。林丹汗既强，漠南诸部为所陵者，多走科尔沁。林丹汗怒，攻之。以

清援得解。时明熹宗天启五年也。於是漠南诸部，次第降清。天启七年，清太祖死，子太宗立。思宗崇祯七年，太宗征诸部之兵伐察哈尔。乘辽河盛涨，出不意袭其庭。林丹汗走青海，道死。清遂取归化城。使宣捷於喀尔喀。喀尔喀震慑，岁使进白骝一，白马八，时曰九白之贡。自是内外蒙古，皆服於清，而科尔沁以降附早，世婚清室，称肺腑焉。

蒙古既衰，瓦剌复盛。瓦剌，清时曰卫拉特。分为四部：曰和硕特，居乌鲁木齐，元太祖弟哈布图哈萨尔之后长之。曰准噶尔，居伊犁。曰杜尔伯特，居额尔齐斯河。部长皆也先后。曰杜尔伯特，居塔尔巴哈台。元臣翁罕之后长之。和硕特固始汗，始并青海、喀木之地。崇祯十年，西藏第巴^①桑结，招之入藏，袭杀红教护法藏巴汗，而奉班禅居札什伦布。固始汗遂徙牧青海，遥握西藏政权。卒，子达颜汗立，与桑结不协。於是准噶尔浑台吉，亦逐土尔扈特，服杜尔伯特。浑台吉卒，弟噶尔丹立，与桑结有旧，桑结又招之，袭杀达颜汗。准噶尔遂统一卫拉特四部。噶尔丹徙牧阿尔泰山，以窥蒙古。清圣祖康熙二十七年，以兵三万，袭喀尔喀。三汗部众数十万，同时溃走漠南。圣祖命发粟振之。并令科尔沁部，假以牧地。亲出兵征噶尔丹。噶尔丹累战不利，伊犁旧地，又为兄子策妄阿布坦所据，遂自杀。三汗还治漠北。圣祖崩，固始汗嫡孙罗卜藏丹津，诱青海诸部为乱。岳钟琪击破之。罗卜藏丹津奔策妄阿布坦。青海平，设办事大臣於西宁以统辖之。策妄阿布坦死，子噶尔丹策零，复犯蒙古。札萨克图汗部额駙策凌大败之。高宗乾隆二年，定以阿尔泰山为准、蒙游牧之界。嘉策凌之功，析土谢图汗所属二十一旗隶之，使独立，称三音诺颜汗。喀尔喀始有四部。十年，噶尔丹策零死，准部内乱。辉特部长阿睦尔撒纳来降。^②使为乡导，攻准部，平之。高宗欲仍杜尔伯特，和硕特之旧，以辉特代土

① 官名。

② 辉特，本土尔扈特属部。

耳扈特，绰罗斯补准噶尔之阙，各以降人为汗，使如喀尔喀之例，为外藩。而阿睦尔撒纳觊兼长四部，复叛，又发兵讨平之。而以满兵驻防其地焉。清代平定准、蒙之事，大略如此。

蒙古分封诸汗国，自元之衰，亦多衰颓不振。察八儿既败，太宗分地，多入察合台后王。拔都之王也，立鄂尔多於浮而嘎河下游之萨莱，是为阿尔泰鄂尔多，译言金帐也。其兄鄂尔达，分地在昔浑河北，是称白帐汗。弟昔班，分地在鄂尔达之西，至於乌拉河，称蓝帐汗。^①昔班之弟脱哈帖木儿之后，地在阿速富海沿岸，称哥里米汗。金帐汗后裔既绝，三家之裔，争欲据其位，纷争不绝。帖木儿(Timur)者，初隶月即别族。后自起兵据两河间。^②定都於撒马儿干。^③东定察合台分地。西服旭烈兀后王。破土耳其，定小亚细亚。西北服钦察，征俄罗斯，破莫斯科。蒙古在西域之声威，几复成吉思汗西征时之盛。帖木儿卒，诸子争立，国复分崩。帖木儿六世孙巴拜尔(Zdhir Udin Baber)入印度，定都特里。^④是为印度蒙兀儿朝。^⑤巴拜尔孙亚格伯(Akoar)，服西北中三印度。未几，德干高原诸国，结麻刺他同盟(Maratha)以抗之。明神宗万历四十三年，英人始至印度互市。清圣祖康熙四十八年，东印度公司成。以蒙兀儿朝与麻刺他同盟搆兵，英商多受侵害，始抽饷练兵以自卫。及乾隆时，英人遂据孟加拉。孟加拉者，印度最富饶之区也。自是英人数干预印度内乱，稍夺其收税之权。乾隆五十年，英人合麻刺他同盟陷特里，蒙兀儿朝亡。咸丰七年，孟加拉叛英，立蒙兀儿朝后裔於特里。明年，为英所破。英人遂收公司之权归政府，置印度大臣於伦敦，总督於印度。德宗光绪三年，英女皇维多利亚，始兼印度皇帝之号焉。

① 即月即别族。又译作月祖伯族(Usoeg)。

② 阿母，锡尔两河。

③ 明太祖洪武五年。

④ 明世宗嘉靖五年。

⑤ 日译讹作莫卧儿。

蒙族之在中西亚者，至俄罗斯强，而悉为所并。初俄之败於蒙也，诸小侯皆受命於钦察汗。^①其中以莫斯科为最强。明英宗天顺时，遂叛蒙古而自立。时钦察汗之后，分为大斡耳朵(Orda)、阿斯达拉干(Astrakan)二国。^②北有喀山，^③西有哥里米二汗。咸海之滨，则月即别族萃焉。又有居叶尼塞、鄂毕二河间者，西史称为失必儿汗(Sibir)，实鲜卑之转音也。俄人与喀山、哥里米两汗同盟。明孝宗弘治十五年，大斡耳朵为哥里米汗所并。世宗嘉靖十一年，俄人灭喀山。越二年，并阿斯达拉干。哥里米汗附土耳其，至清高宗乾隆四十八年，卒为俄所并。巴拜尔之入印度也，两河间地，为蓝帐汗之后所据。分为阿富汗，基华二国。穆宗同治十二年，亦为俄所灭。

以上述蒙族盛衰大略。既竟，以下略述满洲之事。案满洲二字，昔人恒以为部族之名。盖据清人所自述，其建号曰清以前，实以此二字为称号也。然据日本稻叶君山所考证，则清之建号曰清，实在太宗天聪十年，即以是年为崇德元年，实明思宗之崇祯九年。是年以前，国号本称后金，其见於朝鲜人之记载，及奉天铭刻者甚夥。至满洲二字，则明人书作“满住”，系最大酋长之称，非国名，亦非部族名也。^④《清实录》载其始祖，姓爱新觉罗，名布库里雍顺，为天女佛固伦之子。定三姓之乱，居长白山东俄漠惠^⑤之野俄朵里城。^⑥数

① 术赤之后，西史称 Km of Kiptchak，异译亦作奇卜察克。

② 窝瓦、乌拉二河间。

③ 哥里米汗同族。

④ 详见稻叶氏所著《清朝全史》。近人《满洲名称考》云：“满住系最大酋长之称，建州历代相沿如此。日本人所搜辑之朝鲜书，燃藜室记述中所录之《增中日记》，记万历四十七年，朝鲜都元师姜弘立降清。约和后，胡将言当到城见满住，许令还国云云。当时太祖已建元称号。将士尚称之曰满住，建州部族，即以满住为酋长，谓为满洲部族，犹之称国为王国、帝国、侯国，略无足怪。其对明言我满洲如何，犹之明人谓上命如何。然彼此误会，他人以为建州人自名其国或部族，建州人亦遂窃之。其后太宗致书袁崇焕，即自称满洲国皇帝矣。其中蜕化之由，约略可见。”

⑤ 一作鄂漠辉。

⑥ 一作鄂多里。

世，国乱，族被戕。有范察者得免，隐其身以终。又数传至肇祖都督孟特穆，乃计诱先世仇人诛之，而定居於赫图阿拉。据近人所考证，则明代女真，凡分三种：曰建州，曰海西，曰野人，皆设卫以处之。而统以奴儿干都司。建州者，渤海之旧疆，《唐书》所谓率宾府领华、益、建三州，而《元一统志》所谓故建州也。^①地在今兴京附近。海西者，元行政区域之名，即后来扈伦四部之地。野人卫，地在吉、黑二省之极东。曹廷杰《西伯利亚东偏纪要》载：特林地方，有明代敕建及重建《永宁寺碑》，皆太监亦失哈述征服奴儿干及海中苦夷等事。苦夷即今库页，可见明时肃慎族散处之地，仍与前此相同。建州卫设於明永乐元年，见《明实录》。左卫设於永乐十年，见《明史》。《实录》载：“十四年二月，赐建州左卫指卫使猛哥帖木儿宴。”朝鲜《龙飞御天歌》^②注有云：“东北一道，本肇基之地也，畏威怀德久矣。野人酋长，远至移兰豆漫，皆来服事。如女真则斡朵里豆漫夹温猛哥帖木儿，火儿阿豆漫古论阿哈出，託温豆漫高卜儿阔”云云。《元史·地理志》：辽阳等处行中书省所属合兰府水达达等路，元初设军民万户府五：一曰桃温，^③一曰胡里改，^④一曰斡朵怜，一曰脱斡怜，一曰孛苦江。斡朵里，即斡朵怜之异译。火儿阿，即胡里改之音差。託温，亦即桃温音转，移兰豆漫，原注义为三万户。盖夹温猛哥帖木儿、古论阿哈出、高卜儿阔，实元斡朵怜、胡里改、桃温三路之万户也。猛哥帖木儿，即肇祖之名孟特穆。《元史》之帖木儿，清修《三史国语解》，均改为特穆尔可证。所谓都督，则满洲人自称其长官之词。明廷虽授以指挥，满人仍称为都督，《明实录》中，不乏其例。满文称某人某官者，例先官而后人。日本人由奉天钞得之《清实录》，清初记载，尚多如此。猛哥帖木儿既为万户，则必

① 盖自渤海设建州以来，其他即恒以是为名，故辽金时治所虽移，《元志》犹称之为故建州。

② 朝鲜李氏自颂其开国之词。

③ 今屯河。

④ 呼尔哈异译，今宁安河名。

有所受之。《元史·兵志》，谓元万户、千户、百户，皆世其官。此三万户者，既仍存元初之名，则必得之世袭。《开国方略》：^①“太祖责乌喇贝勒布占泰云：我爱新觉罗氏由上天降生，事事循天理，顺天命。汝即不知百世以前事，岂十世以来事，亦不知邪？”则雍顺之得姓，据太祖自言，不过十世以来之事。从太祖上溯之，七世而至肇祖，再溯其前，不过三世，即满十世之数。是知《实录》所云，雍顺开国，越数世而国乱，又数世而后至肇祖，必系悠缪之词。由元初至明洪武末，相距百年，正合三世之时限。则雍顺必即元初受万户职者，俄朵里城，亦即斡朵里之异译。其地当在今三姓附近，故《清实录》谓雍顺往定三姓之乱也。特其位置，在长白山北而不在其东耳。

《龙飞御天歌》注谓夹温即猛哥帖木儿之姓，而朝鲜《东国舆地胜览》，则又称为童孟哥帖木儿。《明实录》：“神宗万历十七年九月辛未，以建州夷酋童奴儿哈赤为都督金事。”则清太祖亦姓童。而《东夷考略》又云：“奴儿哈赤姓佟。”佟为辽东大族，童、佟音近，或夷人不知文字而误书？太祖元妃佟佳氏，亦即佟家。今佟家江，明时尚称婆猪江，似亦因建州女直曾居其地，而得佟家之名。然则清室之先，必为佟姓无疑。至夹温二字，则或系斡准之双声互倒。金国语称金为斡准，又作按春，即清所自称之爱新也。

猛哥帖木儿既受职於明，亦臣服朝鲜。朝鲜太祖授以万户，世祖又升为上将军。明宣宗宣德八年，为七姓野人所杀。并杀其子阿古，子童仓、弟凡察挟卫印亡入朝鲜。凡察，当即《清实录》范察也。旋袭指挥使。未几，猛哥帖木儿子董山出，与之争印。明诏凡察以印与董山。凡察不听。乃分建州为左右二卫，使董山持新印掌左卫，凡察以故印掌右卫焉。《清实录》载肇祖二子，长曰充善，即董山对音。次曰褚宴，盖仓字合音，童则其姓也。凡察之后不详。董山颇桀骜，明檄致广宁诛之。时宪宗成化二年。其下拥其子脱罗，为之复仇。脱罗者，《清实录》充善之子妥罗也。久之，乃无闻。建

① 《圣武记·开国龙兴记一》，王氏《东华录》万历十年十二月。

州左卫，盖至是中衰。《清实录》：褚宴次子曰锡宝斋篇古，锡宝斋篇古之子曰兴祖都督福满。都督福满六子，长德世库，次刘阐，次索昌阿，次景祖觉昌安，次包朗，次宝实，是为宁古塔贝勒。宁古塔，译言六也。景祖第四子曰显祖塔克世。塔克世长子努尔哈赤，即太祖也。都督福满，求诸《明实录》，无相当之人。稻叶氏疑建州左卫之统绪，实至董山而中绝。其后入主左卫者，乃别一部落。近人撰《心史史料》，据稻叶氏书引《明实录》，武宗正德间，左卫都督兀升哈求升职之表，疑即兴祖其人。当时求升职盖得请，故以都督称之，且谥之曰兴。予则颇疑兴祖为凡察后，故清虽出左卫，仍以凡察为其先世也。

兴祖时，建州左卫颇式微。《清实录》谓宁古塔贝勒，各筑一城，相距近者五里，远者不过二十里可见。而海西强盛。海西者，清所谓扈伦四部也。《清实录》载清初，满洲部落，大别为四：曰满洲，其分部五：一苏克苏浒河，二浑河，三完颜，四栋鄂，五哲陈。曰长白山，其分部三：一讷殷，二珠舍里，三鸭绿江。曰东海，其分部二：一瓦尔喀，二库尔哈。曰扈伦；其分部四：一叶赫，二哈达，三辉发，四乌拉。满洲及长白山，均明建州地，东海为野人卫地，扈伦则海西卫地。然其部族，实非明初之海西女真，乃野人女真，於正统时侵入者。故有之海西女真，遂为所逐。其人本在黑龙江支流忽刺温河上，忽刺温即扈伦异译，其为因地得名，抑地以部族得名，则不可考矣。诸部种族，亦不尽纯。如叶赫酋长姓土默特氏，实来自蒙古。而库尔哈，或云即兀良哈异译是也。特其大体，则皆为肃慎族耳。叶赫酋祝鞏革，筑城於吉林西南。后为哈达酋王台所杀。^①二部互讎，李成梁征服之。时建州右卫王杲亦桀骜，犯边。成梁击破之。王杲走哈达，哈达执送之。叶赫酋那林孛罗，^②尝言清太祖为王杲之裔。钱谦益《岳武穆画像记》亦云：佟奴为王杲遗孽。《清实

① 王台之居，在松花江流域。距开原四百余里。

② 《清实录》纳林布禄。

录》显祖大福晋喜塔喇氏，阿古都督女。阿古都督，盖即王杲也。王杲子阿台^① 怨明。万历十一年，苏克苏浒河部图伦城主尼堪外兰，与李成梁攻阿台。阿台之妻，景祖长子礼敦女也。景祖及显祖往救，皆死焉。^② 明人归其丧，以太祖袭指挥使。后太祖攻破尼堪外兰。尼堪外兰奔明边。明人执以付太祖，并开抚顺，清河，宽甸，沈阳四关互市。清势自是日张，满洲诸部，次第为所慑服。至万历四十四年，遂以七大恨告天，誓师伐明矣。^③

肃慎处山岭崎岖之地，故其政治极为简陋。《汉书·挹娄传》云：“无大君长。邑落各有大人，处於山林之间。”《北史·勿吉传》云：“邑落各自有长，不相总一。”《唐书·靺鞨传》云：“其部众离为数十，酋各自治。”盖自渤海以前，迄未尝有共主也。渤海制度，一切模范中华，稍变其旧。然《金史本纪》云：“生女直之俗，无书契，无约束，不可检制。昭祖欲稍立条教，诸父部人，皆欲坑杀之。已被执。叔父谢里忽，弯弓注矢，射於众中，劫执者皆散走，乃得免。昭祖稍以条教为治，部落浸强。辽以惕隐官之。诸部族犹以旧俗，不肯用条教。昭祖耀武，至於青岭，白山。^④ 顺者抚之，不从者讨伐之”云云。则渤海之治，所能变靺鞨之俗者亦仅矣。^⑤

其风俗则极强劲。《晋书》谓其“人性凶悍，以无忧哀相尚。贵壮而贱老。父母死，男子不哭泣。哭者谓之不壮”。又谓其法律极严酷，“相盗窃，无多少皆杀之。故虽野处而不相犯”。《北史》谓其“种众虽少，而多勇力。处山险，又善射，发能入人目”。故“於东夷中号称强国”。当汉时，其居与北沃沮邻。尝乘船寇钞，北沃沮畏之，夏则深藏岩穴，冬乃下居平壤焉。夫余责其租赋重。魏黄初中，

① 《清实录》阿太章京。

② 明人书，景祖名叫场，显祖名他失。

③ 以上所述清代兴起之事，略据稻叶氏《清朝全史》及近人《心史史料》。

④ 见前。

⑤ 《唐书》谓渤海开国时，即已颇知书契，而《金史》谓其无书契，亦渤海文化，不普及於女真诸部之征。

其众遂叛。夫余数伐之，亦不能定也。其人多以射猎为业，故善造弓矢。《后汉书》云：“弓长四尺，力如弩。矢用楛，长一尺八寸。青石为镞。镞皆施毒，中人即死。”《晋书》云：“其国东北有山，出石，其利入铁。将取之，必先祈神。”《北史》云：“其角弓长三尺，箭长尺二寸。常以七八月造毒药，傅矢，以射禽兽，中者立死。”《晋书》谓其“土无盐铁”。《金史本纪》亦云：“女直旧无铁。邻国有以甲冑来粥者，景祖倾资厚价，以与贸易。亦令昆弟族人皆仇之。得铁既多，因之以修弓矢，备器械，兵势稍振。”则此族至宋世犹无铁也。^①

其生业，虽主渔猎畜牧，亦有五谷，麻布。有马不乘，但以为财产而已。盖处山险故也。多畜猪，食其肉，衣其皮。冬以猪膏涂身，厚数分，以御风寒。夏则裸袒，以尺布蔽其前后。夏巢居，冬穴处。其穴处负山水，坎地，梁木其上，复以土，如丘冢然。开口向上，以梯出入。穴以深为贵，大家至接九梯焉。无井灶，作瓦甬，受四五升以食。坐则箕踞，以足挟肉而啖之。得冻肉，坐其上令暖。其人臭秽不洁，作厕於中，圜之而居。又以溺洗面。《后汉书》谓其於“东夷之中，最无纲纪”，信不诬也。

《金史本纪》云：“黑水旧俗，无室庐，负山坎地，梁木其上，复以土。夏则出随水草，冬则入处其中。迁徙不常。献祖乃徙居海古水，耕垦树艺。始筑室，有栋宇之制，人呼其地为纳葛里。纳葛里，汉语居室也。”《礼志》：“天会十四年，文武百僚太师宗磐等上议：皇六代祖，徙居得吉，^②播种是勤，去暴露护栋宇之安，释负载肇车舆之利。”则女真之穴居，直至金初始革也。

肃慎嫁娶：男以毛羽插女头，女和则持归，然后致礼聘之。初婚之夕，男就女家，执女乳而罢。妇贞而女淫。然妻外淫，人告其夫，夫辄杀妻，而后悔，必杀告者，由是奸淫事终不发。死者，其日即葬之

① 《仪礼·乡射礼》注：“肃慎氏贡楛矢，铭其楛。”其铭当系中国人所为。

② 即纳葛异译。

於野。交木作小亭。杀猪积其上，以为死者之粮。^①亦有无棺槨，但埋之者。秋冬死，或以其尸捕貂。貂食其肉，多得之。^②

辫发之俗，北族类然。肃慎则又剃去其前。《晋书·肃慎传》云：“俗皆编发。”《唐书·靺鞨传》亦云：“俗编发。”可知其由来之旧矣。俞樾《曲园杂纂》引宋琬《建炎德安守御录》谓“建炎二年，十二月二十八日，有北来一项群贼数万人，皆剃头辫发，作金人装束”。可见金人不但辫发，抑且剃头。稻叶氏《清朝全史》云：“综宋代纪事，蒙古人之辫发。前与左右皆留，他尽剃，其前所留，垂下，如今支那南方妇人之前发。两侧所留则辫之，余端垂下。”竹崎季长《蒙古袭来绘词》^③中，蒙古人皆两辫，但不见前有留发耳。

《北史·勿吉传》：“国南有徒太山者，华言太皇，俗甚敬畏之人，不得山上洩汗。行经山者，以物盛去。上有熊黑豹狼，皆不害人，人亦不敢杀。”^④《金史·礼志》，谓金之郊祀，本於旧俗有拜天之礼。又谓金初朝日用本国礼。又大定十一年，世宗谓宰臣：“本国事天之礼甚重。”《太祖本纪》谓故事，五月五日，七月十五日，九月九日，拜天射御，岁以为常。则其俗亦敬天地，日月，山川。然巫鬼之习，亦由来甚旧。《始祖以下诸子传》谓：“国俗有被杀者，必使巫覡诅咒杀之者。乃系帛於杖端，与众至其家，歌而诅之。曰：取尔一角，指天一角。指地之牛，无名之马，向之则华面，背之则白尾，横视之则有左右翼者。其声哀切凄惋，若蒿里之音。既而以刃画地，劫取畜产财物而还。其家一经诅咒，家道辄败。又云：“初昭祖久无子，有巫者能道神语，甚验，乃往祷焉。巫良久曰：男子之魂至矣。此子厚有福德，子孙昌盛，可拜而受之。若生，则名之曰乌古迺。是为景祖。又良久，曰：女子之魂至矣。可名曰鹵忍。又良久，曰：女子之兆复见，可名曰斡都拔。又久之，复曰：男子之兆复见，然性不驯良，长

① 《晋书》。

② 《唐书》。

③ 犹言“图记”。

④ 徒太山即太白山，见《唐书》。

则残忍，无亲亲之恩，必行非义，不可受也。昭祖方念后嗣未立，乃曰：虽不良，亦愿受之。巫者曰：当名之曰乌古出。既而生二男，二女，次第先后，皆如巫者之言。遂以巫所命名名之。”此其巫鬼之习，即今日所谓萨满教也。清代有所谓堂子者，《啸亭杂录》云：“立竿祭天，又总祀社稷诸神於静室，谓之堂子。”然其所祀实非正神，故终清代秘其礼云。

《金史》谓女真地狭产薄，故其部族极贫窘。《太祖纪》：康宗七年，岁不登，民多流莩，强者转而为盗。欢都等欲重其法，为盗者皆杀之。太祖曰：以财杀人，不可。财者，人所致也。遂减盗贼征偿者，为征三倍。民间多逋负，卖妻子不能偿。康宗与官属会议，太祖在外庭，以帛系杖端，麾其众，令曰：骨肉之爱，人心所同。自今三年勿征。过三年徐图之。众皆听令，闻者感泣焉。然粥身为奴，粥卖妻子之事，《食货志》及《本纪》中尚屡见，皆其本部族之人也。又太宗天会元年，诏李董阿宾资曰：“先皇帝以同姓之人，旧有自粥及典质其身者，令官为赎。今闻尚有未复者，其悉阅赎。”则宗室亦不免矣。

惟其然也，故其兵力之强，乃为举世所罕觐。以少胜众之民族，考诸往史，殆无如女真者。女真初起，兵不满千。穆宗袭节度使后，为辽讨叛，募兵始得千余。太祖攻辽，诸部兵皆会，仅二千五百人。出河店之战，兵始满万。然天祚亲征，众号七十万，金人拒之者，不过二万。耶律余睹来降，引金深入，太祖亲临前敌，众亦不过万人。其追天祚於大鱼泺，则仅四千人耳。入燕之役，宗望以七千人先。其后伐宋，恒分两路，每路不过三万，已多杂他部族与汉人矣。《金史·兵志》曰：“金兴，用兵如神，战胜攻取，无敌当世。曾未十年，遂定大业。原其成功之速，俗本劲鸷，人多沈雄。兄弟子侄，才皆良将。部落队伍，技皆锐兵。加之地狭产薄，无事苦耕，可给衣食，有事苦战，可致俘获。劳其筋骨，以能寒暑。征发调遣，事同一家，是故将勇而志一，兵精而力齐。一旦奋起，变弱为强，以寡

制众，用是道也。及其得志中国，自顾其宗族国人尚少，乃割土地，崇位号，以假汉人，使为效力而守之。猛安谋克，杂厕内地，听与契丹、汉人婚姻，以相固结。迨夫国势浸盛，则归土地，削位号，罢辽东渤海，汉人之袭猛安谋克者，渐以兵柄，归其内族。然枢府金募，兼采汉制，伐宋之役，参用汉军及诸部族，而统以国人。非不知制胜长策，在以志一之将，用力齐之兵也。土宇既广，岂得尽任所亲哉？盖金兵力之有限，实由其部众之寡少，至其风气之强悍，则固不可诬矣。^① 清太祖之兴也，以遗甲十三副。其攻鄂勒珲，^② 身被州余创，犹力战，卒克之。其御杨、镐四路之师，以四旗六万之众。虽曰明兵以分而弱，以寡击众，实为虚词。^③ 然其往来扞御，巧而且速，其智略勇气，亦不可及也。故老传言：“满洲初兴，汉人望而生畏。以一满人，可逐数十汉人。如驱羊然，莫敢格者。”知方兴之朝气，必有不容轻视者矣。

然其进入中原，即易刚而为柔。其初兴也，沛然莫之能御，其衰也，亦一落千丈。则由其程度太低，与文明之民族接，不能传其文化，而惟纷华靡丽之悦也。金之衰，盖自迁种人入中原始。猛安谋克户之入中原也，民口二十五，受田四顷四亩有奇，岁输粟不过一石。税之可谓极薄，又多拘良田与之。然诸猛安谋克人，皆惟酒是务。今汉人佃蒔，而取其租。有一家百口，陇无一苗者。《世宗本纪》：“大定十六年，上与亲王，宰执官从容论古今兴废，曰：女直旧

① 《宋史·吴玠传》：“玠死，胡世将问玠所以制胜於玠。玠曰：玠从先兄，有事西夏。每战，不过一进御顷，胜负辄分。至金人，则更进迭退，忍耐坚久。令酷而下必死。每战，非累日不决。胜不遽追，败不至乱。自昔用兵，所未尝见也。久与角逐，乃得其情。盖金人弓矢，不若中国之劲利。中国士卒，不若金人之坚耐。吾常以长技，洞重甲於数百步外，则其冲突固不能相及。於是选据形便，出锐卒更迭挠之，与之无穷，使不得休暇，以沮其坚忍之势”云云。《金史·宗瑞传》：“语同列曰：宗常从大军南伐，每见元帅国王，亲临陈督战，矢石交集，而王免胄，指挥三军，意气自若，用兵制胜，皆合孙吴，可谓命世雄才矣。至於亲冒锋镝，进不避难。将士观之，孰敢爱死？宜其所向无前，日辟国百里也。”此金将勇而志一，兵精而力齐之注脚也。元帅国王，谓宗弼。

② 尼堪外兰失图伦后所居，在今龙江西南。

③ 见《圣武记·开国龙兴记》。

风，最为纯直。虽不知书，然其祭天地，敬亲戚，尊耆老，接宾客，信朋友，礼意款曲，皆出自然。其善，与古书所载无异。”其能灭辽迁宋，岂偶然哉？然及世宗时，业已译汉姓，改汉名，效南人装束，浸至不能女直语。世宗虽力主保守旧俗，亦无如之何矣。

清室初兴时，即能略知书史。金人忘其本俗之事，太宗时即引为鉴戒。崇德元年，尝集诸王贝勒大臣，令弘文院官读《金史·世宗本纪》。谕以勿忘旧制，废骑射，效汉俗，为万世之计。康雍乾诸朝，於此尤兢兢焉。然其部族风气，转移尤速。崇德元年，太宗谕王大臣，即云：“太祖时，八旗子弟，一闻行师出猎，皆踊跃争先。今则或托妻子有疾，或以家事为辞。”逮乎入关，则战伐多恃降将。三藩之变，自尚善贝勒一路外，多怀异心。有欲举襄阳以北降敌者，转赖汉将持之得免。^① 满人至此，已如泽中之麋，蒙虎之皮矣。而其不能勤事生业，亦与金人无异。入关之始，即圈占近畿田宅，以给旗兵。康雍乾之世，负债则为代偿；典卖田地，则为代赎；又时有恩赐，借贷。其待种人，盖又较金源为厚。然其人皆侈衣食，事敖游，得田则卖，得粟则粲，得金则挥霍立尽，与金猛安谋克户，无以异也。初入关时，旗人四出强卖人参，又向商贾强行市易，至有恃强鞭撻者。於是禁不得出外经商。乾隆时，乃借以库银，令其营运。然其人本不能商，不旋踵，亏折以尽。^② 时又徙八旗余丁三千於吉林，令其耕垦。亦以所得地典与汉人，逃归北京。八旗生计，遂终清世无善策。

女真文字，亦本华文，创之者为完颜希尹。自希尹创制后，宗室中通习最早者，当推景祖曾孙宗宪，^③ 其后精深者推温迪罕缔达，善教授者称纥石烈良弼。宗室中精中国文学者，为世宗子豫王允成，孙琿。《始祖以下诸子传》穆宗第五子昂：“女直既未有文字，亦未

① 见《啸亭杂录》。

② 见《熙朝纪政》。

③ 宗宪又通契丹、汉文。

尝有记录。故祖宗事皆不载。宗翰好访问女直老人，多得祖宗遗事。”“天会六年，诏书求访祖宗遗事，以备国史。命昺与耶律迪越掌之。昺等采摭遗言旧事，自始祖以下十帝，综为三卷。凡部族，既曰某部，复曰某水之某，又曰某乡某村，以别识之。凡与契丹往来，及征伐诸部，其间诈谋诡计，一无所隐。有详有略，咸得其实。”今一披读《金史》，先世事迹，秩然可考。不徒远胜《元史》，亦非《辽史》取资汉文旧籍者，所得比肩，皆昺等之功也。

女真部族，程度尚较契丹为低，而其模效中华，则较契丹为力。《金史·文艺传》谓：“金用武得国，无异於辽，而一代制作，能自树立唐、宋之间，有非辽世所及”谓此也。以与女真本族无关，今不之及。中原文物，为女真所劫掠者亦甚多。《宋史·钦宗纪》：“靖康二年，夏，四月，庚申朔金人以帝及皇后，太子北归。凡法驾、卤簿，皇后以下车辂、卤簿、冠服、礼器、法物、大乐、教坊乐器、祭器、八宝、九鼎、圭璧、浑天仪、铜人、刻漏古器、景灵宫供器，太清楼、秘阁、三馆书，天下州府图，及官吏、内人、内侍、技艺、工匠、倡优，府库蓄积为之一空。”其所失，殆过辽之入汴矣。武力不竞，文物随亡，岂不痛哉！①

清时，女真开化又非金世之比。其文字创於额尔德尼，而达海加以圈点。乃以蒙古文为根原。满、蒙言语多同，固较用汉字为便也。太祖即通汉文，能读《三国演义》及《水浒传》。初设文馆，后分为三院，弘文院专译汉书。故一切制度，较金初亦觉美备。太宗时已能修《太祖实录》，而辽宁所存《满文档案》，史家亦视为瑰宝焉。

蒙古虽出室韦，然既与沙陀突厥混合，其居地又在漠北，故其风气与室韦等处山岭之地者少殊。室韦人能种粟麦及稌，又有曲以酿。冬逐水草，夏亦城居。《五代史》称其地多铜铁金银，其人工巧，铜铁诸器皆精好，且善织毛锦。则已颇进於农工矣。而蒙古初兴，纯为游牧种人风习，盖地势使然也。然室韦无君长，惟有大酋，

① 金初制度之简陋，可参看附录《金初官制》条。

号余莫弗瞞咄，管摄其部。死则子弟代立。嗣绝，则择贤豪立之，其众大者数千户，小或千户，滨散川谷，逐水草，不税敛。每弋猎，即相啸聚，事毕而去。不相臣制。而蒙兀汗位，亦时绝时续，必待众推，似仍室韦旧习也。

蒙古官制，极为简陋。除以万户治军旅，断事官治政刑外，可考者惟四怯薛之制。怯薛者，蒙古亲卫军之名。其所属有火儿赤，昔宝赤，怯怜赤，主弓矢鹰隼之事；有札里赤，主书写圣旨；有心闾赤，为天子主文史；有博尔赤，亲烹饪，以奉上饮食；有云都赤、阔端赤，侍上，带刀及弓矢；有八刺哈赤，司闾；有答剌赤，掌酒；有兀刺赤、莫伦赤，典车马；有速古儿赤，掌内府上供衣服；有帖麦赤，主牧橐驼；有火赤，主牧羊；有忽刺罕赤，主捕盗；有虎儿赤，掌奏乐；皆分番更直，而领於怯薛之长，实皆近习耳。其兵制，则确能举国皆兵。用本部族人者，谓之蒙古军。用他部族人者，谓之探马赤军。其法：家有男子，十五以上，七十以下，无众寡，皆令为兵。孩幼稍长，又籍之，为渐丁军。故其部族不多，而兵数颇众。又能取异族之长，以自补其短。每攻破州县，辄招取铁木金火等人，以充砲手。其后来之军，有以技名者，砲军，弩手军，水手军是也。其所向无前，宜矣。

蒙人生事，本至简陋。骤入中原，惟知见纷华美丽而悦。至於损上益下，藏富於民，为久长之计，则非其所知也。《元史·耶律楚材传》：“太宗时，近臣别迭等言：汉人无补於国，可悉空其人，以为牧地。又议裂州县以赐亲王功臣。”楚材力争，乃止。其初下中原，尝举降人为驱丁，虽儒者不免。盖视中原人皆俘虏矣。惟颇喜技巧，凡克城邑，工匠必别籍之。其制：凡攻城，敌以矢石相加，即为拒命；既克，必尽杀之。汴梁将下，速不台欲屠其城。耶律楚材谓奇巧之工，厚藏之家，皆萃於此，遂已。太宗时，商贾餽物於朝廷者，皆得驰驿。太宗崩，乃蛮真后称制。西域商人奥鲁剌合蛮，以言利得政柄，使专掌财赋，至付以御宝宫纸，使自书行之。又有旨：“奥

都刺合蛮所建白，令史不为书者，断其手。”其卤莽灭裂，亦可笑矣。然终元世，其理财之策，除朶民以自奉外，实他无所知，正不特初起时为然也。

蒙古旧俗，亦尚巫鬼。《元史·文宗纪》：“天顺二年，正月，封蒙古巫者所奉神为灵感昭应护国忠顺王，号其庙曰灵佑”是也。然此等神教，程度甚浅，入人不深。故与他族相接后，信其教甚易。如其接吐蕃，则信喇嘛教，居西域，则信天方教是也。成吉思汗征西域，尝掠得徒思妇人名法特马者，以归。法特马好巫蛊，乃蛮真后宠之。太宗朝旧人，半为所谗搆斥逐。可见其迷信之易矣。然亦以此故，於各教无所岐视。克敌时，於其民所信之教悉仍之，遂为民心所归。如古出鲁克据西辽，强其民改教，以致灭亡。蒙古取之，人民信教，一听自由，民遂以安是也。

蒙古初用畏兀文。后据藏文，别造新字。其传受汉人文化，远不如辽、金二代。《廿二史劄记》云：“《元史本纪》：至元二十三年，翰林承旨撒里蛮言：国史院纂修太祖累朝《实录》，请先以畏吾字繙译进读，再付纂定。元贞二年，兀都带等进所译《太宗·宪宗·世祖实录》。是皆以国书进呈也。其散见於他传者如世祖问徐世隆以尧，舜，禹，汤为君之道。世隆取书传以对。帝喜，曰：汝为朕直解进读。书成，令翰林承旨宏藏译写以进。曹元用奉旨译唐《贞观政要》为国语。元明善奉武宗诏，节《尚书》经文，译其关于政事者，乃举文陞同译，每进一篇，帝必称善。虞集在经筵，取经史中有益於治道者，用国语，汉文两进读。译润之际，务为明白，数日乃成一篇。马祖常亦译《大训》以进。^① 是凡进呈文字，必皆译以国书，可知诸帝皆不习汉文也。惟裕宗为太子时，早从姚枢，窦默受《孝经》。及长，则侍经幄者，如王恂、白栋、李谦、宋道等，皆长在东宫备咨访。中庶子伯必，以其子阿八赤入见。太子谕令入学。伯必即令入蒙古学。逾年再见，问所读何书？以蒙古书对。太子曰：我命汝

① 皆见各本传。

学汉人文字耳。此可见裕宗之留心学问。然未即位薨。以后如仁宗，最能亲儒重道。然有人进《大学衍义》者，命詹事王约等节而译之。则其於汉文，盖亦不甚深贯。至朝廷大臣，亦多用蒙古勋旧，罕有留意儒学者。世祖时，尚书留梦炎等奏：江淮行省无一人通文墨者。乃以崔彧为江淮行省左丞。^①李元礼谏太后不当幸五台，帝大怒，令丞相完泽，不忽木等鞫问。不忽木以国语译而读之。完泽曰：吾意亦如此。是不惟帝王不习汉文，即大臣中习汉文者亦少也。”以视辽、金二代，相去不甚远哉！

金人以同化於汉族而败，元人颇豫防之。《元史·世祖本纪》：至元二十三年，“以从官南方者多不归，遣使徙徒北还”。《成宗纪》：大德七年，“以行省官久住，多与所部人联姻，乃诏迁其久任者”。是其事也。然亦终无救於其不振。此事自关文化之深浅，非可以力争也。

文明程度较低之民族，大都直情径行。故其宽厚质直之处，或非文明人所及。然其残酷，亦出意外。蒙古欲空中原为牧地，最足骇人听闻，然犹空言耳。至女真，则其待汉人之酷，有出人意料之外者。洪迈《容斋三笔》云：“靖康之后，陷於金虏者，帝王子孙，宦门仕族，尽没为奴婢，使供作务。每人一月，支稗子五斗，令自舂为米，得一斗八升，用为糗粮。岁支麻五把，令缉为裘。此外更无一钱一帛之入。男子不能缉者，则终岁裸体。虏或哀之，则使执爨。虽时负火得暖热，然才出外取柴归，再坐火边，皮肉脱落，不日辄死。惟喜有手艺，如医人、绣工之类。寻常只围坐地上，以败席或芦藉之。遇客至开筵，引能乐者使奏技。酒阑客散，各复其初，依旧环坐刺绩，任其生死，视如草芥。”《金史》载海陵杀赵氏子孙一百三十余人。世宗时，梁肃奏：“天水郡公^②本族，已无在者。其余皆远族，可罢其养济。”盖二帝之亲支尽矣。撰《蒙兀儿史记》之屠君

① 《彧传》。

② 钦宗。

敬山，^①尝为予言：“宁古塔人民，有於岁首阖户哀泣终日者。习俗相沿，莫知其故。实皆赵宋之遗黎，在当日以是志亡国之痛者也。”

然金、元等虽恃其强盛，歧视汉人，而及其末叶，则亦甚惨。《廿二史劄记》云：“一代敝政，有不尽载於正史，而散见於他书者。金制，以种人设明安穆昆^②分领之，使散处中原。世宗虑种人为民害，乃令明安穆昆，自为保聚。其土地与民犬牙相入者，互易之。使种人与汉人，各有界址。意至深远也。”^③其后蒙古兵起，种人往战辄败。承安中，主兵者谓种人所给田少，不足养身家，故无斗志。请括民田之冒税者给之。於是武夫悍卒，倚国威以为重，有耕之数世者，亦以冒占夺之。及宣宗贞祐间，南渡，盗贼群起。向之恃势夺田者，人视之为血仇骨怨，一顾盼之顷，皆死於锋镝之下，虽赤子亦不免。事见元遗山所作《张万公碑文》。又《完颜怀德碑》亦云：民间仇拔地之怨，睚眦种人，期必杀而后已。寻踪捕影，不三二日，屠戮净尽。甚至掘坟墓，弃骸骨。惟怀德令临淄，有惠政，民不忍杀，得全其生。可见种人之安插河北诸郡者，尽歼於贞祐时。盖由种人与平民杂处，初则种人倚势虐平民，后则平民报怨杀种人，而亦一代得失之林也。”予案往昔世俗犹有杀鞑子一语，鞑子即鞑靼也。然则元室亡时，其种人虽多以改姓自媚於汉得免，^④其见屠戮者，亦必不少矣。

清承金、元之后，文化稍高，又能粗知书史，故其待汉族，歧视无异金、元，而又益之以深鸷。当太祖时，获汉人皆以为奴，得儒士皆杀之。然亦能用范文程等。盖深知其忠顺者则用之，不敢必者则杀之。太祖自知文化较落后，深虑知计不足与汉儒士敌也。太

① 寄。

② 即猛安谋克，清乾隆时所改译字。

③ 宋世宗为保守旧俗最力之人。其令种人自为保聚，乃虑其与汉人同化，且欲团结以制汉人耳，非为汉人计也。赵氏盖以清代亦有圈地之事，故不得不为此回护之辞。

④ 见《日知录·二字姓改一字》条。

宗时，渐有窥伺中原之心，务为笼络人心之计，故待明朝降将极厚。又尝考试儒士，免其为奴。然究非出於真诚，故不旋踵，复定奴仆不许应试之制。崇德二年，都察院承政祖可法以为言。太宗则斥之曰：“今满洲家人，非先时滥行占取者可比。间有一二生员，皆攻城破敌之际，或经血战而获，或因阵亡赏给。无故夺之，彼死职之劳，捐躯之义，忍弃之乎？若另以人补给，所补者独非人乎？尔等止知爱惜汉人，不知爱惜满洲有功之人，及补给为奴之人也。”是年，因责都察院承政张存仁等庇护汉人，又曰：“若礼部承政祝世昌，奏请禁阵获良人妇女，卖充乐户一疏。祝世昌岂不知乐户一事，朕已禁革？不过徇庇汉人，借此立言要誉耳。朕料祝世昌身虽在此，心之所向，犹在明也。祝世昌果系忠臣，彼明以大元田、刘、张三姓功臣之裔为娼，即当奏请禁止矣。”不惟私其种族，而又左袒元代功臣后裔，其仇视汉人之心，可谓深矣。^①宁完我云：“汉官不会满语，常被骂詈辱打，至伤心堕泪。皇上遇汉官，每每温慰恳至，而国人反陵轹作贱，将何以成一体，徠远人邪？”清室初年，汉官见满洲王大臣白事皆长跪，虽大员亦如此。耿、尚、洪、吴等，虽若特蒙宠眷，其所处之地，亦可想见矣。况其下於此者？而其能引决，曾不若臧获婢妾，且甘为清室鹰犬，以搏噬父母之邦，其用心岂不异哉？入关而后，圈占田宅之夺民生计，嘉定、扬州之肆行屠戮，列朝文字之狱之挫折士气、摧毁文化，迄今言之，犹令人发指眦裂焉。

清代深谋，尤在联合满、蒙，以制汉族。不特关东之地不许汉人屯垦，即於蒙地亦然。奉天将军岁终例须奏报并无汉人出关，至末叶犹然也。然而究何益哉？藏舟於山，夜半，有力者负之去矣！坐使满、蒙之地，广田自荒，致生外人之覬覦，此则其禁阻汉人之效耳。

^① 中国以没入妇女充乐户，固系秕政，然系各族一律。

附录一 金初官制

《金史·百官志》：“金自景祖，始建官属，统诸部，以专征伐，巍然自为一国。其官长皆称曰勃极烈。故太祖以都勃极烈嗣位，太宗以谙班勃极烈居守。谙班，尊大之称也。其次曰国论忽鲁勃极烈。国论，言贵，忽鲁，犹总帅也。又有国论勃极烈，或左右置，所谓国相也。其次诸勃极烈之上，则有国论，乙室，忽鲁，移赉，阿买，阿舍，吴，迭之号，以为升拜宗室功臣之序焉。其部长曰孛堇，统数部者曰忽鲁。凡此，至熙宗定官制皆废，其后惟镇抚边民之官曰秃里。乌鲁图之下，有扫稳，脱朵。详稳之下，有么忽，习尼昆。此则具於官制而不废。皆踵辽官名也。”此段文字，殊欠清晰。其《国语解》云：“都勃极烈，总治官名，犹汉云冢宰。谙版勃极烈，官之尊且贵者。国论勃极烈，尊礼优崇，得自由者。胡鲁勃极烈，统领官之称。移赉勃极烈，位第三曰移赉。阿买勃极烈，治城邑者。乙室勃极烈，迎迓之官。札失哈勃极烈，守官署之称。晟勃极烈，阴阳之官。迭勃极烈，倅贰之官，诸纥详稳，边戍之官。诸移里堇，部落墟寨之首领。秃里，掌部落词讼，察非违者。乌鲁古，牧圉之官。”胡鲁，即忽鲁。国论勃极烈，忽鲁勃极烈，据解乃两官，而《志》误合为一。下又重出国论勃极烈之名。“则有国论，乙室，忽鲁，移赉，阿买，阿舍，吴，迭之号”句，国论，忽鲁又重出。阿舍，即《解》之札失哈。吴为晟字之误。盖此诸号，至熙宗皆废，故作史者亦不可能了然也。《桓赧散达传》：“国相雅达之子也。雅达之称国相，不知其所从来。景祖尝以币与马求国相於雅达。雅达许之。景祖得之，以命肃宗。其后撤改亦居是官焉。”案《辽志》：属国职名，有左相、右相。又载景宗保宁九年，女直国来请宰相，夷离厘之职，以次授者二十一人。则雅达之国相，心受诸辽，故须以币与马求之。然则金初国论勃极烈为最尊之官，都勃极烈，谙版勃极烈，皆后来所设，故

移赉勃极烈位居第三也。

《志》又云：“诸纥详稳一员，掌戍守边堡。么忽一员，掌贰详稳。习尼昆，掌本纥差役等事。”“诸移里董司。移里董一员，分掌部族村寨之事。”“诸秃里。秃里一员，掌部落词讼，访察违背等事。”“诸群牧所，国言谓乌鲁古。提控诸乌鲁古一员。又设扫稳，脱朵，分掌诸畜，所谓牛马群子也。”此等序谓踵辽官名，其下皆无勃极烈字。然则凡有勃极烈字者，皆女真之旧也。金初官制大略可见矣。

第八章 苗 族

西南诸族，最为错杂，而名称亦猥多。我国古代，通称为蛮，后世讹而为苗。近今之言种族者，亦多通称高地族而已。不甚加以分别，此甚疏也。今就载籍可稽者，略加爬梳，析为五族：曰苗，曰粤，曰濮，曰羌，曰藏，以次分论之。

苗者，盖蛮之转音。我国古代，称四方之民族曰夷，蛮，戎，狄，原以其方位言，非以其种族言。既习以是为称，而其种族之本名遂隐。今所谓苗族者，其本名盖曰黎。我国以其居南方也，乃称之为曰蛮，亦书作𡵓作髦。^①晚近乃讹为苗，既讹为苗，遂与古之三苗国混。三苗姜姓。当五帝时，姬、姜二姓之争甚烈。^②姜为姬败，乃南走。服九黎之民而君之，时曰三苗。近人既不察今之苗族与古之三苗之别，又不察古之姜姓，其君九黎而称三苗，实在北方战败之后，乃误以为初与姬姓战於北方者，即为后来之三苗，所用者亦即为后来九黎之民，遂有今之苗族先汉族入中原，后乃为汉族所逐之说矣。今请得而辨正之。

① 《书·牧誓》：“及庸、蜀、羌、髳、微、卢、彭、濮人。”《诗·小雅》：“如蛮如髦。”《毛传》：“髦，夷髦也。”《郑笺》：“髦，西夷别名。武王伐纣，其等有八国从焉。”《正义》：“彼髳此髦，音义同也。”案西夷种族，别无称髦者。若系国名，则不得与蛮对举。《毛传》例不破字，其称夷髦，正系以夷蛮为训。《韩诗》：“今夫肢体之序，与禽兽同节；言语之暴，与蛮夷不殊，混然无道，此明王圣主之所罪。”《诗》曰：如蛮如髦，我是用忧。”亦以夷蛮训蛮髦，韩、毛同义也。如蛮如髦，乃以双声之字为重言耳。近人或云：髳为马留二字合音，非。马留乃粤族，见下篇，与今所谓苗族，古称为蛮者无涉。

② 《晋语》：“昔少典娶於有娇氏，生黄帝、炎帝。黄帝以姬水成，炎帝以姜水成，成而异德，故黄帝为姬，炎帝为姜。二帝用师，以相济也。”可见姬、姜二姓，实为当时两大族。自黄帝战胜炎帝后，颛顼、帝喾、尧、舜、禹、契、稷相继而有天下者，皆黄帝之子孙。姜姓望国，不过齐许申吕，盖姬成而姜败矣。

何以知三苗为姜姓之国，而非种族之名也？案古之言三苗者，马融、王肃云：“国名也。缙云氏之后为诸侯，盖饕餮也。”①高诱云：“帝鸿氏之裔子浑敦，少昊氏之裔子穷奇，缙云氏之裔子饕餮，三族之苗裔，故谓之三苗。”②韦昭云：“炎帝之后，诸侯共工也。”③其言苗民者，郑玄云：“苗民，谓九黎之君也。九黎之君，於少昊氏衰，而弃善道，上效蚩尤重刑。必变九黎言苗民者，有苗九黎之后，颛顼代少昊，诛九黎，分流其子孙，为居於西裔者三苗。至高辛之衰，又复九黎之恶。尧兴，又诛之。尧末，又在朝。舜时，又窜之。后王深恶此族三生凶恶，故著其氏而谓之民。民者冥也，言未见仁道。”④然则苗者氏族，民者贬辞。既不容望文解为人民，自无从凭臆断为种族。至於三苗本系，则高诱三族苗裔之说，似即缘三字而附会，别无确据。且即如所云，亦仍有缙云氏之裔在内。杜预注《左氏》，谓缙云为黄帝时官名，⑤此仅得为氏，⑥而未详其姓，《史记集解》⑦引贾逵云：“缙云氏，姜姓也。炎帝之苗裔。”与韦昭“炎帝之后”之说合。惟昭又谓为共工，似显与《书》之“流共工”、“窜三苗”分举者背。然《周语》：太子晋谓“共工壅防百川”；又谓“共之从孙四岳佐禹，祚四岳国，命为侯伯，赐姓曰姜，氏曰有吕”。《韦注》引贾逵说，亦以共工为炎帝之后，姜姓。而据宋翔凤所考，则谓四岳即《左氏》“夫许太岳之胤也”之太岳⑧实即《尧典》之伯夷，《尚书大传》之阳伯，《墨子》⑨、《吕览》⑩之许由、伯阳。《庄子》尧让天下於许由，实即《尧典》咨四岳逊朕位之事，其说甚为精核。又《韩非子·外储说》：

① 《书·尧典》释文。

② 《淮南子·修务训》注。

③ 《书·吕刑正义》。

④ 《礼记·缙衣正义》引郑注《吕刑》。

⑤ 文公十八年。

⑥ 以官为氏。

⑦ 《五帝本纪》。

⑧ 隐公十一年。

⑨ 《所染篇》。

⑩ 《当染篇》。

“尧欲传天下於舜，共工谏曰：孰以天下而传之於匹夫乎？尧不听，举兵而诛共工於幽州之都。”而郭璞注《山海经》^①亦曰：“昔尧以天下让舜，三苗之君非之，帝杀之。有苗之民，叛入南海，为三苗国。”然则共工三苗，皆当时姜姓之仇舜者，实仍姬、姜之争耳。纵令韦昭以三苗当共工为误，而三苗之必为姜姓，则无疑矣。《后汉书·西羌传》：“西羌之本，出自三苗，姜姓之别也。”其说与贾、马、韦、高合，盖必有所受之矣。^②

何以知三苗之君为姜姓，而其民则为今之苗族也？案郑注《吕刑》明言苗民为九黎之君，则九黎二字，系指人民可知。^③高注《淮南子》于三族苗裔之说之外，别举一说曰：“一曰窜三苗国民于三危。”郭注《山海经》亦曰：“尧诛三苗，其民叛入南海。”皆以君与民分别言之。三苗君民之实非同族，亦隐隐可见。虽郑注谓“有苗九黎之后”，又谓“颡项代少昊，诛九黎，分流其子孙，为居于西裔者三

① 《海外南经》。

② 《后汉书》又云：“其国近南岳，及舜流四凶，徙之三危，河关之西南羌地是也。”其说地理亦极合。案自来说三危者，多误以为在敦煌附近，而“至于三危入于南海”之黑水，遂至聚讼纷纭。今案《史记集解》引郑玄云：“《地理志》：益州滇池有黑水祠，而不记此山水所在。《地记》曰：三危山，在鸟鼠之西南。”又《水经注》两引《山海经》，以证《尚书》之三危。三十卷云：“三危山，在敦煌南，与岷山相接，南带黑水。”四十卷云：“三危之山，三青鸟居之。广圆百里，在鸟鼠山西。”又“江水东过江阳县，洛水从三危山道广魏洛县南，东南注之”。洛县，今四川广汉县。三危山，在鸟鼠西南，岷山之西，明系今青海地方，长江上源以北，黄河上源以南之山。黑水在三危之南，明即今金沙江。金沙江古名泸水，泸从卢，卢即黑也。滇池有黑水祠，滇池固在金沙江南岸也。《禹贡》雍、梁二州，皆以黑水为界，盖雍州西南，抵今青海地方江源之北，梁州西界，抵今西康之江东岸，故雍州得包有析支。所谓入于南海者，乃夷蛮戎狄谓之四海之海，非洋海之海也。古代命山，所包至广，非如后世，但指一峰一岭言之。云三危在敦煌南，犹云河水出敦煌塞外，以敦煌为当时中国最西北境，古云，非谓必在敦煌附近也。自《左传》昭公九年“允姓之奸，居于瓜州”，杜《注》谓“允姓阴戎之祖，与三苗俱放三危者。瓜州，今敦煌。”于是移敦煌南之三危于敦煌境内，《括地志》因之，晋言“三危山在敦煌县东南四十里”。而异说始滋矣。其实《汉书·地理志》及《续汉书·郡国志》敦煌郡下，均不言有三危山也。《后汉书·西羌传》言三危析支，地理皆与经义密合。清圣祖以哈刺乌苏为黑水，因谓康、卫、藏为三危，犹中国之三省。其说殊为荒谬。然世多信之者，以哈刺乌苏译义为黑水耳。其实舍泸水之字不取，而转以哈刺二字相附会，真所谓舍近而求远也。

③ 马融，高诱，伪孔以蚩尤为九黎之君，其用蚩尤二字，虽少涉含混，然九黎二字，系指人民言则同。参看下文。

苗”。又谓“至高辛氏之衰，又复九黎之恶”。一似九黎亦为君名，而为苗民之祖，然此九黎二字，自以代九黎之君四字用。^①古人文字简略，上文既明言之曰“苗民谓九黎之君”，又紧承之曰“九黎之君，于少昊之衰，而弃善道”云云，故下文遂省去“之君”二字耳。《后汉书·南蛮传》：“建武十二年，九真徼外蛮里张游，率其种人，慕化内属。封为归汉里君。”《注》：“里，蛮之别号，今呼为俚人”是也。里，俚皆即黎，字变而音未变。盖姜姓既败于北，乃南走而臣九黎，犹月氏破于匈奴，乃西走而臣大夏耳。

何以知姜姓之君九黎，必在其北方既败之后也？案近人误以与黄帝战于北方者，为今日之苗族，皆为“蚩尤九黎之君”一语所误，殊不知古之称人，惟重氏族，子孙父祖，同蒙一号者甚多。即如战于阪泉之野之炎帝，岂得以为“斲木为耜，揉木为耒”之炎帝乎？伪孔及高诱^②之释蚩尤，但曰“九黎之君”，“九黎民之君”，诚少涉含混。然马融则明著之曰：“少昊之末九黎君名，^③实本《楚语》“少昊之衰，九黎乱德”之语，则不以为与黄帝战于涿鹿之蚩尤可知。郑更明著之曰：“九黎之君，于少昊氏衰，而弃善道，上效蚩尤重刑”，则蚩尤在九黎之君之前可知。其释蚩尤也，则曰“霸天下，黄帝所伐者”，^④绝不言九黎之君。则与黄帝战之蚩尤，实未尝君临九黎可知。《韩诗》称三苗之国曰：“衡山在南，岐山在北；左洞庭之陂，右彭蠡之泽。”^⑤《史记·五帝本纪》则云：“在江淮荆州。”从古无以三苗为在北方者。则战于涿鹿之蚩尤，虽为三苗国君之祖，而其身实未尝君临三苗，又可知矣。且郑玄既以蚩尤为霸天下，应劭又以蚩尤为古天子，^⑥而《史记·五帝本纪》述黄帝与炎帝、蚩尤之争，其词又颇错乱。其

① 其言“有苗九黎之后”，犹言九黎之君之后。颛顼诛九黎，犹言诛九黎之君。又复九黎之恶，犹言又复于少昊氏衰而弃善道上效蚩尤重刑之九黎之君之恶。

② 《秦策》注。

③ 《书·吕刑释文》。

④ 《吕刑正义》。

⑤ 《史记·吴起列传》，《战国策·魏策》略同。

⑥ 《吕刑正义》。

文曰：“轩辕之时，神农氏世衰。诸侯相侵伐，暴虐百姓，而神农氏弗能征。於是轩辕乃习用干戈，以征不享，诸侯咸来宾从。而蚩尤最为暴，莫能伐。炎帝欲侵陵诸侯，诸侯咸归轩辕。轩辕乃修德振兵，……以与炎帝战于阪泉之野。三战，然后得其志。蚩尤作乱，不用帝命。于是黄帝乃征师诸侯，与蚩尤战于涿鹿之野，遂擒杀蚩尤。而诸侯咸尊轩辕为天子，代神农氏。”夫既云“诸侯相侵伐，暴虐百姓弗能征”矣，又云“欲侵陵诸侯”，其事弗类。而以“习用干戈”、“诸侯宾从”之轩辕，阪泉之役，犹必“三战然后得其志”，转与最暴莫能伐之蚩尤，酷似一人，是则可疑也。今世所传《大戴记》，虽未必可信，然要为古书，其述五帝事多与《史记》同，尤足以资参证。今案《五帝德篇》，只有与炎帝战于阪泉之文，更无与蚩尤战于涿鹿之事。然则《五帝本纪》之蚩尤，炎帝，究为一人，抑为二人？殊未易定。崔氏适谓《易·系辞》之“黄帝垂衣裳”，《风俗通》^①引作皇帝。又《春秋繁露》，^②亦以轩辕为黄帝，足征皇黄二字，古可通假。《吕刑》之“皇帝遏绝苗民”，实即黄帝与炎帝战于阪泉之事，殊为有见。然则谓蚩尤用九黎之民，即今日之苗族，与黄帝驰驱于幽冀之域者，其为武断无据，概可见矣。

三苗与黎民之关系既明，则黎族古史，可以进考，案今之所谓苗族者，实为汉长沙武陵蛮之后。其种族原始，《后汉书》各载之。曰：“昔高辛氏有犬戎之寇，帝患其侵暴，而征伐不克。乃访募天下，有能得犬戎之将吴将军头者，购黄金千镒，邑万家，又妻以少女。时帝有畜狗，其毛五采，名曰槃瓠。下令之后，槃瓠遂衔人头造阙下，群臣怪而诊之，乃吴将军首也。帝大喜。而计槃瓠不可妻之以女，又无封爵之道，议欲有报而未知所宜。女闻之，以为帝王下令，不可违信，因请行。帝不得已，乃以女配槃瓠。槃瓠得女，负而走入南山，止石室中。所处险绝，人迹不至。于是女解去衣裳，

① 《声音》。

② 《三代改制质文篇》。

为仆鉴之结，著独立之衣。帝悲思之，遣使寻求；辄遇风雨震晦，使者不得进。经三年，生子一十二人，六男六女。槃瓠死后，因自相夫妻。织绩木皮，染以草实，好五色衣服，制裁皆有尾形。其母后归，以状白帝。于是使迎致诸子。衣裳斑斓，言语侏离，好入山壑，不乐平旷。帝顺其意，赐以名山广泽，其后滋蔓，号曰蛮夷。外痴内黠，安土重旧。以先父有功，母帝之女，田作贾贩，无关梁符传，租税之赋。有邑君长，皆赐印绶，冠用獭皮。其渠帅曰精夫，相呼为媵徒。今长沙武陵蛮是也。”^①此说一望而知为汉人所附会。然干宝《晋纪》、范成大《桂海虞衡志》皆谓苗人杂糅鱼肉，扣槽而号，以祭槃瓠。^②则槃瓠确为苗族之祖。近人或云：“吾国古帝，踪迹多在北方，独盘古则祠在桂林，墓在南海。”^③又今所传盘古事迹，或谓其与开辟俱生，^④或谓其以一身化为万有，^⑤亦与其余缪悠古说，设想迥殊。现在粤西岩洞中，尚时有崇宏壮丽，榜为盘古庙者，中祀盘古及天皇、地皇、人皇。旧历六月二日，相传为盘古生日，苗族远近咸集，致祭极虔。则盘古殆即吾族所谓槃瓠，与天、地、人三皇。皆为苗族古帝，而其传说，转见于吾族之载籍欤？《遁甲开山图》谓：“天皇氏被迹在柱州昆仑山下，地皇氏兴于熊耳龙门之间，人皇氏兴于荆马山提地之国。”柱州，以昆仑山高，若天柱然，故名。荆马山，旧说在蜀。^⑥《尚书璇玑铃》谓：“人皇氏乘六羽驾云车出谷

① 注：“今辰州卢溪县西有武山。”黄闵《武陵记》曰：山高可万仞，山半有槃瓠石室，可容数万人。中有石林，槃瓠行迹。今案山窟前有石羊石兽，古迹奇异尤多，望石窟，大如三间屋。遥见一石，仍似狗形。俗相传云是槃瓠像也。案唐卢溪县，在今湖南泸溪县西南。

② 《文献通考·四裔考》引。

③ 《述异记》。

④ 《三五历记》：“天地混沌如鸡子，盘古生其中。万八千岁，天地开辟，阳清为天，阴浊为地，盘古在其中。一日九变，神于天，圣于地。天日高一丈，地日厚一丈，盘古日长一丈，如此万八千岁，天数极高，地数极深，盘古极长，后乃有三皇。”

⑤ 《五运历年记》：“首生盘古，垂死化身，气成风云，声为雷霆，左眼为日，右眼为月，四肢五体为四极五岳，血液为江河，筋脉为地理，肌肉为田土，发髭为星辰，皮毛为草木，齿骨为金石，精髓为珠玉，汗流为雨泽。身之诸虫，因风所感，化为黎蚩。”《述异记》略同。

⑥ 俱见《遁甲外纪》。

口。”而《华阳国志》谓：“蜀之为国，肇自人皇。”然则此族殆自中亚高原沿江东下者，地皇之迹至于熊耳龙门，则彼族初封初不局于洞庭、彭蠡间矣。予案盘古名号，雅记无征。^①而《三五历记》及《五运历年记》之说，与《摩登伽经》所谓“自在以头为天，足为地，目为日月，腹为虚空，发草木，流泪为河，众骨为山，大小便利为海”；《外道小乘涅槃论》所说“本无日、月、星辰、虚空及地，惟有大水。时大安荼生，形如鸡子。周匝金色。时熟破为二段。一段在上作天，一段在下作地”者，顾极相类。疑为象教东来以后，窃彼外道之说而成。^②既非吾族固有之词，亦非苗族相传之说。至于三皇，则古书所载，一似异说纷如，其实理而董之。仅得两说：一为今文家言，《尚书大传》所谓“遂人为遂皇，伏羲为戏皇，神农为农皇”是也。一为古文家言，《白虎通义》或说，以伏羲、神农、女娲为三皇是也。^③然则安有所谓被迹昆仑之天皇，兴于熊耳、龙门之地皇，乘六羽，驾云车，出谷口之人皇与？又古所谓昆仑，实在青海境内。^④其地与三危，同为西徼。然三危实三苗所流放，而非其发祥之所也。又槃瓠，盘古，音读相同，扣槽之仪，千载未泯。则谓盘古实为彼族古帝，或亦非诬。然必据百家言不雅驯之书，即为彼族十口相传之说，则未免失之早计矣。

苗族古代疆域，似未越洞庭、彭蠡之间。或引《吕览·召类》“尧战于丹水之浦，以服南蛮”。谓此族曾到南阳附近。然汉江上游，在

① 司马贞作《补三皇本纪》，从郑玄说，以伏羲，女娲，神农为三皇。又据《河图三玉历》列天皇，地皇，人皇之说于后，可谓好用纬候矣，然亦不采盘古。

② 案厄泰梨雅优婆尼沙昙(Aitareya Upanishad)云：“大古有阿德摩(Atman)，先造世界，世界既成，后造人。此人有口，始有言，有言乃有火。此人有鼻，始有息，有息乃有风。此人有目，始有视，有视乃有日。此人有耳，始有听，有听乃有空。此人有肤，始有毛发，有毛发乃有植物。此人有心，始有念，有念，乃有月。此人有脐，始有出气，有出气，乃有死。此人有阴阳，始有精，有精乃有水。”其思想亦相类。盖本印度民族旧说，各种神教哲学，同以为蓝本也。

③ 详见第一章附录《三皇五帝考》。

④ 详见第一章附录《昆仑考》。

古代实为濮族之地。^①南蛮二字，为南方异族之通称，不能即断为苗族也。观熊资迁郢而启濮，则夷陵以西，亦为濮族所据。惟熊渠东伐扬粤，至于郢，粤族为今马来人种，当时踪迹，似未能至夏口，^②或实为此族欤？然自楚人拓地而南，又沿江东下，此族遂并洞庭、彭蠡间地而失之，而退入今湖南境内矣。

洞庭流系，古称九江。其独立入湖者凡四：湘，资，沅，澧是也。四水之中，湘水流域地最平坦，故其开辟独早。秦、汉时，文化已较高，盖自楚辟湖南后，湘江流域即逐渐开化矣。^③自汉以后，中国所致力者，乃在今川、鄂、湘三省之交。《后汉书》云：吴起相悼王，南并蛮、越，遂有洞庭，苍梧。秦昭王使白起伐楚，略取蛮夷，始置黔中郡。汉兴，改为武陵。^④岁令大人输布一匹，小口二丈，是谓賫布。……光武中兴，武陵蛮夷特盛。建武二十三年，精夫相单程等据其险隘，大寇郡县。遣刘尚击之，败没。二十五年，马援乃破平之。章、和、安三世，澧中、潯中诸蛮，^⑤多次出击。顺帝永和元年，武陵太守上书，以为蛮夷率服，可比汉人，增其租赋。其冬，澧中、潯中诸蛮反抗。以李进为太守，讨破之。进简选良吏，在郡九年，得其情和。桓、灵时，长沙、武陵、零陵蛮，^⑥复数反抗焉。三国而后，纲纪废弛，此族遂大举进攻。《南史》述其事曰：“东连寿春，^⑦西通巴、蜀，北接汝、颍，往往有焉。其於魏氏，不甚为患。至晋之末，稍以繁昌。渐为寇盗。刘、石乱后，诸蛮无所忌惮，其族渐得北迁。宛、洛萧条，略为丘墟矣。”案夷陵以西，本为濮族所据。夏口附近，亦有氏羌居之，^⑧不尽此族。惟当时此三族者，实已混合而不可分

① 见第十章。

② 见第九章。

③ 参看第一章。

④ 今湖南沅陵。

⑤ 潯水，今澧水支流九溪河。

⑥ 零陵，今湖南零陵。

⑦ 今安徽寿县。

⑧ 各见本章。

耳。^①晋时，于荆州置南蛮校尉，雍州置宁蛮校尉以治之。宋孝武初，罢南蛮，而宁蛮如故。大抵在今河南境者，常叛服于南北朝间，又数进扰。在今湖北境者，深山重阻，尤为诸蛮聚居之所，甚至屯据三峡，断遏水路。荆、蜀行人，为之假道焉。其居今湖南境者，顺附者一户输粟数斛，余无杂调。而宋人赋役严苦。贫者不堪，多逃亡入蛮。蛮无徭役，又不供官税。相互结连，动有百千。州郡力弱，则起而反抗。种类渐多，户口不可知也。其后居楚、豫间者，南北朝末，渐与汉人同化。居楚、蜀间者，周武帝天和末，命陆腾讨破之。惟在今湖南境内者，至隋、唐之世，始加以经略焉。

今湖南境内，湘江流域开辟最早，而沅、资流域较晚。雄、橐、武、辰、酉之域，尤为群蛮荟萃之区，所谓五溪蛮也。隋时，始于今沅陵县地置辰州，唐时进置锦州^②、溪州、^③巫州、^④叙州。^⑤唐末，群蛮分据其地，自署为刺史。宋有天下，任蛮人秦再雄招降之。于是沅江流域之地，分为南北江。北江蛮酋，彭氏最大。南江蛮酋，舒氏、田氏、向氏最大，而资江流域，则为梅山峒蛮所据。其地东接潭，南接邵，西接辰，北接鼎澧，最为腹心之患。又有杨氏者，据今靖县地，号十峒首领，神宗始任章惇，招降梅山蛮，置安化、新化二县。^⑥又平南江蛮，置沅州。^⑦降十峒首领，置诚州。北江之地，亦归版籍，于是今湖南全境，未定者仅西北一隅，与湖北西南境毗连之地。明时，辟施州。^⑧永顺，^⑨保靖。^⑩清康熙时，增辟乾州，^⑪凤

① 马贵与说。

② 今湖南麻阳。

③ 今湖南永顺。

④ 今四川巫山。

⑤ 今湖南黔阳。

⑥ 今县同。

⑦ 今芷江。

⑧ 今湖北恩施。

⑨ 今湖南永顺。

⑩ 今湖南保靖。

⑪ 今湖南吉首。

鳳^①二厅，雍正时，改永顺为府，又辟永绥，^②松桃^③二厅。其初蛮民畏吏如官，畏官如神。有司因之，恣为侵暴。汉人移居其地者又日多。三四十年间，地几尽为所占。苗民忿怒，倡言逐客民，复故地。遂有乾隆六十年之苗乱。调四川、云南、湖南、广西兵数十万，然后破之。未及大定，而川、楚白莲教大起义，官军北调，苗民反抗益烈。后傅鼐总理边务。乃修碉堡，创屯田，练汉民为兵，购收苗人军器，又设学塾以教之，于是局势始定。

贵州一省，原来交通闭塞。其地自湖南入者，经镇远、平越而至贵阳；自滇、蜀入者，经泸州会于毕节；自广西入者，则经郁江上流；多苗族居住之区。元时，始于其地设土司。明初，元所属思州来降。分设思州、思南二司。^④永乐十一年，分其地为八府、四州，设贵州布政司，都指挥使以治之，贵州始列为内地。贵阳附近诸土司，以安氏，宋氏为最大。安氏居水西，宋氏居水东，分统诸土司。后宋氏衰，安氏独盛。天启时，其酋安位之叔邦彦，结永宁^⑤宣抚奢崇明进围贵阳。至崇祯元年，乃平之。贵州东南境，以古州为中心，^⑥环寨千三百余，周几三千里，谓之苗疆。清雍正时，鄂尔泰主改流，任张广泗为经略。后广泗移督湖广。继任者轻慢其事。十三年，苗民又起义。高宗立，复任广泗经略。蹙之丹江、丹拱、都匀间之牛皮大箐中，大肆屠杀，此后贵州苗民曾不断起义反抗。

从来苗民居住今湖南、贵州之境，其族不少。其派别至繁，旧俗彼此不通婚姻。其于汉人，有深闭固拒，不肯通婚者，亦有慕与汉人结婚者。今之论苗族者，或分为纯苗族，不纯苗族。纯苗族，言语，风俗，皆与汉人绝殊。不纯苗族，则介乎汉与苗之间者也。往

① 今湖南凤凰。

② 今湖南花垣。

③ 今贵州松桃苗族自治县。

④ 思州，今贵州铜仁地区及玉屏一带。思南今贵州思南。

⑤ 永宁，今贵州关岭。

⑥ 古州，今贵州榕江。

昔苗人皆务农。亦或猎牧不以为正业。清政府掠夺苗民田地，平地率为汉人所占。苗民多居山地。旧时垦田力作，劳苦倍而收获半。以能勤苦，又不见纷华异物而迁，大抵惟土物爱，一切奢侈诈伪之事，几于绝无，^①故风俗俭朴。其族古代本与汉族相接近，又其进化较迟，故多存汉族古俗。食必先祭，穆然见三古之遗风焉。又善于音乐歌舞，女子长于刺绣、蜡染，衣服多华丽好彩色，或用五色线绣成，此《后汉书》所谓“衣裳斑斓”者邪？旧时无文字，通用汉语文。每聚族致祭，祝词必数先祖之名，能致祝者将老，则择族之强识者传焉。或不及传而死，祭时遂无致祝者，则他族姗笑之。^②故视之颇谨。然究不足恃，故其古事传者甚少云。相传苗族古时崇巫鬼。《淮南子》谓“荆人鬼，越人祝”。荆人盖苗族也。《墨子·非攻》：“昔者三苗大乱，天命殛之。日妖宵出，雨血三朝。龙生于庙，犬哭于市。夏冰。地坼及泉，五谷变化，民乃大震。高阳乃命玄宫。^③禹亲把天之瑞令，以征有苗。四电诱祗。^④有神，人面鸟身，若瑾以待。^⑤搃矢有苗之祥。^⑥苗师大乱。后乃遂几。”^⑦此苗族最古之传说，几充塞之以妖祥矣。^⑧

又有瑶族，分布于湖南之永明、江华、宁远、蓝山、道县、武冈、城步、郴县，广东之连县、连山、肇庆、罗定、合浦，广西之桂林、庆远、马平、平乐。旧时居平地者曰平瑶，居山地者曰山瑶。平瑶多与汉人融化，山瑶则自率其俗，居于岩洞之间。旧时俗称瑶峒也。大多从事农业，少数从事林业。或说瑶亦出于苗。旧说谓因其不事征徭，故称为瑶，说似难信。然其俗亦祀槃瓠，谓其与苗同祖，当

① 如烟赌，苗人即几绝无。

② 案此似亦中国古俗，周官所谓瞽矇诵世系者也。

③ 当作高阳乃命禹于玄宫。

④ 孙诒让云：疑雷电惊振之误。

⑤ 孙氏云：若瑾疑事珪之误。

⑥ 孙云：祥疑当作将。

⑦ 孙云：几，微也。言三苗之后世，遂衰微也。

⑧ 日宵出雨血等，必彼族先有是说，而后吾族从而传之也。

不诬也。

又有畬民者在浙江、福建两省。浙江之旧处州府属最多，衢、严亦有焉。通用汉语文，主要从事农业，长期与汉族杂居，颇为融洽。其俗亦祀槃瓠。祭时为竹箱二，一盛红布囊，刻木为狗头，朱漆之，饰以金箔，置囊中。福建人俗称畬民为狗头蛮，盖以此。一置画像。所画皆其族故事，如槃瓠衔吴将军首，高辛以女妻槃瓠等。其族传说，谓“其祖初化为狗，后又化为龙”云。予案畬畬同音，犹茶茶本一字，《史记·儒林传》“董仲舒弟子吕步舒”。《集解》引“徐广曰：一作茶，亦音舒”。则舒茶同音。今之畬民，或古之群舒乎？^①

^① 《春秋大事表》卷五：今江南庐州府舒城县，为古舒城。庐江县东百二十里，有古龙舒城。舒蓼，舒庸，舒鸠及宗四国，约略在此两域间。

第九章 粵 族

百粵散居东南沿海之地，古有文身之俗。《小戴记·王制》：“东方曰夷，被发文身”“南方曰蛮，雕题交趾。”《正义》释雕题谓“以丹青雕刻其额”。又曰“非惟雕额，亦文身也”。可见古代所谓夷与蛮者，吾国人虽因其所居之方位而异其称，在彼则实为同族。^①《汉书·地理志》：“今之苍梧、郁林、合浦、交趾、九真、南海、日南，皆粤分也。其君禹后，帝少康之庶子云。封于会稽，文身断发，以避蛟龙之害。”此可证春秋时于越之越，亦即汉时南粤、闽粤之粤。《后汉书·袁牢传》：“种人皆刻画其身，象龙文。”《东夷传》：“倭地大较在会稽、东冶之东，与珠崖、儋耳相类，故其法俗多同”。《三国志》：“倭：男子无大小，皆黥面文身。”又云：“夏后少康之子，封于会稽，断发文身，以避蛟龙之害。今倭人好沈没捕鱼蛤，亦文身以厌大鱼水禽。后稍以为饰。诸国文身各异，或左或右，或大或小，尊卑有差。以丹朱涂其身体，如中国用粉也。”《后汉书》马韩：“其南界近倭。亦有文身者。”弁辰：“其国近倭，故颇有文身者。”《北史》：流求：“妇人以墨黥手，为虫螭之文。”《南史》：扶南：“俗本裸，文身被发，不制衣裳。”此可见文身之俗，自滇、缅，经闽、粤以至朝鲜、日本皆有之。闾若臻《四书释地三续》：“《留青札记》曰：某幼时及见今会城住房客名孙禄者，父子兄弟，各于两臂背足，刺为花卉、葫芦、鸟兽之形。因国法甚禁，皆在隐处，不令人见。某命解衣，历历按之，亦有五彩填者，分明可玩。及询其故。乃曰：业下海为鲜者，必须黥体，然后能避蛟龙

^① 《礼记》于西戎、北狄，同言不粒食；东夷、南蛮，同言不火食，亦足见夷蛮风俗之同。

鲸鲵之害。方知剪发文身，古亦自有。《汉书·地理志》于粤已然。录此者，见今犹信耳。”此又足以证古说之非诬，抑可见粤族之有此俗，实由其居沿海使然也。

沿海原始民族或有食人之俗，《墨子·鲁问》：“楚之南，有啖人之国者；其国之长子生，则解而食之，谓之宜弟，美则以遗其君，君喜则赏其父。”①《左传》僖公十九年，宋襄公使邾文公用郕子于次睢之社，欲以属东夷。②可知食人之俗，古所谓蛮夷者，亦皆有之。《后汉书·南蛮传》，引《墨子》之说，以为当时之乌浒人。《注》：万震《南州异物志》曰：乌浒，地名。在广州之南，交州之北。恒出道间，伺候行旅，辄出击之。利得人食之，不贪其财货。并以其肉为肴俎，又取其髑髅，破之以饮酒，以人掌趾为珍异，以食老也。”墨子所识，地不得至交、广之间。范书所云，似近牵合，然其俗则固大同。《南史》毗骞：“国法刑人，并于王前啖其肉。”“国内不受估客，往者亦杀而

① 《节葬下》：“越东有铍沐之国，其长子生，则解而食之谓之宜弟。”《韩非子·二柄·难一》皆云：“齐桓公好味，易牙蒸其子首而进之。”其《十过》及《淮南子·主术训·精神训》高注，并作“首子”。

② 杜《注》：睢水次有妖神，东夷皆社祠之。《后汉书·郡国志》注引唐蒙《博物记》，谓在临沂县。案汉临沂县故城，在今山东临沂县北。又案《春秋》言“用之”者二，一僖公十九年，“邾人执郕子用之”，“一昭公十一年，楚师灭蔡，执蔡世子有以归用之”是也。僖公十九年《公羊》云：“叩其鼻以血社。”《谷梁》云：“叩其鼻以髀社。”注：“髀者，髀也。取鼻血髀祭社器。”昭公十一年《公羊》曰：“恶乎用之，用之防也。其用之防奈何？盖以筑防也。”注：“持其足，以头筑防。”《谷梁》不言用之之法。《左氏》则僖公十九年，载司马子鱼之言曰：“古者六畜不相为用，小事不用大牲，而况敢用人乎？”昭公十一年载申无宇之言曰：“五牲不相为用，况用诸侯乎？”皆谓以人为牲。昭公十年“平子伐莒，取郕，献俘，始用人于亳社。臧武仲在齐，闻之，曰：周公其不殄鲁祭乎？周公殄义，鲁无义。”《诗》曰：德音孔昭，视民不佻。佻之谓甚矣，而壹用之，将谁福哉？”注：“壹，同也。同人于畜牲。”《汉书·五行志》：“宣公十七年，六月，癸卯，日有食之。刘向以为后邾支解郕子。”《山海·东山经》：“凡东山经之首，自橄蕪之山，以至于竹山，凡十二山，三千六百里。其神皆人身龙首，祠毛用一犬。祈神用血。”郭注：“以血涂祭为神也。”《公羊传》云：“盖叩其鼻以社社。音钓饵之饵。”郝氏懿行曰：“《玉篇》云：以牲告神，欲神听之曰社。说与郭异。据郭注，社疑当为髀。《玉篇》云：耳血也。《礼记·杂记》：髀皆于屋下。郑注云：髀，谓将剖割牲以髀，先灭耳旁毛荐之。郭引《公羊传》者，僖公十九年文。然传云盖叩其鼻以血社，不作髀字。《谷梁传》正作叩其鼻以髀社。范宁注云：髀者，髀也。是郭此注当由误记，故竟以《谷梁》为《公羊》耳。”愚案用人之法盖甚多，支解之以为牲，或以其血涂祭器，或持其足，以头筑防皆是。《公》、《谷》同处甚多，窃疑《公羊》之血社，亦当作髀社。

食之。”《北史》流求：“国人好相攻击，收斗死者聚食之。其南境，人有死者，邑里共食之。战斗杀人，便以所杀人祭其神。”《隋书》真腊，“城东有神，名婆多利，祭用人肉。其王年别杀人，以夜祀祷”。此可征食人之俗，曾一度流行于楚、粤、交、广至南洋群岛之原始民族间也。

沿海之族见于古籍者，自淮以北皆称夷，自江以南则曰越。^①夷之见于《禹贡》者有青州之嵎夷，莱州、冀州、扬州之鸟夷，徐州之淮夷。嵎夷，当即《尧典》“宅嵎夷曰暘谷”之嵎夷。今文《尚书》及《帝命验》、《考灵曜》，并作嵎铁，谓在辽西。^②夷铁同音。《说文》土部：“嵎夷，在冀州阳谷。立春日，日直之而出。”山部：“嵎山，在辽西。一曰嵎铁，嵎谷也。”盖辽西之地，或以为属冀，或以为属青。马融曰：“嵎，海嵎也。夷，莱夷也。嵎谷，海嵎夷之地名。”^③则合嵎夷、莱夷为一。案《史记·封禅书》秦始皇东游海上，祠齐之八神。其七曰日主，祠成山。成山斗入海，最居齐东北隅，以迎日出云。韦昭曰：成山，在东莱不夜县。自古相传为日出之地。似与马说合。^④然《禹贡》下文，别言“莱夷作牧”，则马说似非。要之总在今山东辽宁境也。莱夷，即春秋时之莱，为齐人所灭者。据《汉志》，地当在今山东黄县。扬州、冀州之鸟夷，今《禹贡》皆作岛。然《正义》谓孔读鸟为岛，则伪孔经文亦作鸟也。郑释冀州之“鸟夷皮服”云：“东北之民，搏食鸟兽者。”^⑤颜师古释《汉志》之鸟夷卉服云：“东南之民善捕鸟者。”伪孔读为岛似非，然亦不能确知所在。淮夷，《郑注》云：“淮水之上夷民。”^⑥予案古所谓徐戎，亦称为徐夷者，似与淮夷是一。以其居淮水之上，则曰淮夷；以其州表之，则曰徐戎，犹粤之在扬州分者

① 作粤同。

② 《书》疏及《尧典释文》，《史记·夏本纪索隐》。

③ 《书释文》。

④ 汉不夜故城，在今山东文登县东。

⑤ 《书正义》。

⑥ 见《正义》。

称扬粤耳。^① 嵎夷，鸟夷，后世无闻焉。而淮夷，徐戎，则特为强悍。至秦有天下，乃悉散为人户。^② 其称为越者：则《史记·楚世家》：“熊渠伐扬粤，至于鄂，立长子康为句亶王，中子红为鄂王，少子执疵为越章王，皆在江上楚蛮之地。”句亶，《集解》“张莹曰：今江陵也。”^③ 鄂，《集解》：“《九州记》曰：今武昌。”越章，宋翔凤谓即汉丹阳，今当涂县。^④ 更证以秦伯，仲雍，文身断发，^⑤ 则自江陵以东，迄于吴会，皆为此族居地。更南，则今浙江以南曰於越，瓯江以南曰瓯越，福建地曰闽越，两广，越南地曰南越，秦、汉时皆入中国版图。而凭恃险阻之山越，至于六朝，犹常反抗汉族。

其留居川、滇境者：曰哀牢，曰僚。哀牢缘起，《后汉书》述之曰：“其先有妇人名沙壹，居于牢山。尝捕鱼水中，触沈木，若有感，因怀孕。十月，产子男十人。后沈木化为龙，出水上。沙壹忽闻龙语

① 仍孔说即如此。《说文》：“邾，邾下邑也。鲁东有徐城。”《史记·鲁世家》：“顷公十九年，楚伐我，取徐州。”徐广曰：“徐州在鲁东。今薛县，六国时徐州。”案今山东滕县。《汉志》：临淮郡，徐县，即春秋时徐子之国，则江方阴睦县，可见徐戎跨地甚广。

② 《后汉书·东夷传》：古有所谓九夷者，即淮夷也。孙治让云：“《尔雅·释地》云：九夷，八狄、七戎、六蛮，谓之四海。《王制》孔注云：九夷，在《东夷传》九种：曰畎夷，于夷，方夷，黄夷，白夷，赤夷，玄夷，风夷，阳夷。李注注《尔雅》云：一曰玄夷，二曰乐浪，三曰高丽，四曰满饰，五曰莞余，六曰东夷，七曰东屠，八曰倭人，九曰天鄙。按《王制》疏所云，皆海外远夷之种别。此九夷与吴楚相近，三即夷，非海外东夷也。《书·叙》云：成王伐淮夷，遂伐奄。《荀非子·说林》上篇云：周公旦攻九夷而商盖服。商盖即商奄，则九夷也即淮夷。故《吕氏春秋·古乐》篇云：成王立，殷民反。王命周公践伐之。商人服象，为虐于东夷。周公遂以师逐之，至于江南。又《乐成》篇云：犹尚有管叔、蔡叔之事，与东夷八国不听之谏。高注云：东夷八国，附从二叔，不听王命。周公居摄三年伐奄，八国之中最大，著在《尚书》。余七国小，又先服，故不载于经也。案东夷八国，亦即九夷也。春秋以后，盖臣属楚、吴、越三国。战国时，又專屬楚。《说苑·君道》篇说越王勾践与吴战，大败之，兼有九夷。《淮南子·齐俗训》云：越王勾践霸天下，洒上十二诸侯，皆率九夷以朝。《战国策·秦策》云：楚苞九夷，方千里。《魏策》云：张仪曰：楚破南阳，九夷内附，许鄢陵死。《文选》：李斯上秦始皇书，说伐代逐，包九夷，制郢、郢。李注云：九夷，即楚夷也。若然，九夷实在淮、泗之间，北与齐、鲁接壤。故《论语》：子欲居九夷。参互观之，其源流固可考矣。”案孙说是也。李巡注《尔雅》夷蛮戎狄，多引汉以后四夷之名，其力固会，显然。孙说见《墨子间诂非攻中》篇。

③ 《索隐》：“系本康作庸，亶作祖。”

④ 《过庭录·楚鬻熊居丹阳武王徙郢考》。

⑤ 《史记·吴秦伯世家》。

曰：若为我生子，今悉何在？九子见龙惊走，独小子不能去，背龙而坐。龙因舐之。其母鸟语，谓背为九，谓坐为隆。因名之曰九隆。及后长大，诸兄以九隆能为父所舐而黠，遂共推以为王。后牢山有一夫一妇。复生十女子，九隆兄弟。皆娶以为妻。后渐相滋长，种人皆刻画其身，象龙文，衣著尾。”又云：“哀牢人皆穿鼻僇耳。其渠帅自谓王者，耳皆下肩三寸，庶人则至肩而已。”观其传说及其习俗，而其种族可知矣。

哀牢夷之改设郡县始于后汉明帝时。以其地为永昌郡，今云南之保山县也。《唐书》称南诏为哀牢夷之后，然南诏系出两爨，自是濮族，见下篇。惟古哀牢夷之族，见于《唐书》者亦不少，今为料拣之：其居古永昌郡者，谓之永昌蛮。永昌蛮之西，有扑子蛮。“趫悍，以青袈罗为通身袴，善用竹弓，入林射飞鼠，无不中者。人多长大，负排持犁而斗。”又有望蛮者，“用木弓短箭，镞傅毒药，中者立死”。茫蛮，亦呼茫诏。在永昌之南。有茫天连、茫吐姆大睽、茫昌、茫鲊、茫施等，“皆楼居，无城郭。或漆齿，或金齿，象才如牛，养以耕”。有望苴蛮，在澜沧江西，“男女勇捷，不鞍而骑。善用矛剑，短甲蔽胸腹，鞬鞞皆插猫牛尾，驰突若神。南诏出兵，辄以为前驱焉”。又有寻传蛮者，“射豪猪，生食其肉。战以竹笼头如兜鍪。俗无丝纊，跣履荆棘，不苦也”。其西有裸蛮，亦曰野蛮。“漫散山中，无君长。作槛舍以居，男少女多。无田农。以木皮蔽形。妇或十或五，共养一男子。”有黑齿、金齿、银齿三种。“见人以漆及镂金银饰齿，寝食则去之。”又有绣脚种，“刻踝至腓为文”。有绣面种，“生逾月，涅黛于面”。有雕题种，“身面皆涅黛”。有穿鼻种，“以金环径尺贯其鼻，下垂过颐。若长，以丝系环，人牵乃行。其次以二花头金钉贯鼻下出”。又有长髯种、栋锋种，“皆额前为长髻，下过脐，行，以物举之。若长，则二女在前，共举其髻乃行”。又有三濮，“在云南徼外千五百里。曰文面濮，镂面，以青涅之。曰赤口濮，裸身而折齿。剡其唇使赤。曰黑焚濮，山居如人，以幅布为裾，贯头而系之。唐高

宗龙朔中，亦通朝贡焉。凡此诸蛮，观其习俗及其分布之地，皆可知其为古粤族也。自南诏兴，大抵为所抚用矣”。^①

僚地与氐羌相杂，南接濮，然其文明程度，较濮与氐羌为低，可证其别为一族。史称“其人依树积木以居其上，名曰干阑”。此与后印度诸国同。又称其人“自卖以供祭”，“俗畏鬼神，尤尚淫祀。所杀之人，美鬢髻者，乃剥其面皮，笼之于竹，及燥，号之曰鬼，鼓舞祀之，以求福利，报怨相攻击，必杀而食之”。可证其原始风俗亦有杀人以祭及食人之习。又其人能“卧水底，持刀刺鱼”。此文身之习所由来也。其妇人横布二幅，穿中贯其首，号曰通裙。亦即古所谓贯头衣。凡此诸端，皆与粤族同俗。

僚族居地，《北史》云：“自汉中达于邛、^②笮，^③川洞之间，所在多有。”其强大始于李势时。桓温破蜀，力不能制。又蜀人东流，山险之地多空。僚遂挟山傍谷。与夏人参居者，颇输租赋。在深山者，不为编户。梁、益二州，岁岁伐僚，以自裨润，公私颇藉为利。魏立巴州，以统诸僚。又立隆城镇，所统僚二十万户。岁输租布，谓之北僚。后梁州为梁所有，有属梁。周人平梁、益，令所在抚慰。其与华人杂居者，亦颇从赋役。然官府每岁命随近州镇，出兵讨之。获其生口，以充贱隶。谓之压僚。商旅往来，亦资为货；公卿民庶之家，有僚口者多矣。唐高祖、太宗、高宗三朝，僚多次在剑南州郡反抗。后遂无闻焉。其在四川碁江县境者，谓之南平僚。其王朱氏，唐太宗贞观三年，遣使内款。以其地隶渝州。宋神宗熙宁中，熊本平其地，为南平军。

往昔云南临安、开化、广南、广西、潯江、昭通诸县，有旧称土僚者。旧俗生子置水中，浮则养之。沈则弃之。其在贵州之镇远、施秉、余庆者旧称水仡佬。旧习隆冬能入水捕鱼。在平越、黔西者旧

① 今云南元江、临安、广西、广南之扑喇蛮，相传为九隆之裔。

② 今四川西昌。

③ 今四川汉源。

称打牙伧佬。旧俗女将嫁，折其二门齿。^①在贵定者旧称剪发伧佬。旧俗畜发寸许，四垂，长则剪之。在平远者旧称锅圈伧佬。旧俗女服青布，束发如锅圈。旧称披袍伧佬。旧俗袍前短后长，无袖。此外都匀、镇远、遵义、大定，亦皆有伧佬。又有所谓木佬者，在都匀、清平、贵定。近人游记云：“木佬，即僕僚。为山僚所征服，山僚蔓衍黔、粤间，自称主僚。主僚自征服僕僚后，淫酗专横，又为罗罗所征服云。”案伧佬亦作倅佬，乃僚之重言也。僚与伧佬大抵以农业为主。

今之海南岛，乃汉珠崖、儋耳二郡。居其地之族曰黎，躯干肤色，皆类马来。其稍与汉人同化者曰熟黎，居深山者曰生黎。生黎妇女，仍有文身之习，自两耳至腮，刺为三文或五文云。除文昌、琼东二县外，所辖皆有黎族。原为古粤族之一支，生产以农业为主。

云南之地，自唐时为南诏所据。五代为大理政权，其王受宋封为云南节度使，元设云南行省，明初仍之。其时疆域，实抵今后印度半岛。明时，永昌而外蛮族，以平缅、麓川为大。今保山以西之潞江；腾冲以西南之南甸、干崖、盏达；越龙溪、天马诸关，入今缅甸境，伊洛瓦底江右岸之孟拱、孟养，左岸之八莫、孟密，皆其地也。自此以南，今蛮得勒、阿瓦一带白缅。其南为洞吾。又其南为古刺。^②普洱以南为车里。^③其南为老挝。^④又其南为八百媳妇。^⑤皆设有中国之地方政府或宣慰司。其疆域，西及那加山脉实苞今伊洛瓦底江上游，及萨尔温、湄公河之上游也。

平缅、麓川，元时本为两宣慰司。明太祖乃命平缅酋思伦发，兼统麓川。后伦发为其部长刀干孟所逐。明为之讨禽干孟，乃得还。于是分其地，设孟养、木邦、孟定、潞江、干崖、大候、湾甸诸土司。伦

① 此即《唐书》赤口濮之俗。近人游记云：今已无此习矣。

② 今白古。

③ 云南境内澜沧江右岸。

④ 在泰国西北。

⑤ 缅甸东境，南界安南，东接泰国。相传其酋长有妻八百，故名。

发弟任发，欲复故地。英宗时，叛。王骥讨之。任发走孟养，为緬所执送。子机发，仍据孟养。骥又讨破之。立陇川宣抚司而归。机发据孟养自如。朝命骥三讨之，机发遁去。部人复奉任发少子禄居孟养。骥知终不可平，乃与立约：许居孟养，部勒诸酋而立石金沙江，曰：“石烂江枯，尔乃得渡。”遂班师。后机发亦为緬所得。思氏怨緬。禄子与孟密、木邦攻緬，破之。杀其酋莽纪岁。^① 緬当明初，亦分緬中、緬甸两宣慰司。后緬甸酋为木邦所杀。部众共推莽得刺为主。是为莽氏有国之始。而緬中不复见，盖为緬甸所并也。纪岁既为思氏所杀。子瑞体，走洞吾母家。其酋养为子，遂有土地。时葡萄牙人已通商东洋，瑞体傭为兵。并古刺。降孟密、木邦、潞江。抚州人岳凤，商于陇川。陇川宣抚司多士宁才之，妻以妹，用为记室。凤结瑞体，杀士宁，据其位。遂破干崖，服蛮莫，攻孟养，破之。思氏酋名个者走死。世宗嘉靖八年，瑞体卒，子应里袭，进扰。刘綎大破之。直抵阿瓦，然亦仅定陇川而归。遂成今日之境界矣。

粤族古有文身食人之俗，已见前。又世界断发之俗，亦当以此俗为最早。其事散见古书，不可枚举。今试略征之。《左传》哀公七年曰：“太伯端委，以治周礼。仲雍嗣之，断发文身，裸以为饰。”十一年，齐与吴战，“公孙挥命其徒曰：人寻约，吴发短”。十二年曰：“吴夷狄之国也，祝发文身。”可见春秋时之吴，确有此俗。昭公三十年，“吴灭徐。徐子章禹，断其发，携其夫人，以逆吴子”。盖从其俗以示服。杜《注》云：“自刑示惧”者，非也。《墨子·公孟》：“昔者越王勾践，剪发文身，以治其国。”《庄子·逍遥游》：“宋人资章甫而适诸越，越人断发文身，无所用之。”《韩非·说林下》：“公孙弘断发而为越王骑。”《淮南子·齐俗训》：“三苗髻首，羌人括领，中国冠笄，越人剃鬋，其于服一也。”《说苑·善说》：“越文身鬋发，范蠡、大夫种出焉。”《奉使》：“越使者诸发，谓宋曰：今大国有命，冠则见以礼，不冠则否。假令大国之使，时过敝邑，敝邑之君，亦有命矣。曰：客必剪发

^① 亦作纪瑞。

文身，然后见之。于大国何如？”可见春秋战国时之越人，亦确有此俗。又《左传》昭公七年，“楚子享公于新台，使长鬣者相”。注：“鬣，须也。”《正义》曰：“吴楚之人少须，故选长鬣者相礼也。”十七年，吴公子光与楚战，“使长鬣者三人，潜伏于舟侧”。注亦曰：“长鬣，多髭须，与吴人异形状，诈为楚人。”案吴人无皆少须之理。《说文》髡部：“鬣，发鬣鬣也。”段氏玉裁曰：“鬣鬣，动而直上貌。所谓头发上指，发上冲冠也。辞赋家言旌旗猎猎，是其假借字也。人部曰：儼，长壮儼儼也。字意略同。今《左氏》长儼作长鬣，杜以多须释之，殊误。须下垂，不称鬣。凡上指者称鬣。”此说甚精。鬣既不可训须，长亦不可训多。盖吴发短，使长发者诈为非吴人耳。毛发可以御寒，故北族被发，南人断发，中原敛发，亦各适其地也。《礼记·王制》：“东方曰夷，被发文身。”《韩非·说林上》：“越人被发。”《淮南子·原道训》：“九疑之南，被发文身。”“被”必“断”之误。《史记》、①《说苑》、②《论衡》，③皆谓尉佗椎髻，盖虽不同乎夏，而犹未忍尽即乎夷，故未肯断其发，非越人有椎髻之俗也。

此族远古有裸体之习，亦久而后改。《吕览·贵因篇》：“禹之裸国，裸入衣出。”④《左氏》谓仲雍“裸以为饰”，则西周以前，吴、越之人，犹有不衣者。春秋以来，盖此族遂改。然《韩非·说林》谓“越人跣行”，则犹不履也。《论衡·恢国篇》：“夏禹偃入吴国。太伯采药，断发文身。唐、虞国界，吴为荒服。越在九夷，属衣关头。今皆夏服，褒衣履舄。”则秦、汉之世，被服全与中夏同矣。其远方则犹未变。

自汉建置交趾、九真、日南等郡，南越渐接受汉族文化。《后汉书·南蛮传》云：“凡交趾所统，虽置郡县，而言语各异，重译乃通。人如禽兽，长幼无别，项髻徒跣，以布贯头而著，⑤后颇徙中国罪人，

① 《陆贾传》。

② 《奉使》。

③ 《率性》、《遣告》。

④ 《淮南子·原道训》：“禹之裸国，解衣而入。”

⑤ 案此所谓项髻者，指杂居其间之濮族言之。

使杂居其间，乃稍知言语，渐见礼化。光武中兴，锡光为交趾，任延守九真。于是教其耕稼，制为冠履。初设媒聘，始知姻娶。建立学校，导之礼义。”《循吏传》云：“九真俗以射猎为业，不知牛耕。民尝告桀交趾，每致困乏。延乃令铸作田器，教之垦辟田畴。岁岁开广，百姓充给。又骆越之民，无嫁娶礼法。各因淫好，无适对匹。不识父子之性，夫妇之道。延乃移书属县，各使男年二十至五十，女年十五至四十，皆以年齿相配。其贫无礼聘，令长史以下，各省俸禄，以振助之。同时相娶者二千余人。其产子者，始知种姓，咸曰：使我有是子者，任君也。多名子为任。初平帝时，汉中锡光为交趾太守，教导民夷，渐以礼义，化声侔于延。领南华风，始于二守焉。”可见南越隶属汉代版图时，得汉族文化之熏陶，为不少矣。此外以汉人作蛮夷大长者，盖亦不少。最古之越无余，吴太伯即其例。《唐书·环王传》：“又有西屠夷。盖援^①还留不去者，才十户。隋末，孳衍至三百，皆姓马。俗以其寓，故号马留人。”亦其一例。

诸族中，以僚之发展较迟，岂以其“散居山谷”故邪？《北史》云：“僚无氏族之别，又无名字。所生男女，惟以长幼次第呼之。”^②其丈夫称阿谟、阿段，妇人称阿夷、阿等之类，皆其次第称谓也。往往推一长者为王，父死子继，若中国之贵族。亦不能远相统摄，好相杀害。人皆不敢远行。至于忿怒，父子不相避，惟手有兵刃者先杀之。若杀其父，走避于外，求得一狗，以谢其母，不复嫌恨。亡失儿女，一哭便止，亦不复追思。相劫掠卖取如猪狗。往往亲戚比邻，指授相卖。被卖者不服，逃窜避之。乃将买人指捕，逐若亡叛。获便缚之。但被缚，即服为贱隶，不敢称良矣。女多男少，妇人任役。婚法，女先以货求男。^③贫者无以嫁，则卖为婢。惟执楯持矛，不执弓矢。”是南北朝时尚较落后。

① 马援。

② 案商人多以甲乙为名，盖亦此俗。

③ 案此俗与林邑同。

第十章 濮 族

濮，亦作卜，^①又作𡗗。^②后称罗罗，即今彝族。^③亦西南一大族也。此族地与苗族相接，而种族判然不同。近人谓“其异，云贵人类能言之。日本鸟居龙藏，探险苗疆，益言其骨骼，习俗，文明，彼此皆有差异。且二族世为仇讎，今犹剧烈焉”。此族所居，为今黔江、金沙江、大渡河流域。《汉书》所谓“南夷君长以十数，夜郎最大；^④其西靡莫之属以十数，滇最大；^⑤自滇以北，君长以十数，邛都最大”者也。^⑥然上溯周秦以前，此族之地，实尚不止此。今录予所撰《微卢彭濮考》一篇于下，以见其概。

《微卢彭濮考》曰：《书·牧誓》：“及庸、蜀、羌、髳、微、卢、彭、濮人。”释地者多不能得其在。今案庸即春秋时之庸。^⑦蜀亦即后世之蜀。羌族蔓延甚广，从武王伐纣者，当在陇蜀之间，别见予所撰《鬼方考》。微，卢，彭，濮，亦皆见于《左氏》。惟髳不能确知所在耳。《左氏》：桓公十二年，“伐纣之役，楚师干涉于彭。罗人欲伐之”。杜《注》：“彭水，在新城昌魏县。”今湖北之郢阳，即《牧誓》之彭也。明年，“楚屈瑕伐罗。及郢，乱次以济。及罗，罗与卢戎两军之，大败之”。《释文》云：“卢如字，本或作卢，音同。”则德明所据本，

① 《周书·王会解·伊尹四方令》。

② 《说文》：“𡗗，犍为蛮夷也。”

③ 《山海经·海外北经》：“有青龙焉，状如虎，名曰罗。”郝疏：“吴氏引《天中记》云：今云南蛮人，呼虎亦为罗罗。”颇疑此族人以虎自号。

④ 夜郎，今贵州铜梓。

⑤ 滇，今云南昆明滇池附近地区。

⑥ 邛都，今四川西昌。

⑦ 《左氏》杜注，在上庸县。今湖北竹山。

卢戎作庐戎。文公十四年，公子燮、公子仪以楚子出，将如商密。庐戢黎及叔麋诱而杀之。十六年，楚大饥。庸人帅群蛮以叛楚。麋人帅百濮聚于选，将伐楚。自庐以往，振麋同食。使庐戢黎侵庸。杜《注》：“庐，今襄阳中庐县。戢黎，庐大夫。”此庐盖即卢戎旧地。是时属楚为邑。晋中庐故址，在今湖北南漳县东。鄢水，杜《注》谓在襄阳宜城县，今湖北之宜城。罗，《释例》谓是时在宜城山中。宜城、南漳密迩，宜可合御楚师。《书》：“西旅献獒。”《正义》曰：“西方之戎，有国名旅者。”其说当有所本。旅、卢音同，春秋时之卢戎，盖即从武王伐纣之卢，亦即献獒之旅也。^①文公十一年，楚子伐麋，熊大心败麋师于防渚。潘崇复伐麋，至于锡穴。此麋当即十六年帅百濮将伐楚之麋。《十三州志》：房陵，即春秋防渚。今湖北房山县。锡穴，《释文》云：“或作锡。”《十道志》：郧乡本汉锡县，古麋国也。^②盖即锡穴，今湖北郧乡县也。《释例》谓麋在当阳，去防渚、锡穴太远。罗泌谓在当阳者为麋，在汉锡县者当作麋，其说盖是。麋麋形近易讹。哀公十四年，“逢泽有介麋焉”。《释文》谓麋又作麋其证。《谷梁》庄公二十八年，“筑微”，《左氏》作“麋”，则“麋”、“微”音同通用之证也。麋，亦即《牧誓》之“微”也。然则微、卢、彭三国，皆与庸相近。其地，皆在汉中、襄、郧一带，适当周人自武关东出之路。其能从武王以伐纣，亦固其所。濮为种族之名，散布之地甚广。《释例》谓建宁郡南有濮夷，^③盖就当时种落言之，而牧野所从，则不在此。《左氏》昭公九年，王使詹桓伯辞于晋曰：“自武王克商以来，巴、濮、楚、邓，吾南土也。”巴即春秋时之巴国，今四川之阆中县。邓，在今河南邓县，楚封丹阳，后人多误谓今秭归。据宋氏翔凤所考，地实在今商县之南，南阳之西，丹、析二水入汉处。^④濮与此三国并举，其地亦必相近，故《国语》“楚蚳冒始启

① 《括地志》：金州，有古卢国，则在今陕西安康县。

② 《御览·州郡部》引。

③ 晋建宁，今云南曲靖。

④ 《过庭录·楚鬻熊居丹阳、武王徙郢考》。

濮”，韦昭谓为“南阳之国”也。《论语》文王为西伯，“三分天下有其二，以服事殷”。三分有二，郑玄谓指雍、梁、荆、豫、徐、扬言之。而韩婴叙《诗》，谓周南之地，在南阳、南郡之间。则牧野之役，武王实合西南诸族以伐纣也。濮为种族之名，非指一国。故杜《注》谓庸亦百濮夷。然则微、卢、彭诸国，亦未必非濮矣。楚初封丹阳，熊绎徙荆山，^①武王迁郢，其所启，盖皆濮地也。^②

《左传》昭公十九年，楚子为舟师以伐濮。“费无极言于楚子曰：若大城城父，而置太子焉，以通北方，王收南方，是得天下也。”此言在迁郢以后，则此濮必在郢之南。后来所辟黔中郡，疑亦濮族之地。自此以西南，则接于夜郎、滇王矣。然则濮族古地，实跨豫、鄂、湘、川、滇、黔六省也。^③

濮族古国，实以夜郎及滇为大宗，《后汉书》云：“初有女子。浣于遯水，有三节大竹，流入足间。闻其中有号声，剖竹视之，得一男儿，归而养之。及长，有才武，自立为夜郎侯，以竹为姓。”又云：“夜郎之降也，天子赐其王印绶，后遂杀之。夷人以竹王非血气所生，甚重之，求为立后。牂牁太守吴霸以闻。乃封其三子为侯。死，配食其父，夜郎谓之竹王三郎神。”往昔贵州吐司，犹有自谓其先出于竹中者，亦可见其传世之远矣。其开辟则始于楚。楚顷襄王时，庄骄从沅水伐夜郎，西至滇，以兵威定属楚。欲归报，会秦击夺楚巴、黔中郡，道不通。乃以其众王滇。变服，从其俗以长之。秦时，诸此国颇置吏焉。汉兴，皆弃此国，而开蜀故徼。巴蜀民或窃出商贾，取其箝马，犍僮，旄牛。武帝建元六年，番禺令唐蒙使南

① 在今南漳。

② 以上为《微卢彭濮考》原文。《山海经·中山经》：“荆山，其中多犛牛。”注：“旄牛属也。黑色，出西南徼外也。”此亦濮人在今湖北之一证。

③ 如卢国在安康，则并跨今陕西省。《左传》昭公元年，赵孟谓楚。曰：“吴濮有衅，楚之执事，岂有顾盟？”盖楚东南界吴西南界濮也。《尔雅》：四极，“南至于濮铅”。盖即此一带。《广韵》濮字注，引《山海经》曰：“濮铅，南极之夷。尾长数寸，巢居山林。”似据汉以后书伪造。《后汉书》述盘瓠种，哀牢夷，衣皆著尾也。不可以释《尔雅》。今本《山海经》，亦无此文。

粤。南粤食蒙蜀枸酱。蒙问所从来。曰：道西北牂柯江。江广数里，出番禺城下。蒙归，问蜀贾人。知夜郎临牂柯江。江广百余步，足以行船。蒙因上书，以为制粤一奇。武帝拜蒙中郎将，说谕夜郎，以其地为犍为郡。后以公孙弘言。罢事西南夷。元狩元年，张骞言：“使大夏时，见蜀布，邛竹杖。问所从来。曰：从东南身毒国，可数千里，得蜀贾人市。或闻邛西可二千里有身毒。”骞因盛言：“大夏在汉西南，慕中国。患匈奴隔其道。诚通蜀身毒国道，便近，又无害。”于是通滇。南粤反，发南夷兵。且兰君反。^①汉兵还诛之。平其地，为牂柯郡。以邛都为越嶲郡。夜郎遂入朝。^②因使讽谕滇王。滇王众数万，其旁东北劳深、靡莫之属，皆同姓，相仗，未肯听。元封二年，发巴、蜀兵击，灭劳深、靡莫。滇举国降，以为益州郡。

自汉开此等地方为郡县后，蛮夷大姓，遂多中原之人。《后汉书》云：公孙述时，牂牁大姓，龙、傅、尹、董氏，与郡功曹谢遍保境为汉。使从番禺江奉尊。光武嘉之，并加褒赏。《唐书》所载，有东谢蛮，在黔州西三百里。其附近有牂牁蛮，东谢之南曰西赵，西曰夷子。东谢及牂牁，酋长皆姓谢氏。牂牁后改以赵氏为酋长。西赵酋长姓赵氏，夷子酋长姓李氏。宋时，有龙、方、张、石、罗五姓，常奉职贡，受爵命，而龙氏最大。神宗元丰七年，有程蕃，乞贡方物，愿依五姓例著籍，许之。哲宗元符二年，有韦蕃者，亦来贡，总称西南七蕃云。

滇中望族，爨为最著。《唐书》云：“西爨，自云本安邑人。七世祖为晋南宁太守。^③中国乱，遂王蛮中。”而《大爨碑》谓其先出于楚令尹子文，未知孰是。要必中国人王蛮中者也。爨有东西之分。东爨谓之乌蛮，西爨谓之白蛮，即今彝族之祖先。案《唐书》：初襄

① 且兰，今贵州福泉。

② 地为县，属牂柯。

③ 今云南曲靖。

五姓皆乌蛮，其妇人衣黑缙；东钦二姓皆白蛮，其妇人衣白缙。则其服饰之别，亦由来旧矣。乌蛮种落，见于《唐书》者：曰阿芋路，曰阿猛，曰夔山，曰暴蛮，曰卢鹿蛮，曰磨弥敛，曰勿邓。阿芋路，居曲州、^①靖州^②故地，勿邓则居汉会无县故地焉。^③其北有初裹五姓，居邛部、^④台登^⑤之间。又邛部六姓之中，其五姓为乌蛮。勿邓南七十里，有两林部落。其南，又有丰琶部落。两林部落，则十低三姓，阿屯二姓，亏望三姓隶焉。丰琶部落，则阿诺二姓隶焉。黎、^⑥嵩、^⑦戎^⑧三州之鄙，又有粟蛮二姓，雷蛮三姓，梦蛮三姓，与两林、丰琶皆隶勿邓。其在南诏附近者，则有独锦蛮、施蛮、顺蛮及磨些蛮。^⑨在滇池之西者，有徒莫只蛮、俭望蛮、^⑩白水蛮。^⑪其西，为大勃弄、小勃弄、二川蛮，西接叶榆。又其西，即六诏也。白蛮境域，自弥鹿、升麻二州，^⑫南至步头。^⑬其种落之见于史者，又有邛部六姓中之一姓及居北谷之东钦蛮二姓，^⑭及始居弄栋，^⑮后乃散居剑、共诸川^⑯之弄栋蛮焉。

此外未明著其属于乌蛮抑白蛮者，则嵩州新城旁有蒙蛮、夷蛮、讹蛮、狼蛮。戎州管内有驯、骋、浪三州蛮。^⑰又有夷望、鼓路、

① 今已并入四川高县。

② 今四川屏山。

③ 今四川会理。

④ 今四川邛崃。

⑤ 今四川冕宁。

⑥ 今四川汉源。

⑦ 今四川西昌。

⑧ 今四川宜宾。

⑨ 在今丽江，剑川一带。

⑩ 今云南楚雄一带。

⑪ 在姚安大姚境。

⑫ 今曲靖。

⑬ 今建水。

⑭ 今四川冕宁。

⑮ 今云南姚安。

⑯ 丽江剑川境。

⑰ 驯、骋二州，均在今屏山县境。

西望、安乐、汤谷、佛蛮、亏野、阿醯、阿鹑、柳蛮、林井、阿异十二鬼主，皆隶嶲州。有奉国、苴伽等十一部落，春秋受赏于嶲州。又戎、嶲二州之北有浪稽蛮、罗哥谷蛮。其东有婆秋蛮、乌皮蛮。其南有离东蛮、锅铎蛮。及其西之磨些蛮，均与南诏、越析相姻娅。黎州南路有廓清道部落主三人，婆盐鬼主十人。又有阿逼蛮，分十四部落，^①其最远者则为松外诸蛮。^②凡此，虽未明著其属于白蛮及乌蛮，然其所居之地及其习俗观之，均可知其与乌、白蛮同种，而为古所谓濮族也。

爨氏之盛，盖自晋政不纲以来，其初犹羁縻不绝。梁元帝时，南宁州徐文盛，以召诣荆州。有爨坟者，遂据其地。死，子震玩分统其众。隋文帝开皇初，命韦世冲以兵戍之。置恭州、^③协州、^④昆州。^⑤未几叛，史万岁击之。至西洱河、滇池而还。震玩惧而入朝，文帝诛之。唐高祖即位，以其子弘达为昆州刺史，奉父丧归。死，以爨归王为南宁州都督。为安宁^⑥两爨大鬼主崇道所杀。妻阿吒，乌蛮女也。走父部，乞兵相仇。于是其子守隅，为南宁州都督，皮逻阁以女妻之。又以一女妻崇道子辅嗣。崇道，守隅，相攻击不置。阿吒诉皮逻阁。皮逻阁为兴师。崇道走黎州。遂虏其族。杀辅嗣，收其女。崇道俄亦被杀，诸爨稍离弱。阁罗凤立。召守隅并妻归河谿，不通中原。阿吒自主其部落，岁入朝。阁罗凤以兵胁徙西爨户二十万于永昌城。^⑦东爨以言语不通，多散依林谷，得不徙。于是乌蛮种复振。徙西爨故地，与峰州为邻。^⑧德宗贞元中，

① 曰大龙池，曰小龙池，曰控，曰苴质，曰乌拔，曰苴货，曰鹰栗水，曰戎列，曰婆狄，曰石地，罗公，曰迷，曰离曼，曰里汉。

② 今松潘县西境。

③ 今四川庆符县西。

④ 今四川珙县南。

⑤ 今云南昆明。

⑥ 城名，今云南安宁。

⑦ 今云南保山。

⑧ 在今越南境。

置都督府，领羁縻州十八，世与南诏婚姻云。

宋时，诸蛮通朝贡者，其属于黎州者凡十二种：即山后两林蛮、①邛部州蛮、②风琶蛮、③保塞蛮、④三王蛮、⑤西蕃蛮、⑥净浪蛮、⑦白蛮、⑧乌蒙、⑨阿宗蛮、⑩大云南蛮、小云南蛮⑪是也。丰琶、两林、邛部最大，其余诸小蛮皆分隶焉。邛部州蛮，即唐勿邓，号百鬼都鬼主，最强悍。尝招集蕃汉亡命，侵攘他种，闭其道以取利。其属叙州者，有三路蛮：西北曰董蛮，正西曰石门部，东南曰南广蛮。徽宗大观三年，夷酋罗永顺、杨光荣、李世恭等，各以其地内属。建纯，滋，祥三州，后皆废。属威州者⑫有唐保、霸二州，因称保霸蛮。政和三年，以保州为祺州，⑬霸州为亨州，⑭后亦废为寨。属茂州者有盖、涂、静、当、直、时、飞、宕、恭等九州。政和五年，直州内属，以其地置寿宁军、延宁军，未几亦废。其属泸州者有溪峒州十，仁宗庆历初，乌蛮王子得盖请复建姚州，许之，即以得盖为刺史。得盖死，其子窃号罗施鬼主。死，子仆夜袭其号。浸弱，不能令诸部。乌蛮有二酋：曰晏子，居直长宁，⑮宁远⑯以南；曰斧望箇恕，居近纳溪。⑰浸强大，擅劫晏州山外六姓，⑱及纳溪二十四姓生夷。熙

① 在州南七日程。

② 州东南十二日程。

③ 州西南千一百里。

④ 州西南三百里。

⑤ 州西百里。

⑥ 州西三百里。

⑦ 州南百五十里。

⑧ 州东南百里。

⑨ 州东南千里。

⑩ 州西南二日程。

⑪ 即大理。

⑫ 今四川汶川。

⑬ 今汶川境。

⑭ 今汶川西北。

⑮ 今四川长宁。

⑯ 今四川屏山附近。

⑰ 今四川纳溪。

⑱ 晏州，今四川兴文。

宁六年，熊本经制蛮事。晏子，斧望简恕及仆夜皆愿入贡，受王命。晏子未及命而死。以简恕知归来州，仆夜知姚州。简恕之子乞弟，晏子之子沙取禄路，并为把截将，西南夷部巡检。八年，俞州僚酋阿讹起兵，率其党奔简恕。会简恕老，以事属乞弟，遂与讹侵诸部。元丰五年，讨破之。以归来州赐罗施鬼主。乞弟失地，穷甚，往来死于诸蛮。

濮族之居黔江及金沙江流域者，久以耕农为业，散为诸小邑聚，无大部落。其在郁江流域者则不然。唐之西原蛮，宋之广源州蛮是也。西原蛮者，地在广容之南，邕桂之西，西接南诏。^①俗椎结左衽，无城郭，依山险，各治生业，急则屯聚，而轻死善战斗。有宁氏者，世相承为豪。黄氏其隶也。唐玄宗天宝初，黄氏强，与韦氏、周氏、侬氏相唇齿，常进扰。后韦氏、周氏，亦为黄氏所逐，奔海滨。肃宗至德初，黄氏起兵，乾元中，乃讨平之。贞元、元和间，复起兵，黄氏、侬氏据州十八，大为邕、容二管之患。文宗太和中，经略使董昌龄，使子兰讨破之。诸蛮内附。十八州岁输贡赋，道路清平。其后侬氏最强，结南诏为助。至宋时，卒有侬智高起兵。

广源州，在邕州西南，郁江之原。地峭绝险阻。侬氏世据之。自交趾建国，广源虽号邕管羁縻州，实服役焉。有侬全福者，知儋州。^②其弟存禄，知万涯州。^③全福妻弟侬当道，知武勒州。^④全福杀存禄、当道，并有其地。交趾怒，执之，及其子智聪以归。全福妻阿侬，嫁商人，生子，名智高。年十三，杀其父。冒侬姓。久之，与其母据儋州。建国曰大历。交趾攻拔，执之。使知广源州。内怨交趾，袭据安德州。僭称南天国。请内附，不许。乃招纳亡命，谋起兵。宋仁宗皇佑四年，以兵五千，沿郁江东下，陷邕州，僭号仁惠皇帝。时天下久安，岭南州县无备，故所向皆得志。连陷

① 今广西扶绥境内。

② 今广西扶绥境内。

③ 今广西崇左。

④ 亦在崇善县境。

横、①贵、②龚、③讨、④藤、⑤梧、⑥封、⑦康、⑧端⑨九州，进围广州。五十七日，不拔，乃解去。诸将讨之，皆无功。五年，正月，狄占绝昆仑关，⑩击破之。智高奔大理。初智高杀其父后，其母阿依，尝嫁特磨道依夏卿。智高败，往依之。阿依有计谋，智高攻陷城邑，多用其策。及是收残众，欲再起兵。安抚使余靖发峒兵掩禽之。智高死于大理。

大理，本南诏也。《唐书》云：乌蛮别种。其先渠帅有六，蛮语谓王曰诏，故号六诏。六诏曰蒙隼诏，⑪曰越析诏，⑫曰浪穹诏，⑬曰邈睢诏，⑭曰施浪诏，⑮曰蒙舍诏。⑯蒙舍诏居诸部南，故称南诏。其王蒙氏。唐玄宗开元末，有皮逻阁者，始强。逐河蛮，筑太和城居之。⑰厚以利啖剑南节度使王昱，求合六诏为一。玄宗许之。册为云南王。而诏特进何履光，以兵定其境。取安宁城盐井，⑱复立马援铜柱，乃还。鲜于仲通节度剑南，卞急少方略。故事，南诏尝与妻子谒都督。过云南，⑲太守张虔陁私之。又多所求乞。阁罗凤⑳

-
- ① 今广西横县。
② 今广西贵县。
③ 今广西平南。
④ 今广西桂平。
⑤ 今广西藤县。
⑥ 今广西苍梧。
⑦ 今广东封开。
⑧ 今广东德庆。
⑨ 今广东高要。
⑩ 在广西南宁东北昆仑山上。
⑪ 今四川西昌。
⑫ 亦曰磨些诏。今云南丽江。
⑬ 今云南洱源。
⑭ 今云南洱源县境
⑮ 洱源之东。
⑯ 今云南巍山彝族回族自治县境。
⑰ 今云南大理。
⑱ 今云南安宁。
⑲ 即姚州。今云南姚安。
⑳ 皮逻阁子。

不应。虔随数诘折之，阴表其罪。由是忿怨。发兵攻杀虔随。取姚州及小夷州三十二，仲通讨之，大败。时杨国忠当国，调大兵攻之，又败。阁罗凤北臣吐蕃。会安禄山反，阁罗凤遂取赕州，据清溪关。^①与吐蕃联结，为蜀患颇深。阁罗凤卒，孙异牟寻立。西泸令郑回，惇儒也。赕州之陷，为南诏所得。阁罗凤使教子弟，实傅异牟寻。后以为清平官。南诏之臣吐蕃，吐蕃悉夺其险要，立营候，岁索兵助防，赋敛重数，异牟寻稍苦之。回乃说其归唐。会韦皋节度剑南，亦遣使招之。南诏复来归。与唐合击，败吐蕃兵。时德宗贞元时也，异牟寻卒，子寻合劝立。卒，子劝龙晟立。其下弑之，而立其弟劝利。劝利卒，子丰祐立。时穆宗长庆三年也。丰祐赅悍，善用其下。西川节度杜元颖，以文儒自高，不治戎事。南诏遂陷邛戎，赕，入成都。宣宗时，又陷安南都护府。唐以高骈为都护，复其地。丰祐卒，子坦绰酋龙立。称帝，国号大礼。^②陷播州，攻邕管。唐徙高骈镇西川，破其兵。南诏乃请和。酋龙年少，嗜杀戮，亲戚异己者皆斩，兵出无宁岁。其犯蜀也，男子十五以下悉发，妇人耕以饷军，稍衰矣。卒，子法立，年亦少，好畋猎，国事决于大臣，益衰。然僖宗时犹一寇西川，陷安南。后中国乱，不复通。

蒙氏传国至唐昭宗时，为其臣郑买赐所篡，改号大长和。后唐明宗时，又为其臣赵善政所篡，改号大天兴。寻又见篡于其臣杨义贞，改号大义宁。晋高祖时，段思平得之，改号大理国。仁宗皇祐中，依智高走死其国，函首以献。神宗熙宁中，其主连义，为其臣杨义所弑，义遂篡位。高昇太起兵讨灭之，立段寿辉。传子正明，避位为僧。国人皆归心高氏，遂奉昇太为王。时哲宗元符二年也。改国号大中。临终，嘱其子太明曰：“段氏不振，国人推我，不得已从之。今其子已长，可还故物。尔后人勿效尤也。”太明遵遗言，求

① 在今四川汉源。

② 亦作大理。

段氏子正淳立之。于是段氏复兴，号曰后理。高氏世相之，人称为高国王。理宗淳祐十二年，^①元世祖伐之。明年，兵临其国。其王兴智及相高太祥拒战，败绩。太祥被执，不屈死。兴智亦被虏。设大理都元帅府。又以刘时中为宣抚使，与兴智安辑之。中原多故，段氏复据其地，传十一世。明兰玉、沐英乃灭之，以其地为大理府。

自元以来，云贵之地，日益开辟，诸濮族亦皆列为土司。其最有关系者，在黔则播州，在滇则乌撒、乌蒙、东川、镇雄四土府也。播州，今遵义县地。唐僖宗时，为南诏所陷。太原人杨端，应募复其城。其后遂世有其土。明初，杨氏率先归附，仍以原职授之。其地三面邻蜀，兵尤骁勇，数从征调，尝有功。万历时，宣慰使杨应龙以犯罪，为疆吏所纠，遂反。官兵讨之，屡衄。天启初，调川、滇、湖南三省兵，乃讨平之。以其地为遵义、平越二府。乌蒙、乌撒、东川、镇雄皆在云南东北境。^② 据其地者皆乌蛮裔。宋时，有封乌蛮王者。元置乌蒙、乌撒等处宣慰司。明初，傅友德平其地，分设四土府。其地西连贵阳，与水西安氏辖境相接，实滇、黔间要地。而明以之隶四川，鞭长莫及，制驭无从，遂为腹心之梗。清初，平乌撒，置威宁，而余三府仍隶四川。世宗时，鄂尔泰总督云贵，主改土归流。世宗知其才可任，以三府改隶云南。乃开其地，为东川、昭通二府焉。云南全省，明初虽设郡县，实多用土官。即正印为流官者，亦必以土官佐之。经明、清二代，乃逐渐同化，土官亦多改流云。

濮族进于耕农最早。《汉书》述西南夷，自夜郎至邛都，皆椎髻耕田，有邑聚，与其西之犍昆明，编发随畜迁徙者迥殊。由此上推之，《左传》文公十六年，芟贾策百濮，谓将“各走其邑”，知其俗正与《汉书》所述之夜郎等同。谓濮族旧居鄂、豫，弥可信矣。《汉书》云：牂柯地多雨潦，寡畜生，无蚕桑，最贫。句町^③有桃粮木，可以为面，

① 元宪宗二年。

② 东川、镇雄今为县，乌蒙今云南昭通地区。

③ 今云南通海。

百姓资之。邛都俗多游荡，而喜讴歌，略与牂柯相类。益州则河平土敞，多出鸛鵒、孔雀。有盐池田渔之饶，金银畜产之富。民俗豪汰，居官者皆富及累世焉。可以见汉时此诸地方之肥瘠。

汉族良吏，牂启濮族之功亦不小。《后汉书》云，王莽时，以广汉文齐为太守。造起陂池，开通溉灌，垦地二千余顷。率厉兵马，修障塞，降集群夷，甚得其和。肃宗元和中，蜀郡王进为太守，政化尤异。始兴起学校，渐迁其俗。桓帝时，牂柯郡人尹珍，自以生于荒裔，不知礼义，乃从汝南许慎、应奉受经书、图纬。学成，还乡教授。南域始有学焉。其功绩，殊不在文翁、司马相如之下。然《唐书》述诸族之俗，皆以十二月为岁首。父母丧，斩衰布衣，近者四五年，远者五六年。婚姻以牛酒为礼。松外诸蛮，有城郭，知阴阳历数。非尽汉以后所传。盖皆在北方，与汉族杂处所受也。

唐宋时，云贵乌蛮及爨氏首领利用“鬼巫”进行统治。《唐书》谓其称主祭者为鬼主。每户岁出一牛，或一羊，就其家祭之。大部落有大鬼主，百家则置小鬼主。两林部落虽小，然为诸族所宗，号为都大鬼主云。此亦极似汉族支子不祭，祭必于宗子之家之俗。

濮族自古离析为小邑聚，无大君长，此其文明程度虽高，而不能强盛之原因也。稍能抟结之，具有国家之规模者，当始爨氏。至南诏则益进矣。爨氏制度无可考，南诏制度，见于史籍者颇多。今举其要者。其语：谓王为诏。王母曰信么，亦曰九么。妃曰进武。其官：曰坦绰，曰布燮，曰久赞，谓之清平官。所以决国事轻重，犹唐宰相也。曰酋望，曰大将军。大将军十二，与清平官等。列日议事王所。出治军壁，称节度。有内算官，代王裁处。有外算官，记王所处，以付六曹。六曹长有功，补大军将。次补清平官。幕爽主兵，琮爽主户籍，慈爽主礼，罚爽主刑，劝爽主官人，厥爽主工馆，万爽主财用，引爽主客，禾爽主商贾，皆清平官。酋望，大将军兼之。爽，犹言省也。督爽，总三省也。乞托主马，禄托主牛，巨托主仓廩，亦清平官，酋望，大将军兼之。曰爽酋，曰弥勤，曰勤齐，掌赋

税。曰兵孺司，掌机密。外有六节度，二都督，十险。险，夷语，州也。大府，主将曰演习，副曰演览。中府，主将曰缮裔。副曰缮览。下府，主将曰澹酋，副曰澹览。小府，主将曰幕勃，副曰幕览。府有陀酋，若管记。有陀西，若判官。百家有总佐一，千家有治人官一，万家有都督一。壮者皆为战卒，有马为骑军。以邑落远近，分四军。以旗帜别四方面。一将统千人，四军置一将。凡敌入境，以所入面将御之。择乡兵为四军罗直子。百人，置罗直子统一人。王亲兵曰朱弩佉直。佉直，韦带也。师行，人廩粮斗五升，以二千五百为一营。其法，前伤者养治，后伤者斩。行举国皆兵之制，而又劫之以严法，此其所以能抗衡于两大之间与？

民以农耕为业。亦有授田之法。田，五亩曰双，上官授田四十双，上户三十双，以是而差。自曲靖至滇池，人皆水耕，食蚕以柘，能织锦绣。太和祁鲜^①以西，人不蚕，剖波罗树实，状如絮，组缕而幅之。犂田，一牛三夫，前挽，中压，后驱。无贵贱皆耕，不徭役。人岁输米二斗，一艺者给田二收乃税。丰祐之入成都，掠工伎数万。自是工文织，与中原埒焉。市易用帛及贝。贝大若指，以十六枚为一觅。案云南用贝甚久，明时犹然，谓之海肥。盖南诏盛时，疆域颇广，故其所用之币，能推行全境也。

彝族，元明以来，史籍称为罗罗或傛罗，聚居于四川凉山。四川、西昌、贵州、威宁、普安一带亦有之。往昔其统治者称黑彝，被统治者称白彝。人皆盘发顶上，盖犹是椎结之旧。其所居屋皆平顶。自有文字，即彝文。或称老彝文。从事农业，部分从事畜牧。其文化程度颇高。清初，江阴陈鼎祚就昏龙家。^②著《滇黔土司昏礼记》。谓龙为汉上诸姬，本名鸢。为楚所灭，放其族于此，乃去鸟为龙。或谓汉武灭牂柯，徙蜀中大姓龙、董、傅氏于其地。未知孰是。其言语不与苗同，而陈鼎祚之妻，能通彝文，可知其为濮族。贵

① 山名。

② 在威宁一带。

阳、安顺、都匀、平越之仲家，亦多通彝文之人。仲家，即今布依族或谓系马殷所率柳州之戎卒。此或间有混合耳。往昔龙家以子月为岁首。平越、黄平之天苗，大定、威宁、平远、桂阳、清镇、修平、清平之蔡家苗，贵阳、清镇、修文、龙里之宋家苗皆然。天苗，自谓姬姓，周后。蔡家苗，自称蔡后，楚放之于此。或谓随壮蹕至此。宋家苗，自谓宋后，为楚所俘，放此。或曰：宋汉时为蜀中大姓，后迁此。宋家亲丧食蔬水，蔡家三月不食稻肉，皆古礼，盖居中原与汉族密迩时效之，迄今未变也。

第十一章 羌 族

羌亦东方大族。其见于古书者，或谓之羌，或谓之氐羌。案《周书·王会解》：“氐羌以鸾鸟。”孔晁《注》：“氐地羌。羌不同，故谓之氐羌。今谓之氐矣。”则汉时之氐，即古所谓氐羌。盖羌其大名，氐其小别也。《后汉书·西羌传》：“武丁征西戎鬼方，三年乃克。故其诗曰：自彼氐羌，莫敢不来王。”此以武丁所伐之鬼方，即为氐羌。宋氏翔凤《过庭录》谓“纣以九侯为三公”之九侯，即《文王世子》“西方有九国焉”之九国，又即《诗》“我征自西，至于朁野”之朁野，即与鬼方是一。愚案《左氏》，秦晋迁陆渾之戎于伊川，亦谓之九州之戎，九州之九，盖亦即鬼方之鬼也。陆渾之戎，周人谓在瓜州。杜注谓瓜州在敦煌，失之太远。孔氏以汉时之氐，为古之氐羌，范氏以氐羌即鬼方，则汉时氐地，即古鬼方之国耳。氐地在陇、蜀之间，殷、周并起关中，^① 实其声威所及。故武丁有三年之征，受辛肆夺环之虐，^② 武王以抚有九国为吉梦之征，而东迁以后，周大夫犹于役其地也。详见予所撰《鬼方考》。

古之氐羌，在今陇、蜀之间者，至秦、汉时，盖皆服属中国，同于编户。其在南者，则同化较迟，则古所谓巴人，汉时所谓巴群南群蛮及板楯蛮也。《后汉书》述巴群南群蛮缘起曰本有五姓：巴氏，樊氏，暉氏，相氏，郑氏，皆出于武落钟离山。其山有赤黑二穴。巴氏之子，生于赤穴。四姓之子，皆生黑穴。未有君长，俱事鬼神。乃共掷剑于石穴，约能中者，奉以为君。巴氏子务相，乃独中之。众

① 见第一章。

② 《吕览·过理》：“纣刑鬼侯之女而夺其环。”

皆叹。又令各乘土船，约能浮者，当以为君。余姓悉沈，唯务相独浮。因共立之。是为廪君。乃乘土船，从夷水至盐阳。盐水有神女，谓廪君曰：此地广大，鱼盐所生，愿留共居。廪君不许。盐君暮辄来取宿，旦即化为虫，与诸虫群飞，掩蔽日光，天地晦冥。积十余日，廪君伺其便，因射杀之，天乃开明。廪君于是君乎夷城，四姓皆臣之。廪君死，魂魄世为白虎。巴人以虎饮人血，遂以人祠焉。其述板楮蛮云：“秦昭王时，有一白虎，常从群虎，数游秦、汉、巴、蜀之境，伤害千余人。昭王乃重募国中有能杀虎者，赏邑万家，金百镒。时有巴郡阆中夷人，能作白竹之弩，乃登楼射杀白虎。昭王嘉之，而以其夷人，不欲加封。乃刻石盟要：复夷人顷田不租，十妻不算。伤人者论，杀人者得以俛钱赎死。盟曰：秦犯夷，输黄龙一双；夷犯秦，输清酒一钟。夷人安之。”案《说文》：“巴，蜀桑中虫也”。《魏略》：①“氐之有王，所从来旧矣。其种非一，或号青氐，或号白氐，或号蜚氐，此盖虫之种类，中国人即其服饰而名之也。”合“廪君死魂魄为白虎”，及阆中夷人射杀白虎之言观之，可知此族图腾时代之俗矣。②

巴氐盖氐之大宗，故秦惠王并巴中，仍以为蛮夷君长，世尚秦女。其民：爵比不更。有罪，得以爵除。其君长：岁出赋二千一十六钱；三岁一出义赋，千八百钱。其民户出幘布八丈二尺，鸡羽三十铢。汉兴，一依秦时故事。建武二十三年，南群潞山蛮雷迁等始叛，刘尚讨破之。徙其种人七千余口，置江夏界中。和帝永元十三年，巫蛮许圣等反。明年，讨破之，复悉徙置江夏，是为沔中蛮。与盘瓠种之散处江北者，盖混淆不可辨析矣。③ 汉末张鲁居汉中，以鬼道教百姓。蜀人敬信巫觋，多往奉之。值天下大乱，自巴西之宕渠，迁于汉中杨车坂，抄掠行旅，百姓患之，号曰杨车巴。魏武帝克

① 《三国志》注引。

② 钟离山，在今湖北宜都。夷水，今清江。

③ 据马端临说。

汉中，迁其众于略阳北土。复号之为巴氏。晋元康中，氐齐万年起兵，关西扰乱，频岁大饥。百姓流移就谷，相与入汉川者数万家。李特等将之入蜀，是为成汉。其留略阳者，苻氏为前秦，吕氏为前凉，并为十六国之一。板楯蛮，世居渝水左右。汉高祖发其众，还定三秦。遣还巴中。复其渠帅罗、朴、督、鄂、度、夕、龚七姓，不输租赋。余户乃岁入贖钱四十。世号为板楯蛮夷。遂世世服从，至于中兴，群守常率以征伐。其人天性劲勇，初为汉前锋，数陷陈。永初中，羌入汉中。板楯蛮救之，羌死败殆尽，号为神兵，传语种辈，勿复南行焉。

巴郡南郡蛮及板楯蛮，皆在今嘉陵江流域，古所谓渝水也。其居渝水以外者，部落分布尤广。《汉书》最叙之曰：“自朐以东北，君长以十数。徙，苻都最大；自笮以东北，君长以十数，冉駹最大；自驩以东北，君长以十数，白马最大；皆氏类也。”武帝开西南夷，始以苻都为沈黎郡。^①冉駹为汶山郡，^②白马为武都郡。^③而武都夷为患最深。地有仇池，方百顷。四面斗绝。夷人依以为险。数为边寇。郡县讨之，则依固自守。元封三年，遣兵破之。分徙其众于酒泉郡。建年中，兴国氐王阿贵，百顷氐王千万，姓杨氏，各有部落万余。十六年，从马超为乱，超破后，夏侯渊攻灭之。余众或入蜀。其不能去者，分徙扶风、美阳、天水、南安界中。虽都统于郡国，亦自有王侯，在其墟落间。晋时，千万之后，卒复据仇池，传国至南北朝焉。^④唐时，黎、邛二县之东，有凌蛮，其西有三王蛮，为苻都夷，白马氏之遗种。三王者，杨、郝、刘三姓，世为首长，袭封王，故以名焉。岁原节度府帛三千匹，以调南诏。南诏亦密略之，使觐成都虚实。戎州又有姐羌，为古白马氏之遗。而居东饮磨些附近者，又有钵羌及弥羌

① 徙为县，属蜀。天汉四年，并蜀为西部，置两都尉：一居旄牛，主徼外夷。一居青牛，主汉人。

② 宣帝地节三年，并蜀为北部都尉，灵帝时复置郡。

③ 分广汉西鄙合之。

④ 《南史》之武兴国。

焉。此皆在今四川境者也。其在今云南境者，则与濮族错处。《汉书》所谓“西自桐师以东至叶榆，名为僬昆明。编发，随畜迁徙，无常处，无君长，地方可数千里”者也。此族与濮族，显著之别有二：濮族椎结，而此族编发，一；濮族耕田有邑聚，而此族随畜迁徙，二也。自汉至唐尚然。唐时仍谓之昆明蛮。在爨蛮以西，以西洱河为境。高宗龙朔三年，有七千户内附。总章三年，以其地置禄州、汤望州。咸亨三年，昆明十四姓率户二万内附，析其地为殷州、总州、敦州。殷州居戎州西北，总州居戎州西南，敦州在戎州之南，远不过五百余里，近者三百里。其后又置盘麻等四十一州，皆以首领为刺史。

陇蜀及滇，皆山岭崎岖，而河湟西海之间，则地较平夷，便于猎牧。居民气性，稍类北狄，《后汉书·西羌传》所述是也。《后汉书》云：“羌无弋爰剑者，秦厉公时为秦所拘执，以为奴隶。不知爰剑何戎之别也。后得亡归，而秦人追之急，藏于岩穴中，得免。羌人云爰剑初藏穴中，秦人焚之，有景象如虎，为其蔽火，得以不死。既出，又与剺女遇于野，遂成夫妇。女耻其状，披发复面，羌人因以为俗，遂俱亡入三河间。”^① 诸羌见爰剑被焚不死，怪其神，共畏事之，推以为豪。河湟间少五谷，多禽兽，以射猎为事，爰剑教之田畜，遂见敬信，庐落种人依之者日益众。羌人谓奴为无弋，以爰剑尝为奴隶，故因名之。其后世世为豪。至爰剑曾孙忍时，秦献公初立，欲复穆公之迹，兵临渭首，灭狄獬戎。忍季父邛畏秦之威，将其种人附落而南，出赐支河曲数千里，与众羌绝远，不复交通。其后子孙分别，各自为种，任随所之。或为牦牛种，越嶲羌是也。或为白马种，广汉羌是也。或为参狼种，武都羌是也。忍及弟舞，独留湟中。并多娶妻妇。忍生九子，为九种。舞生十七子，为十七种，羌之兴盛，从此始矣。”又云：“自爰剑后，子孙支分凡百五十种。其九种在

^① 《续汉书》作河湟间。注：“黄河，湟水，赐支河也。”案赐支即黄河九曲地，当以《续汉书》为是。

赐支河首以西及蜀、汉徼北。……其五十二种衰少，不能自立，分散为附落。或灭绝无后，或引而远去。其八十九种，惟钟最强，胜兵十余万。其余大者万余人，小者数千人。更相钞盗，盛衰无常”。案此说以诸羌支分，悉出爰剑，未必可信。然爰剑之后，派别极繁，则自为实录。盖羌族先进，实在陇、蜀之间。河湟上腴，东周之世，犹为草昧。爰剑久居塞内，渐被华风，蒙扰蓄畜，实以一身而兼羲、农之教。本支百世，长为殊俗所尊亲，固其宜矣！

羌人与汉人发生矛盾，不在塞外而在塞内。以彼此融化，非旦夕可期，而汉人又颇陵侮之故也。^①景帝时，研种留何，^②率种人求守陇西塞。徙之狄道，^③安故，^④临洮氏道，^⑤羌道，^⑥是为羌人附塞之始。时匈奴冒顿，臣服诸羌。武帝乃度河湟，筑令居，^⑦开河西四郡，^⑧以隔绝羌、胡。先零种起兵，汉兵击破之，置护羌校尉统领焉。于是羌去湟中，依西海^⑨盐池。^⑩宣帝时，复度湟水，犯塞。赵充国屯田以待其敝，卒破之。置金城属国，以处降羌。王莽辅政，讽羌献西海地，以为郡，筑五县边海，亭燧相望焉。莽败，诸羌据西海反抗。隗嚣不能讨，因加慰纳。发其众以拒汉。嚣亡，仍常起兵，后乃归服。徙置天水、陇西、扶风三郡。

烧当者，研十三世孙。自烧当至滇良，世居河北大允谷，种小人贫。而先零，卑湍，并皆强富。数侵犯之。滇良与子滇吾、滇岸，积见陵易，愤怒。而素有恩信于种中，乃会附落及诸杂种，掩击先

① 建武九年，司徒掾班彪上言：“今凉州郡皆有降羌。降羌披发左衽，而又与汉人杂处。习俗既异，言语不通。数为小吏黠人，所见侵夺。穷患无聊，故致反叛。”

② 研忍子。

③ 今甘肃临洮。

④ 在狄道南。

⑤ 今甘肃清水。

⑥ 今甘肃武都。

⑦ 今甘肃莊浪。

⑧ 酒泉，武威，张掖，敦煌。

⑨ 今青海。

⑩ 今青海之盐池。

零、卑蒲，大破之。夺居其地大榆中。^①地肥美，阻河为固。又有西海鱼盐之利。绿山滨水，以广田畜。南得钟、存，以益其众。遂致强大。附落转盛。滇吾子曰东吾，曰迷吾，曰号吾。东吾子曰东号。东号子曰麻奴。迷吾子曰迷唐。自光武末至和帝时，多次起兵后乃败走赐支、河曲，又为汉兵所破。逾河首，依发羌。于是西海、榆中安定。隗嚣相曹凤，请复西海郡县。规固二榆，广设屯田。汉从其谋。夹河列屯，凡三十四部。功垂就，而永初羌人被迫起事。

安帝永初元年，发金城、陇西，汉阳羌数百千骑征西域。群羌惧远屯不返，行到酒泉，多有散逃。诸郡各发兵徼遮，或复其庐落，羌遂同时奔溃。时羌久居郡县，无复器甲。或持竹竿木枝，以代戈矛。或执铜镜以象兵，或负案以为楯。而郡县懦不能制，争图上徙。诸将则断盗牢廩，私自润入。以珍宝賂左右，上下放纵，不恤军事。士不得其死者，白骨相望于野。于是先零别种滇零，自称天子于北地。东犯赵、魏，南入益州。进击三辅，截断陇道。军运转输之费，至二百四十余亿。乃平之。时顺帝永建三年，羌乱历二十载矣。越十年，当永和元年，羌复起事，至冲帝永嘉元年，乃平。凡八年，军费八十余亿。又十四年，当桓帝延熹二年，诸种复有起兵者。段熲讨破之。熲坐事征，代以胡闳。闳无威略，羌遂稍强六年，复代以颍。颍以尽杀为主，出兵剿击。至灵帝建宁二年，乃平。是役凡历十一年。据《后汉书·西羌传》，谓西羌降者万余落，获生口数万，东羌降者不过四千人。^②可见杀戮之甚。然至中平元年，北地降羌与汉中羌义从胡、北宫伯玉、李文侯又起反抗。伯玉劫致金城人边章、韩遂，使任军事。后遂杀章及伯玉、文侯，拥兵攻陇西。太守李相如与连和，共杀凉州刺史耿鄙。鄙司马扶风马腾亦

① 《水经注》：“河水自河曲，又东，径西海郡南。又东，径允川，而历大榆谷、小榆谷北。”

② 降羌在安定、北地、上郡者为东羌。在陇西、汉阳、金城者为西羌。

起兵，于是凉州不安者三十年。中平元年，上距建宁二年，亦不过十五年也。后汉时之降羌，本不足为大患。所以不断大起义反抗者，实朝政不肃，官吏暴虐，将帅贪懦，有以致之。与清川、楚白莲教之大起义最相似。

滇吾为烧当嫡裔，故羌人甚重之。滇吾九世孙迁那，率种人内附。汉处之南安之赤亭。^①那玄孙柯廻，为魏镇西将军，绥戎校尉，西羌都督。廻子即姚弋仲也。

羌之又一派，为西域中之氐羌行国。《汉书》云：“蒲犁与依耐、无雷，皆西夜类也。西夜与胡异，其种类氐羌。行国，随畜，逐水草”。又婼羌、鄯善亦为行国。温宿则“土地物类所有，与鄯善诸国同”。《后汉书》西夜，子合各自有王。又有德若，俗与子合同。又载车师、蒲类、移支、且弥，亦均行国。移支“俗勇敢善战，以寇抄为事，皆披发”，尤酷与羌类。此一派，盖与居祁连、敦煌间之大月氏相近。而月氏汉初为匈奴所破，西走，逐塞种，居其地。乌孙又乞师于匈奴，击破之。乃南走，臣大夏，居妣水滨。妣水，今阿母河。大夏者，西史之巴克特利亚。月氏袭其遗风，遂焕然为葱岭以西文明之国。其羸弱不能去者，保南山，号小月氏。与诸羌共婚姻，亦称湟中月氏胡。在张掖者，号义从胡。史载其风俗皆与羌无异。三国以后，遂不复见。盖氐、羌故同族，遂泯焉无别也。

大月氏至宋、齐之间，乃为哒哒所破。中国史不载，西史亦不记其详。然其遗迹有可考见者。《北史》：“康国者，康居之后也。迁徙无常，不恒故地。然自汉以来，相承不绝。其王本姓温，月氏人也。旧居祁连山北昭武城，因被匈奴所破，西踰葱岭，遂有其国。枝庶各分王。故康国左右诸国，并以昭武为姓，示不忘本也。”《唐书》：康国，君姓温，本月氏人，始居祁连山北昭武城，为突厥所破，稍南依葱岭，即有其地。支庶分王：“曰安，曰曹，曰石，曰米，曰何，曰火寻，曰戊地，曰史，世谓九姓。并姓昭武。”案康居未尝居祁连北，月氏西

^① 在今甘肃天水县境。

徙，亦远在突厥兴起以前；《北史》谓康国为康居之后，明系误谬；《唐书》“为突厥所破”云云，突厥亦明系匈奴之误。然月氏为匈奴所破，西徙而臣大夏，只分其国为五部翕侯；厥后贵霜翕侯，且并四部而一之，则支庶分王，明是为𑖀𑖂所破以后之事也。康，亦称萨末鞬，又曰飒秣建。元魏称悉万斤。即今撒马耳干。安，亦曰布豁，曰捕喝，即今布哈尔。东安，亦曰小安，曰喝汗。在安东北四百里。当在今锡马达亚境。东曹，亦称率都沙那，又作苏对沙那，苏都识匿。^①北至石，西至康皆四百里。当在今斡罕境。西曹，本称曹国，盖东曹，中曹，皆自此而分也。亦称劫布咀那，在米国之北，西三百余里而至何国。^②则当在塞拉佛山境。又有中曹，居康之北，西曹之东焉。石，或曰柘支，曰柘折，曰赭时，今塔什干。米，或曰弥末，曰弭末贺。北百里距康。今基大普也。何，亦曰屈霜你迦，曰贵霜匿，在劫布咀那西三百余里。^③火寻，或曰货利习弥，曰过利，^④今基华境也。戊地，《西域记》作伐地，云在布喝之西四百余里，地当今谋夫。史，亦曰佉沙，曰羯霜那，南有馱门山，即《明史》所谓渴石，今加尔支也。此外见于《北史》者：又有乌那遏，都乌浒水西。东北去安四百里，西北去穆二百里，似亦在今谋夫附近。又有馱汗国。《唐书》作宁远，都葱岭之西五百余里，东距疏勒千里，西去苏对沙那，西北去石国，各五百里。其王亦均氏昭武。《北史》又云：“大月氏国，都瞿蓝氏城，在弗敌沙西，去代一万四千五百里，北与蠕蠕接。数为所侵，遂西徙，都薄罗城，去弗敌沙二千一百里。其王寄多罗勇武，遂兴师，越大山，南侵北天竺。自犂鞞罗以北五国，尽役属之。”“小月氏国，都富楼沙城。其王本大月氏王寄多罗子也。寄多罗为匈奴所逐西徙后，令其子守此城，因号小月氏焉。在波路西南，去代一万六千六百里。”案柔然兵力，未及葱岭以西，所云数为

① 此三名皆一音之异译，《唐书》并列劫布咀那，云“凡四名，”则误矣。

② 据《西域记》。

③ 《西域记》。

④ 《元史》之花刺子模。

所侵，似即汉初见逼于匈奴之事。然滕蓝氏城，即《汉书》之监氏城，乃月氏西徙后莫都之所，无由见逼于匈奴，则亦必月氏见破于厥咄之事矣。以《北史》所载诸国道里向方考之。薄罗城，似系今阿富汗北境之波尔克，富楼沙则其东境之白沙威尔。然则月氏虽分崩，枝庶分王，犹遍今俄领中央亚细亚及阿富汗之境，特始役属于厥咄，继役属于突厥而已。至唐时，昭武九姓诸国，犹遍受封爵，以其地置都督府州，其裡祀固未尝斩也。其亡，当在大食并西域后，其事实不可考。^①

以上所述诸派，皆在今甘、新、陇、蜀之间。其居今四川西部及青海西藏境者，则梗塞不通，榛荒弥甚，今综晋、唐、南北朝诸史述之。其最近中原者为宕昌，地在吐谷浑之东，益州之西北，东接中华，西近西域。^② 其南为邓至，地在平武以西，汶岭以北。邓至之西有赫羊国，又有东亭卫、大赤水、寒宕、石河、薄陵、下习、小仓驤、覃水诸部落。今四川茂县以北，北抵甘肃、青海河洮之间，皆其地也。自此以西北，则为党项。党项之地，东接临洮西平，西拒叶护，^③ 实今黄河上源之地。^④ 又其西为白兰。《北史》云：“自白兰山西北，即为可兰。”白兰山，似今巴颜哈喇之脉。《唐书》又有多弥，滨犁牛河。犁牛河，即今江源木鲁乌苏。多弥西为苏毗，则在今海、藏间矣。《北史》又云：“吐谷浑有乙弗敌国。国有屈海，周围千余里。”核其地望，似指今柴达木河下游之达布逊淖尔也。此皆在今青海境者也。其在今四川西藏间者，则成都西北二千余里，有嘉良夷。嘉良夷之西有附国。“嘉良有水，阔六七十丈；附国有水，阔百余丈，并南流，用皮为舟而济。”似即今雅龙江及金沙江。附国西有薄缘夷。其西为女国。女国东北，连山绵亘数千里，接于党项，往往有羌。有大小左封、昔卫、葛延、白狗、向人、望族、林台、春桑、利豆、迷桑、婢

① 此节释地，略据丁氏谦《大唐西域记考证》。

② 此语颇误。

③ 指西突厥言。

④ 《唐书》又有黑党项，居赤水西。赤水亦名赤亭水，在今甘肃陇西县之西。

药、大碛、白兰、北利、模徒、那鄂、当迷、渠步、桑梧、千碉等，并在深山穷谷。案女国在今后藏，见下篇。女国东北之山，当即今长江、怒江上源间之山。又《唐书》所载：“雅州西三百余里之外有百坡、当品、严城、中川、钳矣、昌区、① 钳井七部落；四百余里之外有罗岩、当马、三井、束绛、名耶、② 钳恭、画重、罗林、笼羊、林波、林烧、龙逢、索古、敢川、惊川、梹眉、不烛，十七部落；六百余里之外有椎梅、作重、梹林、金林、逻蓬五部落；皆置羁縻州。”③ 此皆在今四川、西藏间者也。宕昌，邓至距中原最近。《北史》云：“宕昌之众本姓别自为部落。酋帅各有地分，不相统摄。有梁懃者，世为酋长，得羌雄心，乃自称王。”案《南史》，武兴国大姓有苻氏、姜氏、梁氏。武兴故中国郡县，姜、梁皆汉姓，得毋懃亦汉人与？宕昌尝受南北朝封爵。邓至亦通贡南朝。其余诸国，南北朝、隋、唐时亦多来朝贡。以党项为最强大。党项，魏周时颇进窥。唐攻吐谷浑，其酋拓跋赤辞助之抗王师。唐击破之，乃内属，置羁縻州三十二，以松州为都督府。④ 后吐蕃强，拓跋氏畏逼，请内徙。徙庆州，⑤ 置靖边等州以处之。西夏其后也。其故地入吐蕃。处者皆臣属之，更号为弭药。

羌族散布甚广，而其地之交通，率皆不便。故其风气各有不同。最进步者为氐。氐族披发左衽，言语好譬类。⑥ 而与羌杂胡同。其嫁娶，亦有似于羌。此为其与羌同族之确证。然后汉、三国时，与华人错居者，已多知汉语。惟还其种落，则仍用氐语耳。贵妇人，党母族，盖去女系时代未久也。能织布，善田种。冉骹土地刚卤，不生谷粟，亦以麦为资。其地土气多寒，盛夏冰犹不释。冬则避寒入蜀为佣，复则违暑反其邑。其畜有猪、牛、马、驴、骡。冉骹有旄

① 《地理志》作磊。

② 《地理志》作配。

③ 逻蓬，《地理志》不载。柏坡，索古属黎州，余均属雅州都督府。

④ 今四川松潘。

⑤ 今甘肃庆阳。

⑥ 盖由称名不具。

牛，肉重千斤，毛可为毳。其人能作旄毡，班鬣，青顿，髦毼，羊羖之属。^①《后汉书》云：“氐人依山居止，累石为室，高者至十余丈，谓之邛笼。”注云：“彼土夷人呼为雕。”即今所谓碉也。《南史·武兴国传》云：“言语与中国同，地植九谷，婚姻备六礼，知书疏，种桑麻，出绢绢布等。”则全与汉人融化矣。

其居河湟者，则极为强悍。史称其兵“长在山谷，短于平地。不能持久，而果于冲突。以战死为吉利，病终为不祥。堪耐寒苦，同之禽兽。虽妇人产子，亦不避风雪”。古时其俗氏族无常，或以父名母姓为种号。十二世后，相为婚姻。父死则妻后母，兄亡则纳嫠嫂。故国无嫠寡，种类繁多。然不立君臣，无相长一。强则分种为首豪，弱则为人附落。更相钞暴，以力为雄。杀人偿货，无他禁令。故其虽众而不一。赵充国云：“羌人所以易制者，以其种自有豪，数相攻击，势不壹也。”^②

其余诸羌族，程度高低不一。宕昌及党项皆既无法令，又无徭赋。惟战时乃相屯聚，否则各事生业，不相往来。附国之法，重者死，轻者罚牛。人皆轻捷，便于击剑。漆皮为甲。弓长六尺，以竹为箭。白兰、党项，亦能作兵。然好盗，更相剽劫。尤重复仇。未得所欲者，蓬首垢面，跣足草食。后乃已。私斗既烈，自无由合大群。党项在诸羌中为最大。亦不过大部五千骑，小部千余耳。其婚姻：宕昌父及伯叔兄弟死，即以继母、世叔母及嫂、弟妇为妻。附国则父亦妻其子妇。惟党项不娶同姓。大抵以畜牧为生。《北史·宕昌传》：“牧养犛牛、牛、豕，以供其食。”《唐书·党项传》：“养犛牛、马、驴以供食，取麦他国以酿酒”是也。然如附国，《北史》云：“其土高，气候凉，多风少雨，宜小麦青稞。”则亦略知种植矣。男女皆衣裘褐，被毡。以皮为帽，形圆如钵。或带鞬鞞。全剥牛脚皮为鞞。项系铁锁，手贯铁钏。王与酋帅，金为首饰，胸前悬一金花，径

① 以上据《后汉书》、《三国志》及《三国志》注引《魏略》。

② 本传。

三寸。后来吐谷浑之服饰，亦颇与此相类。盖徙居羌地，化于羌也。其居处有二：一织犂牛尾及羊毛复屋，岁一易。^①又其一为碉。高者十余丈，下者五六丈。每级以木隔之。基方四步，上方二三步。状似浮图。下级开小门，从内上通。下必关闭，以防贼盗。^②盖因所居之地而异也。

古时羌族程度，有极低者。《北史》云：可兰，“目不识五色，耳不闻五声。顽弱不知战斗。忽见异人，举国便走。性如野兽，体轻工走，逐不可得”。如此说可信，几距原人不远矣。

其所信教，亦间有可考者。宕昌、党项，皆三年一相聚，杀牛羊以祭天。党项之俗，人年八十以上死者，以为令终，亲戚不哭。少死者即云夭枉，乃悲。附国，有死者，置尸高床上。沐浴衣服。被以甲，复以兽皮。子孙不哭，带甲舞剑而呼云：我父为鬼所杀，我欲杀鬼报冤。其余亲戚，哭三声而止。死家杀牛，亲族以猪酒相遗，共饮噉而瘞之。死后十年，方始大葬。必集亲属，杀马动至数十匹，立木为祖父神而事之。

大月氏之居东方，亦当与羌同俗。西徙以后，则渐同化于白人。故《汉书·大夏传》谓其“土地，风气，物类所有，民俗，钱货，与安息同”。《大宛列传正义》引万震《南州志》谓其“城郭，宫室，与大秦同”。《唐书》谓其“习旁行书，则其文字亦受之西域。然东方旧俗，仍有存者”。《北史·康国传》谓其“婚姻丧制，与突厥同”是也。据《北史》及《唐书》，昭武诸国，实以康为大宗，《北史》云：“其国立祖庙，以六月祭之。诸国皆来助祭。”《大唐西域记》曰：“凡诸胡国，此为其中。进退威仪，远近取则。兵马强盛，战无前敌。”俨然为礼乐征伐所自出焉。其神教，则兼奉佛教及火教。《唐书》谓“尚浮屠法，祠祆神”是也。《隋书·康国传》：“有《胡律》，置于祆祠，将决罚则取而断之。”《石国传》：“城东南立屋，置座于中。正月六日，七月十五

① 《北史》宕昌，《唐书·党项传》。

② 《北史·附国传》。

日，以王父母烧余之骨，金瓮盛之，置于床上，巡绕而行，散以香花杂果，王率臣下致祭焉。”火葬盖佛教之法。法律置于祆祠，则其严祀之不待言矣。又《隋书·曹国传》：“国中有得悉神。自海以东诸国，并敬事之。其神有金人焉。金破罗阔丈有五尺，高下相称。每日以骊五头，马十匹，羊一百口祭之。常有千人，食之不尽。”《曹国传》：“其俗重淫祠。葱岭山有顺天神者，仪制极华。金银鑠为屋。以银为地。祠者日有千余人。祠前有一鱼脊骨，其孔中通，马骑出入。”《唐书·东曹传》：“有野叉城。城有巨窟，严以关钥。岁再祭。人向窟中立，即烟出，先触者死。”《史国传》：“城有神祠。每祭必千羊。用兵类先祷乃行。”此则各地方固有之神教也。

附录一 鬼方考

《左传》僖公二十二年，“秦、晋迁陆浑之戎于伊川。”三十三年，“遽兴姜戎，……败秦师于淆”。襄公十四年，“将执戎子驹支，范宣子亲数诸朝，曰：来！姜戎氏！昔秦人迫逐乃祖吾离于瓜州，乃祖吾离被苫盖、蒙荆棘以来归我先君，我先君惠公，有不腆之田，与女剖分而食之。……对曰：昔秦人负恃其众，贪于土地，逐我诸戎。惠公蠲其大德，谓我诸戎，是四岳之冑裔也，毋是剪弃。赐我南鄙之田，狐狸所居，豺狼所嗥。我诸戎剪其荆棘，驱其狐狸豺狼，以为先君不侵不叛之臣，至于今不贰。昔文公与秦伐郑，秦人窃与郑盟，而舍戍焉，于是乎有淆之师。晋御其上，戎亢其下，秦师不复，我诸戎实然”。昭公九年，“周甘人与晋阎嘉争阎田。晋梁丙、张趯帅阴戎伐颍。王使詹桓伯辞于晋曰：……先王居橐杓于四裔，以御魑魅，故允姓之奸居于瓜州。伯父惠公归自秦，而诱以来，使逼我诸姬，入我郊甸，则戎焉取之。戎有中国，谁之咎也？”观此诸文，陆浑之戎、姜戎、阴戎，异名同实，事至明白。驹支自称四岳之冑，而周人称为允姓之奸，则其人实有二姓。杜《注》谓四岳之后皆姓姜，又别为允

姓者，说自不误。惟谓瓜州即敦煌，^①说出杜林，^②则不无可疑耳。

河西四郡，乃汉武帝所开。春秋时，秦国疆域，盖西不逾河，安得远迹至敦煌哉？宋于庭谓诗“我征自西，至于朁野”之朁野，即“覃及鬼方”及《易》“高宗伐鬼方”之鬼方，又即《礼记·文王世子》“西方有九国焉”之九国。《史记·殷本纪》以西伯昌、九侯、鄂侯为三公。《礼记·明堂位》：“脯鬼侯以享鄂侯。”《王义》曰：“鬼侯，《周本纪》作九侯。”盖西方九国之诸侯，入为殷之三公。《列子》称相马者九方皋，九方当即鬼方，以国为氏。愚案《左氏》昭公二十二年，晋籍谈，荀偃帅九州之戎，以纳王于王城。下言王城人败陆浑于社。则社《注》谓九州戎即陆浑戎者不误。九州即九国，亦即朁野，鬼方。盖陆浑戎之故国。所谓瓜州，疑亦其地也。

《汉书·贾捐之传》：“武丁，成王，殷周之大仁也。然其地东不过江、黄，西不过氐、羌。”此以氐、羌即武丁所伐之鬼方也。《文选·赵充国颂》李《注》引《世本》注：“鬼方，于汉则先零戎也。”《潜夫论·边议篇》论羌乱曰：“破灭三辅，覃及鬼方。”并以汉时之羌当古之鬼方。干宝《易》注，谓在北方，^③盖误。

氐羌者，《周书·王会解》：“氐羌以鸾鸟。”孔《注》：“氐地羌。羌不同，故谓之氐羌。今谓之氐矣。”盖羌之一种也。^④案经典有但言羌者，《书·牧誓》“及庸、蜀、羌、髳、微、卢、彭、濮人”是也。有兼言氐羌者：《诗·商颂》：“昔有成汤，自彼氐羌，莫敢不来享，莫敢不来王。”《大戴记·五帝德》述舜所抚者，析支、渠搜氐羌是也。羌为大名，氐为种别。但言羌者，辞略也。盖亦指氐羌矣。

《大戴记·帝系》：“陆终氏娶于鬼方氏。鬼方氏之妹，谓之女隤氏。”陆终为颛顼之后，则鬼方在古代，实与中国相婚姻。故武丁伐之，至于劳师三年。其后又入为纣之三公也。宜武王以抚有之为

① 襄十四、昭九年注两言之。

② 《汉书·地理志》：敦煌，“杜林以为古瓜州，地生美瓜。”

③ 《周易集解》。

④ 《吕览·义赏篇》高注，谓“氐与羌二种夷民”。盖误。

梦祥矣。《诗》：“文王曰咨，咨女殷商，如蜎如蠙，如沸如羹。小大既丧，人尚乎由行。内爨于中国，覃及鬼方。”《毛传》仅训鬼方为远方，未能实指其事。今知鬼方即鬼侯，则知“覃及鬼方”，正指脯鬼侯事也。女隤，《世本》及《风俗通》皆作嬖，《汉书·古今人表》作溃。鬼贵同音，故愧字亦通作溃。则隤字疑即隤字。春秋狄人为隤姓，戎狄固以方位言，非以种族言。迁古公于岐者，《书》《传》皆称狄，其地固在秦陇间也。^①《国语·郑语》史伯谓郑桓公曰：“当成周者，西有虞，虢，晋，隤，霍，杨，魏，芮。”则东迁后犹资其翊卫，周大夫之行役芟野，固无足怪矣。^②

《左传》昭公九年，杜《注》，“允姓，阴戎之祖，与三苗俱放三危者”。盖因阴戎、三苗皆姜姓云然。《禹贡疏》：“郑玄引《地记》书曰：三危之山，在鸟鼠之西，南当岷山。”《水经注》卷四十引《山海经》，亦云：“在鸟鼠山西。”又云：“江水电过江阳县，洛水从三危道广魏洛县南，东南注之。”洛县，今广汉也。然则三危之脉，实在陇蜀之间。《续汉书·郡国志》谓首阳有三危，三苗所处。虽不中，当不远矣。孔晁谓“氏地羌谓之氏羌，今谓之氏”，则汉时所谓氏者，即古所谓氏羌。《汉书·西南夷传》曰：“自徼以东北，君长以十数，冉駹最大。自駹以东北，君长以十数，白马最大。皆氏类也。”《地理志》。陇西有氏道，广汉有甸氏道。刚氏道。蜀郡有邛氏道。古所谓鬼方者，必去此不远矣。

陆浑之戎，杜《注》谓在当时之陆浑县。^③又有伊洛之戎。《注》谓“杂戎，居伊水，洛水之间者”。^④又有蛮氏。《注》云：“戎别种也。河南新城东南有蛮氏城。”^⑤案成公六年侵宋之役，《左氏》以伊洛

① 汉隤器，天水成纪人。魏隤禧，京兆人。秦始皇时有丞相隤状，当亦秦人也。隤禧，见《三国志·王肃传》。

② 《左传》僖公二十二年杜《注》，但云“允姓之戎居陆浑，在秦、晋西北”。

③ 僖二十二年。

④ 僖十一年。疏引《释例》：“河南洛阳县西南有戎城。”

⑤ 成公六年。

之戎、陆浑、蛮氏并举，则自系三族，然秦晋迁陆浑之戎于伊川，则实与伊洛之戎杂处。《左氏》之伊洛之戎，《春秋》但作洛戎，得母洛戎在洛，陆浑之戎在伊川，云伊洛之戎者，实两种既混合后之总称与？哀公四年。“蛮子赤奔晋阴地。……阴地之命大夫士蔑，致九州之戎，将裂田以与蛮子而城之，且将为之卜。蛮子听卜，遂执之与其五大夫，以畀楚师于三户。”则蛮子所奔者，实陆浑之戎，^①二者之关系亦极密。庄公二十八年，“晋侯娶二女于戎，大戎狐姬生重耳，小戎子生夷吾”。杜《注》谓“小戎，允姓之戎”其言当有所据。献公是时，未必越秦而远婚于西垂。又僖公二十二年《疏》云：“十一年传称伊洛之戎，同伐京师，则伊洛先有戎矣。”疑允姓之戎，本有在伊洛之间者，惠公之处离吾，特使之从其类也。然则蛮氏之戎，或亦氐羌之族矣。此皆鬼方之类，播迁而入中原者邪？

氐羌之俗，有与华夏类者。《左传》庄公二十一年，“王以后之鞶鉴与之”。杜《注》云：“鞶带而以镜为饰也。今西方羌胡犹然，古之遗服。”^②《诗》“在其板屋，乱我心曲”。《毛传》曰：“西戎板屋。”《正义》：“《地理志》曰：天水，陇西，山多林木，民以板为屋。故《秦诗》云：在其板屋。然则秦之西垂，民亦板屋。”则衣服居处，西戎与中国，极相类矣。此皆其久相往来之征，宜高宗之勤兵力于此也。《后汉书》谓巴“俗喜歌舞。高祖观之，曰：此武王伐纣之歌也。乃令乐人习之，所谓巴渝舞也”。《尚书大传》，称武王伐纣之师，前歌后舞，所用者盖即巴人。巴亦氐类也。殆果“终抚九国”欤？驹支谓“我诸戎饮食衣服，不与华同，费币不通，言语不达”。达也通也，谓无使命往来。非谓其人不知华语也。不然，安能赋《青蝇》之诗邪？

《三国志》注引《魏略》：“氐语不与中国同，及羌杂胡同。”胡者，匈奴，氐与习，故亦通其语。羌则其本语也。《荀子·大略》曰：“氐羌

^① 陆浑以昭十七年为晋所灭，然其部落自在，故二十二年，籍谈，荀跣仍帅其众以纳王也。

^② 定公六年“定之鞶鉴”注同。

之虜也，不忧其系垒也。而忧其不焚也。”《注》氏羌之俗，死则焚其尸。①《后汉书》谓羌人死则烧其尸。皆氏羌同族之证。

《山海经·海内经》：“伯夷父生西岳，先岳生西龙，先龙是始生氏羌，氏羌乞姓。”西岳疑四岳之误。乞姓疑亦允姓之讹。又《海内南经》：“氏人国在建木西，其为人，人面而鱼身，无足。”《大荒西经》：“有互人之国。炎帝之孙名曰灵恕，灵恕生互人，是能上下于天。有鱼偏枯，名曰鱼妇，颞颥死即复苏。风道北来，天乃大水泉，蛇乃化为鱼，是为鱼妇。颞颥死即复苏。”《图赞》：“炎帝之苗，实生氏人。死则复苏，厥身为鳞。云南②是托，浮游天津。”灵恕，《注》云：“音如券契之契”。与乞姓之乞，音同字异。《山海经》固不足信，亦氏羌姜姓之一佐证。颇疑姜羌实一字也。

鬼方所在，古人虽不审谛，率皆以为在西。自《诗序》以《殷武》之诗为祀高宗，《毛传》以“挾彼殷武，奋伐荆楚”，为指武丁，乃有以鬼方为在楚者。今本《竹书纪年》，“武丁三十有二祀，伐鬼方，次于荆”。即据此等说伪造。下又云：“三十有四祀，王师克鬼方，氏羌来宾。”遂忘其自相矛盾也。近世邹叔绩，推波助澜，又据《红崖摩崖石刻》，谓鬼方在贵州，则去之愈远矣。《红崖碑》者，在“贵州永宁东六十里红岩后山诸葛营旁。字大者周尺三四尺，小者尺余。深五六寸许。共二十五字。土人以其在诸葛营旁，称为《诸葛碑》。又《传》云不知刻自何年。诸葛征南，营其下，读而拜焉，使蛮人护之，故谓之《诸葛碑》。蛮人因岁祀之，以占姓雨瘴疫。其碑在岩上最高处，非绳木迭架，不能上拓”。③其文诡异而初不古，不知何世好事者所为。邹氏一一钩摹而强释之，附会为高宗征鬼方所刻，亦可谓好奇之过矣。邹氏之说曰：“汉之先零羌，即今青海。汉代之羌，有今藏地喀木。故《前汉书·地理志》云：桓水南行羌中，入南海。桓

① 《吕览·义赏》：“氏羌之民，其虜也，不忧其系累，而忧其尸不焚也。”

② 疑当作雨。

③ 以上据邹氏《红崖碑释文》。

水，即今澜沧江也。^①羌之种落，又延蔓于武都、越嶲，所谓参狼、白马、旄牛诸羌是也。以《竹书》、《世本》、《后汉书》证之，鬼方即羌明甚。是则今青海，藏地喀木及滇、蜀之西徼，皆商代鬼方。故虞仲翔谓坤为鬼方。坤西南，且好寇窃，亦同羌俗也。^②今云，贵罗罗种，自谓其先出于旄牛，殆亦羌种？其俗有鬼主，见《唐书》、《宋史·南蛮传》。愈以知羌即鬼方也。^③高宗之伐鬼方也，自荆楚深入，始入其地。历今黔、滇审矣。三年克之而还，盖仍从故道，会诸侯于南岳也。此则其东还过西方而刻石纪功之作。”案邹氏以羌为鬼方，是也，乃举后世羌人所居之地，悉指为殷时之鬼方，则近于儿戏矣。古者师行日三十里，六军一万五千人，如何历湘、鄂、滇、黔以入海、藏邪？

① 案此说亦误。

② 案虞注“襦有衣御终日戒”云：“伐鬼方三年乃克，旅人怨劳。衣服皆败。鬼方之民，犹或寇窃，故终日戒也。”

③ 案罗罗乃古之濮人，予别有考。羌以父名母姓为种号，所谓旄牛，或人名，如蒙古始祖孛儿帖赤那，译言苍狼之例，非必谓其先为旄牛所生也。《三国志》注引《魏略》，谓“氐种非一，或号青氐，或号白氐，或号緄氐，此盖虫之类，中国即其服色而名之”。盖氐羌有图腾之俗。又部落各别其衣色。青氐、白氐之称，由衣色而生；旄牛、白马、緄氐之名，皆以图腾而立。图腾之制，部各不同，断不能谓汉代之西羌，同于今日之罗罗也。至以鬼主附会鬼方，则尤为曲说矣。

第十二章 藏 族

今地理学家所谓西藏高原者，就地势别之，可分四区：南山之南，冈底斯山之北，诸大川上源之西，地势高而且平，水皆潴为湖泊，一也。雅鲁藏布江之东，巴颜喀喇山之南，大度河之西，伊洛瓦底江、怒江、澜沧江、金沙江、雅龙江之所贯流，二也。巴颜喀喇之北，南山之南，黄河上游及青海所潴，三也。喜马拉雅之北，冈底斯山之南，雅鲁藏布江之域，四也。第四区为印度阿利安人分支吐蕃兴起之地，第二第三两区皆羌地，第一区，即藏族之故居也。

古时西部有大月氏与唃廝囉，唃廝囉实藏族之首见于史者也。《北史》云：“大月氏之种类，亦曰高车别种。”《南史》则称为滑国，曰：“车师之别种”，三说皆误。大月氏西徙后，史述其俗，多同大夏，姑勿论。其留居南山者，号小月氏，俗皆与羌同。羌俗多娶妻妇，适与唃廝囉一妇数夫反。高车、车师，亦不闻有一妇数夫之俗。一妇数夫，此特异之俗。果其有之，诸史不容不载也。《北史》云：“其原起自塞北，自金山而南。”金山本钹勒所处，故有高车别种之讹。车师北近金山，此族盖又尝居车师故地，故有车师别种之说。目为大月氏之种类，亦以其后得大月氏之地云然。皆指其所居之地以定其种族，而不知其人之初不居是也。^①

然则唃廝囉之故国，果安在与？案《唐书》：“大夏，即吐火罗也。唃廝囉，王姓也。后裔以姓为国，讹为怛怛，亦曰挹阇。”此说颇误。吐火罗者，大夏之旧都，即《大唐西域记》所谓缚喝者

^① 《北史》又谓“其语与蠕蠕，高车及诸胡不同”。可见“大月氏之种类”及“高车别种”之说之不正确。

也。^①乃城名。𐰽𐰺都大夏旧都，故人犹以大夏旧都之名称之。非彼初亦以吐火罗为国号，后乃改用王姓也。^②於邑双声。于於同字。然则𐰽𐰺，怛怛，挹𐰽，仍系于𐰽音转。此族盖自后藏越南山而北，首据于𐰽，人因以于𐰽称之。其后拓土日广，徙居大夏故都，人不复考其得氏之由，乃复别译以𐰽𐰺，怛怛，挹𐰽等字。实则与以大夏旧都名之为吐火罗，正后先同揆耳。自于𐰽入后藏，本为往来孔道。此族之故居后藏，可无疑矣。

𐰽𐰺之盛，始于南北朝之初。其衰，亦略当南北朝之末。西史谓自五世纪中叶以降百余年，为𐰽𐰺极盛之世，其年代亦略相当也。当夫月氏既衰，突厥未起，𐰽𐰺实为跨有葱岭东西之大国。惜其事迹，东西史氏，均不能道其详。今约略考之。《南史》云：“后稍强大，征其旁国波斯、盘盘、𐰽𐰽、焉耆、龟兹、疏勒、姑墨、于𐰽、句般等国，开地千余里。”《北史》则云：“其人凶悍，能斗战。西域康居、于𐰽、沙勒、^③安息及诸小国三十许，皆役属之，号为大国。”又载朱居国、渴盘陀国、钵和国、𐰽弥国皆役属𐰽𐰺。朱居国，在于𐰽西，其人山居，语与于𐰽相类。渴盘陀国，在葱岭东，朱驹波西，河经其国东北流，^④风俗与于𐰽相类。钵和国，在渴盘陀西，唐时曰护密，或曰达摩悉铁帝，曰护𐰽，王居寒迦审城，北临乌浒河。^⑤波知国，在钵和西南，有三池。传云大池有龙王，次有龙妇，小者有龙子。行人经之，设祭乃得过。不祭，多遇风雪之困。^⑥𐰽弥国，在波知南，山居，皆葱岭东西之地。观其所力征经营，而其始起之地可知矣。

① 今阿富汗之波尔克城。《北史》别有吐火罗国，云“与𐰽𐰺杂居”，又云：“其王都拔底延城，盖王舍城也”尤非。《西域记》：“缚喝，都城周二十余里，人称小王舍城。”《隋书》谓其都城多寺塔，皆饰以金，盖亦佛法兴盛之地，故有此称。若王舍城则自在印度也。

② 此说出近人丁氏谦，案大夏二字，似亦吐火罗转音，乃译音，非有义也。

③ 即疏勒。

④ 今于𐰽河。

⑤ 今阿姆河，源出葱岭，曰鄂克疏河，又曰瓦汗河，亦曰乌汗河。《唐书》乌浒，当是乌汗转音。玄奘《西域记》作缚乌河，则鄂克疏转音也。

⑥ 疑今帕米尔高原。

以上诸国，多不近车师，去金山尤远。且葱岭以东，自魏、晋迄南北朝，虽曰时绝时通，而大事仍皆见于中国史籍。果使哒力征，起自金山，远逾葱岭。焉耆、龟兹诸国，实乃首当其冲；于阗、疏勒之伦，乃后继承其敝。纵无叩关乞援之使，亦有近塞传述之辞。记载阙焉，宁不解人难索？然则原出塞北，寄居后部，非他族之事，而史误系之哒，即强大之后，声威乃暨于此，决非其初兴时事矣。^①

哒之破月氏，西史亦不能道其详。但云：哒自此尽据两河间地。又南下，降西北两印度。西伐波斯，波斯纳岁币以和。嗣后哒屡干预其君主之废立，波斯几夷为藩属。梁武帝普通元年后，北印度乌苅国兴。^②攘哒于境外。未几，突厥复盛。与波斯东西夹攻。哒遂分崩。其地多入突厥。^③

今通称此族为藏，旧又称川、藏之间为西康。康也，藏也，实仍羌字转音，因音变而字异耳。而此族之自称，则曰土伯特。土伯即吐蕃异译。^④特者，统类之词。^⑤《蒙古源流考》称尼雅特赞博汗胜四方部落，为八十八万土伯特国王。尼雅特赞博，即《唐书》之弃宗弄赞，乃印度阿利安人之首王西藏者。^⑥其时已称土伯特，则土伯固

① 《南史》曰：“汉永建元年，八滑从班勇击北虏有功，勇上为后部亲汉侯。自魏晋以来，不通中国。魏之居代都，滑犹为小国，属蠕蠕”云云。案两《汉书》载西域风俗皆详，车师与汉尤密。果有一妇数夫之族，附后部以居，安得一语不及？后魏孝文帝太和中，高车副伏罗部叛柔然，其酋阿伏至罗与穷奇，走前部西北自立。后穷奇为哒所杀，虏其子弥俄突。阿伏至罗亦以残为其下所杀，立其宗人跋利延。哒纳弥俄突。国人杀跋利延迎之。明帝正光中，柔然内乱，婆罗门自立。哒听弥俄突之弟还国。击婆罗门，破之。婆罗门奔魏。魏置之敦煌。哒主三妻，皆婆罗门妹也。婆罗门叛投哒，为魏所讨禽。此皆哒势力，及于金山，车师之事，然不能谓其初起于此也。

② 《西域记》之乌仗那。

③ 《西域记》云：“出铁门，至陆货逻阇。自数百年，王族绝嗣，酋豪力竞。依山据谷，分为二十七国。皆役属突厥。”此哒败亡后之情形也。

④ 蕃读如播。

⑤ 见《元史译文证补》卷一。

⑥ 见下章。

藏人种族之本号也。^①

藏族之北出者为唃哒，其留居后藏者，则南北朝时所谓女国，唐时所谓东女也。此国本名苏伐剌拿瞿咀罗。^②曰女国，曰东女，盖皆汉人称之。据玄奘《西域记》，其地在大雪山中，北距于阗，东接吐蕃，正今后藏之地也。《唐书》云：“王君康延川，岩险四缭，有弱水南流，缝草为船。”似即今怒江。又云：“东与吐蕃、党项、茂州接，东南属雅州罗女蛮，白狼夷。”则似兼有今前藏地矣。此国世以女为王，号曰宾就。女王之夫曰金聚，不知国政。王居九层之楼，侍女数百人。五日一听朝政。后有小女王，共知国事。女王死，国人以金钱数万纳王族中，求贤女二人立之。其一为小王。王死，因以为嗣。或姑死妇继。无篡夺。隋文帝开皇六年，始遣使朝贡。后绝。唐高祖武德中，其王汤滂氏，遣使入贡。高祖厚赐之。为突厥所掠，不得通。贞观中，使复至。太宗玺制抚慰。显庆初，使高霸黎文与王子三卢来朝，授右监门中郎将。其王敛臂，使大臣来请官号。武后册拜右玉钤卫员外将军。天授、开元间，王及子再来朝，诏与宰相宴曲江，封王曳夫为归昌王，左金吾卫大将军。后乃以男子为王。开元以后，史不复见。后南诏与韦皋书，言吐蕃之暴横，有云：“西山女王，见夺其位。”其殆为吐蕃所灭与？女王之位，不传之女而传之妇；后又以男子为王，则似此国王位，亦另系相承，立女特偶然之事。然南诏称为西山女王，则似其后仍立女，而以男子为王，特偶然之事者。史籍无征，未由亿断其政体矣。^③

又《唐书·南蛮传》：“名蔑，其人短小。兄弟共取一妻。妇总发为角，以辨夫之多少。”俗与唃哒同，亦必同族也。

① 今通称察木多以东为康，前藏为藏，后藏为卫。据西藏僧人所自述，则藏与康实以丹达山为界，而卫在喜马拉雅山以南，乃吐蕃盛时之疆域也。此说出《西康建省记》，考之於史，良是。丹达山以东，诚皆羌地。吐蕃盛时，喜马拉雅山南之国，固有为之臣者，泥婆罗即其一也。

② 《唐书》、《西域记》皆同。

③ 东女者，对西女言之也。西女者，西北距拂菻，西南际海岛皆女子，多珍货。附拂菻，拂菻君长，岁选男子配焉。俗生男不举。亦见《唐书》。

俗谓高原少女多男，下隍之地，少男多女，故有一妇数夫之习，此亦亿测之辞。男女妃合之制，因时因地而殊。一妇数夫之习，他族遼古之世，亦不必无之，惟呾哒则久而未变耳。呾哒之俗，“兄弟共取一妻，迭寝焉。一人入房，户外挂其衣为志。生子属其长兄。夫无兄弟者，妻戴一角帽。若有兄弟者，依其多少之数角”焉。故其世系不甚分明。“王位不必传于子弟，堪者死便受之。”《西域记》谓其亡，由“王族绝嗣，酋豪力竞”，殆亦继嗣之法不定，有以致之与？其王坐金床，随太岁转，与妻并坐接客，而无职官。则政权必出于一之义，尚未分明，行政者又无其人，可见其政治演进之浅。刑法峻急，偷盗者，无多少，皆要斩。盗一责十。弥足见其文明程度低矣。

《南史》谓呾哒事天神，^① 火神。《北史·吐火罗传》，则谓其俗奉佛。盖诸教并行，不衷于一。其葬，以木为椁。富者累石为藏，贫者掘地而埋。随身诸物，皆置塚内。父母死，子截一耳。葬讫即去。则似犹守旧俗也。

呾哒以游牧为业，多驰马，无城邑，依随水草，以毡为屋，东向开户，夏迁凉土，冬逐暖处。^② 头皆剪发，衣服类加以璆珞。其语与柔然、高车及诸胡不同，待河南人^③ 重译，然后通焉。吐谷浑与羌杂居，所谓河南人，盖羌人也。此呾哒本在后藏，地与羌接之明证。“无文字，以木为契。与旁国通，则使旁国胡为胡书，以羊皮为纸。”盖其文化皆受之西域，居后藏时无有也。

女国，“子从母姓。妇人轻丈夫，而性不妬忌。女贵者咸有待男”。盖亦行一妇数夫之制。丈夫惟务战与耕而已。此女王所由立与？然“官在外者，咸男子为之。凡号令，女官自内传，男官受而行之”。盖女系时代，曾以女为族长，其后化家为国，而此制未变，故犹立女王。然执事究以男子为优，故外官又皆用男子也。

① 即祆神，亦即所谓胡天也。

② 《唐书》云：“其国土著”盖指吐火罗一地言之。

③ 吐谷浑。

其所居皆重屋，王九层，国人六层，盖如羌族之居碉也。气候多寒，以射猎为业。然多产盐，亦能将向天竺兴贩，其利数倍。男女皆以彩色涂面，一日中或数改变。人皆披发，以皮为鞋。案寒地之人多披发，^① 则被发者藏族之故俗。𪛗𪛗之剪发，盖据西域后，化于西胡也。事阿修罗神，又有树神。岁初以人祭，或用弥猴。^② 祭毕，入山祝之。有一鸟，如雌雉，来集掌上。破其腹视之。有众粟，则年丰，沙石则有灾，谓之鸟卜。其贵人死，剥藏其皮。内骨瓮中，糝金屑瘞之。经一年，又以其皮肉，铁器埋之。

此稿成后，披阅王静庵《观堂集林》。其《西胡考》云：“《大唐西域记》十二云：于阗国尼壤城，四百余里至睹货逻故国。国久空旷，城皆荒芜。案于阗国姓，实为尉迟。而画家之尉迟乙僧，张彦《历代名画记》云：于阗人。朱景元《唐朝名画录》云：吐火罗人。是于阗与吐火罗同族，亦吐火罗曾居于阗之证。又今和阗以东大沙碛，《唐书》谓之图伦碛，^③ 今谓之塔哈马干碛，皆睹货逻碛之讹变。是睹货逻故国，在且末于阗间。”案谓吐火罗曾居于阗，又谓其故国在且末于阗间，迹近凿孔，不如予说之信而有征矣。然一尉迟乙僧，或谓于阗人，或谓吐火罗人，则足为𪛗𪛗、吐火逻是一，及𪛗𪛗为于阗异译之证。盖张彦云于阗人，犹云𪛗𪛗人耳。当时虽误译于阗为𪛗𪛗，乙僧则自知其故国中国旧译为于阗，不随时俗之讹而从其朔也。

① 见《尊族》篇。

② 此殆知用人之残忍，而以是为代。可悟进化以渐之理。

③ 原注：“《唐书·西域吐谷浑传》：李靖等军且末之西。伏允走图伦碛，将托于阗。是图伦碛在且末于阗间。”

第十三章 白 种

今日欧、亚二洲之界，为乌拉山，为乌拉河，为里海，为高加索山，为黑海。水本不足为交通之障，乌拉山脉虽长而低，高加索山虽峻而短，亦不足以阻碍往来。故分史事为东西洋二部，则其界线，非今日欧、亚二洲之界，而亚洲中央之高原也。今自波谜罗高原，东连青海、西藏、川边，实为世界最高、最崎岖之处。其北，则自新疆、蒙古，连于两海之间，为一大沙漠。南固山岭重迭，北亦举目荒凉。欧亚二洲之来往，除蛮族侵略外，殆无有焉。^①其南海道交通，却较陆地为便。然苏彝士运河未开，加之昔时航海之术不如今日之精，往来究属不便。故冒险航行者，不过商贾之流。国家使节，必旷世而后一通，而兵事更无论矣。此东西洋之史事，所由以有关系为变，无关系为常邪？史事如此，而人种之分布随之。葱岭以东，以黄人为主。葱岭以西，以白人为主。其东非无白人，其西非无黄人，然较微矣。然关系虽浅，究非绝无。我国盛时，疆理所至，盖亦跨葱岭东西，声威所届尤远。葱岭以东固有白人，其西之白人，来者亦不少，此史有明文者也。故论我国民之血统，与白人混合者，实亦不少也。

见于中国史之白人，当分数派论之：一为汉时西域诸国。西域

^① 非谓竟无，谓其事不关重要耳。自亚入欧，陆道有三：一出西伯利，为北道。一逾葱岭，为中道。一自前后印度沿海行，为南道。北道荒寒，中道险阻，南道则苏彝士地峡为之阻。故中国与大秦之交通，卒始于海也。以兵事言，中国兵力及于葱岭以外者甚少。元人虽尽臣西亚，兼据欧洲，实乃蛮族侵略性质耳。大食之强，卒不能侵犯中国。西辽既建国，命将伐金，师行万里，无所得。大石曰：“皇天勿顺，命也。”帖木儿之强，元亡于东方，遗民多归之。帖木儿欲大举伐明，中途而卒。即帖木儿不死，亦不易越沙漠而扰北边也。此皆葱岭为东西限界之证。

诸国，种族有三：（一）塞种，（二）氐羌，（三）汉族也。知西域有汉族者，《汉书·西域传》曰：“自且末以往，皆种五谷。土地、草木、畜产、作兵，略与汉同。有异乃记。”然记其异者少，不记者多，则同于汉者甚多。此必非偶然也。塞种，似即 Semites，近人译为塞米的，或译为山米。故居伊犁河流域。又有乌孙者，颜师古谓其“青眼赤须，状类猕猴”。洪文卿尝询之俄人，俄人谓此类今德意志人。^①此亦未必然。然乌孙之为白种，则无疑矣。乌孙与月氏，俱居敦煌。其昆莫难兜靡，为月氏所杀。子猎骄靡，新生。傅父抱之，亡归匈奴。匈奴单于爱养之。冒顿及老上再击破月氏。月氏击逐塞王，居其地。塞王南君罽宾。^②猎骄靡长，请于匈奴，再攻月氏，月氏败，西走，臣大夏。大夏者，西史之巴克特利亚（Bactria）也。乌孙自是居伊犁河域。张骞谓“乌孙居敦煌时故小国”，而《汉书》载其户口胜兵之数，为西域最，盖不去之塞种、月氏，皆为所抚用矣。浑邪王之降，河西地空，张骞欲厚赐乌孙，使还居故地。许妻以公主，为昆弟。时昆莫年老，国分于仲子大禄，嫡孙岑陁不能专制，又远汉，未知其大小，而臣匈奴久，其大臣又皆不欲，故谢使者。而匈奴闻乌孙通汉，怒，欲击之。乌孙恐，乃使朝，愿得尚主。汉以江都王建女细君妻之。昆莫自以年老，欲使岑陁尚主。主不可，以闻。诏从其俗。主死，复以楚王戊孙解忧妻之。岑陁卒，大禄子翁归靡立。翁归靡卒，岑陁子泥靡立。皆尚楚王。翁归靡时，匈奴欲侵陵乌孙。昆莫及主，俱以为言。宣帝为发五将军击匈奴。校尉常惠，护乌孙兵，自西方入。获畜产甚众，匈奴由此衰耗。泥靡号狂王，与主不相得。公主与汉使谋诛之。不克。其子发兵围公主及汉使，都护救之，乃解。翁归靡胡妇子乌就靡，袭杀狂王，自立。元贵靡者，翁归靡尚楚主时所生子也。汉立元贵靡为大昆弥，乌就靡为小昆弥，时出兵安定其国。元始以后，事迹乃不可知焉。《汉书》谓自“乌孙分

① 见《元史译文证补》卷二十七上。

② 克什米尔。

立两昆弥后，汉用忧劳，且无宁岁”。盖乌孙大国，汉欲借其力以制匈奴，不图转屈中国之力以事之也。

乌孙而外，大宛亦为大国。近人云：“古时希腊之民，移殖里海之北者，彼国称为耶而宛，^①即中国所谓大宛。葡萄、苜蓿亦希腊语之译音云。”^②张骞之使月氏，为匈奴所得。后亡走大宛。大宛为发译传道，抵康居。康居传致大月氏。时大月氏得沃土，志安乐，无报胡心。而骞在大夏时，见邛竹杖，蜀布。问“安得此？”大夏国人曰：“吾贾人往市之身毒。”骞以为“大夏去汉万二千里，居西南。今身毒居大夏东南数千里，有蜀物，其去蜀不远矣”。欲由蜀通大夏，不达，而汉由此开西南夷。^③其后汉求天马于大宛，不得。使李广利征之，不利。汉再发大兵征之，卒破其国。此役汉所失极多，然西域诸国，自此震惧，多遣使贡献，使子弟入侍焉。

塞王之为月氏所破也，《汉书》曰：“塞种分散，往往为数国。疏勒以西，休循，捐毒之属皆故塞种也。”又乌弋山离，“其草木、畜产、五谷、果菜、食饮、宫室、市列、钱货、兵器、金珠之属皆与罽宾同”。难兜，“亦种五谷、葡萄诸果。与诸国同属罽宾”。盖亦皆塞种矣。西域之绝也，莎车王贤，称霸诸国。妣塞王杀贤使者，贤击灭之，而立其臣。妣塞王，盖塞种之王妣水者也。《穆天子传》于一切器物，必著之曰西膜之所谓某某。西膜，盖山米异译也。《穆天子传》盖西域既通之伪书，以考周时事，殊不足用。然实可考汉时事。其述西膜之盛如此，正可见汉时塞种之盛也。^④

诸国中月氏本东方民族。然西徙后，其民实多大夏之遗。故《汉书》谓其“土地，风气，物类所有，与安息同”。^⑤安息者，西史之泊

① Ionian，即Yavanas之转音。

② Botrus Medike

③ 参看《滇族》篇。是时由川滇通藏印之道，未必遂开。邛竹杖蜀布，疑仍由粤浮海道至印度也。

④ 疏勒，今新疆疏勒县。捐毒，在疏勒之西。南与葱岭属，西上葱岭，则休循也。乌弋山离，在今阿富汗境。难兜，在今巴达克山西境。

⑤ 《北史·康国传》：“人皆深目高鼻，多须髯。”

提亚(Partnia)也。《汉书》谓其“土地,风气,物类所有,民俗与乌弋、鬲宾同”。于大宛,则云“与大月氏、安息同”,于康居,则云“与大月氏同俗”,参互观之,而诸国之为白种,可无疑矣。乌孙状貌,确为白种,而《汉书》谓其“与匈奴同俗”者,以白种诸国,均事农商,乌孙独事游牧,故云。非谓其与匈奴同种也。《汉书》又总序之云:“自宛以西至安息国,虽颇异言,然大同,自相晓知也。其人皆深目,多须髯。善市贾,争分铢。贵女子,女子所言,丈夫乃决正。”可以知其种族矣。

汉通西域,始武帝时,至王莽而绝。后汉时,班超定之。超还,任尚代为都护。以峻急失诸胡心,西域复叛。永建中,超子勇复平之。然乌孙及葱岭以西遂绝。故其兴亡多不可考。大宛,《魏书》称为者舌,特言地望言之。其种族犹是与否,不可知也。乌孙,魏时犹通使。《魏书》云:“其国数为蠕蠕所侵,南徙葱岭山中。”自隋以后,遂无闻焉。元时有钦察者,亦曰乞卜察兀,地在乌拉岭西,里海、黑海以北。俄书称其地曰波罗物次,称其种人曰波罗物齐。他国皆称之曰奇卜察克。拉施特,阿卜而戛锡云:突厥族派凡五,一为奇卜察克,与蒙古同属乌古斯汗之后。乌古斯汗与亦脱巴阿部战败,退至两河间。^①有陈亡将弁妇,怀孕临蓐,军中仓卒无产所,就空树中生子。乌古斯汗收育之,名以奇卜察克,义谓空树。越十七年,乌古斯战胜亦脱巴阿人,遂降其部。未几复叛,乃令奇卜察克往牙爱克河^②镇抚之,因以名部。西人涉猎中国史者,谓乌孙西徙葱岭后,杳不知其所之。唐初突厥所属之可萨部,即在奇卜察克之地。西书称曰哈萨儿。唐中叶后,又有他部,自东而西,哈萨儿部,被逼西徙。旧时牧地,悉属别姓。此部族即是乌孙。俄人称波罗佛次,佛次当即乌斯转音。今俄南境帖尼驳河,古名乌苏河,其入海之地,名乌速立姆那,^③当由乌孙居此,故有此称也。然所谓乌古斯汗者,中

① 未言何河。

② 今乌拉河。

③ 犹言乌孙海湾。

西古籍，咸无可征。故近世西人，多解为荒野平地之民，谓语出波斯，俄之波罗物次亦同解云。^①予案蒙古为鞑靼、沙陀之混种，沙陀为西突厥别部，俱已见前。哲别速不台之西征，其诱钦察，实有“我等同类”之说，又《元史·土土哈传》谓“其先本武平北折连川按答罕山部族。自曲出徙居西北玉里伯里山，因以为氏。号其国曰钦察。曲出生唆末纳，唆末纳生亦纳思，世为钦察国主”。则钦察与蒙古，同出突厥，说非无因。岂乌孙为柔然所逼，后又隶属突厥欤？

斡族之又一支为坚昆。唐时称黠戛斯，或曰居勿，曰结骨，曰纥骨，曰纥圻斯，皆一音之异译也。《汉书·匈奴传》，称其“东去单于庭七千里，南去车师五千里”，盖在今唐努乌梁海境。^②《唐书》云：“地当伊吾之西，焉耆西北，白山之旁。”又云：“直回纥西北三千里，南依贪漫山。”又云阿热驻牙青山。青山之东，有水曰剑河，偶艇以度。水悉东北流，经其国，合而北，入于海。”又曰“徙牙牢山之南，牢山，亦曰赌满，距回鹘旧牙，度马行十五日”。案贪漫、赌满。同音异译，皆即今之唐努山。剑河，即《元史》之谦河，今叶尼塞上源之华克穆河也。^③黠戛斯人种甚杂。《唐书》称“其人皆长大，赤发，斫面，绿瞳”。此本为白种之征。又云：“其种杂丁令，其文字语言，与回鹘同。”又列结骨为铁勒十五部之一，则于丁令相杂矣。丁令久属匈奴，匈奴封李陵为右贤王，盖即王其部落。故其人至唐时，尚自以为陵后。《唐书》称其“以黑发为不祥。黑瞳者，必曰陵苗裔也”。“景龙中，献方物。中宗引使者劳之曰：‘而国与我同宗，非它落比。’既破回鹘，得太和公主，自以李陵后，与唐同宗，遣使者达干，奉主来归。会昌中，诏阿热著宗正属籍。”其果为陵后与不可知，而其人自谓陵后，则不虚矣。今俄人称哈萨克曰乞儿吉思，谓语出回纥。乞儿义为

① 以上据《元史译文证补》。

② 略当车师正北。

③ 详见《元史译文证补》卷二十六。

四十，吉思义为女，古时匈奴以汉地四十女嫁夫居此，故蒙是称。亦其与汉族相杂一旁征也。

坚昆自汉至隋，无所表见。唐时，为突厥所羁制。突厥以女妻其酋豪。后又隶薛延陀以颉利发一人监焉。贞观时，其酋长三人：曰訖悉辈，曰居沙波，曰阿米辈，共治其国。二十一年，闻铁勒入臣，即遣使献方物。其酋俟利失觐屈阿栈，身入朝。^①以其地为坚昆府，隶燕然都护。乾元中，为回纥所破。自是不能通中国。回纥授其阿热官毗伽顿颉斤。回纥稍衰，阿热即自称可汗。回纥遣宰相伐之，不胜。挐斗二十年不解。而其将句录莫贺作难，导阿热，阿热遂得破杀回纥可汗。然未尝徙居其地，故其后事迹不可知。元时谓之吉利吉思，亦作乞儿吉速。地在也儿的石河，今额尔齐斯河也。又有乃蛮者，亦作乃满，又作乃马。其部长曰亦难赤可汗。生二子，长曰太赤不哈，是为塔阳可汗。次曰古出古敦，是为不亦鲁黑汗。兄弟交恶，分国而治。塔阳居金山之阳，忽里牙速兀札八儿二水间，南近沙漠。不亦鲁黑居兀鲁黑塔黑之地，北近金山。忽里牙速兀，即今乌里雅苏台河，札八儿，今匝盆河也。兀鲁黑塔黑未详。然云北近金山，则亦当在今科布多、乌梁海境。《元史·地理志》谓乃蛮本居吉利吉思之地。而当时漠北诸族，惟乃蛮奉也里可温教，最为洁清，可知其为黠戛斯之后矣。清世亦称哈萨克。分三部：左曰鄂尔图玉斯，行国。中曰齐齐玉斯，西曰乌拉玉斯，皆居国。地界乌梁海、塔城、伊犁之间。西人仍称之为吉利吉思。^②乾隆时尝内附，授所部以王公台吉等爵，定三年一贡，岁一互市于乌鲁木齐。

《唐书》云：“吐蕃，本西羌属，居析支水西。祖曰鶻提勃悉野，健武多智，稍并诸羌，据其地。蕃发声近，故其子孙曰吐蕃，而姓勃罕野氏。或曰南凉秃发利鹿狐之后，二子，曰樊尼，曰傉檀。傉檀嗣，为乞伏炽磐所灭。樊尼挐残部臣沮渠蒙逊。以为临松太守。蒙逊

① 《唐书》云：“其君名阿热，遂姓阿热氏。”阿栈，似即阿热异译。

② 左部曰大吉利吉思，中部曰中吉利吉思，西部曰小吉利吉思。

灭，樊尼率兵西济河，逾积石，遂抚有群羌云。”此二说求之藏人所述，羌无左证。且其地仅在河源积石一带，距吐蕃赞普所居之逻娑川，^①尚千里也。盖中原王朝前此兵威所加，使译所及，传闻所得，极于河源内外。自此以往，实非所知。鶻提勃悉野及秃发樊尼，固实有其人，其兼并群羌，亦必实有其事。然与吐蕃实风马牛不相及。特当时所知羌中故实，以此为最远，故遂从而附会之耳。

考西藏地方历史，自当以藏族所自述者为据。惜藏文史籍，译成汉文者，仅《蒙古源流考》之前半耳。今姑据以为证。《源流考》云：“巴特沙拉国乌迪雅纳汗生一子，善占之必喇满占之，曰：此子剋父，必杀之。而锋刃利器，皆不能伤。乃贮以铜匣，弃之恒河中。外沙里城附近种地老人收养之。长，告以前事。此子遂向东边雪山而去。至雅尔隆赞唐所有之四户塔前，众共尊为汗。时岁次戊申、戊子后千八百二十一年也。是为尼雅特赞博汗。胜四方部落，为八十八万土伯特国王。尼雅特赞博汗生穆特赞博汗，穆特赞博汗生定持赞博汗，定持赞博汗生索特赞博汗，索特赞博汗生墨尔特赞博汗，墨尔特赞博汗生达克特赞博汗，达克特赞博汗生色哩特赞博汗，色哩特赞博汗生智固木赞博汗，为奸臣隆纳木所弑。^②其长子冒特，逃往宁博地方。次子博啰咱，逃往包地方。三子布尔特齐诺，逃往恭布地方。隆纳木据汗位一载，旧日数大臣诛之，迎立博啰咱。是为布迪恭嘉勒汗。布迪恭嘉勒汗生噜勒噶凌，噜勒噶凌生库噜木凌，库噜木凌生实勒玛凌，是称六贤汗，^③实勒玛凌生德噜开木松，德噜开木松生迪斯巴勒。迪斯巴勒生迪米雅，迪米雅生萨喇特纳穆，萨喇特纳穆生苏幹，苏幹生萨琳嘉勒灿，萨琳嘉勒灿生洞哩洞剪，此为衍庆七汗。洞哩洞剪生都克迪都克灿，都克迪都克灿生持托克哲赞，持托克哲赞生拉托哩年赞，拉托哩年赞生持年松赞，

① 今拉萨。

② 后文又云：“尼雅特赞博汗之七世孙色尔特赞博汗，为其臣隆纳木所弑。”

③ 似夺二汗之名。

持年松赞生达克哩年资克，达克哩年资克生纳木哩苏隆赞 是为妙音七汗。^① 纳木哩苏隆赞生名哩勒丹苏隆赞，名哩勒丹苏隆赞，以丁丑年生，实戊子后二千七百五十年。年十三岁，己丑，即汗位”，案名哩勒丹苏隆赞，即《唐书》之弃宗弄赞。其即位之年己丑，为唐太宗贞观三年。其生年丁丑，为隋炀帝大业十三年。是岁为戊子后二千七百五十年，则上溯尼雅特赞博汗始王土伯特之戊申，为戊子后千八百二十一年者，实为周赧王二年矣。《源流考》之年代，固全不足据，然其事实，则考之他书，多有证验，固不能尽指为虚诬也。^②

《唐书》述弃宗弄赞世系云：“其后有君长曰痕悉董摩。董摩生陀土度，陀土生揭利瑟若，揭利生勃弄若，勃弄生诃素若，诃素生论赞素，论赞生弃宗弄赞。亦名弃苏农，亦号弗夜氏。”此说与前两说绝不相蒙，可见前两说之无据矣。^③ 弃宗弄赞，以贞观八年，遣使来朝，求婚，不许。使者归，妄谓吐谷浑间之。弃宗弄赞怒，发兵攻吐谷浑。吐谷浑不能抗，走青海之阴。遂破党项、白兰、勒兵二十万，入寇松州。^④ 侯君集击破之，乃去。旋使来谢罪，固请婚。以宗女文成公主妻之。自此事中国甚谨。永徽初，卒。无子，立其孙。^⑤ 幼不事政。宰相禄东赞专其国。禄东赞卒，子钦陵，居中用事。赞婆、悉多干、勃论，皆专方面兵。而赞婆专东境几三十年，大为边患。仪凤四年，赞普死，子器弩悉弄立。^⑥ 既长，欲自得国，杀钦陵。南方属帐多叛。赞普自讨，卒于军。子弃隶缩赞立，始七岁。^⑦ 吐蕃当高宗

① 亦仅六汗。

② 布尔特齐诺，即《元秘史》之孛儿帖赤那，乃蒙古奇渥温氏之祖。此人之年代，似不能在弃宗弄赞以前，此亦《源流考》年代不足据之一证也。

③ 此所述，盖真吐蕃赞普世系。德宗时，赞普乞力赞，姓卢提氏，亦不姓勃率野氏也。

④ 今四川松潘。

⑤ 《源流考》曰：“赞普年八十二卒。长子莽苏陇前卒。次子恭苏陇立，年十四。

⑥ 《源流考》：“恭苏陇卒，遗腹子对苏陇生，即嗣位。”观《唐书》长欲得国之言，可知其即位时年尚幼。

⑦ 《源流考》：对苏陇之后，为哩勒丹祖克丹汗。即位时二岁。

时，尽破诸羌，又取四镇，^①破茂州西之安戎城，疆域抵西洱河。武后时，王孝杰复四镇。钦陵寇临洮，又不胜。钦陵死，乃请和。中宗以雍王守礼女金城公主妻隶缩赞。吐蕃请河西九曲地，为公主汤沐邑。许之，且许筑桥河上，以通往来。由是河洮之间，被寇无宁岁。玄宗立，乃复之。安祿山反，河西陇右尽为吐蕃所陷。代宗时，至入长安，立广武王承宏为帝焉。时则畿辅岁见侵掠。德宗立，乃请和。已而请助讨朱泚。约事平界以泾、灵等四州。吐蕃兵疫作，辄引去。其后顾求地。德宗赐以帛万匹。吐蕃怒，遂为寇。久之，其赞普达磨，^②嗜酒，好猎，喜内，凶愎少恩，稍衰。武宗会昌二年，卒。无子，以妃琳氏兄子嗣。方三岁。别将尚恐热杀宰相，自为之。以兵攻鄯州节度使尚婢婢。^③尚婢婢来降，唐乘之复河湟，时宣宗世也。自是之后，吐蕃衰，其事多不可见。

吐蕃盛时，疆域殊广。西藏僧人谓卫地在喜马拉雅山之南，已见前篇。今案吐蕃赞普治逻娑川，即今拉萨，其地已在西藏南境。而《唐书》谓器弩悉弄以讨南方之叛卒于军，其所谓南方，必在印度无疑矣。高宗时，吐蕃既破吐谷浑、党项、白兰，又取安戎城，破诸羌，羁縻州十有八，其疆域抵西洱河，实苞今西康及云南，四川之鄙。王孝杰复四镇，玄宗时，吐蕃欲假道勃律以取之。勃律者《魏书》之波路，《西域记》作钵露罗，在迦湿弥罗之北，^④今印度之本治城也。武后时，吐蕃求与中国分十姓可汗地。^⑤《唐书·大食传》谓“贞元中与吐蕃相攻。吐蕃岁西师，故鲜盗边”。可见其在西域之威凌矣。

以上所述白种，虽与中原关系较疏，然其与中华民族相混合者，实亦不少。冉闵之诛胡羯也，史称“高鼻多须，或致滥死”。夏曾

① 龟兹，于阗，疏勒，碎叶。玄宗时，西突厥十姓可汗请居碎叶，乃以焉耆备四镇。碎叶川，今吹河也。

② 《源流考》之达尔玛。

③ 鄯州，相当今青海西宁、湟中、乐都等地。

④ 迦湿弥罗今克什米尔。

⑤ 西突厥地。参看第四章。

佑因疑匈奴之形状，为高鼻多须。非也。匈奴自是黄人，所谓高鼻多须，乃西域之白种人，随匈奴入中原者耳。《北史·粟特传》：“其国商人，先多诣凉土贩货。魏克姑臧，悉见虏。”此其商人之混杂中土者也。比外佛教，火教等传教之徒，遂留中国者，当亦不少。

此诸白种，风俗亦各不同。然大率承袭欧洲之文明。亦颇能传之中国。以生业言，则汉时西域，氐羌为行国，而塞种为居国。《汉书》述罽宾等之俗，谓其能艺五谷、葡萄、诸果，粪治园田。雕文刻镂，织罽，刺文绣，治宫室，有市列，以金银为钱。据近今治植物学者言，则中国植物，传自西域者实不少云。汉武帝征和中，桑弘羊与丞相御史奏言：“屯田轮台以东，其傍国少锥刀，贵黄金采繒，可以易谷食。”成帝时，康居遣子侍汉贡献。都护郭舜钦上言：“康居骄黠，讫不肯拜使者。都护吏至其国，坐之乌孙诸天下。王及贵人先饮食已，乃饮啖都护吏。故为无所省，以誇旁国。以此度之，何故遣子入侍？其欲贾市，为好辞之诈也。”罽宾杀汉使，遣使谢罪。杜钦谓“无亲属贵人贡献，皆行贾贱人，欲通货市买，以献为名”。又述道路之险，谓“历大头痛、小头痛之山，赤土身热之阪，令人身热无色，头痛呕吐，驴畜尽然。又有三池盘石。阪道陜者尺六七寸，长者径三十里，临峥嵘不测之深。行者骑步相持，绳索相引。二千余里，乃到县度。畜队未半坑谷，尽糜碎。人堕，势不得相收视。险阻危害，不可胜言”。而贾市之徒，能数岁而一至，亦可谓难矣。此等固皆为利，然文明之传播，实利赖之。《北史·大月氏传》：“太武时，其国人商贩京师，自云能铸石为五色琉璃。于是采矿山，于京师铸之。既成，光泽乃美于西方来者。乃诏为行殿，容百余人。光色映彻。观者见之，莫不惊骇。自此国中琉璃遂贱，人不复珍之。”此等事当尚不少，此特其一端也。

中国文化，亦当有传播西域者。惜乎不可尽考。《汉书》云：“自宛以西，不知铸铁器。及汉使，亡卒降，乃教铸作它兵器。”即此一

端，其关系可谓绝大。^①然其与汉，初不甚亲。《汉书》云：“自乌孙以西至安息，近匈奴。匈奴尝困月氏，故匈奴使持单于一信到国，国传送食，不敢留苦。及至汉使，非出币物不得食，不市畜不得骑，所以然者，以远汉，而汉多财物，故必市乃得所欲”云。

汉时西域白人，盖皆希腊殖民之裔，故其俗颇文明。至其近于游牧者则不然。《唐书·黠戛斯传》：“昏嫁纳羊马以聘，富者或百千计。法最严，临陈桡，奉使不称，妄议国，若盗者，皆断首。子为盗，以首著父颈，非死不脱。”皆北狄野蛮之俗也。^②

吐蕃多羌俗。其刑：虽小罪，必抉目，或刖劓。以皮为鞭挞之，从喜怒，无常算。其狱，窟地深数丈，内囚于中，二三岁乃出。^③贵壮贱弱。母拜子，子倨父。出入，前少而后老。重兵死，以累世战没为甲门。败懦者，垂狐尾于首，示辱，不得列于人。其居父母丧，断发，黛面，黑衣，既葬而去。其葬，为冢，暨涂之。其君臣，自为友，五六人曰共命。君死，皆自杀以殉。所服玩乘马皆瘞。起大屋冢颠，树众木，为祠所。钦陵之自杀，左右死者百余。祠羴羴为大神。赞普与其臣，岁一小盟。用羊犬猴为牲。三岁一大盟，夜肴诸坛，用人马牛驴为牲。凡牲，必折足裂肠，陈于前。使巫告神曰：“渝盟者，有如牲。”盖多羌俗，而用人及猴为牲，则似又藏族之俗也。其生业，能植小麦、青稞麦、荞麦、豇豆。然究以游牧为主，逐水草，无常所。衣率毡韦。赞普联毳帐以居，号大拂庐，容数百人，部人处小拂庐云。

吐蕃兵力之强，盖由所用之众故勇悍，而又以严法驭之也。《唐书》称其“兵法严而师无馈粮，以卤获为资。每战，前队尽死，后队乃继。其举兵，以七寸金箭为契。百里一驿。有急，驿人隐前加银鹞。甚

① 桑弘羊谓轮台以东，椎刀可易谷食，则重铁器者，正不独自宛以西。然此非必不知铸作，但苦无铁，或铸作不便耳。

② 又曰“丧不剃面，三环尸哭，乃火之，收其骨，岁然后墓”。此盖出于教律，非其故俗也。

③ 《源流考》谓名哩勒丹苏隆赞始定刑法，盖多仍羌俗。

急，鹞益多。告寇举烽。其传骑曰飞鸟使”。可见其戒备之夙，节制之严矣。其铠冑，“衣之周身，穹两目，劲弓利刃，不能甚伤”。其胜兵数十万，尤能收用客族。沙陀、南诏之服，皆以其人为前锋。初盗塞，畏春夏疾疫，尝以盛秋。德宗时，得唐俘，厚给资产，而质其孥，虽盛夏，亦入边矣。

西藏文明与佛教关系至深。首以佛教入西藏者，则文成公主也。《唐书》云：弃宗弄赞既尚主，为主筑一城，以誇后世。遂立宫室以居。国俗赭面，公主恶之。赞普为下令国中禁之。自赭毡罽，被纨绡，为华风。其慕效中国盖甚切。然吐蕃去印度近，其人又本自印度来，故其文化，究以传诸印度者为多。唐时吐蕃常遣人入国学习诗书，又请儒者典章疏，弃隶缩赞使来请《五经》，皆见于《唐书》。然其文字卒仿效印度，其所信佛教，亦以来自印度者为盛，即所谓喇嘛教也。

封面设计：陶雪华

中国学术丛书

中国民族史

吕思勉 著

中国大百科全书出版社出版发行

（上海古北路 650 号）

新华书店上海发行所经销 上海海丰印刷厂印刷

开本 850×1156 毫米 1/32 印张 7.875 插页 6 字数 191,000

1987 年 11 月第 1 版 1987 年 11 月第 1 次印刷

印数：1—13,000

ISBN 7—5000—0016—2 / D·1

定价：（精）3.10 元 （平）2.00 元



